

केशव-ग्रंथावली

[खंड १]

सम्पादक

विश्वनाथ प्रसाद मिश्र

हिंदु स्तानी एकेडेमी

उत्तर प्रदेश इलाहाबाद

केशव-ग्रंथावली

खंड १

[रसिकप्रिया और कविप्रिया]

संपादक

श्री विश्वनाथप्रसाद मिश्र

हिंदी-विभाग, काशी विश्वविद्यालय



हिन्दुस्तानी साहित्य अकादमी
इलाहाबाद

प्रथम संस्करण : १९५४

द्वितीय संस्करण : १९७७

तृतीय संस्करण : १९९०

मूल्य : चालीस रुपये

प्रकाशक : हिन्दुस्तानी एकेडेमी

इलाहाबाद

मुद्रक : श्री विष्णु आर्ट प्रेस

इलाहाबाद

प्रकाशकीय

ब्रजभाषा काव्य को केशव की सबसे बड़ी देन यह है कि उन्होंने काव्य के शास्त्रीय पक्ष को कवि-शिक्षा की दृष्टि से सम्पूर्णता के साथ ग्रहण किया और व्यापक रूप से लक्षण, उदाहरण, परम्परा का साहसपूर्ण स्थापन किया जिसकी परम्परा हिन्दी साहित्य में शताब्दियों तक चलती रही। उनसे पूर्व और उनके समकालीन कुछ कवि ऐसे थे जिन्होंने इस परम्परा का अनुसरण किया, परन्तु केशव की प्रतिभा के आगे वे निस्तेज हो गये। पद-साहित्य की गेय परम्परा से हट कर केशवदास ने मुक्तक, प्रबन्ध तथा इतर लोकप्रिय काव्य-रूपों का अपनी कविता में सम्यक् प्रयोग किया। काव्येतर कलाओं का भी उन्हें पर्याप्त ज्ञान था। उन कलाओं में संगीत और चित्रकला को वरीयता मिली है। उनकी रचनाओं में 'रसिकप्रिया' स्वयं चित्रकारों को विशद प्रेरणा देती रही। यद्यपि केशवदास अलंकारवादी माने जाते हैं, तथापि 'रसिकप्रिया' उनकी सरसता का अद्वितीय प्रमाण है। 'रामचन्द्रिका' में अवश्य ऐसे कुछ प्रसंग हैं जिनके कारण शुक्ल जी को उनकी हृदयहीनता सर्वोपरि लगने लगी, परन्तु यह बात यथार्थ नहीं है। 'रामचरितमानस' की तुलना में 'रामचन्द्रिका' अवश्य वैसी लोकप्रियता अर्जित नहीं कर सकी, किन्तु उसके संवाद व्यापक रूप से लोकप्रिय हुए—मध्यदेश की राम-लीला इसका प्रमाण है। केशवदास का प्रभाव हिन्दी कवियों पर ही नहीं पड़ा, वरन् पंडितराज जगन्नाथ जैसे उद्भट आचार्य भी स्वनिर्मित उदाहरणों की परम्परा को गौरवशाली मानने लगे। उनकी गर्वोक्ति रीति-परम्परा से प्रेरित प्रतीत होती है। संस्कृत में तो दंडी जैसे कुछ ही आचार्यों ने स्वरचित उदाहरणों का उपयोग किया है, किन्तु हिन्दी में केशवदास उनके कीर्तिमान बन गये। वस्तुतः काव्यशास्त्र 'भाषा' को 'देवभाषा' से जोड़ने का उपक्रम था। कवि राजसभा में सम्मान पाने के लिए आचार्यत्व ग्रहण करते थे, किन्तु मूल प्रवृत्ति उनकी कविता रचकर अपनी प्रतिभा प्रदर्शित करने की थी।

केशवदास ने अपने युग तक प्रचलित कवि-समर्थों, वर्णकों, शैलियों तथा भाषा-काव्य की इतर प्रवृत्तियों को संस्कृत काव्यशास्त्र के आलोक में अतिरिक्त समृद्धि प्रदान करते हुए प्रस्तुत किया है।

उनका साहित्यिक योगदान काव्य के नागर पक्ष को विशेष रूप से उजागर करता है, फिर भी उसके भीतर ग्रामीण भाव-सौन्दर्य तथा लोकरूपों का भी समावेश मिलता है। केशवदास अपने वंश की पौराणिक परम्परा और संस्कृत पाण्डित्य के आगे, देवभाषा के सामने लोकभाषा में काव्य-रचना गौरवपूर्ण नहीं मानते थे। किन्तु अपने जीवन-काल में ही उन्होंने अपनी इस हीन भावना से ऊपर उठकर जो कविता लिखी है, उसने उन्हें अमृतपान के समय स्वर्गाङ्गनाओं से

अधरासवपान की याद दिला दी। 'केसव केसन अस करी' वाला दोहा भी उनकी सरसता का ही प्रमाण है यद्यपि वह उनके किसी ग्रंथ में मिलता नहीं।

संस्कृत के आनन्दवर्द्धन, अभिनवगुप्त, मम्मट और विश्वनाथ आदि आचार्यों के समकक्ष न होकर भी वे हिन्दी में आचार्यत्व के संवाहक बने, इसमें कोई संदेह नहीं। ओरछा में भग्नावशेष भवन की देहली को बहुत से कवि अपनी जीभ से स्पर्श करते देखे गये हैं, यह बात मुझे कभी नहीं भूलेगी। प्रवीणराय से उनका सम्बन्ध कितना गौरवपूर्ण था, यह उनके द्वारा सरस्वती से उसकी उपमा देने से प्रकट हो जाता है। कवि और आचार्य ही नहीं, वे राजगुरु भी थे और युद्धों में भी सम्मिलित हुए थे। दिल्ली जाकर बीरबल के द्वारा अकबर से अपने राज्य की प्रतिष्ठा की रक्षा करने में उनका योगदान असाधारण ही माना जायेगा। ओरछा राज्य में, जहाँगीर को विद्रोही होकर भी, शरण मिली, इसमें केशवदास भी सम्मिलित थे। इस प्रकार केशव का व्यक्तित्व और कृतित्व दोनों ही अविस्मरणीय हैं। 'सूर सूर तुलसी ससि' वाले दोहे में 'उडगण केशवदास' कहकर उनका नाम उस वर्ग के समस्त कवियों के प्रतिनिधि रूप में लिया गया है। केशव का यह प्रतिनिधि रूप उनसे विच्छिन्न नहीं किया जा सकता। कवि और आचार्य के बीच संतुलन बनाये रखने की उन्होंने अद्वितीय चेष्टा की। उनकी असफलता भी स्मरणीय बन गयी है और उसने प्रतीकात्मक रूप ग्रहण कर लिया है।

उनके काव्य में युगीन परिवेश का विशद, सूक्ष्म, वास्तविक और विश्वसनीय निरूपण हुआ है। उसकी ऐतिहासिक प्रामाणिकता भी प्रायः असंदिग्ध है। केशव की मान्यता का यह अतिरिक्त पक्ष नये अन्वेषकों को प्रेरित करेगा। कविरूप में मैं भी केशव से देव को बड़ा मानता हूँ, किन्तु जो ऐतिहासिक कार्य केशव ने किया है, वह अप्रतिम है। छंद-वैविध्य की दृष्टि से कदाचित् कोई भी कवि उनकी समानता नहीं कर सकता। 'केशव की कविताई' में अज्ञेय जी ने उनकी प्रयोग-शीलता को रेखांकित किया है। सही शब्द की खोज उनकी कविता में 'सुबरन' की खोज बन गयी।

आचार्य पं० विश्वनाथप्रताप मिश्र ने जितनी अतल दृष्टि से केशवदास की रचनाओं का संपादन किया है, वह उनकी विस्तृत भूमिका से स्वतः स्पष्ट हो जाता है। यह भूमिका केशवदास को पुनर्प्रतिष्ठा का संकल्प लेकर लिखी गयी थी - ऐसा मुझे लगता है, क्योंकि बिना निष्ठा के ऐसा कठिन संकल्प चरितार्थ नहीं किया जा सकता, जैसा 'केशव-ग्रंथावली' के रूप में हुआ है। आचार्य मिश्र ने केशव की जीवनी, उनके पाण्डित्य, उनकी रचना-दृष्टि, उनका परम्परा-बोध तथा अलंकारवादिता को जिस रूप में उजागर किया है, वह किसी और के द्वारा संभव नहीं था। हिन्दुस्तानी एकेडेमी द्वारा तीन खण्डों में उसका प्रकाशन फिर किया जा रहा है। दो संस्करण समाप्त होने के बाद तीसरे संस्करण के प्रकाशन की बहुत समय से प्रतीक्षा थी। विद्वानों को इसके प्रकाशन से परितोष होगा और काव्य-मर्मज्ञों

को पुनर्विचार के लिए आधार भी मिल जायेगा । दिल्ली की साहित्य एकेडेमी ने मुझे केशवदास पर परिचयात्मक पुस्तक लिखने का दायित्व दिया था । उस समय मुझे आचार्य मिश्र द्वारा संपादित इस ग्रंथावली की महत्ता का विशेष अनुभव हुआ ।

हिन्दुस्तानी एकेडेमी की एक योजना रही है कि हिन्दी के प्रमुख कवियों की समस्त रचनाओं के ऐसे संस्करण प्रकाशित किये जायँ जिनके पाठ यथासंभव प्रामाणिक एवं सुसंपादित हों । मेरे गुरुवर डॉ० धीरेन्द्र वर्मा जी ने इसी योजना के अन्तर्गत 'जायसी-ग्रंथावली' तथा 'तुलसी-ग्रंथावली' के बाद 'केशव-ग्रंथावली' का प्रकाशन किया । वे भी मानते हैं कि आचार्य केशवदास हिन्दी की विभूति हैं । उनके प्रति श्रद्धा का भाव व्यक्त करते हुए मैं अपने को गौरवान्वित मानता हूँ कि यह प्रकाशन मेरे कार्यकाल में हो रहा है ।

जगदीश गुप्त
सचिव तथा कोषाध्यक्ष

प्रथम संस्करण का प्रकाशकीय

हिन्दुस्तानी एकेडेमी की एक योजना रही है कि हिंदी के प्रमुख कवियों की समस्त रचनाओं के ऐसे संस्करण प्रकाशित किए जाएँ जिनके पाठ यथासंभव प्रामाणिक तथा सुसंपादित हों। इस योजना के अंतर्गत एकेडेमी से 'जायसी-ग्रंथावली' तथा 'तुलसी-ग्रंथावली' (खंड १) का प्रकाशन हो चुका है। अब 'केशव-ग्रंथावली' (खंड १) इस क्रम की नई कड़ी के रूप में पाठकों के समक्ष है।

'केशव-ग्रंथावली' का संपादन अधिकारी विद्वान् श्री विश्वनाथप्रसाद मिश्र ने अनेक नई और पुरानी छपी तथा हस्तलिखित पोथियों के आधार पर किया है जिसमें 'रसिकप्रिया', 'कविप्रिया', 'रामचंद्रचंद्रिका', 'छंदमाला', 'शिखनख', 'रतनबावनी', 'वीरसिंहदेवचरित', 'जहाँगीरजसचंद्रिका' तथा 'विज्ञानगीता'—ये नौ रचनाएँ सम्मिलित हैं। पूरी ग्रंथावली के तीन खंडों में प्रकाशन का आयोजन है। इस खंड में केशव की दो रचनाएँ 'रसिकप्रिया' और 'कविप्रिया' प्रस्तुत हैं।

आचार्य और कवि केशवदास हिंदी की विभूति हैं। दुःख है कि अभी तक इनके ग्रंथों का सुसंपादित संस्करण प्रकाश में नहीं आ सका था। आशा है, प्रस्तुत ग्रंथावली के संपूर्ण होने पर हिंदी के एक बहुत बड़े अभाव की पूर्ति होगी।

हिन्दुस्तानी एकेडेमी,
उत्तर प्रदेश, इलाहाबाद
सितंबर, १९५४

}

धीरेंद्र वर्मा
मंत्री तथा कोषाध्यक्ष

दूसरे संस्करण का प्रकाशकीय

हिन्दी के अधिकारी विद्वान् आचार्य श्री विश्वनाथप्रसाद मिश्र के इस ग्रन्थ 'केशव-ग्रंथावली' का दूसरा संस्करण प्रकाशित करते हुए हमें प्रसन्नता हो रही है। हिन्दुस्तानी एकेडेमी ने इस ग्रन्थ का पहला संस्करण सन् १९५४ में प्रकाशित किया था।

यह ग्रन्थ कई विश्वविद्यालयों के पाठ्यक्रम में निर्धारित है। विश्वास है, यह संस्करण भी विद्वज्जनों, विद्यार्थियों और सुधी पाठकों के बीच समादृत होगा।

जुलाई, १९७७

उमाशंकर शुक्ल
सचिव तथा कोषाध्यक्ष

ग्रंथ-सूची

१. रसिकप्रिया

१—६३

२. कविप्रिया

६४—२२८

संकेत

रसिकप्रिया

बाल०—बालकृष्णदासजी (ग्रंथस्वामी) का हस्तलेख, सं० १७२२ ।

बाल० खं०—बालकृष्णदासजी का खंडित हस्तलेख, पुष्पिका खंडित ।

रस०—रसगाहकचंद्रिका का हस्तलेख, टीकाकार सूरति मिश्र, १७६० के आसपास निमित्त ।

नवल०—नवलकिशोर प्रेस की मुद्रित प्रति, टीकाकार सरदार कवि, सं० १६०३ में निमित्त ।

कविप्रिया

बाल०—बालकृष्णदासजी का हस्तलेख, सं० १७२४ ।

याज्ञिक०—याज्ञिक-संग्रह (काशी नागरी प्रचारिणी सभा) का हस्तलेख, सं० १७५८ ।

याज्ञिक अ०—याज्ञिक-संग्रह का अपूर्ण हस्तलेख, लिपिकाल अज्ञात ।

सहज०—सहजरामचंद्रिका का हस्तलेख, टीकाकार राम कवि, सं० १८३४ में निमित्त ।

हरि०—हरिचरणदास की कविप्रियाभरण टीका (मुद्रित), सं० १८३५ में निमित्त ।

लाला०—लाला भगवानदीनजी का हस्तलेख, लिपिकाल अनुल्लिखित ।

सरदार०—सरदार कवि की टीका (मुद्रित), सं० १६११ में निमित्त ।

दीन०—दीनजी की प्रियाप्रकाश टीका, सं० १६८२ में मुद्रित ।

रत्ना०—रत्नाकरजी द्वारा सं० १७२४ के हस्तलेख से संपादित 'नखशिख' (मुद्रित) ।

अन्यत्र—अन्य संग्रहादि के हस्तलेख ।

वही—पूर्वगामी संकेत ।

पृ—ख ।

रसिकप्रिया

१

अथ मंगलाचरण

श्रीकृष्ण-बंदना—(छप्पय)

एक-रदन, गजबदन, सदनबुधि, मदन-कदन-सुत ।
गौरि-नंद आनंद-कंद, जग-बंद, चंद-युत ।
सुख-दायक, दायक-सुकीर्ति, जगनायक-नायक ।
खल-घायक, घायक-दरिद्र सब लायक-लायक ।
गुरु-गुन अनंत, भगवंत-भव, भनितवंत भव-भय-हरन ।
जय केसवदास निवास-निधि, लंबोदर, असरन-सरन ॥ १ ॥

श्रीकृष्ण बंदना—(छप्पय)

श्रीवृषभानु-कुमारि-हेतु सृंगार-रूप भय ।
बास हास-रस हरे, मातु-बंधन करुणामय ।
केसी-प्रति अति रौद्र, बीर मारो बत्सामुर ।
भय दावानल-पान, पियो बीभत्स बकी-उर ।
अति अदभुत बचि बिरंचि-मति, सांत संततै सोच चित ।
कहि केसव सेबहु रसिक जन, नवरसमय ब्रजराज नित ॥ २ ॥

अथ कवि-वर्णन—(दोहा)

नदी बेतवै-तीर जहँ, तीरथ तुंगारन्य ।
नगर ओड़छो बहु बसै, धरनीतल में घन्य ॥ ३ ॥
आसम चारि बसे जहाँ, चारि बर्न सुभ कर्म ।
जप, तप, विद्या वेद-बिधि, सबै बड़े धन धर्म ॥ ४ ॥

[१] गौरि-गवरि (रस०) । युत-युत (रस०) । दायक-दाइक (रस०) । सुकीर्ति-सुकृति (रस०) । जग-गण (रस०) । गुरु-गुन-गुन-गन (रस०) ।

[२] रौद्र-रुद्र (रस०) । मारो-मारथी (रस०) । पियो-कियो (रस०) । संततै-ससंतत (रस०) । [३] जहँ-तहँ (रस०) । [४] बसे-बसै (रस०) ।

दिन प्रति जहँ दूनो लहैं, जहाँ दया अरु दान ।
 एक तहाँ 'केसव' सुकवि, जानत सकल जहान ॥ ५ ॥
 अपने अपने धर्म तहँ सबै सदा सुखकारि ।
 जासों देस विदेस के रहे सबै नृप हरि ॥ ६ ॥
 रच्यो बिरंचि बिचारि तहँ, नृपमनि मधुकर साहि ।
 गहरवार कासीस-रवि, कुल-मंडन जसु जाहि ॥ ७ ॥
 ताको पुत्र प्रसिद्ध महिमंडन दूलहराम ।
 इद्रजीत ताको अनुज, सकल धर्म को धाम ॥ ८ ॥
 दीन्ही ताहि नृसिंह जू तन मन रन जय सिद्धि ।
 हित करि लच्छन-राम ज्यों भई राज की वृद्धि ॥ ९ ॥
 तिन कवि केसवदास सों कीन्हो धर्म-सनेहु ।
 सब सुख दै करि यों कह्यो, 'रसिकप्रिया' करि देहु ॥ १० ॥
 संबत सोरह सै बरष बीते अठतालीस ।
 कात्तिग सुदि तिथि सप्तमी बार बरनि रजनीस ॥ ११ ॥
 अति रति-गति मति एक करि, बिबिध बिबेक बिलास ।
 रसिकन कों रसिकप्रिया कीनी केसवदास ॥ १२ ॥
 ज्यों बिनु डोठि न सोभिजै लोचन लोल बिसाल ।
 त्यों हो 'केसव' सकल कवि, बिनु बानी न रसाल ॥ १३ ॥
 तातें रुचि सों साचि पचि कीजै सरस कवित ।
 'केसव' स्याम सुजान को, सुनत होइ बस चित्त ॥ १४ ॥

अथ नवरस-वर्णन—(दोहा)

प्रथम सिंगार सुहास्य-रस करुना-रुद्र सुवीर ।
 भय बीभत्स बखानिये अद्भुत सात सुवीर ॥ १५ ॥
 नवहू रस के भाव बहु, तिनके भिन्न बिचार ।
 सबको 'केसवदास', हरि नायक है सुंगार ॥ १६ ॥

अथ शृंगाररस-लक्षण—(दोहा)

रति मति की अति चातुरी, रतिपति मंत्र बिचार ।
 ताही सों सब कहत हैं कवि कोबिद सुंगार ॥ १७ ॥

- [६] की-सों (रस०) । [१०] कीन्हो०-कियौ धर्म सों नेहु (रस०) ।
 [१३] सोभिजै-सोभिये (रस०) । न०-निरसाल (रस०) ।

अथ शृंगार के भेद—(दोहा)

सुभ संजोम बियोग पुनि द्वै सिंगार की जाति ।
पुनि प्रच्छन्न प्रकाश करि, दोऊ द्वै द्वै भाँति ॥१८॥

अथ प्रच्छन्न-संयोग-शृंगार-लक्षण—(दोहा)

सो प्रच्छन्न संयोग अरु, कहैं बियोग प्रमान ।
जानैं पीउ पिया कि सखि होइ जु तिनहि समान ॥१९॥

अथ प्रच्छन्न-संयोग-शृंगार—(सर्वथा)

जन में वृषभानु-कुमारि मुरारि रमैं रचि सों रस-रूप पियें ।
कल कूजत पूजत काम-कला विपरीत रची रति केलि कियें ।
मनि सोमित स्याम जराइ जरी अति चौकी चलै चल चारु हियें ।
मखतूल के झूल झुलावत 'केसव' भानु मनो सनि अंक लियें ॥२०॥

अथ प्रकाश-संयोग औ प्रकाश-बियोग-लक्षण—(दोहा)

सो प्रकाश-संयोग अरु, कहैं प्रकाश-बियोग ।
अपने अपने चित्त में जानैं सिंगरे लोग ॥२१॥

अथ प्रकाश-संयोग, यथा—(सर्वथा)

'केसव' एक समै हरि-राधिका आसन एक लसैं रँग-भीनैं ।
आनंद सों तिय-आनन की दुति देखत दर्पन में दृम दीनैं ।
भाल से लाल में बाल बिलोकितहीं भरि लालन लोचन लीनैं ।
सासन पीय सवासन सीय हुतासन में मनो आसन कीनैं ॥२२॥

अथ धोराधिकाजू को प्रच्छन्न-बियोग-शृंगार, यथा—(सर्वथा)

कीट ज्यों काटत काननि कान्ह सों मानहुँ में कहि आवति ऊनो ।
ताहि चलें सुनि कै चुप हवै रहे नीकहि 'केसव' एकन दूनो ।
नेक अटैं पट फूटति आँखि सु देखति हैं कब को ब्रज सूनो ।
कहि कों काहू को कीजै परेखोऽब जीजे री जीव की नाक दै चूनो ॥२३॥

अथ राधिका को प्रकाश-बियोग शृंगार, यथा—(सर्वथा)

जिनके मुख की दुति देखत ही निसि-बासर 'केसव' दीठि अटी ।
पुनि प्रेम-बढ़ावन की बतियाँ तजि आन कछू रसना न रटी ।

[२२] रँग-रस (रस०) । में दृम-त्यों दृम (बाल०), सों दृम (रस०) । सवा-
सन-सवासन (नवल०) । [२३] राधिका-प्रिया (रस०) । रहे-गए (नवल०) । एकन-
एकहि (नवल०) ।

जिनके पद पानि उरोज-सरोज हिये धरि कै पल नैन घटी ।
नितके संग छूटत ही फटु रे हिय तोहि कहा न दरार फटी ॥२४॥

(कवित्त)

सीतल समीर ठारि चद्र-चद्रिका निवारि
'केसोदास' ऐसैं ही तो हरपु हिरानु है ।
फूलन फँलाइ डारि झारि डारि घनसार
चंदन कों डारि चित्तु चौगुनो पिरानु है ।
नीर-हीन मीन मुरझाइ जीवै नीर ही तैं
छीर छिरके तैं कहा घोरजु धिरानु है ।
पाई है तैं पीर किघौं यों ही उपचार करै
आगि को तौ डाढ़यो आँगु आगि ही सिरानु है ॥२५॥

श्रीकृष्ण को प्रच्छन्न-वियोग-भृंगार, यथा—(सर्वैया)

'केसव' रुठि रह्यो तुमहीं सों किघौं भय काहू के भोत भयो है ।
वेच्यो है काहू के हाथनि नाथ किघौं तुम काहू के साथ दयो है ।
मेरी सौं मोसहुँ भानहु वेगि इहाँ मनु नाहि कहाँ पठ्यो है ।
साँची कहौ हरि हारयो है काहू सों काहू हरयो कि हिराइ गयो है ॥२६॥

श्रीकृष्ण को प्रकाश-वियोग-भृंगार, यथा—(सर्वैया)

बात कहैं न सुनैं कछु काहू त्यों हेरें नहीं कोउ कैसेहूँ हेरो ।
खाई कछु न पियैं कछु केसो छुवैं न कछु कर कौरौ करेरो ।
हूलि उठी ब्रज बैठी कहा उठि बावहु देखि कह्यो करि मेरो ।
जानै को माइ कहा भयो कान्ह को जोग-संयोग वियोग कि तेरो ॥२७॥

(दोहा)

यों परछन्न प्रकाश बिधि बरने जोग वियोग ।
अब नायक-लच्छन कहौ गूढ़-अगूढ़ प्रयोग ॥२८॥

इति श्रीमन्महाजकुमारइंद्रजीतविरचितायां रसिकप्रियायां प्रच्छन्नप्रकाशसंयोग-
वियोगवर्णन नाम प्रथमः प्रभावः ॥१॥

[२४] यह 'बाल०' में नहीं है । [२५] डारि-डोरि (नवल०) । डारि-टाह (बाल०) । मुरझाइ-मुरझाति (बाल०) । तैं-पैं (बाल०) ।

[२८] 'बाल० खं०' में यह दोहा और है—

सुभग सर्वैया घट करे पुनि दोहा उतईस । केसव प्रथम प्रभाव में रसिकप्रिया के ईस ॥

२

अथ साधारण-नायक-लक्षण—(दोहा)

अभिमानि त्यागी तरुन, कोक-कलानि प्रबोनि ।
 भव्य छमी सुंदर धनी सुचि-रुचि सदा कुलीन ॥ १ ॥
 ये गुन 'केसव' जासु में सोई नायक जानि ।
 अनुकुल दछ सठ घृष्ट पुनि चौबिधि ताहि बखानि ॥ २ ॥
 प्रीति करै निज नारि सों, पर-नारी-प्रतिकूल ।
 'केसव' मन-बच-कर्म करि, सो कहियै अनुकूल ॥ ३ ॥

अथ प्रच्छन्न-अनुकूल, यथा—(सबैया)

और के हास बिलास न भावत साधुनि को यह सिद्ध सुभावै ।
 बात वहै जु सदा निबहै हरि कोऊ कहूँ कछु सोधु न पावै ॥
 आसन बास सुवासन भूषन 'केसव' क्यों हूँ यहौ बनि आवै ।
 मो बिनु पान न खात जु कान्ह सु बैरु किधौ यह प्रीति कहावै ॥ ४ ॥

अथ प्रकाश अनुकूल, यथा—(सबैया)

'केसव' सूधे बिलोचन सूधी बिलोकनि कों अवलोकैं सदाई ।
 सूधियै बात सुनैं समुझैं कहि आवति सूधियै बात सुहाई ॥
 सूधी सी हाँसी सुधानिधि सो मुख सोधि लई बसुधा की सुधाई ।
 सूधे सुभाइ सबै सजनी बस कैसें किये अति टेढ़े कन्हाई ॥ ५ ॥

अन्यच्च—(सबैया)

मेरें तो नाहिन चंचल लोचन नाहिन 'केसव' बानी सुधाई ।
 जानों न भूषन-भेद के भावनि भूलिहूँ मैं नहिँ भौंह चढ़ाई ॥
 भोरेहूँ ना चितयो हरि-ओर त्यों घेरु करै इहिँ भाँति लुगाई ।
 रंचक तो चतुराई न चितहिँ कान्ह भए बस काहे तैं माई ॥ ६ ॥

अथ दक्षिण-लक्षण—(दोहा)

पहिली सो हिय हेतु डर, सहज बड़ाई कानि ।
 चित्त चलें हूँ ना चलें, दच्छिन-लच्छन जानि ॥ ७ ॥

अथ प्रच्छन्न-दक्षिण, यथा—(कवित्त)

हरि से हितु सों भ्रम भूलिहूँ न कीजै मान,
 हातो किये हिय हूँ तैं होति हित हानियें ।

[१] कोक-केलि (बाल० खं०, रस०) । [२] अनुकुल-अतुल (नवल०) ।
 चौबिधि-चारि प्रकार (बाल० खं०) । [५] सूधियै-सूधी सी (बाल० । सुधानिधि-सुधाकर
 (नवल०) । [६] भेद-भाव के भेदनि (बाल० खं०) ।

लोक में अलोक आनि नीकेहूँ कों लागतु है,
 सीता जू को दूत गीत कैसें उर आनियें ।
 आँखिन जो देखियत सोई साँची 'केसौदास',
 काननि की सुनी साँची कबहूँ न मानिय ।
 गोकुल की कुलटा ये यों हीं उलटावति हैं,
 आजु लौं तो वैसेई हैं कालि की न जानियें ॥८॥

अथ प्रकाश-दक्षिण, यथा—(सबैया)

चित्त चोंप चितैबे की तैसियै है अरु तैसियै भाँति डरात घनै ।
 अरु तैमेई कोमल बोल गुपाल के मोहत हैं तिहि भाँति मनै ।
 गुन तैसेई, हास-बिलास सब हुते तैसेई 'केसव' कौन गनै ।
 सखि तू कहै आन बधू के अधीन हैं सो परतीक किधों सपनै ॥६॥
 बहि अंतर गूढ़-अगूढ़ निरंतर काम-कला कुल कौन गनै ।
 कहि 'केसव' हास-बिलास सबै प्रतिद्यौस बढे रसरौति सनै ॥
 जिनको जिय मेरई जीव जियें सखि काय मनो बच प्रीति घनै ।
 तिनकों कहै आन बधू के अधीन हैं सो परतीक किधों सपनै ॥१०॥

अथ शठ-लक्षण—(दोहा)

मुँह मीठी बातें कहै, निपट कपट जिय जानि ।
 जाहि न डर अपराध को, सठ करि ताहि बखानि ॥११॥

अथ प्रच्छन्न-शठ, यथा—(सबैया)

रचि पंकज चंदन बंदन कंचन रंच न रोचन हूँ की बची ।
 कहियै किहि कारन को इते लायक का पर भार्मिनि भौह नची ॥
 अनुमानत हौं अँखियाँ लखि लाल ये नाहि नै राति के रोष रची ।
 तन तेरे बियोग तप्यो तरुनी तिहि मानहुँ मो हिय माँह तची ॥१२॥

अथ प्रकाश-शठ, यथा—(कवित्त)

काननि के रँग रंग नैननि के डोलौ संग,
 नासा अंग रसना के रसहीं समाने हो ।
 और गूढ़ कहा कहाँ मूढ़ हौ जू ? जानि जाहु,
 प्रीढ़रूढ़ 'केसोदास' नीकें करि जाने हो ।
 तन आन मन आन, कपट-निघान कान्ह,
 साँची कहाँ मेरी आन काहे कों डराने हो ।

[८] नीके०-नीक हू लगावत है (नवल०) । की न-कहा (नवल०) ।

[१०] प्रीति-प्रेम (रस०) ।

वे तो हैं बिकानी हाथ मेरें हौं तिहारें हाथ,
तुम ब्रजनाथ हाथ कौन के बिकाने हौ ? ॥१३॥

अथ धृष्ट-लक्षण—(दोहा)

लाज न गालिहु मार की छाँड़ि दई सब त्रास ।
देख्यौ दोष न मानही धृष्ट सु कहियै तास ॥१४॥

अथ प्रच्छन्न-धृष्ट, यथा—(सवैया)

नेह भरे लै लै भाजत भाजन कौन गनै दधि दूध मठाए ।
गारि दिये तैं हँसैं बरजे घर आवत हैं जनु बोलि पठाए ।
लाज की और कहा कहौ 'केसव' जे सुनिये ते सबै गुन ठाए ।
मामी पिये इनकी मेरि माइ को हैं हरि आठहुँ गाँठ अठाए ॥१५॥

अथ प्रकाश-धृष्ट, लक्षण—(दोहा)

मनसा बाचा कर्मना बिहसनि चितवनि लेखि ।
चलनि चातुरी आतुरी आठौँ गाँठि बिसेषि ॥१६॥

अथ प्रकाश-धृष्ट, यथा—(सवैया)

सौँह को सोचु सकोचु न पाँच को डोलत साहु भए करि चोरी ।
बैननि बंचकताई रची रति नैनन के संग डोलति डोरी ।
लाज करै न डरै हित-हानि तैं आनि अरे जिय जानि कै भोरी ।
नाहिनै 'केसव' साख जिन्हें बकि कै तिन सों दुखवै मुख कोरी ॥१७॥

(दोहा)

बरने कवि-नायक सबै, नायक इहि अनुसार ।
सब गुन-लायक नायिका सुनि अब बहुत प्रकार ॥१८॥

इति श्रीमन्महाराजकुमारइंद्रजीतविरचितायां रसिकप्रियायां चतुर्विधनायकप्रच्छन्न-
प्रकाशवर्णनं नाम द्वितीयः प्रभावः ॥२॥

[१४] कहियें०-केशवदास (बाल०, नवल०) । [१५] मामी-मीमी (रस०) ।
[१७] कै तिन-ऐसि न (बाल० खं०) । [१८] बाल० में नहीं है ।

३

अथ नायिका-जाति-वर्णन—(दोहा)

प्रथम पद्मिनी चित्रनी, जुवती जाति प्रमान ।
बहुरि संखनी हस्तिनी 'केसवदास' बखान ॥ १ ॥

अथ पद्मिनी-लक्षण—(दोहा)

सहज सुगंध सरूप सुभ, पुन्य प्रेम सुखदानि ।
तनु तनु भोजन रोष रति, निद्रा मान बखानि ॥ २ ॥
सलज सुबुद्धि उदार मृदु हास बास सुचि अंग ।
अमल अलोम अनंग-भुव पदमिनि हाटक रंग ॥ ३ ॥

पद्मिनी, यथा—(कवित्त)

हँसत कहत बात फूल से झरत जात,
गूढ़ भूरि हाव भाव कोक की सी कारिका ।
पन्नगी नगी-कुमारि आसुरी सुरी निहारि,
बारौ बारि किन्नरी नरी गँवारि नारिका ।
ता पै हों कहा हवै जाउं बलि जाउं 'केसवदास',
रची बिधि एक ब्रजलोचन की तारिका ।
भौर से भंवत अभिलाष लाख भाँति दिव्य,
चंपे की सी कली वृषभान की कुमारिका ॥ ४ ॥

अथ चित्रिणी-लक्षण—(दोहा)

नृत्य गीत कविता रुचै, अचल चित्त चल दृष्टि ।
बहिरति रति अति सुरत-जल मुख सुगंध की सृष्टि ॥ ५ ॥
विरल लोम तन मदन-गृह, भावत सकल सुबास ।
मित्र-चित्र-प्रिय चित्रनी, जानहु 'केसवदास' ॥ ६ ॥

चित्रिणी, यथा—(सबैया)

बोलिबो बोलनि को सुनिबो अवलोकनि कै अवलोकनि जोते ।
नाचिबो गाइबो बीन बजाइबो रीझि रिझाइ को जानति तो ते ॥
राग बिरागनि के परिरंभन हास-बिलासनि तें रति कोते ।
तो मिलतौ हरि मित्रहि कों सखि ! ऐसे चरित्र जी चित्र मैं होते ॥ ७ ॥

[१] केसवदास-केसवराइ (बाल०, रस०) । [२] बखानि-सुजान (बाल०) ।

[३] सलज-सहज (बाल० ख०) । [४] भंवत-भ्रमत (रस०) ।

[५] बहिरति-बिहरत (बाल०) । मुख-मधु (बाल०, रस०) ।

अथ शंखिनी-लक्षण—(दोहा)

क्षोपसील कोबिद-कपट, सलज सलोम-शरीर ।
अमन-बसन नखदान-रुचि, निलज निसंक अधीर ॥ ८ ॥
छार-गंधजुत मार-जल, तप्त भूरि भग होइ ।
सुरतारति अति संखनी, बरनत हैं सब कोइ ॥ ९ ॥

शंखनी, यथा—(सर्वथा)

जातु नहीं कदली की गलीनि भली बिधि लै बदरी मुंह लावै ।
चाहै न चपकली की शली मलिनी नलिनी की दिसा नहि धावै ।
जो कोउ 'केसव' नाग-लवंगलता-लवली-अवलानि चरावै ।
खारक दाख खवाइ मरी कोउ ऊँटहि ऊँट-करारोई भावै ॥ १० ॥

अथ हस्तिनी-लक्षण—(दोहा)

शूल अंगुरी चरन मुख अधर भृकुटि कटि बोल ।
मदन-सदन रद कधरा मंद चाल चित लोल ॥ ११ ॥
स्वेद मदन-जल द्विरद-मद-गंधित भूरे केस ।
अति तीछन बहु लोम तन, भनि हस्तिनी इभ-भेस ॥ १२ ॥

हस्तिनी, यथा—(सर्वथा)

सब देह भई दुरगंधमई मति अंध दई सुख पावत कैसे ।
कछु साल तें लोम बिसाल से हैं श्रुति ताड़न 'केसव' बोल अनैसे ।
अलि ज्यों मलिनी नलिनी तजि कै करिनी के कपोलनि मंडित तैसे ।
छिति छोड़ि कै राजिसिरी बस-पाप निरै-पद राज बिराजत जैसे ॥ १३ ॥

(दोहा)

ता नायक की नायिका, ग्रंथनि तीन प्रमान ।
स्वीया परकीया अवर स्वीया परकीया न ॥ १४ ॥

अथ स्वकीया-लक्षण—(दोहा)

सँपति बिपति जो मरत हू, सदा एक अनुहारि ।
ताहि सुकीया जानियै, मन-क्रम-बचन बिचारि ॥ १५ ॥

स्वकीया-भेद—(दोहा)

मुग्धा मध्या प्रौढ़ गति, तिनकी तीन बिचारि ।
एक एक की जानियहु, चारि चारि अनुहारि ॥ १६ ॥

[१०] लै-हो (नवल०) । दिसा०-दिसानि सिधावै (नवल०) । ऊँट०-ऊँट
कटेरोई (रस०) ।

[११] कटि-कटु (नवल०) ।

मुग्धा-भेद — (दोहा)

नवलबधू नवयौवना, नवलअनंगा नाम ।
 लज्जा लिये जु रति करै, लज्जाप्राय सु बाम ॥१७॥
 तामों मुग्धा नवबधू, कहै सयान लोइ ।
 दिन दिन दुति दूनी बढ़ै, बरनि कहै कबि कोइ ॥१८॥

यथा - (सवैया)

मोहिबो मोहन की गति को गति ही पढ़ी बैन कहा धौं पढ़ैगी ।
 ओप उरोजनि की उपजै दिन काहि मढ़ै अँगिया न मढ़ैगी ।
 नैननि की गति गूढ़ चलाचल 'केसवदास' अकास चढ़ैगी ।
 माई कहाँ यह माइगी दीपति जो दिन द्वै इहि भाँति बढ़ैगी ॥१९॥

अथ नवयौवना-भूषिता-मुग्धा-लक्षण — (दोहा)

सो नवजोबनभूषिता मुग्धा को यह बेस ।
 बाल-दसा निकसै जहाँ जोबन को परबेस ॥२०॥

यथा — (सवैया)

'केसव' फूलि नची भूकुटी कटि लूटि नितंब लई बहु काली ।
 बैननि मोच सँकोच सु नैननि छूटि गई गति की चल चाली ।
 घोमक घोर धरो न धरी अब लै तुम कों मिलिबो बनमाली ।
 वाको केयान निकारन कौ उर आए हैं जोबन के अबिताली ॥२१॥

अथ नवलअनंगा-मुग्धा-लक्षण — (दोहा)

नवलअनंगा होइ सो, मुग्धा 'केसवदास' ।
 खेलै बोलै बाल-बिधि, हँसै त्रसै सबिलास ॥२२॥

यथा — (कवित्त)

चंचल न हूजै नाथ, अंचल न ऐंचो हाथ,
 सोवै नेक सारिकाहू सुक तो सुवायो जू ।
 मंद करौ दीप-दुति चंद-मुख देखियत,
 दौरि कै दुराइ आऊँ द्वारि त्यों दिखायो जू ।
 मृगज-मराल-बाल बाहिरै बिडारि देहु,
 भायो तुम्है 'केसव' सु मोहू मन भायो जू ।

[१८] तामों-त्रासों (नवल०) । कोइ-सोइ (नवल०) ।

[२१] नची-नचै (नवल०) । मिलिबो-मिलऊँ (बाल० खं०), मिलिबे (नवल०) ।

[२२] इसके बाद निम्नलिखित छंद 'बाल० खं०' तथा 'रस' में अधिक है—

छल के निवास ऐसे बचन-बिलास सुनि,
चौगुनो सुरति हूँ तें स्याम सुख पायो जू ॥२३॥

अथ लज्जाप्राय रतिमुग्धा-लक्षण—(दोहा)

मुग्धा लज्जाप्राय-रति, बरनत कबि ईहि रीति ।
करै जु रति अति लाज सों पतिहि बढ़ावति प्रीति ॥२४॥
बोली न हौं वे बुलाइ रहे हरि पाइ परे अरु ओलियो ओड़ी ।
‘केसव’ भेटिबे कौं भरि अंक छुड़ाइ रहे जक हौं नहि छोड़ी ।
सूधें चितैब कौं केतो कियो सिर चाँषि उठाइ अँगुठनि ठोड़ी ।
मैं भरि चित्त तऊ चितयो न रही गड़ि नैननि लाज निगोड़ी ॥२५॥

मुग्धाशयन-लक्षण—(दोहा)

मुग्धा सोइ रहै नहीं पिय-सँस सुनहु सुजान ।
जो क्यों हूँ सोवै सखी ! सुख नहि ताहि समान ॥२६॥

यथा—(सबैया)

पाइ परें अनुहारि कियें पलिका पर पाइ धरे भय-भोने ।
सोइ गई कहि ‘केसव’ कंसहूँ कोरहि कोरिक सौहनि कीने ।
साहस कै मुख सों मुख छूवै छिन में हरि मानि सबै सुख लीने ।
एक उसासहि के उससैं सिगरेई सुगन्ध बिदा करि देने ॥२७॥

अनु-अ धरि लोचन लोलत मेल सु कांड कटाछ की कोर कड़ी ।
मुख माधुरी बानी बसी चतुराई सु ‘केसव’ मोहन तासु पड़ी ।
कुच तबू तनै तन लाज बिराजति बार गहै चहुँ ओर मड़ी ।
न बढ़ी दुति बालहि बालकता हति अंग अनंग की फौज चड़ी ।

मुकता मनिनि की है मुकति-पुरी सी नाक
दारयों दंत दाननि कौं हंसती बतीसी है
मोहन के मंत्रनि के अपरानि की सी रेख ।

भृकुटी सुबेष भावभेद छवि छी सी है ।
चित्त चतुराई उभकी सी उभके से उर
कुच सकुची ती नयननि उभकी सी है ।

‘केसोदास’ रूप की सी साला प्रेम की सी माला

आजु लौं न देखी सुनी जैसी आजु दीसी है ॥

[२३] त्यों-तो (नवल०) । [२४] हौं नहि—मैं पे न (बाल०, रस०) ।
गड़ि-नहि (बाल०) । [२७] कियें-करें (बाल०, नवल०) । कोरहि—
सबै करोरहै (नवल०) । सबै-महा (नवल०) ।

मुग्धा को सुरत-लक्षण—(दोहा)

मुग्धा सुरत करै नहीं, सपनेहँ सुख मानि ।
छल बल कीने होति है, सुख-शोभा की हानि ॥२८॥

यथा—(कवित्त)

सुखदै सखीनि बीच दै कै सौं हैं छाड़ कै,
खवाइ कछु स्वाइ बस कीना बरबसु है ।
कोमल मृनालिका सी मल्लिका की मालिका सी,
बालिका जु डारी मीड़ि मानुसु कि पसु है ।
जानै न बिभात भयो 'केसव' सुनै को बात,
देखौ आनि गात जात भयो किधौ असु है ।
चित्र सी जु राखी वह चित्रनो बिचित्र यह,
देखौ घों नए रसिक या में कौन रसु है ॥२९॥

मुग्धा को मानु—(दोहा)

मुग्धा मान करै नहीं, करै तो सुनहु सुजान ।
त्यों डरपाइ छुड़ाइये ज्यों डरपै अज्ञान ॥३०॥

यथा—(सर्वैया)

बोलै न बाल बुलावतहूँ नख-रेख लिखै भुव प्रेम परेखौ ।
आपनो हाथ बिलोकि बिलोकि कही तब 'केसव' बुद्धि बिसेखौ ।
छोटो बड़ी बिधि-रेख लिखी जुग आयु की रेख सु कौन जु लेखौ ।
प्रेम तें बोल सह्यो न पर्यो अकुलाइ कह्यो पिय कैसी है देखौ ॥३१॥

अथ मध्या के चतुर्भेद

मध्या आरूढ़जोबना, प्रगल्भबचना जानि ।
प्रदुर्भूत मनोभवा, सुरति-बिचित्रा आनि ॥३२॥

अथ मध्या-आरूढ़जोबना-लक्षण—(दोहा)

मध्या-आरूढ़जोबना पूरन जोबनवत ।
भाग सुहाग भरी सदा, भावति है मन-कंत ॥३३॥

यथा—(कवित्त)

चंद को सो भाग भाग भृकुटी कमान ऐसी,
मैन कैसे पैन सर नैननि बिलासु है ।

[२८] सुख-सिख (बाल०) ।

[२९] वह-अति (बाल० खं०); गति (नवल०) । देखौ-कहि (बाल० खं०) ।

[३०] सुजान-निदान (बाल०) । त्यों-यों (रस०, बाल० खं०); ज्यों (बाल०) ।

नासिका सरोज, गंधबाह से सुगंध बाह
 दारघों से दसन 'केसो' बीजुरी सो हासु है ।
 भाँई ऐसी ग्रीव-भुज, पान सो उदर अरु,
 पंकज से पाइ गति हंस की सो जासु है ।
 देखी है गुपाल एक गोपिका मैं देवता सी,
 सोने सो सरीर सब सोंघे को सो बासु है ॥३४॥
 अथ प्रगल्भवचना-मध्या-लक्षण—(दोहा)
 प्रगल्भवचना जानि तिहि, बरनों 'केसवदास' ।
 बचनानि माँझ उराहनो, देइ दिखावै त्रास ॥३५॥

यथा—(सबैया)

कान्ह भले जु भले ढंग लागे भलें इन्ह नैननि के रंग रागे ।
 जानति हौं सबही तुम जानत आपु से 'केसव' लालच लागे ।
 जाहु नहीं अहो जाहू चले हरि जात जितैं दिनहीं बनि बागे ।
 देखि कहा रहे धोखें परे उबटोगे जू देखौ सब देखहु आगे ॥३६॥

अथ प्रादुर्भूतमनोभवा-मध्या-लक्षण—(दोहा)

प्रादुर्भूतमनोभवा मध्या करौ बखानि ।
 तन मन भूषित सोभियै 'केसव' काम-कलानि ॥३७॥

यथा—(सबैया)

आजु मैं देखी है गोप सुता इक, होइ न ऐसी अहीर की जाई ।
 देखत हीं रहियै दुति देह की देखे तें और न देखी सुहाई ।
 एक हीं बंक बिलोकनि ऊपर वारै बिलोकि त्रिलोक-निकाई ।
 'केसवदास' कलानिधि सो बर बूझियै काम कि मेरी कन्हाई ॥३८॥

अथ सुरतविचित्रा-मध्या-लक्षण—(दोहा)

अति विचित्रसुरता मु तो जाको सुरत विचित्र ।
 बरनत कवि-कुल कौं कठिन, सुनत सुहावै मित्र ॥३९॥

यथा—(कवित्त)

'केसोदास' सबिलास मंदहास जुत,
 अबिलोकनि अलापनि को आनंद अपार है ।
 बहिरति सात पुनि अंतरति सात, पुनि
 रति बिपरीतनि को बिबिध बिचार है ।

[३४] ऐसी-की सी (बाल० ख०) ।

[३६] इन्ह-हैं (बाल०); हूँ हूँ (रस०) । जितैं-जहीं (नवल०) ।
 दिन-निज (बाल० ख०) । उबटोगे-उमिट किये देखिबैं (बाल० ख०)

[३८] बूझियै-बुझिहै (नवल०) ।

छूटि जात लाज तहाँ भूषन सुदेस केस,
 टूटि जात हारे सब मिटत सिंगार है ।
 कूजि कूजि उठै रति कूजितनि सुनि खग,
 सोई तौ सुरत सखी और बिबहार है ॥४०॥

अथ सात बहिरति-वर्णन—(दोहा)

आलिंगन, चुंबन, परस, मर्दन नख-रद-दान ।
 अघर-पान सों जानियै बहिरति सात सुजान ॥४१॥

अथ सात अंतरति-वर्णन—(दोहा)

षिति, तिर्यक, सनमुख, विमुख, अध, ऊरध, उत्तान ।
 सात अंतरति समुझियै 'केसवराइ' सुजान ॥४२॥

अथ षोडश-श्रंगार-वर्णन—(कवित्त)

प्रथम सकल सुचि मंजन अमल बास,
 जावक सुदेस केस-पास को सुधारिबो ।
 अंगराग भूषन बिबिध मुख-बास-राग,
 कज्जल-कलित लोल लोचन निहारिबो ।
 बोलन हँसनि मृदु चातुरी चितौनि चारु,
 पल पल प्रति पतिव्रत प्रतिपारिबो ।
 'केसोदास' सबिलास करहु कुँवरि राधे
 इहि बिधि सोरह सिंगारनि सिंगारिबो ॥४३॥

अथ सुरतांत—(सवैया)

संदरता पय पावक जावक पीक हिये नख-चंद नए हैं ।
 चंदन चित्र सुधा, बिष अंजन, टूटि सबें मनिहार गए हैं ।
 'केशव' नैननि नीदमई मदिरा-मद घूमत मोहमए हैं ।
 केलि कै नागर-नागरी प्रात उजागर सागर-भेष भए हैं ॥४४॥

अथ मध्याधोरादि-भेद-लक्षण—(दोहा)

सिगरी मध्या तीन बिधि धोरा और अधोर ।
 धोराधोरा तीसरी, बरनत हैं कवि धोर ॥४५॥

[४०] पुनि-मोति (बाल० खं०); सुभ (बाल) । सात-पाँच (बाल० खं०) । पुनि-
 सुन (नवल०) । तहाँ-जहाँ (बाल० खं०, रस०) ।

[४१] जानियै-समझिए (बाल०) ।

[४२] उत्तान-उमान (बाल० खं०) । समुझियै-जानिए (बाल०) ।

घोरा दोलै बक्र बिधि, बानी बिषम अधीर ।
पिय सों देइ उराहनो सो घोरा न अधीर ॥४६॥

अथ मध्याधीरा, यथा—(सवैया)

ज्यो ज्यों हुलास सों 'केसवदास' बिलास निदास हिये अवरेख्यो ।
त्यो त्यों बढ़यो उर कंठ कलू भ्रम भ्रान्ति भयो किधौं सीत बिसेख्यो ।
मुद्रित होत सखी बरहीं मेरे नैन-सरोजनि साँचु कै लेख्यो ।
तैं जु कह्यो मुख मोहन को अरविद सो है सु तो चंद सो देख्यो ॥४७॥

अथ मध्या अधीरा, यथा—(कवित्त)

तात को सो गात सब बल बलबीर को सो,
मात को सो मुख महा मोह मन भायो है ।
थल सो अचल सील अनल सो चल चित्त,
जल से अमल तेज तेज को सो गायो है ।
'केसोदास' बसत अकास के प्रकास घाष,
घट घट घर घर घँह घनो छायो है ।
रति की सी रति नाथ रूप रतिनाथ को सो,
कहौ केसोराइ झूठ कौन यह पायो है ॥४८॥

अथ मध्या घोराधीरा, यथा—(सवैया)

कान्ह भलें जु भलें समुझाइहौं मोह समुद्र को ज्यों उमह्यो हो ।
'केसव' आपनो मानिक सो मन हाथ पराएँ दै कौनै लह्यो हो ।
नैननि ही मिलिबो करिये अब बैननि को मिलिबो तो रह्यो हो ।
जाइ कह्यो तुम जैसें सखीनि सों एहो गुपाल मैं ऐसें कह्यो हो ॥४९॥

अथ प्रोढ़ाभेद चतुर्विध—(दोहा)

सनि समस्त-रस-कोविदा चित्र-बिभ्रमा जाति ।
अति आक्रामित नायका लब्धायति सुभ भांति ॥५०॥

अथ समस्तरसकोविदा-लक्षण—(दोहा)

सो समस्तरसकोविदा, कोविद कहत बखानि ।
जो रस भावै प्रीतमहि ताहि रस की दानि ॥५१॥

[४६] अधीर-अमीर (नवल०) ।

[४७] बढ़यो-भयो (बाल० ख०) । भ्रान्ति-भीतु (बाल०, नवल०) ।

[४९] अब-सब (नवल०) ।

[५०] लब्धायति-लब्धापति (बाल०) ।

यथा—(कवित्त)

देखी है गुपाल एक गोपिका मैं देवता सी
 सोने तें सलोनी बास सोधे तें सुहाई है ।
 सोभा ही सुभाउ अवतार लियो घनश्याम
 किधौ यह दामिनीयै कामिनी त्वे आई है ।
 देवी कोउ मानवी न दानवी न होइ ऐसी
 भानवी न हाय-भाव भारती पढ़ाई है ।
 'केसोदास' सब सुख साधन को सिद्धि यह
 मेरे जान मैं हीं सों मेनका की जाई है ॥५२॥

अथ विचित्रविभ्रमा प्रौढ़ा-लक्षण—(दोहा)

अति विचित्रविभ्रम सु वह प्रौढ़ा कहत बखानि ।
 जाकी दीपति दूतिका पियहि मिलावै आनि ॥५३॥

यथा—(सबैया)

है गति मंद मनोहर 'केसव' आनद कंद हियें उलहे हैं ।
 भौंह बिलासनि कोमल हासनि अंग सुबासनि गाढ़े गहे हैं ।
 बंक बिलोकनि कों अवलोकि सुमार त्वे, नंदकुमार रहे हैं ।
 एई तौ काम के बान कहावत फूलनि के बिंध भूलि कहे हैं ॥५४॥

अथ आक्रामित नायिकाप्रौढ़ा-लक्षण—(दोहा)

सो आक्रामित नायिका प्रौढ़ा कहि दै चित्त ।
 मनसा वाचा कर्मना जिनि बस कीनो मित्त ॥५५॥

यथा—(सबैया)

तो हित गाइ बजावत नाचत बार अनेक सिंगार बनाओ ।
 जीहू में आन को आनिबो छाड़्यो तोऊ न तेरो भयो मनभायो ।
 भावें सु तूं करिबो करि भामिनि भागु बड़े बस तैं करि पायो ।
 कान्ह त्यों सूघे जु चाहति नाहि सु चाहति है अब पाइ लगायो ॥५६॥

लब्धायति प्रौढ़ा-लक्षण - (दोहा)

सो लब्धायति जानियै, 'केसव' प्रगट प्रमान ।
 कानि करै पति कुल सब प्रभुता प्रभुहि समान ॥५७॥

[५२] देवता सी-अनूप रूप (बाल; नवल०) ।

[५४] उलहे-उमहे (नवल०) ।

[५५] कहि दै-करिबे (नवल०) । जिनि-जिहि (बाल०) ।

[५६] छाड़्यो री-छाड़ियो (नवल०) । तैं करि-चौकड़ि (नवल०),
 हे करि (बाल०) ।

यथा—(सवैया)

आजु विराजत हैं कहि 'केसव' श्रीवृषभानु-कुमारि कन्हारि ।
बानी बिरंचि बहिक्रम काम रची जू बची सु बधूनि बनाई ।
अंग बिलोकि त्रिलोक में ऐसी को नारि नहीं जिन नारि नवाई ।
मूरतिवंति सिंगारि समीप-सिंगार किये जनु सुंदरताई ॥५८॥

अथ प्रौढ़ा घोरा-लक्षण—(दोहा)

आदर माझ अनादरै, प्रकट करें हित होइ ।
आकृति आप दुरावई, प्रौढ़ा घोरा दोइ ॥५९॥

प्रौढ़ा सादरा घोरा, यथा—(सवैया)

आवत देखि लिये उठि आगें ह्वै, आपुहीं 'केसव' आसन दीनो ।
आपुहीं पाइ पखारि भलें जल, पानी को भाजन लाइ नवीनो ।
बीरी बनाइ कै आगें धरी, जब बैहर कों कर बीजना लीनो ।
बांह गही हरि ऐसैं कह्यो हंसि, मैं तो इतो अपराध न कीनो ॥६०॥

अथ आकृतिगुप्ता प्रौढ़ा घोरा, यथा—(सवैया)

चितवी चितवाएँ हँसाएँ हँसो हो, बुलाएँ तें बोलो रहो नतु मौनें ।
सौंह अनेकनि आवहु अंक, करौ रति कों प्रति रैन की रोनें ।
ख्वाएँ तें खाहु बर्याइ बिरी, जनु आई हौ 'केसव' आजु ही गौनें ।
मोहन के मन मोहन कौं, सु कहौ यह धौं सिखई सिख कौनें ॥६१॥

पुनर्यथा—(सवैया)

हित कै इत देखहु, देख्यो सबे, हित बात सुनौ, जु सुनो सबहीं हैं ।
यह तो कछु और, वहै सब ही अरु, सौंह करौअ करी जु तहीं हैं ।
समुझाइ कहौं, समझौं सब 'केसव' झूठीं सबै हम सों जु कहौं हैं ।
मान कियो, अपमान करौ, तो हँसाँ अब के, हँसिबे कों रहौं हैं ॥६२॥

अथ प्रौढ़ा अधोरा-लक्षण—(दोहा)

पति को अति अपराध गनि हतन कहै हित मानि ।
कहत अधोरा प्रौढ़ तिहि 'केसवदास' बखानि ॥६३॥

यथा—(सवैया)

हौं सुख पाइ सिखाइ रही सिख सीखे न ये सखि तैं हू सिखाई ।
मैं बहुतै दुख पाइहू देख्यो पै 'केसव' क्यों हूँ कुटेव न जाई ।

[५८] बची-बचि (नवल०) ।

[६०] जब बैहरिबै हरि (नवल०) । अपराध न-अवराधन (नवल०) ।

[६१] बर्याइ-औ बिरी (नवल०) । सु कहौ-तोहि नहीं (नवल०) ।

[६२] सबहीं-निबहीं (नवल०) । अरु-अब (बाल० खं०) ।

दंड दियें बिनु साधुनि हू संग छूटत क्यों खल की खलताई ।
देखहु दै मधु की पुट कोटि मिटै न घटै विष की विषमार्ई ॥६४॥

अथ प्रोढ़ा धीराधोरा-लक्षण—(दोहा)

मुख रुखी बातें कहै जिय में पिय की भूख ।
धीराधोरा जानियै जैसी मीठी ऊख ॥६५॥

यथा (सर्वया)

हो मन मैलो न जौलौं कछु अब छाड़हु बोलिबो बोल हँसौं हैं ।
'केसव' औरनि सों रसरास रस्यो रसबाद सबै हम सौं हैं ।
देखहु धौं इक बार सकोचन आरस-लोचन आरसी-सौं हैं ।
आए जू वैसेई साज सों आजु सु भूलि गई पिय काल्हि की सौं हैं ॥६६॥

इति स्वकीया ।

अथ परकीया-लक्षण—(दोहा)

सब तें पर परसिद्ध जग ताकी प्रिया जु होइ ।
परकीया तासों कहैं परम पुराने लोइ ॥६७॥

अथ परकीया-भेद—(दोहा)

परकीया द्वै भाँति पुनि ऊढ़ा एक अनूढ़ ।
बिन्हैं देखि सुनि होत बस संतत मूढ़ अमूढ़ ॥६८॥

अथ ऊढ़ा-अनूढ़ा-लक्षण—(दोहा)

ऊढ़ा होइ विवाहिता अविवाहिता अनूढ़ ।
तिनके कहौ बिलास सब 'केसव' गूढ़-अगूढ़ ॥६९॥

ऊढ़ा, यथा—(सर्वया)

बैठी सखीनि की सोभै सभा सब ही के सु नैननि माँझ बसै ।
बूझत बात बर्याइ कहै मन ही मन 'केसवराइ' हँसै ।
खेलति है इत खेल उतै पिय चित्त खिलावति यों बिलसै ।
कोऊ जानै नहीं दृग दौरि कबै कित हवै हरि-आनन छवै निकसै ॥७०॥

अनूढ़ा, यथा—(सर्वया)

बैठी हुती ब्रजनारिन में बनि श्रीबृषभानु-कुमारि सभागी ।
खेलति ही सखि चौपरि चारि भई तिहि खेल खरी अनुरागी ।
पीछे तें 'केसव' बोलि उठे सुनि कै चित्त चातुरी आतुरी जागी ।
जानी न काहू कबै हरि के सुर-मारगहीं सर सी दृग लागी ॥७१॥

[६४] पाइ-खाइ (नवल०) । [६६] जौलौं-बोलौं (नवल०) ।

[७१] मारगहीं-भार गही (बाल०) ।

(दोहा)

काहू सो न कहै कछू बात अनूढ़ा गूढ़ ।
सखी सहेली सों कहै ऊढ़ा गूढ़ अगूढ़ ॥७२॥

ऊढ़ा-वचन, यथा—(सर्वथा)

केसवराइ की सौहैं ककै कछू एकनि आपु में होइ परी ।
एक चितै मुसिकाइ इतै उत बात कहै बहु भाइ-भरी ।
चार चकोर-बिलोचन-भा सी चहुँ दिसि तैं अँगुरी पसरी ।
सखि काल्हि गई हुती गोकुल हौं सबही मिलि द्वैज को चंद करी ॥७३॥

(दोहा)

जग नायक की नायिका बरनी 'केसवदास' ।
तिनके दर्शन-रस कहौं सुनौ प्रछन्न प्रकास ॥७४॥
इति श्रीमन्महाराजकुमारइंद्रजीतविरचितायां रसिकप्रियायां
स्वीकीयापरकीयादिभेदवर्णनं नाम तृतीयः प्रभावः ॥३॥

४

अथ दर्शन-लक्षण—(दोहा)

ये दोऊ दरसैं दरस होहि सकाम सरीर ।
दरसन चारि प्रकार को बरनत हैं कवि धीर ॥१॥
एक जु नीकें देखियै दूजें दरसन चित्र ।
तीजें सपनैं देखियै चौथें श्रवननि मित्र ॥२॥

साक्षात् दर्शन, यथा—(दोहा)

नींद भूख दुति देह की गई सुनत हीं जाहि ।
को जानै ह्वैहै कहा 'केसव' देखें ताहि ॥३॥

श्रीराधिकाजू को प्रच्छन्न साक्षात् दर्शन, यथा—(दोहा)

कहि 'केसव' श्रीबृषभानु-कुमारि सिंगार सिंगारि सबै सरसै ।
सबिलास चितै हरि नायक त्यों रतिनायक सायक से बरसै ।
कबहुँ मुख देखति दर्पन लै उपमा मुख की सुखमा सरसै ।
जनु आनदकंद संपूरन चंद दुखयो रबिमंडल में दरसै ॥४॥

श्रीराधिकाजू को प्रकाश साक्षात् दर्शन, यथा—(संवैया)

पहिलें तजि आरस आरसी देखि घरीकु घसे घनसारहि लै ।
पुनि पोंछि गुलाब तिलौछि फुलेल अंगोछे में आछे अंगोछनि कै ।
कहि 'केसव' मेद जुबाद सो माँजि इते पर आँजे में अंजन दै ।
बहुर्यो दुरि देखौ तो देखौ कहा सखि लाज तो लोचन लागिगै है ॥५॥

श्रीकृष्णजू को प्रच्छन्न साक्षात् दर्शन, यथा—(संवैया)

भाल गुही गुन लाल लटैं लपटीं लर मोतिन की सुखदेनो ।
ताहि बिलोकति आरसी लै कर आरस सों इक सारसनैनी ।
'केसव' कान्ह दुरें दरसी परसी उपमा मति की अति पैनी ।
सूरजमंडल में ससिमंडल मध्य घसी जनु ताहि त्रिबैनी ॥६॥

श्रीकृष्णजू को प्रकाश साक्षात् दर्शन, यथा—(संवैया)

इक तो उर और उरोज अनूपम तैसो मनोहर हार महा री ।
सखि चित्त चलै तरुनीनिहुँ को तरुनैन की 'केसव' बात कहा री ।
हितु सों हित की कहि आवति है पर कौ लगि होंवें री कौतुकहारी ।
अब अंचल दै, नँदलाल बिलोकत री दधि नोखी बिलोवनहारी ॥७॥

श्रीराधिकाजू को प्रच्छन्न चित्र-दर्शन, यथा—(संवैया)

लोचन ऐंचि लिये इति कों मन की गति जद्यपि नेह-नहीं है ।
आनन आइ गए श्रम-सीकर रोम उठे तन कंप लही है ।
तासों कहा कहियँ कहि 'केसव' लाज-समुद्र में बूड़ि रही है ।
चित्रहु में हरि-मित्रहि देखत यों सकुची जनु बाँह गही है ॥८॥

श्रीराधिकाजू को प्रकाश चित्र-दर्शन, यथा—(कवित्त)

'केसोदास' नेह दसा-दीपक सँजोइ कैसे,
ज्योति ही के ध्यान तम - तेजहि नसायहै ।
आँखिन सों बाँधें अन्न काहू की बुझानी भूख ?
पानी की कहानी रानी ! प्यास क्यों बुझायहै ।

[५] घरीकु-कल्लुक (बाल० ख०) । जुबाद-जवादि (रस०) । बहुर्यो-बहुर्यो दूखि देखौ जो देखौ तो देखि री (बाल०) ; बहुर्यो फिर देखि जो देख्यो है तो देखि री (बाल० ख०) ।

[६] मति की-मति ते (बाल० ख०) । जनु ताहि-मनु ताहि (रस०) ।

[७] कहि-कहि ही परि आवति (बाल०, बाल० ख०) । होंवें री-होहुँ री (बाल०, बाल० ख०) ।

[८] गति-मति (बाल० ख०) । तन-अति कंपत ही है (बाल० ख०) ।

एरी मेरी इंदुमुखी ! इंदीवर-नैनी लिखें,
इंदिरा के मंदिर में संपति सिंघायहै ।
ऐसे दिन ऐसैं ही गँवावति गँवारि कहा,
चित्र देखें मित्र के मिले को सुख पायहै ? ॥६॥

श्रीकृष्णजू को प्रच्छन्न चित्र-दर्शन, यथा—(कवित्त)
रूठिबे को तूठिबे को मृदु मुसिक्याय कै
बिलोंकिबे को भेद कछू कह्यो न परतु है ।
'केसोदास' बोलें बिनु बोलनि के सुनैं बिनु,
हिलन मिलन बिनु मोहि क्यों सरतु है ।
कौ लागि अलीनो रूप प्याय प्याय राखौ नैन,
नीर देखें मीन कैसें घोरज धरतु है ।
चित्रिनी बिचित्र चित्र नीकें हीं चितैये मन,
चित्र में चिताएँ चित्त चौगुनो जरतु है ॥१०॥

श्रीकृष्णजू को प्रकाश चित्र-दर्शन, यथा—(सबैया)
अंतरिच्छ-गच्छनीनि यच्छनी सुलच्छनीनि,
अच्छी अच्छी अच्छनीनि छबि छमनीय है ।
किन्नरी नरी सुनारि पन्नगी नगी-कुमारि
आसुरी सुरीनिहूँ निहारि नमनीय है ।
भोगिन की भामिनी कि देह धरें दामिनी कि,
काम हीं की कामिनी कि ऐसी रमनीय है ।
चित्रहू में चित्तहि चुरावति है 'केसोदास',
राम की सी रमनी रमा सी रमनीय है ॥११॥

अथ स्वप्न-दर्शन, लक्षण—(दोहा)
'केसव' दर्शन स्वप्न को, सदा दुरचोई होय ।
कबहूँ प्रगट न जानियें यह जानै सब कोय ॥१२॥

श्रीराधिकाजू को प्रच्छन्न स्वप्न-दर्शन, यथा—(सबैया)
आतुर हवै उठि दौरी अली, जब आतुर ज्यो गहियै सु गहो त्यों ।
हो मेरी रानी कहा भयो तो कहूँ बूझति 'केसव' बूझियै री ज्यों ।
डीठि लगी। किधौं प्रेत लग्यो कि लग्यो उर प्रीतम जाहि डरी यों ।
आनन सीकर सी कहियै धक सोवत तें अकुलाइ उठी क्यों ॥१३॥

[६] बुझानी-न भागी (नवल०) । क्यों-कैसे कै (बाल० खं०) । मंदिर में-मंदिर
क्यों (नवल०) । सिंघायहै-समाइहै (बाल० खं०) । देखें-बिना (नवल०) ।
[१२] जानियें-देखिये (नवल०) ।

श्रीकृष्णजू को प्रच्छन्न स्वप्न-दर्शन, यथा—(कवित्त)

नख-पद-पदवी को पावें पद द्रौपदी न,
 एकौ बिसौ उरबसी उर में न आनिबी ।
 लोम सी पुलोमजा न तिल सी तिलोत्तमा न,
 मँलहू समान मन मेनका न मानिबी ।
 जानियै न कौन जाति अबहीं जगाएँ जाति,
 जीवन तौ जानिहीं जौ ताहि पहिचानिबी ।
 बातक सी बानी माँहि भाव-सो भबानी माँहि,
 'केसोदास' रति में रतीक ज्योति जानिबी ॥१४॥

श्रीराधिकाजू को प्रच्छन्न श्रवण-दर्शन, यथा—(सबंधा)

सौँह दिवाय दिवाय सखी इक बारक काननि आनि बसाए ।
 जानै को 'केसव' काननि तें कित ह्वै कब नैननि माँझ सिधाए ।
 लाज के साज घरेईं रहे सब नैनहि लै मनहीं सों मिलाए ।
 कैसी करौं अब क्यों निकसै री हरेंईं हरें हिय में हरि आए ॥१५॥

श्रीराधिकाजू को प्रकाश श्रवण-दर्शन, यथा—(कवित्त)

को लौं पीहौ कान-रस, रूप की बुझैहै प्यास ?
 'केसोदास' कैसें न नयन भरि पीजियै ।
 बीर की सौं मेरी बीर वारी है जु वारों आनि,
 नैंक किन हसहि बलाय तेरी लीजियै ।
 बरसक माँहि यह बैस अलबेली बीतें,
 दैहौ सुख सखिन क्यों अबही न दीजियै ।
 एरी लड़बावरी अहारी ऐसी वृझै तोहि,
 नाँह सों सनेह कीजै नाँहि सों न कीजियै ॥१६॥

श्रीकृष्णजू को प्रच्छन्न श्रवण-दर्शन, यथा—(कवित्त)

लंघतु है लोक लोक-लोक न उलंघो जात,
 सबही तू समुझावै तोहि समुझावै को ।
 छोड़न कहत तनु तनक न छूटै लाज,
 धन मीत राखि दोऊ कोबिद कहावै को ।
 सोच को संकाच हू को पूरब-पछिम पंथ,
 'केसोदास' एक काल एक जन धावै को ।
 दुख-सुख दूरो दुरादूरि हू तें मेरे मन,
 जैसो सुनी तैसो तोहि आँखिन दिखावै को ॥१७॥

[१५] कब-हरि (नवल०) । [१६] किन हसहि-हंसि कहि हो (बाल०) ।

श्रीकृष्णजू को प्रकाश भवण-दर्शन, यथा — (कवित्त)

निपट कपटहर प्रेम को प्रकटकर,
 बिस बिसे बसीकर कैसे उर आनियें ।
 काम को प्रहरषन कामना को बरषन
 कान्ह को सँकरषन सब जग जानियें ।
 किधौ 'केसोदास' महि मोहनो को भूषन है,
 किधौ ब्रजबालनि को दूषन बखानियें ।
 सुनत हीं छूटयो धाम बन बन डोलैं स्याम,
 राखे तेरो नाम कि उचाट-मंत्र मानियें ॥१८॥

(दोहा)

दरस रमन-रमनीनि के कहे परम रमनीय ।
 प्रगटन प्रेम-प्रभाव अब कहौं कछु कमनीय ॥१९॥

इति श्रीमन्महाराजकुमारइंद्रजीतविरचितायां रसिकप्रियायां
 चतुर्विधदर्शनप्रच्छन्नप्रकाशवर्णनं नाम चतुर्थः प्रभावः ॥४॥

५

अथ दंपति-चेष्टा वर्णन — (दोहा)

तिनके चित की जानि सखि पिय सों कहै सुनाइ ।
 कहै सखी सों प्रीतमें आपुन तैं अकुलाइ ॥२०॥

श्रीराधिकाजू की सखी को बचन कृष्ण प्रति — (सर्वैया)

काल्हि की ग्वालि तौ आज हू लौं न संभारति 'केसव' कैसें हू देहै ।
 सीरी ह्वै जाति, उठै कबहूँ जरि जीव रह्यो कै रही रुचि-रेहै ।
 कोरि विचार विचारति है उपचारनि के बरसै सखि मेहै ।
 कान्ह बुरी जिन मानौ तिहारी बिलोकनि में बिस बीस बिसे है ॥२१॥

श्रीकृष्णजू को बचन राधिका की सखी प्रति — (कवित्त)

प्यास ह्वै रही उदास भागी भूख गहि त्रास,
 'केसोदास' नींदहु की निंदा हित ठानी है ।
 मति को मती न लेय विद्या की बिदाई देय,
 सोभा सुकि सेइ सेइ सब सुख सानी है ।
 विष से लगत गीत केलि की न परतीत,
 प्रीत उर पाहुनी सो पचि पहिचानी है ।

तो बिन कहै को गाय घोरता न ताके साथ,
मोहि को मिलावै हाथ लाज के बिकानी है ॥३॥

अथ चेष्टा लक्षण—(दोहा)

पिय सों प्रगटन प्रीति कहँ जितने करें उपाइ ।
ते सब 'केसोदास' अब बरने सबनि सुनाइ ॥४॥
जब चितवै पिय अनत हीं, तब चितवै मिहसंक ।
जानि बिलोकत आपु त्यों अलिहि लगावै अंक ॥५॥
कबहूँ श्रुति कंडू करै आरस सों ऐंड़ाइ ।
'केसोदास' बिलास सों बार बार जमुहाइ ॥६॥
झूठे ही हँसि हँसि उठै कहै सखी सों बात ।
ऐसैं मिस हीं मिस प्रिया पियहि दिखावै गात ॥७॥
यों ही पीय प्रियानि प्रति प्रगटत अपनी प्रीति ।
सो प्रच्छन्न प्रकास करि बुधि-बल करत समीति ॥८॥
श्रीराधिकाजू की प्रच्छन्न चेष्टा, यथा—(कवित्त)

चोरि चोरि चित चितवति मुँह मोरि मोरि
काहे तें हँसति हियें हरष बढ़ायो है ।
'केसोदास' की सौं तूँ जँभाति कहा बार बार
बीरी खाइ मेरी बीर आरस जो आयो है ।
ऐंड़ सों ऐंड़ाति अति अंचल उड़ात उर
उघरि उघरि जात गात छबि छायो है ।
फूलि फूलि भेंटति रहति उर झूलि झूलि
भूलि भूलि कहति कछू तें आजु खायो है ॥९॥

श्रीराधिकाजू की प्रकाश चेष्टा, यथा—(कवित्त)

मेरो मुख चूमैं तेरी पूरी साध चूमिबे की
चाटें ओस अमु क्यों सिरात प्यास-डाढ़े हैं ।
छोटे छोटे कर कहा छ्वावति छबीली छाती,
छ्वावो जाके छ्वाइबे के अभिलाष बाढ़े हैं ।
खेलन जो आई हौ तौ खेलौ जैसैं खेलियत
'केसोदास' की सौं तैं ये कौन खेल काढ़े हैं ।
फूलि फूलि भेंटति है मोहि कहा मेरी भट्ट
भेंटै किनि जाइ जे वे भेंटिबे कौं ठाढ़े हैं ॥१०॥

[३] घोरता०-घोरजता लैकै साथ (नवल०) ।

[६] बीरी खाइ-विसिखाह (नवल०) ।

[१०] सिरात-री रात (नवल०) । भेंटै किनि जाइ-भेंटत ना ताहि (बाल० खं०) ।

श्रीकृष्ण जू की प्रच्छन्न चेष्टा, यथा—(कवित्त)

छोरि छोरि बाँधी पाग आरस सों आरसी लै
 अनत हीं आन भाँति देखत अनंसे ही ।
 तोरि तोरि डारत तिनू का कहौ कौन पर,
 कौन के परत पाइ बावरे ज्यों ऐसे ही ।
 कबहूँ चुटकि देति चटकि खुजावौ कान,
 मटकि एँड़ाउ जुरी ज्यों जँभात तैसे ही ।
 बार बार कौन देत मनिमाला मोहि,
 गावत कछू के कछू आजु कान्ह कैसे ही ॥११॥

श्रीकृष्णजू की प्रकाश चेष्टा, यथा—(सबैया)

जा लागि लाँच लुगाइनि दै दिन नाच नचावत साँझ पहाँ ऊँ ।
 'केसव' मन्त्र करौ बसकारक हारक जंत्र कहाँ लौं गनाऊँ ।
 हारि रहे हरि क्यों हूँ मिली न मिलाऊँ जौ ताहि तौ माँगों सो पाऊँ ।
 ठाढ़ी वै जाइ मिलौ मिलिबे कहूँ और कछू कनियाँ करि लाऊँ ॥१२॥

अथ स्वयंदूतत्व-लक्षण—(दोहा)

जौ क्यों हू न मिलैं कहूँ 'केसव' दोऊ ईठ ।
 तौ तब अपने आपहीं बुधिल होत बसीठ ॥१३॥

श्रीराधिकाजू को प्रच्छन्न स्वयंदूतत्व, यथा—(सबैया)

दूरि तें देखिबे कौं हवै हवै दीन मनाई हुती लिखि ही लिखि चीठी ।
 देखें मिल्यो मनु हौं हूँ मिली मिलि खेलिबे हूँ कौं मिली मति मीठी ।
 ऐसैं में और चलाइहौ 'केसव' कैसेहूँ कान्ह-कुमार दै ढीठी ।
 लागै न बार मृनाल के तार ज्यों टूटैगी लाल हमैं तुम्हैं ईठी ॥१४॥

श्रीराधिकाजू को प्रकाश स्वयंदूतत्व, यथा—(सबैया)

घाइ नहीं घर, दाई परी जुर, आई खिलाई की आँखि बहाऊँ ।
 पौरियँ आवैं रतौंधु इते पर ऊँचो सुनै सु महा दुख पाऊँ ।
 कान्ह निबेरहु न्याउ नयो इनि आलिन कौ लागि हौं बहराऊँ ।
 ये सब मो संग सोवन आवैं कि हौं इनके संग सोवन जाऊँ ॥१५॥

[११] बार बार-बारि बारि (बाल०, रस०) ।

[१४] लागै-हूँ है न बार मुराति कें (रस०), मुरारि कें (बाल०) ।

निम्नलिखित छंद 'बाल० खं०' और 'नवल०' की प्रतियों में और मिलता है—

छुवो जनि हाथ सों हाथ हिये पल ही पल बाढ़त प्रेमकला ।
 न जानिये जी में कहा बसी जाइ चले फिरि 'केसव' कौन चला ।
 भले हि भले निबडौ जि भली इह देखिबे ही की हला हू भला ।
 मिलै मन तौ मिलिबौई कहूँ मिलिबौ न अलौकिक नंदलला ॥

श्रीकृष्णजू को प्रच्छन्न स्वयंदूतत्व, यथा—(कवित्त)

आपने हीं भाइ के ये सोहत सरीक से, वे
 'केसोदास' दास ज्यों चलत चित लीने हैं ।
 आपु हीं अठाउ के ये लेत नाऊँ मेरो, वे तौ
 बापुरे मिलाप के सँलाप करि हीने हैं ।
 राधिकै सुनाइ कै कहत ऐसैं घनस्याम,
 सुबल को लै लै नाम काम भय-भीने हैं ।
 साथ लै सखानि अब जँबो बन छाड़्यो हम,
 खेलिवे कौ संग सखा साखामृग कीने हैं ॥१६॥

श्रीकृष्णजू को प्रकाश स्वयंदूतत्व, यथा—(सबैया)

बन जैये चली कोऊ ठाली है 'केसव' हौ तुम हैं तौ अरी अरिहो ।
 कछु खेलियँ खेलि न आवत आजु ही भूल्यो न भूल्यो गरें परिहो ।
 हितु हे हिय में किधौ नाहि तऊ हितु नाहि हिये तु लला लरिहो ।
 हम सों यह बूझियँ ऐसी कहौअ कहौ हो कहौ सु कहा करिहो ॥१७॥

अन्यच्च, यथा—(कवित्त)

'केसोदास' घर घर नाचत फिरत गोप,
 एक परे छकि ते मँरेई गुनियत हैं ।
 बारुनी के बस बलदाऊ भए सखा सब,
 संग लै को जँयै दुख सीस धुनियत हैं ।
 मोहि तौ गएँ हीं बनै दीह दीपमाला पाइ,
 गाइनि सँवारिवे कौ चित्त चुनियत हैं ।
 जौ न बसौ लोलिनैन लेरुवा मरहि सब,
 खरक खरेई आज सूने सुनियत हैं ॥१८॥

(दोहा)

ऊढ़ा पुनि यहि भाँति करि बहु बिधि हितनि जनाइ ।
 आपुन हीं तैं लाज तजि पियहि मिलै अकुलाइ ॥१९॥

यथा—(कवित्त)

पंथ न थकत पल मनोरथ-रथनि के,
 'केसोदास' जगमग जैसैं गाए गीत मैं ।
 पवन बिचारि चक्र चंक्रमन चित चढ़ि,
 भूतल अकाश अमै धाम जल सीत मैं ।

[१६] सँलाप-सताप (नवल०) । राधिकै प्रिया को (नवल०) । भय-रस (बाल०) ।

[१८] दुख-देख (बाल० खं०) । बसौ-मिलै (बाल० खं०) । खरक-दरिद
 (बाल खं०) । यह छंद 'बाल०' में नहीं है ।

[१९] पियहि-पतिहि (बाल०) ।

को लौं राखौं थिर बपु बापी कूप रस सम,
हरि बिनु कीनें बहु बासर बितीत मैं ।
म्यान गिरि फोरि तोरि लाज-तरु जाइ मिलौं,
आपु ही तें आपु गाज्यौ आपुनिधि प्रीतमैं ॥२०॥

अन्यच्च, यथा—(सबैया)

जाति भई संग जाति लै कीरति 'केसव' है कुल सों हित फूट्यो ।
गर्ब गयो गुन जोवन रूप को पुन्य सु तौ पल ही पल खूट्यो ।
कान्ह निहारियँ आन कियेँ कहौं लाज सों नीको ह्वै नातो ई टूट्यो ।
छाँड्यो सब हम हेरि तुम्हें तुम पै तनको कपटी नहि छूट्यो ॥२१॥

(दोहा)

अधिक अनूढ़ा लाज तें पिय पै जाइ न आप ।
क्यों हूँ करि सखियै कहैं ताके उर को ताप ॥२२॥

यथा—(सबैया)

जानै को 'केसव' कौने कह्यो कब कान्ह हमारे हिंडोरनि झूलै ।
पान न खाइ न पान्यों पिये तब तें भरि लोचन लेत समूलै ।
जाहु नहीं चलि बेगि बलाइ ल्यौं लेहु सकेलि कहा यह भूलै ।
जानत हो वह कामकली कुंभिलाइ गएँ बहुरचौ फिर फूलै ॥२३॥

अथ प्रथम-मिलन-स्थान-वर्णन—(दोहा)

जनी सहेली धाइ घर सूने घर निसि चार ।
अति भय उत्सव व्याधि मिस न्यौते सु बन-बिहार ॥२४॥
इन ठौरनि ही होतु है प्रथम मिलन संसार ।
'केसव' राजा रंक को रचि राखे करतार ॥२५॥

जनी के घर को मिलन, यथा—(कवित्त)

बेषु कै कुमारिका को ब्रज की कुमारिकानि
माँझ राँझ 'केसोदास' त्रास पग पेलि कै ।
काम की लता सी चपला सी प्रेम पासी सी है
राधिका के बुधबल कंठ भुज मेलि कै ।
दौरि दौरि दुरि दुरि पूरि पूरि अभिलाष
भाँति भाँति के अनूप रूप बहु केलि कै ।
जनी के अजिर आज रजनी में सजनी री
साँची करी स्याम चोरमिहचनी खेलि कै ॥२६॥

[२०] फोरि-कोरि (बाल०) ।

[२३] लोचन-आखियो (बाल०) । [२४] सु बन-विपिन (बाल० खं०) ।

सहेली के घर को मिलन, यथा—(कवित्त)

नैननि के तारनि में राखौ प्यारे पूतरी कै
 मुरली ज्यों लाइ राखौ दसन-बसन में ।
 राखौ भुज बीच बनमाली बनमाला करि
 चंदन ज्यों चतुर चढ़ाइ राखौ तन में ।
 'केसोराइ' कलकंठ राखौ बलि कठुला कै
 करम करम क्यों हू आनी हैं भवन में ।
 चंपककली ज्यों कान्हू सँघि सँघि देवता ज्यों
 लेहु मेरे लाल ! इन्हैं मेलि राखौ मन में ॥२७॥

धाइ के घर को मिलन, यथा—(कवित्त)

हँसत खेलत खेल मंद भई चंद-दुति
 कहत कहानी और बृक्षत पहेली-जाल ।
 'केसोदास' नींद-बस अपने अपने घर
 हरें हरें उठि गए बालिका सकल बाल ।
 घोरि उठे गगन सधन घन चहूँ दिसि
 उठि चले कान्हू धाइ बोलि उठी तिहि काल ।
 आधी राति अधिक अँध्यारे माँझ जैहौ कहाँ
 राधिका की आधी सेज सोइ रहौ प्यारे लाल ॥२८॥

सुने घर को मिलन, यथा—(कवित्त)

देखत ही चित्र सुनी चित्रसाला बाला आजु
 रूप की सी माला राधा रूपकु सुहाए री ।
 नूपुर के सुरनि के अनुरूप तानें लेति
 पग तल ताल देति अति मन भाए री ।
 ऐसे में दिखाई दीनी औचकाँ, कुँवर कान्हू
 जैसे भए गात तैसे जात न बताए री ।
 'केसोदास' कहे परै अलज सलज से न
 जलज से लोचन जलद हवै आए री ॥२९॥

निसि-चार को मिलन, यथा—(सबैया)

एक समै सब देखन गोकुल गोपी-गोपाल-समूह सिंघायो ।
 राति हवै आई चले घर को दसहूँ दिसि मेहु महा मढ़ि आयो ।

[२७] केसोराइ०—केसोराइ गज मेलि राखौ कलकंठी कंठा कल कठुला कै
 (बाल० खं०) ।

[२८] बस-मिसु (नवल०) । बालिका-गबालिका (नवल०) । प्यारे-नंद (नवल०) ।

[२९] राधा-जनु (बाल० खं०) ।

दूसरो बोल ही तें समझै कहि 'केसव' यों छिति में तम छायो ।
ऐसे में स्याम सुजान बियोग बिदा कै दियो सु कियो मनभायो ॥३०॥

अतिभय को मिलन, यथा—(कवित्त)

जानि आगि लागी वृषभान के निकट भौन
दौरि ब्रजबासी चढ़े चहूँ दिसि घाइ कै ।
जहाँ तहाँ सोर भारी भीर नर नारिनि की ।
सब ही की छूटि गई लाज हाइ भाइ कै ।
ऐसे में कुँवर कान्ह सारो सुक बाहिर कै
राधिका जगाई और जुवती जगाइ कै ।
लोचन बिसाल चारु चिबुक कपोल चूमि,
चंपे की सी माल लाल लीनी उर लाइ कै ॥३१॥

उत्सव को मिलन, यथा—(कवित्त)

बल की बरस-गाँठि ताकी राति जागिबे कौं,
आई बजसुंदरी सँवारि तन सोनो सो ।
'केसोदास' भीर भई नंदजू के मंदिरनि,
अध मध ऊरध बच्चो न कोऊ कोनो सो ।
गावति बजावति नचति नाना रूप करि,
जहाँ तहाँ उमंगत आनंद को ओना सो ।
साँवरे की सूनी सेज सोवत ही राधिका जू,
सोए आनि साँवरेऊ मानि मन गोनो सो ॥३२॥

व्याधि-मिस को मिलन, यथा—(सवैया)

सोधि निदाननि दान दए उपचार बिचार किये न धिरानी ।
बेद के सासन व्याधि-बिनासन होम-हुतासन हू न सिरानी ।
'केसव' बेगि चलौ बलि बोलति दीन भई वृषभान की रानी ।
आए हे मेटि मरू करि कै बहुरचौ उनिके वह पीर पिरानी ॥३३॥

न्याते के मिस को मिलन, यथा—(कवित्त)

न्याति कै बुलाई हुती बेटी वृषभानु जू की,
जबे कौं जसोधा रानी आनी हैं सिंगारि कै ।
भोजन कै, भवन बिलोकिबे कौं पान खात,
ऊपर अकेली गई आनंद बिचारि कै ।
देखत देखत हरि भावते कौं भागी, देखि
दौरि गही ब्याल ऐसी बेनी डर डारि कै ।

[३१] भाइ-हाइ (बाल०) ।

[३२] अध मध-मधि अध (बाल०) ।

[३३] न धिरानी-नंदरानी (बाल० ख०) । बेगि-क्योंहू (बाल०) ।

भेंटी भरि अंक मनभायो करि छाड़्यो, मुहुँ

केसरि सों मांड़ि लई बेसरि उतारि कै ॥३४॥

वनविहार के मिस को मिलन, यथा—(सवैया)

देहि री काल्हि गई कहि दैन, पसारहु ओलि भरौ पुनि फेंटी ।

छाड़ौ नहीं मग छाड़ौ जौ या पै छुड़ावै बिलोकनि लाज-लपेटी ।

बात सँभारि कहौ सुनिहै कोऊ जानत हो यह कौन की बेटी ? ।

जानत हैं वृषभानु की है, पर तोहि न जानत कौन की चेटी ॥३५॥

जलविहार को मिलन, यथा—(सवैया)

हरि राधिका मानसरोवर कें तट ठाढ़े री हाथ सों हाथ छियें ।

पिय के सिर पाग प्रिया मुकताहुल छाजत माल दुहँनि हियें ।

कटि 'केसव' काछनी सेत कछें सबही तन चंदन चित्र कियें ।

निकसे छिति छीरसमुद्र ही तें संग श्रीपति मानहुँ श्रीहि लियें ॥३६॥

अन्यच्च यथा—(सवैया)

रितु ग्रीष्म के प्रतिबासर 'केसव' खेलत हैं जमुना-जल में ।

इत गोपसुता उहि पार गुपाल बिराजत गोपनि के दल में ।

अति बूढ़त हैं गति मीननि की मिलि जाइ उठे अपने थल में ।

इहि भाँति मनोरथ पूरि दोऊ दुरि दूरि रहैं छबि सों छल में ॥३७॥

(दोहा)

इहि बिधि राधा-रमन के बरने मिलन बिसेखि ।

'केसवदास' निवास बहु बुधबल लीजहु लेखि ॥३८॥

और जु तरुनी तीसरी क्यों बरनौ यहि ठौर ।

रस में बिरस न बरनिय कहत रसिक-सिरमौर ॥३९॥

ये सब जितनी नायिका बरनी मति-अनुसार ।

'केसवदास' बखानियहु, बुधि-बल अष्ट प्रकार ॥४०॥

प्रथम मिलन थल में कहे अपनी मति-अनुसार ।

हावभाव बर्नन करौ सुनि अब बहुत प्रकार ॥४१॥

इति श्रीमन्महाराजकुमारइंद्रजीतविरचितायां रसिकप्रियायां ।

श्रीराधाकृष्ण-चेष्टा-दर्शन-मिलनस्थानवर्णनं नाम पंचम प्रभावः ॥५॥

[३५] देहि री-दे दधि (नवल०) । कौन०-को महरटी (बाल० खं०) ।

[३६] कछें-लसी (बाल०) । [३७] गोपनि०-गुवालनि के गन में (बाल०) ।

[३८] निवास-बिलास (बाल० खं०) । [३९] ३९ से ४१ तक के छंद 'रस०'

में नहीं हैं ।

६

अथ भाव-लक्षण—(दोहा)

आनन लोचन बचन मग, प्रकटत मन की बात ।
ताही सों सब कहत हैं भाव कबिनि के तात ॥१॥
भाव सु पंच प्रकार के, सुनि बिभाव अनुभाव ।
थाई सात्विक कहत हैं, व्यभिचारी कबिराव ॥२॥

अथ बिभाव-वर्णन—(दोहा)

जिन तें जगत अनेक रस, प्रगट होत अनयास ।
तिन सों बिमति बिभाव कहि बरनत 'केसवदास' ॥३॥

अथ बिभाव-नामभेद-वर्णन—(दोहा)

सब बिभाग द्वै भाँति के 'केसवदास' बखानि ।
आलंबन इक दूसरो उद्दीपन मन आनि ॥४॥
जिन्हें अतन अवलंबई ते आलंबन जानि ।
जिन तें दीपति होति है ते उद्दीप बखानि ॥५॥

अथ आलंबन-स्थान-वर्णन—(छप्पय)

दंपति जोबन रूप जाति लच्छन जुत सखि जन ।
कोकिल कलित बसंत फूल फल दल अलि उपवन ।
जलचर जलजुत अमल कमल-कमला कमलाकर ।
चातिक मोर सु सब्द तड़ित धनु अंबुद अंबर ।
सुभ सेज दीप सौगंध गृह पान गान परिधान मनि ।
नव नृत्य-भेद बीनादि-रव आलंबन 'केसव' बरनि ॥६॥

अथ उद्दीपन-वर्णन—(दोहा)

अवलोकनि आलाप परिरंभन नख-रद-दान ।
चुंबनादि उद्दीप ये मर्दन परस प्रमान ॥७॥

अथ अनुभाव-वर्णन—(दोहा)

आलंबन उद्दीपन के, जो अनुकरण बखान ।
ते कहियै अनुभाव सब, दंपति प्रीति-विधान ॥८॥

अथ स्थायी भाव-वर्णन—(दोहा)

रति हाँसी अरु सोक पुनि क्रोध उछाह सुजान ।
भय निंदा बिस्मय सदा, थाई भाव प्रमान ॥९॥

अथ सात्विक भाव-वर्णन—(दोहा)

स्तम्भ स्वेद रोमांच सुरभंग कंप वैबन्ध ।
आँसू प्रलय बखानियँ आठो नाम अनन्य ॥१०॥

अथ व्यभिचारी भाव-वर्णन—(दोहा)

भाव जु सबही रसनि में उपजत 'केसवराय' ।
बिना नियम तिन सों कहँ व्यभिचारी कबिराय ॥११॥

अथ व्यभिचारी-नाम-वर्णन—(दोहा)

निर्वेद ग्लानि संका तथा, आलस दैन्य 'रु मोह ।
स्मृति धृति ब्रीड़ा चपलता श्रम मद चिंता कोह ॥१२॥
गर्ब हर्ष आवेग पुनि निंदा नींद बिबाद ।
जड़ता उत्कंठा सहित स्वप्न प्रबोध बिषाद ॥१३॥
अपस्मार मति उग्रता त्रास तर्क औ व्याधि ।
उन्माद मरन अवहित्य है व्यभिचारी युत आधि ॥१४॥

अथ हाव-लक्षण—(दोहा)

प्रेम राधिका कृष्ण को है तातें सिंगार ।
ताके भाव प्रभाव तें उपजत हाव बिचार ॥१५॥
हेला लीला ललित मद बिभ्रम विहृत बिलास ।
किलकिचित बिच्छित्ति कहि अरु बिब्बोक-प्रकास ॥१६॥
मोटाइत सुनि कुट्टमित बोधकादि बहु हाव ।
अपने अपने बुद्धिबल बरनत कवि कबिराव ॥१७॥

अथ हेला हाव-लक्षण—(दोहा)

पूरन प्रेम-प्रताप तें भूलत लाज-समाज ।
सो हेला जिहि हरत हिय राधा श्रीब्रजराज ॥१८॥

अथ श्रीराधिकाजू को हेला हाव, यथा—(सवैया)

अवलोकनि अंकुस ऐंचि अनूपम भ्रू जुग पास भलें गल मेली ।
मृदुहास सुबास उठाइ मिली वह जोन्ह की जामिनि माँझ अकेली ।
अधरासव प्याइ किये बस 'केसवराइ' करी रसरीति नवेली ।
बन में वृषभानसुता सुखहीं हरि कों हरि लै गई हेलहि हेली ॥१९॥

[१०] अनन्य-सुवर्ण (नवल०) ।

[१४] त्रास-आस (नवल०) । उन्माद-अवहित्य भय आदि दं (रस०) ।

[१७] बोधकादि-बोधादिक (नवल०) ।

[१९] अधरासव-अधरारस (रस०, नवल०) । रसरीति-रतिरीत (बाल०) ।

श्रीकृष्णजू को हेला-हाव, यथा—(सवैया)

बेनु सुनाइ बुलाइ लई बन भौन बुलाइ के भाँति भली को ।
फूलि गयो मन फूल्यो बिलोकत 'केसव' कानन रास थली को ।
अधरा-रस प्याइ कियो परिरंभन चुंबन कै मुख काम-कली को ।
हेलहि श्रीब्रजनागर आजु हर्यो मन श्रीवृषभानुलली को ॥२०॥

अथ लीला हाव-लक्षण—(दोहा)

करत जहाँ लीलानि कों प्रीतम प्रिया बनाइ ।
उपजत लीला हाव तहँ बरनत 'केसवराइ' ॥२१॥

श्रीराधिकाजू को लीला हाव, यथा—(सवैया)

पायन को परिवो अपमान अनेक सों 'केसव' मान मनैबो ।
मीठो तमोर खवाइबो खैबो बिसेषि चहूँ दिसि चौकि चितैबो ।
चौर कुचीलनि ऊपर पौढ़िबो पातनि के खरकें भजि ऐबो ।
आँखनि मूद कै सीखति राधिका कुंजनि तें प्रतिकुंजनि जैबो ॥२२॥

श्रीकृष्णजू को लीला हाव, यथा—(सवैया)

झाँकि झरोखनि में चढ़ि ऊँचे अवासनि ऊपर देखन धावै ।
निदत गोप चरित्रनि कों कहि 'केसव' ध्यान ककै गुन गावै ।
चित्रित चित्र में आपुनपौ अवलोकत आनंद सों उर लावै ।
आँगन तें घर में घर तें फिर आँगन बासर कों बिरमावै ॥२३॥

अथ ललित हाव-लक्षण—(दोहा)

बोलनि हँसनि बिलोकिबो चलनि मनोहर रूप ।
जैसें तैसें बरनिये ललित हाव अनुरूप ॥२४॥

श्रीराधिकाजू को ललित हाव, यथा—(कबित्त)

कोमल बिमल मन, बिमला सी सखी साथ,
कमला ज्यों लीने हाथ कमल सनाल के ।
नूपुर की धुनि मुनि भोरें कलहंसनि के,
चौकि चौकि परै चारु चेंदुवा मराल के ।
कचनि के भार कुच-भारनि सकुच-भार,
लचकि लचकि जात कटि-तट बाल के ।
हरें हरें बोलत बिलोकत हँसत हरें,
हरें हरें चलत हरत मन लाल के ॥२५॥

[२०] बुलाइ-भुलाइ (रस०) । अधर रा-रस०-रूप महामधुपान कराइ करघो
पररंभन कामकली को (रस०); चुंबन रंभन कामकली को (बाल०) ।

[२२] मीठो-सीठो (बाल०; रस०) । भजि-भगि (रस०) ।

[२३] बासर-जो निसि (बाल०) ।

श्रीराधिकाजू को ललित हाव, यथा—(सबैया)

चपला पट, मोर-किरीट लसै मधवा-धनु सोभ बढ़ावत हैं ।
मृदु गाजत आवत बेंनु बजावत मित्र मयूर नचावत हैं ।
उठि देखि भटू भरि लोचन चातक-चित्त की ताप बुझावत हैं ।
घनस्याम घनाघन-बेष धरें जु बने बन तें ब्रज आवत हैं ॥२६॥

अथ मद हाव-लक्षण—(दोहा)

पूरन प्रेम-प्रभाव तें गर्ब बढ़ै बहु भाव ।
तिनके तरुन बिकार तें उपजत है मद हाव ॥२७॥

श्रीराधिकाजू को मद हाव, यथा—(कबित)

छबि सों छबीली वृषभानु की कुंवरि आजु,
रही हुती रूपमद मानमद छकि कै ।
मारहू तें सुकुमार नंद के कुमार ताहि,
आए री मनावन सयान सब तकि कै ।
हौंस हौंसि सौंहि करि करि पाइ परि परि,
'केसोराइ' की सौं जब हारे जिय जकि कै ।
ताहि समै उठे घन घोरि घोरि, दामिनी सी
लागी लौटि स्याम घन उर सों लपकि कै ॥२८॥

श्रीकृष्णजू को मद हाव, यथा—(सबैया)

मनमोहिनी मोहि सकै न सखी चपला चल चित्त बखानत हैं ।
रति की रति क्यों हूँ न कान करै दुति-चंदकला घटि जानत हैं ।
कहि 'केसव' और की बात कहा रमनीय रमाहूँ न मानत हैं ।
वृषभानुसुता हित मत्त मनोहर औरहि डीठि न आनत हैं ॥२९॥

अथ विभ्रम हाव-लक्षण—(दोहा)

बास बिभूषन प्रेम तें जहाँ होई बिपरीत ।
दरसन-रस तन मन रसित, गनि विभ्रम की गीति ॥३०॥

श्रीराधिकाजू को विभ्रम हाव, यथा—(सबैया)

कटि के तटु हार लपेटि लियो कल किंकिनी लै उर सों उरमाई ।
कर नूपुर सों पग पौंची रची अँगियाँ सुधि अंचल की बिसराई ।
करि अंजन रंजित चारु कपोल करी जुत जावक नैन-निकाई ।
सुनि आवत श्रीब्रजभूषन भूषन भूषतहीं उठि देखन घाई ॥३१॥

[२७] प्रेम-प्रभाव-प्रेमप्रताप (रस०, बाल० ख०) ।

[३०] बास-बांकु (नवल०) । मन-महि (बाल०, रस०, नवल०) ।

[३१] रची-बनी (रस०); बिना (बाल०) । रंजित-अंजित (बाल० रस०) ।

श्रीकृष्णजू को बिभ्रम हाव, यथा—(सवैया)

नंदनंदन खेलत हे बने गात बनी छवि चंदन के जल की ।
वृषभानसुताहि बिलोकत ही रुचि चित्त में बिभ्रम की झलकी ।
गिरि जात न जानत पाननि खात बिरी करि पंकज के दल की ।
बिहँसी सब गोपसुता हरि-लोचन मूंदी सुरोचि दृगंचल की ॥३२॥

अथ बिहृत हाव-लक्षण—(दोहा)

बोलनि के समयें बिषें बोलन देइ न लाज ।
बिहृत हाव तासों कहैं, 'केसव कवि' कबिराज ॥३३॥

अथ राधिका को बिहृत हाव, यथा—(सवैया)

मेरे कहे दहिये जु तऊ फिरि ग्रीष्म ज्यों हठ-काठ दहौगी ।
पैरिबो प्रेम-समुद्र पराए कराए करें कृत क्यों निबहौगी ।
हौंस मरैं सजती सिगरी कबहूँ हरि सों हँसि बात रहौगी ।
पो-चित की चितसारी चढ़ी चित की पुतरी भई कौलों रहौगी ॥३४॥

श्रीकृष्णजू को बिहृत हाव, यथा—(सवैया)

'केसवदास' सों आजु सखी वृषभानु-कुमारी उराहनो दीनो ।
गारि दई अरु मारि दई अरुबिदन सों मनु कै हितहीनो ।
सौख दई, सुख पाइ लई उर लाइ सुगंध चढ़ाइ नवीनो ।
उत्तर देइ को नंदकुमार कछू सिर नीचे तैं ऊँचो न कीनो ॥३५॥

अथ बिलास हाव, लक्षण—(दोहा)

खेलत बोलत हँसत अरु चितवत चलत प्रकास ।
जल थल 'केसवदास' कहि उपजत बिबिध बिलास ॥३६॥

श्रीराधिकाजू को बिलास हाव, यथा—(कवित्त)

किलकत अलिक जु तिलक-चिलक मिस,
भौंहनि में बिभ्रमनि भावभेद दीने हैं ।
लोचननि सोचिन सकोचित नचावति हौ,
दसन चमक हीं चकित चित कीने हैं ।
'केसौदास' मंद हास अनायास दास करि,
लीनें केसोराय जिय जद्यपि प्रबीने हैं ।
मोहन के तन मन मोहिबे को मेरी आली,
तेरे मुख सुख हीं अनंत व्रत लीने हैं ॥३७॥

[३४] पैरिबो-पौरिबो (बाल० खं०) । करें कृत-किये कित (नवल०) ।

[३७] केसौदास०-मंदहास मुखबास अनियास (नवल०) । आली-सखी (बाल०) ।

श्रीकृष्णजू को बिलास हाव, यथा—(कवित्त)

जिन न निहारे ते निहोरत निहारिबे कौ,
 काहू न निहारे जिनि कैसेंहूँ निहारे हैं ।
 सुर नर नाग नव कन्यनि के प्रानपति,
 पतिदेवतानि हूँ के हियनि बिहारे हैं ।
 इहि बिधि 'केसोदास' रावरे असेष अंग,
 उपमा न उपजी बिरंचि पचि हारे हैं ।
 रूप-मद-मोचन मदन-मद-मोचन हैं,
 तीय-व्रत-मोचन बिलोचन तिहारे हैं ॥३८॥

अथ किलकिंचित हाव, लक्षण—(दोहा)

श्रम अभिलाष सगर्ब स्मित क्रोध हर्ष भय भाव ।
 उपजत एकहि बार जहूँ तहूँ किलकिंचित हाव ॥३९॥

श्रीराधिकाजू को किलकिंचित हाव, यथा—(सवैया)

कौने रसै बिहँसै लखि कौनहि कापर कोपि के भौंह चढ़ावै ।
 भूलत लाज भटू कबहूँ कबहूँ मुख अंचल मेलि दुरावै ।
 कौन कीलेति बलाय बलाय ल्यौं, तेरी दसा कहि मोहि न भावै ।
 ऐसी तौ तू कबहूँ न भई अब तोहि दई जिन बाइ लगावै ॥४०॥

श्रीकृष्णजू को किलकिंचित हाव, यथा—(सवैया)

ऐसी है गोकुल के कुल की जिनि दच्छिन नैन किये अनुकूले ।
 खंजन से मनरंजन 'केसव' हास बिलास लता लगि झूले ।
 बोलें झुकी उझकी अनबोलें फिरौ बिझुके से हिये महि फूले ।
 रूप भए सबके विष ऐसे हवै कान्ह कहौ रस कौन के भूले ॥४१॥

अथ बिब्बोक हाव-लक्षण—(दोहा)

रूप प्रेम के गर्व तें कपट अनादर होइ ।
 तहूँ उपजत बिब्बोक-रस यह जानत सब कोइ ॥४२॥

श्रीराधिकाजू को बिब्बोक हाव, यथा—(सवैया)

आवत जानि कै सोइ रही हरएँ हरि बैठे न जानि जगाई ।
 साहस कै उरु मध्य धर्यो कर जागत रोम की रोंचि जनाई ।
 नीबी बिमोचत चौंकि उठी पहिचानि झुकी बतियाँ कहि बाई ।
 बासर गाइ गँवार चरावत आवत हैं निसि सेज पराई ॥४३॥

श्रीकृष्णजू को बिबोक् हाव, यथा—(सबैया)

एक समै इक गोपी सों 'केसव' कैसहुँ हाँसी की बात कही ।
जा कहँ तात दई तजि ताहि कहा हमसों रस-रीति नहीं ।
सुनि को प्रतिऊतर देई सखी दृग-आँसुनि की अवली उमही ।
उर लाइ लई अकुलाइ तऊ अधिरातक लौं हिलकी न रही ॥४४॥

अथ बिच्छित्ति हाव-लक्षण—(दोहा)

भूषन भूषिवे को जहाँ होइ अनादर आनि ।
तहाँ बिच्छित्ति बिचारिये 'केसवदास' सुजानि ॥४५॥

श्रीराधिकाजू को बिच्छित्ति हाव, यथा—(सबैया)

तन आपनैं भाए सिगार सिगारत हैं ये सिगार सिँगारै बृथा हीं ।
ब्रजभूषन-नैननि भूख है जाकी सु तो पै सिगार उतारे न जाहीं ।
सब होत सुगंधनि हीं तें सुगंध सुगंध तें जाति सुगंध सुभाहीं ।
सखि तोहि तें हैं सब भूषन भूषित भूषन तें तुम भूषित नाहीं ॥४६॥

श्रीकृष्णजू को बिच्छित्ति हाव, यथा—(सबैया)

पान न खाए न पाग रची पलटे पट चित्त कहा धरि कै ।
कंठसिरी बनमाल मनोहर हार उतारे धरे अरि कै ।
चंदन चित्रनि लोपि सलोचन लोक बिलोकनि सों लरि कै ।
अंग सुभाइ सुबास प्रकासित लोपिहो 'केसव' क्यों करि कै ॥४७॥

अथ मोट्टाइट हाव-लक्षण—(दोहा)

हेला लीला करि जहाँ प्रकटत सात्विक भाव ।
बुधिबल रोकत सोभियै सो मोट्टाइट हाव ॥४८॥

श्रीराधिकाजू को मोट्टाइट हाव, यथा—(सबैया)

खेलत हे हरि बागे बने जहाँ बैठी पिया रति तें अति लोनी ।
'केसव' कैसहुँ पीठि में डीठि परी कुच कुंकुम की रुचि रोनी ।
मात-समीप दुराई भलें तिनि सातुक भावनि की गति होनी ।
घूरि कपूर की पूरि बिलोचन सूँधि सरोरुह ओढ़ि उड़ोनी ॥४९॥

श्रीकृष्णजू को मोट्टाइट हाव, यथा—(सबैया)

भोजन कै बृषभानु सभा महँ बैठे हे नंद सदा सुखकारी ।
गोप घने, बलबीर बिराजत, खात बनाइ बिरी गिरिधारी ।

[४६] सिगार०—हैं ए-शृङ्गार नहीं ये-शृङ्गार (नवल०); नहीं ये-नहीं सुगंध (बाल०) ।

[४७] रची—बनी (बाल०) ।

राधिका झाँकी झरोखनि झाँप सी लागि गिरे मुरझाइ बिहारी ।
सोर भयो सकुचे समुझें हरवाइ कह्यो हरि लागी सुपारी ॥५०॥

अथ कुट्टमित हाव-लक्षण—(दोहा)

केलि-कलह में सोभियै केलि कपट पट रूप ।
उपजत है तहँ कुट्टमित हाव कहत कवि भूप ॥५१॥

धीराधिकाजू को कुट्टमित हाव, यथा—(सबैया)

पहिलें हठि रुठि चली उठि पीठि दै मैं चितई सखि तैन लखी री ।
पुनि धाइ घरें हरिजू की भुजानि तैं छूटिबे कों बहु भाँति झखी री ।
गहि कै कुच पीड़न दन्त नखच्छत बैरिनि की मरजाद नखी री ।
पुनि ताही को पान खवावति है उलटी कछू प्रीति की रीति सखी री ॥५२॥

श्रीकृष्णजू को कुट्टमित हाव, यथा—(सबैया)

देखतहीं जिहि मौन गही अरु मौन तजें कटु बोल उचारे ।
सौंह कियें हूँ न सौंहों कियों मनुहारि कियें हूँ न सूघें निहारे ।
हा हा कै हारि रहे मनमोहन पाइ परें जिनि लातन मारे ।
मंडत हैं मुहँ ताही को अंक लै हैं कछू प्रेम के पाठ निन्यारे ॥५३॥

अथ बोधक हाव-लक्षण—(दोहा)

गूढ़ भाव को बोध जहँ 'केसव' औरहि होइ ।
तासों बोधक हाव सब, कहत सयाने लोइ ॥५४॥

धीराधिकाजू को बोधक हाव, यथा—(सबैया)

बैठी हुती वृषभान-कुमारि सखीनि की मंडली मंडि प्रबोनी ।
लै कुँभिलानो सो कंज परी इक पाइनि आई गुवारि नवीनी ।
चंदन सों छिरक्यों वह वाकहँ पान दए करना-रस-भीनी ।
चंदन चित्र कपोलनि लोपि कै अंजन आँजि बिदा करि दीनी ॥५५॥

श्रीकृष्णजू को बोधक हाव, यथा—(सबैया)

सखि गोकुल गोप-सभा महँ गोबिंद बैठे हुते दुति कों धरि कै ।
जनु 'केसव' पूरनचंद लसै चित चारु चकोरनि को हरि कै ।
तिनकों उलटो करि आनि दियो किहुँ नीरज नीर नएँ भरि कै ।
कहि काहे तें नैंक निहारि मनोहर फेरि दयो कलिका करि कै ॥५६॥

[५०] झाँप-झाँकि (रस०) राधिका०-राधिका झाँकि झरोखन हूँ कवि केशव रसिक गिरे सुबिहारी (नवल०) ।

[५६] गोकुल-मोहन (बाल०, रस०, बाल० खं०, नवल०) । चारु-चोर (नवल०) ।

(दोहा)

राधा राधारमन के कहे यथामति हाव ।
ढिठई 'केसवराइ' की छमियो कबि कविराव ॥१७॥
इति श्रीमन्महाराजकुमारइंद्रजितविरचितायां रसिकप्रियां
राधिकाकृष्णहावभाववर्णनं नाम षष्ठः प्रभावः ॥४॥

७

अथ अष्ट नायिका-वर्णन—(दोहा)

ये सब जितनी नायिका, बरनी मति-अनुसार ।
'केसवदास' बखानियै ते सब आठ प्रकार ॥१॥
स्वाधीनपतिका, उत्कहीं, बासकसज्जा नाम ।
अभिसंधिता बखानियै और खंडिता बाम ॥२॥
'केसव' प्रोषितप्रेयसी लब्धाविप्र सु आनि ।
अष्ट नाइका ये सकल अभिसारिका सुजानि ॥३॥

अथ स्वाधीनपतिका-लक्षण—(दोहा)

'केसव' जाके गुन-बँध्यो सदा रहै पति संग ।
स्वाधीनपतिका तासु कों, बरनत प्रेम-प्रसंग ॥४॥

प्रच्छन्न स्वाधीनपतिका, यथा—(सवैया)

'केसव' जीवन जो ब्रज को पुनि जीवहु तें अति बापहि भावै ।
जापर देव-अदेव-कुमारनि वारत माइ न बार लगावै ।
ता हरि पैं तू गँवार की बेटी महावर पाइ झवाँइ दिवावै ।
हौं तो बची अब हाँसनि हूँ, ऐसैं और जौ देखै तौ ऊतर आवै ॥५॥

प्रकाश स्वाधीनपतिका, यथा—(कवित्त)

चोली को सो पान तोहि करत सँवारिबोई,
मुकुर ज्यों तोहीं बीच मूरति समानी है ।
तोहीं तियदेवता पैं पायो पति 'केसोदास',
पतिनी बहुत पतिदेवता बखानी है ।
तेरे मनोरथ भागीरथ-रथ पाछै पाछै,
डोलत गुपाल मेरो गंगा को सो पानी है ।

ऐसी बात कौन जु मानी सुनि मेरी रानी,
उनकें तौ तेरी बानी बेद की सी बानी है ॥६॥

अथ उत्का-लक्षण—(दोहा)

कौनहुँ हेतु न आइयो, प्रीतम जाके धाम ।
ताकों सोचति सोच हिय 'केसव' उत्का बाम ॥७॥

प्रच्छन्न उत्का, यथा—(कवित्त)

किधौं गृह काज कै न छूटत सखा-समाज,
किधौं कछु आज ब्रत-बासर बिभात तैं ।
दीनो तैं न सोधु, किधौं काहू सों भयो बिरोधु,
उपज्यो प्रबोधु किधौं उर अवदात तैं ।
सुख में न देहु किधौं मोही सों कपट-नेहु,
किधौं देखि मेहु अति डरे अधिरात तैं ।
किधौं मेरी प्रीति की प्रतीति लेत 'केसोदास',
अजहूँ न आए मन सु धौं कौन बात तैं ॥८॥

प्रकाश उत्का, यथा—(सवैया)

सुधि भूलि गई, भुलए किधौं काहू कि भूलेई डोलत बाट न पाई ।
भीत भए किधौं 'केसव' काहू सों, भेंट भई कोऊ भामिनि भाई ।
मग आवत हैं किधौं आइ गए, किधौं आवहिं गे सजनी सुखदाई ।
अब आए न नंदकुमार बिचारि, सु कौन बिचार अबार लगाई ॥९॥

अथ बासकसज्जा-लक्षण—(दोहा)

बासकसज्जा होइ सो, कहि 'केसव' सबिलास ।
चितवै रति गृह द्वार त्यों पिय-आवनि को आस ॥१०॥

बासकसज्जा, यथा—(कवित्त)

चंदन बिटप बपु कोमल अमल दल,
ललित वलित लता लपटी लवंग की ।
'केसोदास' तामें दुरी दीप की सिखा सी दौरि,
दुरवति नील बास दुति अंग अंग को ।
पौन पानी पंछी पसु बस सबद जित जित,
होइ तित तित चौकि चाहें चोप संग की ।
नंदलाल-आगम बिलोकें कुंजजाल बाल,
लीनी गति तेहीं काल पंजर-पतंग की ॥११॥

प्रकाश वासकसज्जा, यथा—(सवैया)

भाषति है सुख-बैन सखी सहलास हियें अभिलाषनि जोहै ।
कोमल हासनि नैन बिलासनि अंग-सुवासनि कै मन मोहै ।
मूरतिवति किधौ तुलसी तुलसी-बन में, रति-मूरति को है ।
कुंज बिराजति गोपबधू कमला जनु कुंज कुटी महि सोहै ॥१२॥

अथ अभिसंधिता-लक्षण—(दोहा)

मान मनावत हूँ करै, मानद को अपमान ।
दूनो दुख तिन बिनु लहै अभिसंधिता बखान ॥१३॥

प्रच्छन्न अभिसंधिता, यथा—(कवित्त)

बार बार बोले जब बोल्यो न बालिस तब,
बालक ज्यों बोलिबे कौं कत बिललातु है ।
ज्यों ज्यों परे पाइनि त्यों पाहन तें पीन भयो,
होतु कहा अब कियें माखन सो गातु है ।
'केसोदास' सब छाड़ि कियो हठ ही सों हेत,
बाहु छाड़ि जिय जिये बिनु कहा जातु है ।
ऐसे प्यारे पीय ही सों मान्यो न मनायो तब,
ऐसी तोहि बूझियै जु पाछें पछितातु है ॥१४॥

प्रकाश अभिसंधिता, यथा—(सवैया)

पाइ परें हूँ तें प्रीतम त्यों कहि 'केसव' क्यों हूँ न मैं दृग दीनी ।
तेरी सखी सिख सीखी न एक हूँ रोष ही की सिख सीखि जु लीनी ।
चंदन चंद समीर सरोज जरै दुख देह भई सुख हीनी ।
में उलटी जु करी बिधि, मों कहूँ न्यायनि ही उलटी बिधि कीनी ॥१५॥

अथ खंडिता-लक्षण—(दोहा)

आवन कहि आवै नहीं आवै प्रीतम प्रात ।
जाके घर सो खंडिता कहै जु बहु बिधि बात ॥१६॥

प्रच्छन्न खंडिता, यथा—(कवित्त)

आँखिनि जौ सूझत न काननि तो सुनियत,
'केसोदास' जैसे तुम लोकनि में गाए हो ।
बंस को बिसारी सुधि कांक ज्यों चुनत फिरौ,
जूठे सीठे सीथ सठ-ईठ ढीठ ठाए हो ।
दूरि दूरि करत हूँ दौरि दौरि गहौ पाइ,
जानौ न कुठोर ठौर जानि जिय पाए हो ।

काको घर घालिबे कौं बसे कहाँ घनस्याम,
घृष्ट ज्यों घुसन प्रात मेरे गृह आए हौ ॥१७॥

प्रकाश खंडिता, यथा—(सर्वया)

आजु कछू अँखियाँ हरि और सी मानों महावर माहँ रँगो हैं ।
मोहन मोही सी लागति मोहि इतें पर मोहन मोह लगी हैं ।
मेरी सौं मोसहूँ मानहुँ बेगि हियें रस-रोष की रीति जगी हैं ।
मेरे बियोग के तेज तर्चीं किधौं 'केसव' काहू के प्रेम पगी हैं ॥१८॥

अथ प्रोषितपतिका-लक्षण—(दोहा)

जाकों प्रीतम दै अवधि, गयो कौन हूँ काज ।
ताकों प्रोषितप्रेयसी कहि बरनत कबिराज ॥१९॥

प्रच्छन्न प्रोषितपतिका, यथा—(सर्वया)

'केसव' कैसेहूँ पूरबपुन्य मिल्यो मनभावतो भाग भरघो री ।
जानै को माई कहा भयो क्योंहूँ जु औधि को आधिक घोस टरघो री ।
ताकहूँ तू न अजौं हँसि बोले जऊ मेरो मोहन पाई परघो री ।
काठहू तें हूठ तेरो कठोर इतें बिरहानल हू न जरघो री ॥२०॥

प्रकाश प्रोषितपतिका, यथा—(सर्वया)

औधि दै आए उहाँ उनसों यह भाजन कै अबहीं हम ऐ हैं ।
ताकहूँ तो अब लौं बहराइ कै राखी बराचइ मरू करि मैं हैं ।
बैठे कहा इनके ढिग 'केसव' जाहु नहीं कोउ जाइ जु कै हैं ।
जानत हौं उनि आँखनि तें अँसुवा उमगे बहुरघो पुनि रेंहें ॥२१॥

अथ विप्रलब्धा-लक्षण—(दोहा)

दूती सों संकेत कहि लैन पठाई आप ।
लब्धाबिप्र सो जानियै अनआए संताप ॥२२॥

प्रच्छन्न विप्रलब्धा, यथा—(सर्वया)

सूल से फूल सुबास कुबास सी भाकसी से भए भौन सभागे ।
'केसव' बाग महाबन सो जुर सी चढ़ी जोन्ह सबै अँग दागे ।
नेह लम्यो उर नाहर सी निसि नाहू घरीक कहूँ अनुरागे ।
गारी से गीत बिरी बिष सी सिगरेई सिंगार अंगार से लागे ॥२३॥

प्रकाश विप्रलब्धा, यथा—(कवित)

देखत उदधिजात देखि देखि निज गात,
चंपक के पात कछू लिख्यो है बनाइ कै ।
सकल सुगंध ढारि फूल-माल तोरि डारि,
दूतिका कों मारि पुनि बीरी बगराइ कै ।

लै लै दीह साँस तजि बिबिध बिलास हास,
 'केसोदास' ह्वै उदास चली अकुलाइ कै।
 सेइ कै संकेत सुनो कान्हजू सों बोलि ऊनो,
 मोसों कर जोरि दूनो दूनो दुख पाइ कै ॥२४॥

अथ अभिसारिका-लक्षण—(दोहा)

हित तें कै मद-मदन तें पिय पै मिलै जु जाइ।
 सो कहियै अभिसारिका बरनी त्रिविध बनाइ ॥२५॥

अथ स्वकीया अभिसारिका-लक्षण—(दोहा)

अति सलज्ज पग मग धरै चलत बधुन के संग।
 स्वकिया को अभिसार यह भूषन भूषित अंग ॥२६॥

परकीया अभिसारिका, यथा—(दोहा)

जनी सहेली सोभहीं बंधु बधू-सँग चार।
 मग में देइ बराइ डग, लज्जा को अभिसार ॥२७॥

प्रच्छन्न प्रेमाभिसारिका, यथा—(कवित्त)

लीनो हम मोल अनबोलें आई जान्यो मोह,
 मोहि घनस्याम घनमाला बोलि लाई है।
 देख्यो ह्वैहै दुख जहाँ देह हू न देखो परै,
 देखी कौसैं बाट 'केसो' दामिनी दिखाई है।
 ऊँचे नीचे बीच-कीच कंटकनि परे पग,
 साहस-गयंद-गति अति सुखदाई है।
 भागी भयकारी निसि निपट अकेली तुम,
 नाहीं प्राननाथ साथ प्रेमजू सहाई है ॥२८॥

प्रकाश प्रेमाभिसारिका, यथा—(कवित्त)

नैननि की अतुराई बैननि की चतुराई,
 गात की गुराई न दुरति दुति चाल की।
 आपने चरित्रनि के चित्रत बिचित्र चित्र,
 चित्रनी ज्यों सोहै साथ पुत्रिका गुवाल की।
 चंद्र के समान चारु चाय सों चढ़ाएँ फिरै,
 करिकै तिहारे मृग-नैननि की पालकी।

[२६] पग०—डगमग भरी (बाल०)। संख्या २६-२७ 'रस०' में नहीं हैं।

[२८] परे-पीड़े (नवल०)।

कीजै पय-पान अरु खैये पान प्रानप्यारे,
आई है जू आई अलबेली ग्वाल कालि की ॥२६॥

प्रच्छन्न गर्वाभिसारिका, यथा—(सवैया)

लाड़िली लीली कलोरी लुरी कहँ लाल लुके कहँ अंग लगाइ कै ।
आजु तौ 'केसव' कैसहुँ लेखवै लागन देति न देखहु आइ कै ।
बेगि चली उठि आई लिवावन दौरि अकेलियै हौं अकुलाइ कै ।
भूलिहुँ गोकुल गाँउ में गोबिंद कीजै गरुर न गाइ चराइ कै ॥२७॥

प्रकाश गर्वाभिसारिका, यथा—(कवित्त)

चंदन चढ़ाइ चारु अंबर के उर हार,
सुमन-सिगार सोहै आनंद के कंद ज्यों ।
वारो कोरि रतिनाथ बीन में बजावै गाथ,
मृगज मराल साथ बानी जगबंद ज्यों ।
चौंकि चौंकि चकई सी सौतिन की दूती चलीं,
सौतैं भई दीनी अरबिंद-दुति मंद ज्यों ।
तिमिर-वियोग भूले लोचन चकोर फूले,
आई ब्रजचंद चलि चंदावलि चंद ज्यों ॥२८॥

प्रच्छन्न कामाभिसारिका, यथा—(कवित्त)

उरझत उरग चपत चरननि फन,
देखत बिबिध निसिचर दिसि चारि के ।
गनति न लागत मुसल-धार सुनत न,
झिल्लीगन-घोष निरघोष जलधारि के ।
जानति न भूषन गिरत, पट फाटत न,
कंटक अटक उर उरज उजारि के ।
प्रेतनि की पूंछैं नारि कौन पै तै सीख्यो यह,
जोग कैसो सार अभिसार अभिसारिके ॥२९॥

प्रकाश कामाभिसारिका, यथा—(सवैया)

गोप बड़े बड़े बैठे अथाइन 'केसव' कोटि सभा अवगाहीं ।
खेलत बालक-जाल गलीन में बाल बिलोकि बिलोकि बिकाहीं ।
आवति जाति लुगाईं चहूँ दिसि धूँघट में पहिचानति छाहीं ।
चंद सो आननु काढ़ि कहा चली सूझनु है कछु तोहि की नाहीं ॥३०॥

[२६] साथ-संग (रस०) । चढ़ाएँ फिर-चढ़ी फिरति (बाल०, नवल०) ।

[३०] उठि-चलि (नवल०) । लिवावन-बुलावन (नवल०) ।

(दोहा)

‘केसवदास’ सु तीन बिधि, बरनी स्वकिया नारि ।
 परकीया द्वै भाँति पुनि आठ आठ अनुहारि ॥३४॥
 उत्तम मध्यम अधम अरु तीन तीन बिधि जान ।
 प्रकट तीन सै साठ तिय ‘केसवदास’ बखान ॥३५॥

अथ उत्तमा-लक्षण—(दोहा)

मान करै अपमान तें तजे मान तें मान ।
 पिय देखें सुख पावई ताहि उत्तमा जान ॥३६॥

उत्तमा, यथा—(सबैया)

होइ कहा अब के समुझे न तबै समुझे जब हे समुझाए ।
 एक ही बंक बिलोकनि माहूँ अनेक अमोल बिबेक बिकाए ।
 जानिपनो न जनावहु जी जनमावधि लौं उहि जानि हौं पाए ।
 बात बनाइ बनाइ कहा कहौ लेहु मनाइ मनाइ ज्यों आए ॥३७॥

अथ मध्यमा-लक्षण—(दोहा)

मान करै लघु दोष तें छोड़ै बहुत प्रनाम ।
 ‘केसवदास’ बखानियै ताहि मध्यमा बाम ॥३८॥

मध्यमा, यथा—(सबैया)

भूलेहूँ सूघें नहीं चितयो इहि कान्ह कियो लचि लालच केतौ ।
 हाहा कै हरि रहे मनमोहन पाइ परे त्यों परेई रहे तौ ।
 हौं तो यहै तब ही की बिचारति होतौ गुमान क्यों याहि धौं एतौ ।
 लाँबी लटैं अरु पातरी देह जु नैंक बड़ी बिधि आँखि न देतौ ॥३९॥

अथ अधमा-लक्षण—(दोहा)

रूठै बारहि बार जो तूठै बेहीं काज ।
 ताही सों अधमा सबै कहि बरनत कबिराज ॥४०॥

अधमा, यथा—(सबैया)

काटों कपटु जो कान्ह सों कीजै री बाँटों वे बोल कुबोल कसाई ।
 फारों सु घूँघट ओट अटै सोई दीठि फोरो अध कों जु घसाई ।
 ‘केसव’ ऐसी सखीन कों मारों सिखै के करैं हित की जु हँसाई ।
 बारहि बार को रूसबो बारों बहाऊँ सु बुद्धि बियोग-बसाई ॥४१॥

(दोहा)

इहि बिधि नायक-नायिका बरनहुँ सहित बिबेक ।
जाति काल बय भाव तें 'केसव' जानि अनेक ॥४२॥

अथ अगम्या नायिका—(दोहा)

तजि तरुनी संबंध की जानि मित्र द्विजराज ।
राखि लेइ दुख भूख तें ताकी तिय तें भाज ॥४३॥
अधिक बरन अरु अंग घटि, अंत्यज जन को नारि ।
तजि बिघवा अरु पूजिता रमियहु रसिक बिचारि ॥४४॥
यह संजोग सिंगार कौ 'केसव' बरनी रीति ।
बिप्रलंभ सिंगार की रीति कहौ करि प्रीति ॥४५॥

इति श्रीमन्महाराजकुमारइंद्रजीतविरचितायां रसिकप्रियायामष्ट
नायिकासंभोगशृङ्गार वर्णनं नाम सप्तमः प्रभावः ॥७॥

८

अथ बिप्रलंभ शृङ्गार लक्षण—(दोहा)

बिछुरत प्रीतम प्रीतमा होत जु रस तिहि ठोर ।
बिप्रलंभ सिंगार कहि बरनत कबि-सिरमौर ॥१॥

अथ बिप्रलंभ शृङ्गार-भेद-वर्णन—(दोहा)

बिप्रलंभ सिंगार को चारि प्रकार प्रकास ।
प्रथम पूर्व-अनुराग पुनि करुना, मान, प्रवास ॥२॥

अथ पूर्वानुराग लक्षण—(दोहा)

देखतहीं दुति दंपतिहि उपजि परत अनुराग ।
बिन देखें दुख देखियै सो पूरब-अनुराग ॥३॥

श्रीराधिकाजू को प्रच्छन्न पूर्वानुराग, यथा—(कवित्त)

फूल न दिखाव सूल फूलत है हरि बिनु,
दूरि करि माल बाल-ब्याल सी लगति है ।
चँवर चलाव जिन, बीजन हलाव मति,
'केसव' सुगंध बाय बयासी लगति है ।

चंदन चढ़ाव जिन ताप सी चढ़ति तन,
कुंकम न लाव अंग आग सी लगति है ।
बार बार बरजत बावरी है वारों आनि,
बीरो न खवाव बीर बिष सी लगति है ॥४॥

श्रीराधिकाजू को प्रकाश पूर्वानुराग, यथा—(सर्वया)

‘केसव’ कैसेहूँ ईठनि दीठि ह्वै दीठ परे रति-ईठ कन्हाई ।
ता दिन तें मन मेरे कों आनि भई सु भई कहि क्यों हूँ न जाई ।
होइगी हाँसी जौ आवै कहूँ कहि जानि हितु हित बूझन आई ।
कैसेँ मिलौरी मिले बिनु क्यों रहौँ नैननि हेत हियें डर माई ॥५॥

श्रीकृष्णजू को प्रच्छन्न पूर्वानुराग, यथा—(सर्वया)

एक समै वृषभान-सुता सजनी-गन में जननी-संग बैसी ।
जात उन्हें चितयो जिहि रीति सुप्रीति हियें कहि जाइ न तैसी ।
ता दिन तें जग की जुबतीनि की लागत ‘केसव’ बात अनैसी ।
चाहि फिरघो चित चक्र चहूँ न कहूँ दुति देखियै वा मुख कैसी ॥६॥

श्रीकृष्णजू को प्रकाश पूर्वानुराग, यथा—(सर्वया)

भाँति भली वृषभान-लली जब तें अँखियाँ अँखियानि सो जोरी ।
भौह चढ़ाइ कछु डरपाइ बुलाइ लई हँसि कै बस भोरी ।
‘केसव’ काहूँ ल्यौ ता दिन तें रुचि कै न बिलोकति केतौ निहोरी ।
लीलत है सब ही के सिंगार अँगारनि ज्यों बिनु चंद चकोरी ॥७॥

अथ दश दशा-वर्णन—(दोहा)

अबिलोकनि आलाप तें मिलिबे कौं अकुलाहि ।
होत दसा दस बिनु मिलें ‘केसव’ क्यों कहि जाहि ॥८॥

दश दशा नाम-कथन—(दोहा)

अभिलाष सु चिता गुनकथन स्मृति उद्वेग प्रलापु ।
उन्माद व्याधि जड़ता भएँ होतु मरन पुनि आपु ॥९॥

अथ अभिलाष-लक्षण—(दोहा)

नैन बैन मन मिलि रहें चाहै मिल्यो सरीर ।
कहि ‘केसव’ अभिलाष यह बरनत हैं कबि धीर ॥१०॥

श्रीराधिकाजू को प्रच्छन्न अभिलाष, यथा—(सर्वया)

सुधि बुद्धि घटी दुति देह मिटी दिन हीं दिन चाहियै बाढ़ति सी ।
कछु ‘केसव’ आपने पेट की पार दुरावति है मुख काढ़ति सी ।
बिसरघो सुख भूख सखी निसि नींद परी चित-बाहन आढ़ति सी ।
गिरि गो कछ, गाँठि तें छटि छबीली सु काहे तें डोलति डाढ़ति सी ॥११॥

श्रीराधिकाजू को प्रकाश अभिलाष, यथा—(सर्वैया)

जो कहूँ देखें लगै दिख-साध दिखावत हीं दिन हीं दुख पैहीं ।
या ही में 'केसव' देखियै वातन देखिहौं देखि सखी अधिकहौं ।
यों उनकी दुति देखिहौं देह ज्यों आपनो देह न देखन दैहीं ।
देखिबे को बहरावति मोहि सु हौंज्व कहा कछु देखि ही लैहीं ॥१२॥

श्रीकृष्णजू को प्रच्छन्न अभिलाष, यथा—(सर्वैया)

पाइ परौ बलि जाऊँ मनोहर आपुन सी न करौ अब ताहू ।
देखें अघात नहीं दिन के फिर बारक धौं अनदेखें ही जाहू ।
मोसों कही सु कही अब 'केसव' कैसहूँ कान्ह पयाव न काहू ।
डाढ़हुगे जु कहूँक इती रुचि तातो है नैंक सिराइ धौं खाहू ॥१३॥

श्रीकृष्णजू को प्रकाश अभिलाष, यथा—(सर्वैया)

है कोइ माई हितु इनको, यह जाइ कहै किहि बाइ बहे हैं ।
न्याय हीं 'केसव' गोकुल की कुलटा कुलनारिनि नाउ लहे हैं ।
देखि री देखि लगाइ टकी इत सोनो सो घोलि कै चाहि रहे हैं ।
को है री को जैसैं जानत नाहिन काल्हि ही वाके सँदेस कहे हैं ॥१४॥

अथ चिंता-लक्षण—(दोहा)

कैसें कै मिलियै मिलें, हरि कैसें बस होइ ।
यह चिंता चित चेत कै बरनत हैं सब कोइ ॥१५॥

श्रीराधिकाजू की प्रच्छन्न चिंता, यथा—(दोहा)

आपुनहीं तन आपनो होत न देखें जाहि ।
आपुनहीं तें आपनो क्यों मन करिहै ताहि ॥१६॥

श्रीराधिकाजू की प्रकाश चिंता, यथा—(कबित)

प्रेम भय भूप रूप सचिव सँकोच सोच,
बिरह-बिनोद पील पेलियत पचि कै ।
तरल तुरंग अवलोकनि अनंत गति,
रथ मनोरथ रहैं प्यादे गुन गचि कै ।
दुहुँ ओर परी जोर घोर घन 'केसोदास',
होइ जीति कौन की को हारै जिय लचि कै ।
देखत तुम्हैं गुपाल तिहि काल उहि बाल,
उर सतरंज की सी बाजी राखी रचि कै ॥१७॥

[१२] कहूँ-कही (बाल०); (रस०) । दुति-दुरि (बाल०; नवल०) ।

[१४] चाहि-डाहि (बाल०) ।

श्रीकृष्णजू की प्रच्छन्न चिंता, यथा—(कवित्त)

'केसोदास' सकल सुबास को निवास तन,
कहि कब भृकुटि-बिलास त्रास छोलिहै ।
कैसो है सुदिन बड़भागी अनुरागी जिहि,
मेरो दृग वाके संग लागि लागि डौलिहै ।
ऐसी ह्वैहै ईस पुनि आपने कटाछ मृग-
मद धनसार सम मेरे उर ओलिहै ।
दीप के समीप पुनि दीपति बिलोकें वह,
चित्र की सी पूतरी सु क्यों हूँ हँसि बोलिहै ॥१८॥

श्रीकृष्णजू की प्रकाश चिंता, यथा—(सवैया)

राधिका की जननी कों जनी कोऊ क्यों हूँ स्वयंवर बात जनावै ।
देवकुमार से गोपकुमारनि मान दै दै वृषभान बुलावै ।
'केसव' कैसहु बाल भली वह माल सु मेरे हियें पहिरावै ।
तोहि सखी समदै संग वाकें सु क्यों यह बात सबै बनि आवै ॥१९॥

अथ गुणकथन-लक्षण—(दोहा)

जहँ गुनगन गनि देह-दुति बरनत बचन बिसेखि ।
ताकहँ जानहु गुन-कथन, मनमथ-मथन सु लेखि ॥२०॥

श्रीराधिकाजू की प्रच्छन्न गुणकथन, यथा—(कवित्त)

कीरति सहित नित 'केसव' कुंवर कान्ह,
केवल अकीरति नृपति सोम मानियै ।
छुवत चंपक पात कुंभिलात जात तन,
अति हरषत गात हरिजू को जानियै ।
कोमल सुबासजुत प्यारे के परम पानि,
कंटक-कलित नाल-नलिन बखानियै ।
लोचन बिसाल चाह मदनगुपालजू के,
मदन-सरनि दरसन-रस हानियै ॥२१॥

श्रीराधिकाजू की प्रकाश गुणकथन, यथा—(सवैया)

खंजन हैं मनरंजन 'केसव' रंजन नैन किधौं मति जी की ।
मीठी सुधा कि सुधाघर की दुति दंतनि की किधौं दाढ़िम ही की ।
चंद भलो मुखचंद किधौं सखि सूरति काम कि कान्ह की नीकी ।
कोमल पंकज कै पद-पंकज प्रानपियारे कि सूरति पी की ॥२२॥

[१८] दृग-बीर (बाल०); अंग (नवल०) ।

[१९] जनावै-चलावै (बाल०) ।

[२१] सुबासु-सुबाहु (बाल०) ।

श्रीकृष्णजू को प्रच्छन्न गुणकथन, यथा—(सवैया)

जौ कहौ 'केसव' सोम सरोज सुधासुर भृंगनि देह दहे हैं ।
दाढ़िम के फल श्रीफल बिद्रुम हाटक कोटिक कष्ट सहे हैं ।
कोक कपोत करी अहि केहरि कोकिल कीर कुचील कहे हैं ।
अंग अनूपम वा तिय के उनकी उपमा कहैं वेई रहे हैं ॥२३॥

श्रीकृष्णजू को प्रकाश गुणकथन, यथा—(सवैया)

लोचन बीच चुभी रुचि राधे की 'केसव' क्यों हैं सु जाति न काढ़ी ।
मानहुँ मेरें गही अनुरागनि कुंकम-पंक-अलंकृत गाढ़ी ।
मेरियें लागि रही तनुता जनु यों दुति नील निचोल की बाढ़ी ।
मेरे ही मानों हियें कहैं सुँघति यों अरबिंद दियें मुख ठाढ़ी ॥२४॥

अथ स्मृति-लक्षण—(दोहा)

और कछु न सुहाइ जहँ भूलि जाहि सब काम ।
मन मिलिबे की कामना ताही स्मृति है नाम ॥२५॥

श्रीराधिकाजू की प्रच्छन्न स्मृति, यथा—(सवैया)

बोल्यो सुहाइ न खेल्यो हँस्यो अरु देख्यो सुहाइ न दुःख बढ़यो सो ।
नीकियो बात सुनैं समुझैं न मनौ मन काहू के मोह मढ़यो सो ।
'केसव' ढूढ़ति यों उर में मतिमूढ़ भयो गुन गूढ़ पढ़यो सो ।
को करै साज बजावे को बीनहि वाको कछु चित चाक चढ़यो सो ॥२६॥

श्रीराधिकाजू की प्रकाश स्मृति यथा—(सवैया)

मेरे मिलाए हीं पै मिलिहौ मनमोहन सों मन मोहि न दीजै ।
मौनहि मौन बनै न कछु अब क्यों मन मानद के रस भीजै ।
ऐसे हीं 'केसव' कैसें जियौ अहो पान न खाहु तौ पान्यौ न पीजै ।
जानिहै कोऊ कहा करिहौ तब सोच न एतौ संकोच तौ कीजै ॥२७॥

श्रीकृष्णजू की प्रच्छन्न स्मृति, यथा—(सवैया)

घोरि घनो घनसार घस्यो घनस्याम सु चंदन छवैं तन तूल्यो ।
'केसव' कुंज को कूल चितै प्रतिकूल भयो सुभ फूलनि फूल्यो ।
भूले से डोलत बोलतहुँ उत जात कितैं मन संभ्रभ भूल्यो ।
जानति हौ यह काहू के आजु मनोहर हार हिंडोरनि झूल्यो ॥२८॥

श्रीकृष्णजू की प्रकाश स्मृति, यथा—(सवैया)

बासन बास भए बिष 'केसव' डासन डासन की गति लीनैं ।
चंदन चाँदनी त्यों चित चाहै न चंद्रक चंद चिता-रस-भीनैं ।

[२४] अलंकृत-कलंकित (बाल०) ।

[२७] सोच न एतौ-सोचु न तौ ही (बाल०) ।

पान न खात न पान करै कछु हास-बिलास बिदा करि दीनै ।
ऐसी हैं गोकुल के कुल की जिहि गोकुलनाथ के ये ढँग कीनै ॥२६॥

अथ उद्वेग-लक्षण—(दोहा)

दुखदायक हवै जात जहँ सुखदायद अनयास ।
सो उद्वेग दसा दुसह जानहु 'केसवदास' ॥३०॥

श्रीराधिकाजू को प्रच्छन्न उद्वेग, यथा—(सर्वैया)

चन्द नहीं विषकंद है 'केसव' राहु इहीं गुन लील न लीनों ।
कुंभज पावन जानि अपावन धोखें पियौ पचि जानि न दीनों ।
या सों सुधाधर सेष बिषाधर नाँउ धरयो बिधि है बुधिहीनों ।
सूर सों माई कहा कहियै जनि पापी लै आप बराबर कीनों ॥३१॥

श्रीराधिकाजू को प्रकाश उद्वेग, यथा—(सर्वैया)

'केसव' कालिह बिलोकि भजी वह, आजु बिलोकें बिना सु मरै जू ।
बासर बीस बिसे विष मीड़ियै राति जुन्हाई की जोति जरै जू ।
पालिक तें भुव भूमि तें पालिक आलि करोरि कलालि करै जू ।
भूषन देह कछू ब्रजभूषन दूषन देह को हेरि हरै जू ॥३२॥

श्रीकृष्णजू को प्रच्छन्न उद्वेग, यथा—(सर्वैया)

मेघनि ज्यों हँसि हंस न हेरत, हंसनि ज्यों घनरूप न पीवै ।
कांजनि ज्यों चित चन्द न चाहत चन्द ज्यों कांजनि क्यों हूँ न छोवै ।
ताल तें वागनि बाग तें तालनि ताल तमाल की जात न सीवै ।
कैसी हैं 'केसव' वे जुवतीं सुनि ऐसी दसा पिय की पल जीवै ॥३३॥

श्रीकृष्णजू को प्रकाश उद्वेग, यथा—(सर्वैया)

सोचि सखी भरि लेति बिलोचन, काँपति देखति फूलें तमालहि ।
भूले से डोलत बोलत नाहिन, बाग गए किधौं तेरे ही तालहि ।
देख्यो जी चाहति देखि न आवति ? ऐसे में हौं न दिख्यै री लालहि ।
आजु कहा दिखसाध लगी जब देख्यो सुहाइ कछू न गुपलहि ॥३४॥

अथ प्रलाप-लक्षण—(दोहा)

भँवत रहै मन भौर ज्यों है तन मन परताप ।
बचन कहै प्रिय पच्छ सों तासों कहत प्रलाप ॥३५॥

श्रीराधिकाजू को प्रच्छन्न प्रलाप, यथा—(सर्वैया)

खेल न हाँसी न, खोरि अठाउ न, हेतु न बैरु हियो कपै रोसों ।
लेनो न देनो, हलाव भलाव न, नातो न गोतो कहा कहाँ तोसों ।

[३१] जनि पापी लै-यह पापु जु० (बाल०) ।

[३२] कलालि-कलाप (नवल०) ।

आनि दियो दुख में दुख 'केसव' कैसें हँसौं रो कहा कहि कोसों ।
नैन भरिभरि ग्वाल कहै अरी देख्यो तैं कान्ह कहा कह्यो मोसों ॥३६॥

श्रीराधिकाजू को प्रकाश प्रलाप, यथा—(सर्वया)

आलिनि माँझ मिली हुती खेलति, जानै को कान्ह धौं आए कहाँ तैं ।
डीठिहि डीठि परचो न कछू सठ ठीठ गही हठि पोठि की घातैं ।
गई गड़ि लाजनि हीं हिय हौं तौ उठी जरि 'केसव' काँपती यातैं ।
इती रिस मैं न बची कबहूँ पै रही पचि हौं अँखियान के नातैं ॥३७॥

श्रीकृष्णजू को प्रच्छन्न प्रलाप, यथा—(सर्वया)

नील निचोल दुराइ कपोल बिलोकति ही करि ओलिक तोही ।
जानि परी हँसि बोलति भीतर भाजि गई अवलोकत मोही ।
बूझिबे की जक लागी है कान्हहि 'केसव' कै रुचि रूप लिलोही ।
गोरस की सौं बबा की सौं तोहि कि बार लगी कहि मेरी सौं को ही ॥३८॥

श्रीकृष्णजू को प्रकाश प्रलाप, यथा —(कवित्त)

मोहन मरीचिका सो हास, घनसार को सो,
बास, मुख रूप की सी रेखा अवदात हैं ।
'केसोदास' बेनी तौ त्रिबेनी सी बनाइ गुही,
जामें मेरे मनोरथ मुनि से अन्हात हैं ।
नेह उरझे से नैन देखिबे कौं बिरझे से,
बिझुकी-सी भौंहें उझके से उरजात हैं ।
लोचन कमल चाह तिन पर पाइ देति,
तेरे घर आई आजु कहि कैसी बात हैं ॥३९॥

अथ उन्माद-लक्षण—(दोहा)

तरकि उठै पुनि उठि चलै चितै रहे मुँह देखि ।
सो उन्माद जनावहीं रोवै हँसै बिसेखि ॥४०॥

श्रीराधिकाजू को प्रकाश उन्माद, यथा—(सर्वया)

केसव चौंकति सी चितवै, छतिया घरकै, तरकै तकि छाँहीं ।
बूझियँ और कहै मुख और सु और की और भई पल माँहीं ।

[३६] भलाव न-भला उत (बाल०) । भरिभरि-भरे भरि (बाल०); नैननि नीर भरे (नवल०) ।

[३७] डीठ-डीठ (रस०) । गई गड़ि०-हौं गड़ि लाजनि ही जु गई पै (बाल०) । यातैं-पातैं (बाल०) ।

[३८] निचोल-निबोर (रस०) ।

[३९] लोचन कमल०-देबी सी बनाई कौन की है जाई यह तेरे घर आई आजु कह कैसी बात है (रस०; नवल०) ।

डीठि लगी, किधौं बाय लगी, मन भूलि परघो, कै करघो कछु कांहीं ।
घूँघट की घट की पट की हरि आजु कछू सुधि राधिकै नाहीं ॥४१॥

श्रीराधिकाजू को प्रच्छन्न उन्माद, यथा—(ताटक)

‘केसव’ सुधि बुधि हरित सु तुम बिनु बिथा अगाध राधिकहि बाढ़ी ।
छूटी लट लटकति कटित लौं चितवति नीठि नीठि करि ठाढ़ी ।
तरकति तकि तोरति तन तरफति अति अपार उपचारनि डाढ़ी ।
सकसकाति लै साँस अचेत सु चेतहु प्रेम-प्रेत गहि गाढ़ी ॥४२॥

श्रीकृष्णजू को प्रच्छन्न उन्माद, यथा—(सबंया)

गूढ़ अगूढ़ प्रकासत बातनि लोक अलोक की बात सरी सी ।
रोवत हैं, कबहूँ हँसि गावत नाचत लाज की छाड़ि छरी सी ।
काहू को सोच संकोच न ‘केसव’ देखत आवति देह मरी सी ।
बाम की बाय कि काम की बाय कि है हरि की मति काहू हरी सी ॥४३॥

श्रीकृष्णजू को प्रकाश उन्माद, यथा—(कबित)

सजल चकित चित चितवत चहूँ दिसि,
चाहि चाहि रहैं मुख, चपल चलत धाइ ।
सोचत से मन, मन कंपत, तपत तन,
‘केसोदास’ रोवत हँसत उठें गाइ गाइ ।
चलहि दिखाऊँ तोहि देखतहीं भयो मोहि,
भयो सु कहन आई तोसों अलि अकुलाइ ।
जैसें कछु आँक-बाँक बकत हैं आजु हरि,
तैसें जिन नाऊँ मुख काहू को निकसि जाइ ॥४४॥

अथ व्याधि-लक्षण—(दोहा)

अंग बरन बिबरन जहाँ, अति ऊँचे उस्वास ।
नैन-नीर परिताप बहु, व्याधि सु ‘केसोदास’ ॥४५॥

श्रीराधिकाजू की प्रच्छन्न व्याधि, यथा—(सबंया)

बैनु तज्यो उनि बैन तें बोलौ न बोल बिलोकत बुद्धि भगी है ।
वे न सुनें समुझें न तू बार्ताहि प्रेत लग्यो किधौं प्रीति जगी है ।
‘केसव’ वे तुहि तोहि रटें रट तोहि इतै उनि हीं की लगी है ।
वे भखैं पान न, पान्यों न तू, सु तै कान्ह ठगे कि तू कान्ह-ठगी है ॥४६॥

[४१] चौकति-चौकित (रस०) ।

[४२] हरति०-रहै तुम्हें बिनु (सरदार) । तरकति०-तरकि तोरति तनु (नवल०) ।

[४३] छाड़ि-छाँह (नवल०) । संख्या ४५ ‘रस०’ में नहीं है ।

[४६] बैनु-बैन (नवल०, बाल०) । बोल-बैन (बाल०) ।

श्रीकृष्णजू की प्रकाश व्याधि, यथा—(सर्वया)

हूँ उनके तन ताप तें तापियै, हूँ इनके उपचार जुड़ियै ।
हूँ उनके उड़ि जैयँ उसासनि हूँ इनके अँसुवानि अन्हैयै ।
'केसव' ये नंदलालन वै बृषभानलली पै निदान न पैयै ।
एकहि बेर दुहुँनि कहा भयो माई री तू चलि, देखन जैयै ॥४७॥

अथ जड़ता-लक्षण—(दोहा)

भूलि जाइ सुधि बुधि जहाँ, सुख दुख होइ समान ।
तासों जड़ता कहत हैं 'केसोदास' सुजान ॥४८॥

श्रीराधिकाजू की प्रच्छन्न जड़ता, यथा—(सर्वया)

खरे उपचार खरी सियरी सियरे तें खरोई खरो तन छीजै ।
ऐसे में और करें तें कछु उपजै तो सकेलि कहा हम लीजै ।
देखत ही यह कामकली कुंभिलानियै जाति कहा अब कीजै ।
कौन पै जाऊँ, कहा करौ 'केसव' कैसें जियै वह क्यों हम जोजै ॥४९॥

श्रीराधिकाजू की प्रकाश जड़ता, यथा—(सर्वया)

अँखियानि मिली सखियानि मिली पतियां-बतियांनि मिली तजि मौनै ।
ध्यान-विधान मिली मनहीं मन ज्यों मिलै राँक मनौं मन सौनै ।
'केसव' कँसहुँ बेगि चलौ नतु ह्वैहै वहै हरि जो कछु हौनै ।
पूरन प्रेम-समाधि लगे मिलि जैहै तुम्हैं मिलिहौ तब कौनै ॥५०॥

श्रीकृष्णजू की प्रच्छन्न जड़ता, यथा—(सर्वया)

पल ही पल सीतल होत सरीर बिचारे सब उपचार निदानै ।
जौ करियै तन खंडन मंडन चित्त कछु सुख दुःख न आनै ।
'केसव' कान्ह सुने समुझै नहि, बूझियै कौनहि को पहिचानै ।
जोग लियो कै विभोग है काहू को लोग कहा इनि रोगनि जानै ॥५१॥

श्रीकृष्णजू की प्रकाश जड़ता, यथा—(सर्वया)

कान्ह कें आसन बासनहीं न हुतासन मीत को प्रासन कीजै ।
'केसव' इंद्रिय सोधि सब मन साधि समाधिनि कै रस भीजै ।
जौ लौ भए हरि सिद्ध प्रसिद्ध न तौलौ बिलोकि अलोकि न कीजै ।
देवी ! करें तप तो लगि वे, बरदान न जौ जिय-दान तौ दीजै ॥५२॥

[४७] देखन जैयँ-देखि डरंयँ (रस०, नवल०) ।

[४९] हो-ही (बाल०, नवल०) । कामकली-कामलता (नवल०) ।

[५०] राँक-एक (नवल०) । नतु-तन (रस०, नवल०, बाल०) ।

[५१] पहिचानै-यह माने (रस०, बाल०, नवल०) ।

अथ मरण-लक्षण—(दोहा)

बनै न क्योंहैं मिलन जहँ, छल बल 'केसोदास' ।
 पूरन प्रेम-प्रताप तें मरन होत अनयास ॥५३॥
 मरन सु 'केसवदास' पै बरन्यो जाइ न मित्र ।
 अजर अमर जस कहि कहौं कैसैं प्रेत-चरित्र ॥५४॥
 रति उपजै रमनीनि कै, पहिलें 'केसोदास' ।
 तिन की इंगित देखि सखि करत सु प्रेम-प्रकास ॥५५॥
 अति आदर अति लोभ तें, अति संगति तें मित ।
 साधुनि हूँ के होत हैं 'केसव' चंचल चित्त ॥५६॥
 सुभग दसा दस मैं कहीं उपजै पूरन राग ।
 जिहि बिधि उपजै मान मन बरनों सुनहु सुभाग ॥५७॥

इति श्रीमन्महाराजकुमारश्रीइंद्रजीतविरचितायां रसिकप्रियायां
 विप्रलंभशृङ्गारपूर्वानुरागवर्णनं नामाष्टमः प्रभावः ॥८॥

६

अथ मान-लक्षण—(दोहा)

पूरन-प्रेम-प्रताप तें, उपजि परतु अभिमान ।
 ताकी छबि के छोभ तें, 'केसव' कहियत मान ॥१॥
 प्रकटहि पिय प्रति मानिनी, गुरु लघु मध्यम मान ।
 प्रकटहि पीय प्रियानि प्रति, केसवदास' सुजान ॥२॥

अथ गुरुमान-लक्षण—(दोहा)

आन नारि के चिन्ह लखि, अरु सुनि श्रवननि नाउँ ।
 उपजत है गुरुमान तहँ, 'केसवदास' सुभाउँ ॥३॥

श्रीराधिकाजू को प्रच्छन्न गुरुमान चिह्नदर्शन तें, यथा—(सवैया)

आजु मिले बृषभानकुमारिहि नंदकुमार बियोग बितै कै ।
 रूप की रासि रस्यो रस 'केसव' हास बिलासनि रोस रितै कै ।

[५६] संख्या ५६ के अनंतर 'रस०' में यह दोहा है—

आदरादि तें साध हू ज्यों चंचल चित होत ।

त्यों पर सखि संग दंपतिहि चंचलता उद्भूत ॥

[३] अरु-कै (नवल०) ।

बागे के भीतर देखि हियें नख नैन नवाइ रही सु इतै कै ।
फूलहि में भ्रमि भूलि मनो सकुचे सरसीरुह चन्द चितै कै ॥४॥

श्रीराघिकाजू को प्रकाश गुरुमान श्रवण तें, यथा—(सर्वया)

बूझति ही वह गोपी गुपालहि आजु कछू हँसि कै गुनगार्थहि ।
ऐसे में काहू को नाम सखी कहि कैसें धौं आइ गयो ब्रजनाथहि ।
खात खवावति ही जु विरी सु रही मुख की मुख हाथ की हाथहि ।
आतुर ह्वै उनि आँखिन तें अँसुवा निकसे अखरानि के साथहि ॥५॥

अथ नायक को गुरुमान-लक्षण—(दोहा)

लोक-लोक उल्लंघि कछु, प्रिया कहै जब बैन ।
उपजि परत गुरुमान तहँ, प्रीतम के उर-ऐन ॥६॥

श्रीकृष्णजू को प्रच्छन्न गुरुमान, यथा—(कवित्त)

ऐसी ऐसी रति राचे सौहनि के साँचे स्याम,
देखौ आनि बाँचि कैधौ कौन की ये चीठी है ।
सुनहु सभाग पाई रावरीयै पाग माहि,
कागर के रूप काहू आगि की अँगीठी है ।
जानति हौं याहीं मग पायो है जनम जग,
औरहू अलोकन की बीथी तुम दीठी है ।
काहे कौं कहावत कटुक कालकूट ऐसी,
कह्यो हरि हरें हँसि 'हमकौं तौ मीठी है' ॥७॥

श्रीकृष्णजू को प्रकाश गुरुमान, यथा—(कवित्त)

आपने सो आपनेही आगें कहियत किधौं,
खोरि के खजाने खोरि ही में खोलियत हैं ।
डीठि हू तौ रोकियत जौ पै कहूँ जाइ 'केसो',
और कहा नैन लै छुरी सों छोलियत हैं ।
वेई घनस्याम जिनि बिनु घनी घरनीनि,
घरिक में घने घनसार घोलियत हैं ।
बोलति हौ कैसें ऐसे बोलौ जैसें बोलियत,
मोल हू लए सों ऐसे बोल बोलियत हैं ॥८॥

अथ लघुमान-लक्षण—(दोहा)

देखत काहू नारि त्यौं, देखै अपने नैन ।
तहँ उपजत लघुमान, कै सुनें सखी के बैन ॥९॥

[५] कहि कैसें—सुनि आयो धौं कैसे कह्यो (बाल०) ।

[७] औरहू—लोक में (बाल०) ।

श्रीराधिकाजू को प्रच्छन्न लघुमान, यथा—(सर्वया)

कान्ह तिहारी वा प्रानप्रिया कें अयान सयान सबै मन माहीं ।
मान किधौ अपमान अबै यह मानस पै अनुमाने न जाहीं ।
सुख दुख न 'केसव' जानि परै समुझै रिस हास न हूँ अरु नाहीं ।
यों खिन ही सियरी खिन ताती है ज्यों बदलै बदरानि की छाहीं ॥१०॥

श्रीराधिकाजू को प्रकाश लघुमान, यथा—(कबित)

झूठहूँ न रुठियै री ईठ सों इतै कहाऽब,
नैक पोठ देत ईठ कौन के भए अली ।
काल्हि केतौ नंदलाल मो सों घालि लालि करें,
काल्हि ही न आई ग्वारि जौ पै तू हुती भली ।
आजु हीं जु बीच परी बीच पारिबे कौं माई,
आन रंग आन भाँति ज्यों कनेर की कली ।
तेरे ही कहे की कोऊ साखि है जू बूझियै री,
देखियै जु आँखि ताकी साखि की कहा चली ॥११॥

अथ प्रिय को लघुमान-लक्षण—(दोहा)

प्रिय को कह्यो करै नहीं प्रिया कौनहूँ काज ।
उपजत है लघुमान तहँ बरनत हैं कविराज ॥१२॥

श्रीकृष्णजू को प्रच्छन्न लघुमान, यथा—(सर्वया)

आगें कहा करिहौ अबहीं तें इतो दुख दीनो कह्यो बिनु कीनें ।
'केसव' कौनहु लाज कि लाड़ तें भूलि गई तौ भय हित हीनें ।
भेटे नहीं भरि अंक लला भरि जीभ न बोली जू बोल नवीनें ।
देखे नहीं कबहूँ भरि आँखिनि आजुहि कैसें चलै चित लीनें ॥१३॥

श्रीकृष्णजू को प्रकाश लघुमान, यथा—(सर्वया)

बोलि ज्यों आए त्यां बोलत नाहिनें मोसों कहा कछु चूक तिहारी ।
'केसव' कैसेहूँ देख्यो सुने बिन जानै कहा कोऊ जी की बिहारी ।
खीर सिराई न जानत खाइ, नई यह भूख की भाँति निहारी ।
काँचि ही दाखहि चाहत चाख्यो सु अंत तऊ तुम कुंजबिहारी ॥१४॥

अथ मध्यम मान-लक्षण—(दोहा)

बात कहत पिय और सों देखै 'केसवदास' ।
उपजत मध्यम मान तहँ माननि के सबिलास ॥१५॥

[११] भाँति-जिय (बाल०, नवल०) ।

[१२] प्रिया०-प्रिय को नाहीं लाज (नवल०) ।

[१५] सबिलास-अनयास (बाल०) ।

श्रीराधिकाजू को प्रच्छन्न मध्यम मान, यथा—(सवैया)

कहीं कान्हू कहीं सिंगरी निसि नासी सु तो तुम हीं कहँ चाहतहीं ।
तनु में तनु रेख लिखी किहि 'केसव' कंटक-कानन गाहतहीं ।
कछू राती सी आँखि कहा भइ ताती तिहारे बियोग के दाहतहीं ।
हिय बंचक-रोति रची जब रंचक लाइ लई उर नाह तहीं ॥१६॥

श्रीराधिकाजू को प्रकाश मध्यम मान, यथा—(सवैया)

सखि ज्यों उनको तू बकावति मोहू को आई बकावन ह्वै गरई ।
अब याही तें तोसहु बात कछू कहिबे कों हुती न कही परई ।
कहि 'केसव' आपनी जाँघ उधारि कै आप ही लाजनि को मरई ।
इक तो सब तें हरए हरि हैं अब होहुँ कहा हरि तें हरई ॥१७॥

अथ प्रिया को मध्यम मान-लक्षण—(दोहा)

जहाँ न मानै मानिनी, हारै पिय जु मनाइ ।
उपजत मध्यम मान तहँ, प्रीतम कें उर आइ ॥१८॥

श्रीकृष्णजू को प्रच्छन्न मध्यम मान, यथा—(कवित्त)

बार बार बरजी मैं सारस सरस मुखी,
आरसी लै देखि मुख या रस में बोरिहै ।
सोभा के निहोरें तें निहारति न नैंकहूँ तू,
हारी हैं निहोरि सब कहा काहू खोरि है ।
सुख को निहोरयो जु न मान्यो सो भली करी तें,
'केसोराइ' की सौं अब जौ तू मुँह मोरिहै ।
नाह के निहोरें किन मानति निहोरति हौं,
नेह के निहोरें फिर मोही जु निहोरिहै ॥१९॥

श्रीकृष्णजू को प्रकाश मध्यम मान, यथा—(सवैया)

मानहि मान तें मानिनि 'केसव' मानस तें कछु मान टरैगो ।
मान रहै सु जु माने नहीं परिमान नखें अभिमान भरैगो ।
ह्वैहै सहेली समान तबै जब सौतिनि में अपमान करैगो ।
आप मनावत मानहि री बहुरचौ जु मनावन तोहि परैगो ॥२०॥

[१६] नासी-नारी (नवल०) ।

[१७] परई-थरई (नवल०) ।

[१९] या रस-आरस (नवल०, बाल०) । मानति०-मानहि निहोरति हौ (बाल०) ।

(दोहा)

राधा राधा-रवन के बरने मान समान ।
तिन को मान मनाइबो कहियत सुनौ सुजान ॥२१॥

इति श्रीमन्महाराजकुमारइंद्रजीतविरचितायां रसिकप्रियायां
विप्रलंभशृङ्गारमानवर्णनं नाम नवमः प्रभावः ॥६॥

१०

अथ मानमोचन-लक्षण—(दोहा)

मान तजहि प्रीतम प्रिया, कहि 'केसव' करि प्रीति ।
बरनि सुनाऊँ सुनहु सब, मैं जु सुनी षट रीति ॥१॥
साम दान भनि भेद पुनि, प्रनति उपेच्छा मानि ।
पुनि प्रसंग-विध्वंस अरु, दंड होइ रस-हानि ॥२॥

अथ साम-लक्षण—(दोहा)

ज्यों क्योंहैं मन मोहियै छूटि जाइ जहँ मान ।
सोई साम उपाय कहि 'केसवदास' बखान ॥३॥

श्रीराधिकाजू को साम उपाय, यथा—(सवैया)

'केसवदास' सदा किये आस रहै सुख की दुख ताहि न दीजै ।
ताहूँ सों रोष न मानियै मानिनि भूलिहुँ आपनो मानि सु लीजै ।
हौं तुमहीं तुम हौं सुनि सुंदरि मूरति द्वै जिय एकहीं जीजै ।
मान है भेद को मूल महा अपने सहु सो सपने हूँ न कीजै ॥४॥

श्रीकृष्णजू को साम उपाय, यथा—(सवैया)

कहि आवति है जौ कहावत हौ तुम नाहीं तौ ताकि सके हम सोंही ।
तिहि पैड़े कहा चलिये कबहूँ जिहि काँटो लगै पग पीर दुकोंहीं ।
प्रीति कुम्हेंडे की जैहै जई सम, होति तुम्हें अंगुरी पसरोंहीं ।
कीजै कछु यह जानि कै 'केसव' हौं तुम हीं तुम तौ हरि हों हीं ॥५॥

[२] दान०—दाम अरु (नवल०) ।

[३] ज्यों—ज्यों त्यों करि (बाल०) । छूटि—भूलि (बाल०) ।

[५] दुकोंहीं—पिरोहीं (बाल०) । कीजै है—हैं है (बाल०) ।

अथ दान उपाय-लक्षण—(दोहा)

‘केसव’ कौनहुँ ब्याज मिस दै जु छुटावै मान ।
बचन-रचन मोहै मनहि तासों कहियै दान ॥६॥
जहाँ लोभ तें दान लै छाँड़ै मानिनि मान ।
बारबधू के लच्छनहि पावै तबहि प्रमान ॥७॥

श्रीराधिकाजू को दान उपाय, यथा—(कबित्त)

कोमल अमल दल दीने हे कमल-भव,
अरुन अरुन प्रभु जू कौं सुखहाइयै ।
‘केसोदास’ सोभाधर सधर सुधा के घर,
मधुर अधर उपमा तौ इनि पाइयै ।
उरज मलय-सैल-सील सम सुनि देखि,
अलक बलित ब्याल आसा उर आइयै ।
निपट निगंध यह हार बंधुजीव को सु,
चाहत सुगंध भयो नैंक ग्रीव नाइयै ॥८॥

अन्यच्च, यथा—(सवैया)

मत्तगयंदनि साथ सदा इनि थावर जंगम जंतु बिदार्यो ।
ता दिन ते कहि ‘केसव’ बंधन बेधन कै बहुधा बिधि मार्यो ।
सो अपराध सुधारन सोध यहै इनि साधन साधु बिचार्यो ।
पावन-पुंज तिहारो हियो यह चाहत है अब हार बिहार्यो ॥९॥

श्रीकृष्णजू को दान उपाय, यथा—(कबित्त)

हँसति हँसति आई आनि इक गाथा गाई,
कहहु कन्हौ याको भाउ समझाइ कै ।
पीबें क्यों अधर-मधु दंपति सु एकैं बार,
रदन करज थल दीजहि बताइ कै ।
यह परिरंभन कहावै कौन ‘केसोदास’,
मेरी सों जो मोसों तुम राखहु दुराइ कै ।
राधिका की अधिकाई कहा कहौ लीनो आजु,
आपनो पियारो पीउ आपु ही मनाइ कै ॥१०॥

अथ भेद-लक्षण—(दोहा)

सुख दै कै सब सखिनि कहँ आपु लेइ अपनाइ ।
तब सु छुड़ावै मान कों, बरनों भेद बनाइ ॥११॥

[६] मिस-कछु (बाल०, नवल०) । छुटावै-छुड़ावै (बाल०, नवल०) ।

[७] ‘रस०’ में नहीं है ।

[८] सधर-सुधर (नवल०) । उर आइयै-उर धाइयै (बाल०) ।

[११] छुड़ावै-छिड़ावै (रस०); मनावै (बाल०) । मान कों-मानिनी (बाल०) ।

श्रीराधिकाजू को भेद-उपाय, यथा—(सर्वैया)

‘केसव’ धाइ खबासिनि तोहि सखी सकुचैं सब आपन घातैं ।
मोहिं तौ माई कहे हीं बनैं अब बाँधि दई विधि तो कहैं तातैं ।
नैंक हरैं हरैं बोलि बलाइ ल्यों हौं डरपौं गड़ि जाहि न जातैं ।
माखन सो मेरे मोहन को मन काठ सी तेरी कूठेठी ये बातैं ॥१२॥

श्रीकृष्णजू को भेद उपाय, यथा—(सर्वैया)

काहू कह्यो ‘हरि रुठि रहे’ तब तैं बहु बुद्धि बितर्क बढ़ावैं ।
सोधि सबै अपनो सो रही धन मीत रहै सु उपाय न पावैं ।
ह्वां वह रीति इहाँ यह ‘केसव’ ज्यों दुहूँ ओर जरे कों जरावैं ।
बूझति हौं पिय प्यारी तिहारी सु मान करैं कि मनावन आवैं ॥१३॥

अथ प्रणति-लक्षण—(दोहा)

अति हित तैं अति काम तैं, अति अपराधहि जानि ।
पाइ परै प्रीतम प्रिया, ताकों प्रनति बखानि ॥१४॥

श्रीराधिकाजू की प्रेम तैं प्रणति, यथा—(सर्वैया)

तैं चितयो जु न सूधे तऊ जऊ प्रेम ककैं पिय पाउ गह्यो हो ।
मोहिं बिलोकि बिलोकि अलीन अलीक अलोक-प्रबाह बह्यो हो ।
बूझति हौं सखि सीस दियें तिनु और सबै हिय हेतु रह्यो हो ।
कान्हहि आएँ मनावत तोसौं में मान किधौं अपमान कह्यो हो ॥१५॥

श्रीराधिकाजू की अति काम तैं प्रणति, यथा—(सर्वैया)

बोलति नाहिन बुलाएँ हूँ बोल कहा लगी मोहिं बकाए हीं मारन ।
सो पर्यो पाइनि बूझि सखी सब देति हैं ज्यौ जुवती जिहि कारन ।
हठ छाड़ि कै कंठ लगाइ उठाइ कहा लगी ऐंठि अकास निहारन ।
कोनैं भए नहि द्वै दिन ए दिन तू ही लगी कछु ऊलट पारन ॥१६॥

श्रीराधिकाजू की अति अपराध तैं प्रणति, यथा—(सर्वैया)

‘केसवदास’ उदास भई दरसाइ दसा दुख-द्यौस भर्यो री ।
राति भए अधिरातक हू लौं बिनै बहु बंधुबधूनि कर्यो री ।
धाइ रही समुझाइ कछू न सखीनि हूँ के सिखाए तैं सर्यो री ।
काहे तैं मान्यो न मानिनि तौ लागि जौ लागि पाइ न पीउ पर्यो री ॥१७॥

[१३] जरावैं-जुड़ावैं (बाल०, नवल०) । बूझति-पूछति (रस०, बाल०) ।

[१५] तऊ जऊ-जऊ तऊ (बाल०) । बूझति-पूछति (बाल०, रस०) ।

[१६] बोलति नाहिन-बोलति आपु (बाल०, नवल०) । ऐंठि-बैठी (बाल०); भेड़ि (रस०) ।

(दोहा)

पियहि मनावै पाइ परि, प्रिया परम हित मानि ।

नापराध नहि काम तें बरनत ही रसहानि ॥१८॥

श्रीकृष्णजू की प्रणति अति हित तें, यथा—(सबैया)

नीरहि तौ बिनु मीन सरै अरु मीन तौ नीरहि के जिय जीजै ।

जा बिनु और सुहाइ न 'केसव' तहि सुहाइ सु तौ सब कीजै ।

जा लागि मो पग लागत हे सु लगी पग अंक लगाइ न लीजै ।

हौं सिखऊँ अपने सपनें हूँ तौ आवत लच्छि किवार न दीजै ॥१९॥

अथ उपेक्षा-लक्षण—(दोहा)

मान मुचावन बात तजि कहियै और प्रसंग ।

छुटि जात जहँ मान, सो कहत उपेच्छा अंग ॥२०॥

श्रीराधिकाजू की उपेक्षा, यथा—(कवित्त)

चपला न चमकति चमक हृथ्यारनि की,

बोलत न मोर बंदी सयन-समाज के ।

जहाँ तहाँ गाजत न, बाजत दमामे दीह,

देत न दिखाई दिनमनि लीने लाज के ।

चलि चलि चंदमुखी साँवरे सखा पै बेगि,

सोषक जु 'केसोदास' अरि सुख-साज के ।

चढ़ि चढ़ि पवन तुरंगनि गगन घन,

चाहत फिरत चंद जोधा तमराज के ॥२१॥

श्रीकृष्णजू की उपेक्षा, यथा—(कवित्त)

'केसोदास' दिन राति केतकी की भावै भाँति,

जिन में बसति जाति, नैननि में नलिनी ।

माधवी को पीवै मधु सूझत न अंध कहँ,

सेवती सेवन कही सेई गंधफलनी ।

औरै हौं कहति बात कान्ह काहे को लजात,

ऐसे तौ खिस्याइ सो जू होइ मनमलिनी ।

देखौ नहीं प्रानपति निलज अली की गति,

मालती सों मिल्यो चाहै लिये साथ अलिनी ॥२२॥

अथ प्रसंग-विध्वंस-लक्षण—(दोहा)

उपजि परै भय चित्त भ्रम, छुटि जाइ जहँ मान ।

सो प्रसंग-विध्वंस कवि, 'केसवदास' बखान ॥२३॥

श्रीराधिकाजू को प्रसंग-विध्वंस, यथा—(सवैया)

केकी न 'केसव' काम के किकर बोलत डोलत देत दुहाई ।
काम-निसा यह कामिनि कोऊ रिसाइगी तासहु ह्वै है रिसाई ।
गाजति नाहिन मेघघटा यह बाजति डौड़ी सखी सुखदाई ।
भोर भएँ फिरि कीबो अबोलौ सु बोलौ अबै बलि बोलि कन्हाई ॥२४॥

श्रीकृष्णजू को प्रसंग-विध्वंस, यथा—(कवित्त)

कोकनि की कारिका कहति काहू सारिका सों,
दुरि दुरि हित चित चौगुनो चढ़ायो है ।
सूकि रही सकुचानि वापुरी सुकी तौ, कहि
काहू सों सकै न देह दुखनि डढ़ायो है ।
उठि चलौ न्याउ कीजै अबकै मनाइ दीजै,
नीकें ही में 'केसोदास' कलह बढ़ायो है ।
मानत न एते पर उलटी मनावै वह,
ऐसो ही सयान स्याम सुकहि पढ़ायो है ॥२५॥
(दोहा)

देस काल बुधि वचन तें कल धुनि कोमल गान ।
सोभा सुभ सौगंध तें, सुख ही छूटत मान ॥२६॥

यथा—(कवित्त)

घननि की घोर सुनि, मोरनि को सोर सुनि,
सुनि सुनि 'केसव' अलाप अलीजन को ।
दामिनी दमक देखि देह की दिपति देखि,
देखि सुभ-सेज देखि सदन सु बन को ।
कुंकम की बास घनसार को सुवास भयो,
फूलनि की बास, मन फूल कै मिलन को ।
हँसि हँसि बोलि दोऊ, अनहीं मनाएँ मान,
छूटि गयो एकै बार राधिका रमन को ॥२७॥

(दोहा)

इहि विधि मान छुड़ावहीं, आगुस में नर नारि ।
पल पल प्रीति बढ़ावहीं, 'केसवदास' बिचारि ॥२८॥
प्रिया न प्रीतम सों करै, अति हठ 'केसवदास' ।
बहुरची हाथ न आवई, जौ ह्वै जाइ उदास ॥२९॥

[२५] चढ़ायो-बढ़ायो (रस०) । सूकि-सौचि (बाल०) । डढ़ायो-बढ़ायो (बाल०);

उठायो (नवल०) । नीकें ही-नेकही (बाल०, नवल०) ।

[२७] सदन-सुंदर (नवल०) । गयो-गो एकहि (रस०) ।

बारहि बार न कीजई, बारक कीजै मान ।
 कहि 'केसव' ज्यों आप में, सदा बढ़ै सनमान ॥३०॥
 प्रीति बिना भय होय नहि, भय बिनु होइ न प्रीति ।
 प्रीति रहे जहँ भय रहै, यहै मान की रीति ॥३१॥
 गर्ब, व्यसन, धनत्याग तें, निष्ठुर बचन प्रवास ।
 लालच बिप्रियकरन तें, प्रिय तें होइ उदास ॥३२॥
 मान बिबिध करने बिबुध, जहाँ बिबिध बुधिवास ।
 'केसव' कहना करि कछु कहियत बिरह-प्रवास ॥३३॥

इति श्रीमन्महाराजकुमारइंद्रजीतसिंहविरचितायां रसिकप्रियां
 विप्रलम्भशृङ्गारमानमोचनं नाम दशमः प्रभावः ॥१०॥

११

अथ करुणा-विरह लक्षण—(दोहा)

छूटि जात 'केसव' जहाँ सुख के सब उपाय ।
 कहना रस उपजत तहाँ, आपुन तें अकुलाय ॥१॥
 सुख में दुख क्यों बरनियै, यह बरनत व्योहार ।
 तदपि प्रसंगहि पाय कछु, बरनत मति-अनुसार ॥२॥

अथ राधिकाजू को प्रच्छन्न करुणा-विरह, यथा—(सबैया)

मैं पठई मति लेन सखी सु रही मिलि कै मिलिबे कहँ आनै ।
 जाइ मिलें दिन ही दृग-दूत दयाल सो देह-दसा न बखानै ।
 प्रेरत पैज कियें तन प्राननि जोग के और प्रयोग निदानै ।
 लाज तें बोलत पाऊँ न 'केसव' ऐसैं ही कोऊ कहा दुख जानै ॥३॥

श्रीराधिकाजू को प्रकाश करुणा-विरह, यथा—(कबित्त)

हरति हरित हार हेरत हियो हरत,
 हारी हौं हरिननैनी हरि न कहूँ लहौं ।

[३२] करन तें--करन तिय (बाल०, रस०) ।

[३] निदानै--निधानै (रस०); निधानै (नवल०) ।

बनमाली ब्रज पर वरषत बनमाली,
 बनमाली दूरि दुख 'केसव' कैसें सहौं ।
 हृदय-कमल नैन देखि के कमलनैन,
 होहुगो कमलनैन और हौं कहा कहाँ ।
 आप घने घनस्याम घनही से होत घन,
 सावन के चौस घनस्याम बिनु क्यों रहौं ॥४॥

श्रीकृष्णजू को प्रच्छन्न कष्टना विरह, यथा—(कवित्त)

जैसे मिल्यो प्रथम श्रवन-मग जाइ मन,
 रवन भवन कीने अलिक अलक में ।
 मनु मिलें मिले नैन 'केसोदास' सबिलास,
 छवि-आस भूलि रहे कपोल-फलक में ।
 नैन मिलें मिल्यो जान सकल सयान सजि,
 तजि अभिमान भूल्यो तन की झलक में ।
 तैसें छल बल साधि राधिकै मिलन कहैं,
 चाहत कियो पयान प्रानहूँ पलक में ॥५॥

श्रीकृष्णजू को प्रकाश विरह, यथा—(सवैया)

हे तरुनाई तरंगिनि-पूर अपूरब पूरब राग रंगे पय ।
 'केसवदास' जिहाज मनोरथ संभ्रम बिभ्रम भूरि भरे भय ।
 तर्क-तरंग-तरंगित तुंग तिमिगिल मूल बिसालनि के चय ।
 कान्ह कछू कहनामय हे सखि तैं ही किये कहना-बहनालय ॥६॥

अथ प्रवास विरह-लक्षण—(दोहा)

'केसव' कौनहु काज तैं पिय परदेसहि जाइ ।
 तासों कहत प्रवास सब कवि कोबिद समुझाइ ॥७॥

श्रीराधिकाजू को प्रच्छन्न प्रवास विरह, यथा—(सवैया)

तू करिहै कब धौं कहि गौनहि नंदकुमार तौ गौन कियोई ।
 मोहि महा डर तो उर को न रहै लटि लै जिनि कोधौं लियोई ।

[४] सावन-स्यामनि (बाल० रस०) ।

[५] जैसे-ऐसे (नवल०) ।

[७] 'बा०' में संख्या ७ के अनंतर यह छंद अधिक है—

जानै कहा मेरी दीरघ साँस ले नैन नवाइ दुकाइ बृथाहू ।
 माथी न दुखिहै सुधी निहारो पखारो नहीं मुखु जो न अन्हाहू ।
 ऐसैं ही 'केसव' क्यों रहे प्रान सु अपनी पीर सुनावहु काहू ।
 कै हुती भोरी कि भोजनी छाड़यो तो पान्यो न पीवो जो न पान खाहू ॥

ऐसी न बूझियै 'केसव' तोहि बिचारै जु बीच बिचार बियौई ।
तेरे ही जीय जियै जिनको जिय रे जिय ! ता बिनु तूज्ब जियौई ॥८॥

श्रीराधिकाजू को प्रकाश प्रवास विरह वर्णन, यथा—(कवित्त)

कौन कैं न प्रीति, को न प्रीतमहि बिछुरतु,
या ही कैं अनोखो पतिव्रत गाइयतु है ।
'केसोदास' जतन किये ही भलें आवै हाथ,
और कहा पच्छिति के पाछें धाइयतु है ।
उठि चलि जौ न मानै काहू की बलाइ जानै,
मानसै जु पहिचानै ताकें आइयतु है ।
याकें तौ है आजु हीं मिलौं कि मरि जाऊँ ऐसैं,
आगि लागें मेरी माई मेहु पाइयतु है ॥९॥

श्रीराधिकाजू को विरह-भय-विभ्रम, यथा—(सवैया)

कोकिल केकी कुलाहल हूलि उठी उर में मति की गति लूली ।
'केसव' सीत सुगंध समीर गयो उड़ि धीरज ज्यों तन तूली ।
जै मुनि जै मुनि कै बची जोन्ह की जामिनी पै न अजौं सुधि भूली ।
क्यों जियो कंसी करौ बहुर्यौ बिसु सी बिसनी बिसवासिनि फूली ॥१०॥

श्रीकृष्णजू को प्रच्छन्न प्रवास-विरह, यथा—(सवैया)

जिनि बोलि सुबोल अमोल सबै अँग केलि-कलोलनि मोल लिये ।
जिनिको चित लालची लोचन रूप अनूप पिपूष सु पीय जिये ।
जिनिको पद 'केसव' पानि छियें सुख मानि सबै दुख दूरि किये ।
तिनको सँग छूटत हीं फिटु रे फटि कोटिक दूक भयो न हिये ॥११॥

श्रीकृष्णजू को विरह प्रकाश प्रवास, यथा—(सवैया)

'केसव' क्यों हूँ चले चलि कोरि संदेश कहैं फिरि पेंडूक दू पर ।
आगें धरैं अपनी सो कै साहस पाछें हीं पेलि परै पग भू पर ।
होत जहीं तहीं ठाढ़े ठगे से 'चलो' न कह्यो परै कान्ह हितू पर ।
लोक की लाज फिरयो न परै, पै मिसान करैं अधकोसक ऊपर ॥१२॥

श्रीकृष्णजू को विरह-भय-विभ्रम, यथा—(सवैया)

प्रेत की नारि ज्यों तारे अनेक चढ़ाइ चलै चितवै चहुँघाँ तो ।
कोढ़िनि सी ककुरे कर-कंजनि 'केसव' सेत सबै तन तातो ।

[८] कब-कहि (बाल०) ।

[९] किये ही-करें ही (नवल०) । माजसै-मानुसैं (बाल०) ।

[१०] छिये-छवै (बाल०) !

भेटत हीं बरहीं अवही तौ बरचाइ गई हो सखै सुख सातो ।
कैसौ करौं कहि कैसें बचौं बहुरघौ निसि आई किये मँहु रातो ॥१३॥

श्रीराधिकाजू की निद्रा, यथा—(सवैया)

आएँ तें आवैगी आँखिनि आगें ही डोलिहै मानहु मोल लई है ।
सोवै न सोवन देइ न यों तब सोवन में उन साथ दई है ।
मेरियै भूलि कहा कहाँ 'केसव' सौत कहूँ तें सहेली भई है ।
स्वारथ हो हितु है सबकें परदेस गएँ हरि नौंदी गई है ॥१४॥

श्रीकृष्णजू की निद्रा, यथा—(सवैया)

'केसव' कैसहूँ कोरि उपाइन आनि सु तौ उर लागति है ।
चकचौंधत सी चितवै चित में चित सोवत हू महुँ जागति है ।
परदेस प्रिया पल मोहि पत्याति न जानै को याकी कहा गति है ।
तजि नैननि नींद नबोढ़ बधू लहुँ आधिक राति तें भागति है ॥१५॥

श्रीराधिकाजू की सखी की पत्नी, यथा—(कवित्त)

'केसव' कुँवर ! वृषभान की कुँवरि आजु,
देवता ज्यों बन उपवन बिहरति है ।
कमला ज्यों थिर न रहति कहूँ एक छिन,
कमलाग्रजा ज्यों कमलनि तें डरति है ।
काली ज्यों न केतकी के फूल रुचै, सीताजू ज्यों,
निसिचर-मुख तिन देखें ही जरति है ।
बदन उधारत ही मदन सुयोधन हीं,
द्रौपदी ज्यों नाम मुख तेरो ही ररति है ॥१६॥

पुनर्यथा—(कवित्त)

भौरिनी ज्यों भवत रहित बन-बीथिकानि,
हंसनी ज्यों मृदुल मृनालिका बहति है ।
पीउ पीउ रटति रहति चित चातकी ज्यों,
चंद चितै चकई ज्यों चुप हवै रहति है ।

[१२] 'बाल०' में छंद संख्या १२ के बाद यह दोहा अधिक है—

खान पान परिधानु पुनि जान जान दुति अंग ।
सुभ संजोग वियोगु बिनु मानो सुख तिस अंग ॥

[१४] मेरियै-मेरि सौं (बाल०) ।

[१६] आजु-बन (नवल०, बाल०) । छिन-ठीर (नवल०) । डरति-दुरति (रस०) । रुचै-सूँघै (नवल०) ।

हरिनी ज्यों हेरति न केसरि के काननहि,
 केका सुनि व्याली ज्यों बिलान ही चहति है ।
 'केसव' कुँवर कान्हु विरह तिहारे ऐसी,
 सूरति न राधिका की मूरति गहति है ॥७॥

श्रीकृष्णजू की सखी की पत्नी, यथा (कवित)
 दीरघ दरीनि बसैं 'केसोदास' केसरी ज्यों,
 केसरी को देखि बन करी ज्यों कपत हैं ।
 बासर की संपदा उलूक ज्यों न चितवत,
 चकवा ज्यों चंद चितै चौगुनो चपत हैं ।
 केका सुनि व्याल ज्यों बिलात जात घनस्याम,
 घननि की घोरनि जवासे ज्यों तपत हैं ।
 भौर ज्यों भँवत बन जोगी ज्यों जगत रैन,
 साकत ज्यों स्याम नाम तेरोई जपत हैं ॥१८॥

(दोहा)

'केसवदास' प्रवास को कह्यो जयामति साथ ।
 राधा हरि बाधाहरन बरनौं सखी-समाज ॥१६॥
 इति श्रीमन्महाशयकुमारहंजोतविरचितायां रसिकप्रियायां
 संभोगशृङ्गारप्रवासवर्णन नामैकादशः प्रभावः ॥११॥

१२

अथ सखी वर्णन—(दोहा)

धाइ, जनी, नाइन, नटी प्रगट परोसिनि नारि ।
 मालिनि बरइनि सिल्पिनी चुरिहेरनी सुनारि ॥१॥
 रामजनी संन्यासिनी पटु पटुवा की बाल ।
 'केसव' नायक-नायिका सखी करहि सब काल ॥२॥

धाइ को वचन राधिका सों, यथा—(सबैया)

मोहन-साथ कहा निसि द्यौस रहै सतरंजहि के मिस बेठी ।
 'केसव' क्योंहैं सुनै महितारी तो राखहि री ! घर ही मह पैठी ।

[१७] बहति-चहति (नवल०) ।

[१८] साकत-चातक (नवल०) ।

हौं सिखऊँ सुखदै सिख तोहि तैं भौह चढ़ाइ कै डीठि अनेठी ।
को न लड़ैती सरूप न काहि तुहीं कछू जाति अकासहि ऐंठी ॥३॥

घाइ को वचन कृष्ण सों, यथा—(कवित्त)

थोरी सी सुदेस बैस दीरघ नयन केस,
गौरा जू सी गौरी भोरी भवजू की सारी सी ।
साँचे की सी ढारी अति सूछम सुढार कटि,
'केसोदास' अंग अंग भाइ कै उतारी सी ।
साँचे कैसी सोंधी, देह सुधा सों सुधारी, पाइ
धारी देवलोक तैं कि सिंधु तैं उधारी सी ।
आजु यासों हँसि खेलि बोलि चालि लेहु लाल,
काल्हि ऐसी ग्वालि लाऊँ काम की कुमारी सी ॥४॥

जनी को वचन राधिका सों, यथा—(कवित्त)

सोभा को सघन बन मेरो घनस्याम नित.
नई नई रुचि तन हेरत हिराइयै ।
'केसोदास' सकत सुवास को निवास करि,
बिबिध बिलास हास त्रास बिसराइयै ।
ऊख-रस केतक महुख-रस मीठो है,
पियूष हू की पैली धाँ हे जाकौ नियराइयै ।
चोरीचोराँ नैननि चुराँ सुख कौन जौ लौं,
पिय-मन माँहि मन मेलि न चराइयै ॥५॥

जनी को वचन श्रीकृष्ण सों, यथा—(कवित्त)

ऐसी बातें ऐसैं ही धौं कैसैं कै कही परति,
जाकी मति-गति लाज-पट सों लपेटी हैं ।
मेरें ही न आवै, मेरी बीर एती बेर वे तौ,
जानति हौं घाइ ही के साथ लोटि लेटी हैं ।
ऐसी तो हैं चेरिन की चेरी बाकी 'केसोदास',
जैसी तुम हा हा करि पाइ परि भेटी हैं ।
जानति हौं नंदजू के ढोटा हौ जू, जानें बोल
उतहि वेऊ तौ वृषभानजू की बेटी हैं ॥६॥

[३] सुखदै-सिखदै (नवल०, बाल०) । अनेठी-अमेठी (रस०) ।

[४] सुढार-सुधारि (रस०, नवल०) । कटि-कढ़ी (नवल०) ।

[६] पट-पाट (बाल०, रस०) । जानति हौं-जात घाइ ही के घर साथ लोटि
लेटी है (नवल०) । ढोटा-बेटा (बाल०) । बोल-जाहु (बाल०) ।

नाइन को वचन राधिका सों, यथा - (सवैया)

अब ही तो गए उठि पौरहूँ लौं न पै बोलन जाहि री पीछहि लागें ।
करिहौ तब कैसी पराए जु ढोटहि हवैहै कछू निसिधौस के जागें ।
जौ न रहौ परै 'केसव' कैसहुँ देखतही सुख स्याम सभागें ।
देती हौ जान क्यों राखत काहे न आरसोयै करि आँखिन आगें ॥७॥

नाइन को वचन कृष्ण सों, यथा - (सवैया)

बड़ी जिय लाज बड़ी उर आली बड़ी लहुरीयौ चलै चित लीनें ।
बड़ी बड़ी आँखि, बड़ी छबि सों चितवै बड़ि बेर बड़ो सुख दीनें ।
बड़े ही बिचार बड़ी रुचि 'केसव' क्यों हूँ मिलै तो मिलै हमहीनें ।
बड़ीनि हूँ सों तौ बड़े दुख बोलै, इतै बड़े मान बड़ो मन कीनें ॥८॥

नटो को वचन राधिका सों, यथा - (सवैया)

जो हौं दिखावन तोहि गई री तैं मेरियै ग्रीवें गही फिरि माई ।
आजु कहा दिखसाध लगी है दिखाऊंगी जाइ तौ वेई कन्हवाई ।
देखे तैं सीरी हवै जाति भट्ट अनदेखें जरै तु यहै अधिकाई ।
राति की वे गति द्यौस की ए अब हौं तेरी बातनि बाजहि आई ॥९॥

नटो को वचन कृष्ण सों, यथा - (कवित्त)

जहीं जहीं दुरै तहीं जोन्ह ऐसी जगमगै,
कैसें हूँ जु 'केसव' दुराऊँ लिये रंग की ।
पवन के पंथ अलि, अलिनि के पीछें आली,
अलिनी ज्यों लागी फिरैं जिन्हें साध संग की ।
निपट अमिल वह तुम्हें मिलिबें की जक,
कैसें कै मिलाऊँ गति मोपै न बिहंग की ।
इक तो दुसह दुख देति हुती दुति दूजें,
बीस बिसे बिसु भई बास बाके अंग की ॥१०॥

परोसिन को वचन राधिका सों, यथा - (सवैया)

पाइ परें पलिका परस्यो सु लगी रति तोलन मेलि रती हो ।
सौहैं किये मूंह सौहों कियो अब लौं तुम पै गति ऐसी न ती हो ।

[७] उठि-पुनि (बाल०, नवल०) । सुख-मुख (बाल०) ।

[८] तौ मिलै-जो कहूँ (बाल०); सु बड़ी (नवल०) ।

[९] ए अब-वे गति (रस०); ए पुन (नवल०) । बातनि-बालनि (नवल०) ।
बाजहि-बाजनि (नवल०) ।

[१०] लिये-ल्याऊँ (नवल०) । बिसु, भई बास-बिसु बास भई (बाल०,
नवल०) ।

‘केसव’ कैसेहुँ देखन कौं तिन्हें भोरहीं भोरी हवै आनि दती हो ।
पान खवावत हीं तिन सों तुम राति कहा सतराति हती हो ॥११॥

परोसिन को वचन कृष्ण सों, यथा—(सर्वंगा)

हाँसी में बातक वालों कही हँसि वे हूँ कही सु हितै करि लेख्यो ।
आँखें मिली न मिली सखियाँ मिलबोई सु ‘केसव’ क्यों अवरेख्यो ।
चिच्याइ मरै चुप साधे कि चातक स्वाति समें ही सवै सु बिसेख्यो ।
आजु हीं क्यों वह आवै इहाँ जिनि आगि लगेंहूँ न आँगन देख्यो ॥१२॥

मालिन को वचन राधिका सों, यथा—(कबित)

दुरिहै क्यों भूषन बसन दुति जोवन की,
देह ही की जोति होति घौस ऐसी राति है ।
नाह को सुबास लागें हवैहै कैसी ‘केसव’,
सुभाव ही की बास भौर भीर फारे खाति है ।
देखि तेरी सूरति की मूरति बिसूरति हौं,
लालन को दृग देखिबे कौं ललचाति है ।
चलिहै क्यों चंदमुखी कुचनि के भार भएँ,
कचनि के भार तौ लचकि लंक जाति है ॥१३॥

मालिन को वचन श्रीकृष्ण सों, यथा—(कबित)

घेरौ जिनि मोहि घर जान देहु घनस्याम,
घरिक में लागी उर देखिबो ज्यों दामिनी ।
होइ कोऊ ऐसी वैसी आवै इत उत हवै कै,
वह वृषभानजू की बेटी गजगामिनी ।
आदित को आयो अंत, आवौ बलि बलि जाऊँ,
आवती हूँ वेऊ बना आई बनि जामिनी ।
काम के डरनि तुम कुंज गह्यो ‘केसोदास’,
भौरन के भय उन मौन गह्यो भामिनी ॥१४॥

बरइनि को वचन राधिका सों, यथा—(कबित)

मैन ऐसो मन मृदु मृदुल मृनालिका के,
सूत ऐसे सुर धुनि मनहि हरति हैं ।
दार्यो कैसे बीज दाँत, पात से अरुन ओठ,
‘केसोदास’ देखि दृग आनंद भरति हैं ।

[१२] सवै-सवै (रस०) ।

[१३] सुभाव-सुवास (नवल०) ।

[१४] बनि जामिनी-अरु जामिनी (नवल०) ।

एरी मेरी तेरी मोहि भावति भलाई तातें,
 बूझति हौं तोहि और बूझत डरति हैं।
 माखन सी जीभ, मुख कंज सो कोवँर कहु,
 काठ सी कठेठी बातें कैसें निकरति हैं ॥१५॥

बरइनि को वचन कृष्ण सों, यथा—(कबित्त)
 नैननि नवावौ नेक अति ही अनीति करें,
 जानत न तुम जैसे ब्रज जानियत हैं।
 चंचल चरित्र चित चेटक चटक लावौ,
 चरे कै चितनि अभिसार सौंपियत हैं।
 एकनि के पैठे उर उररि उरोजन में,
 उर डोलें 'केसोदास' कैसें वै जियत हैं।
 ऐसी कहूँ होति है जो बालनि के चोरि चोरि,
 मन मनमथ ही के हाथ बेचियत हैं ॥१६॥

शिल्पिनी को वचन राधिका सों, यथा—(सवैया)

अबहीं पुनि बोलि री बोलि, लगी जक पौरिहूँलौं उठि जान न दीने।
 मेरे ही जान भई उलटी तुमहीं बस 'केसव' वे कहूँ कीने।
 जो तो इतौ दुख पावति हौ तलफें दृग मीन मनो जल झीने।
 तो कत छाड़ति हौ छिन एक रहौ किनि चित्र ज्यों हाथहि लीने ॥१७॥

शिल्पिनी को वचन कृष्ण सों, यथा—(सवैया)

खोट तुरी जिमि खूंट रहौ गहि ठौर कुठौरनि जानिहू जाहू।
 लाज न आवति मारें समाजन लागें अलोक के ताजन ताहू।
 कोरि बिचार बिचारहु 'केसव' देखहु बूझि हित सब काहू।
 नेह ही के फिरि लागिहौ संग न नैननि के संग ओर निबाहू ॥१८॥

चुरिहारिन को वचन राधिका सों, यथा—(कबित्त)

मन मन मिलें कहा मिलिहै मिले को सुख,
 मिलिहू धौं देखहु बीलाइ काहू बाल सों।

[१५] ऐरी-केसे (बाल०, रस०)। तातें-यातें (रस०)। कोवँर-कोमल (रस०)।

[१६] चेटक०-चेटकी चेटका जायो (नवल०)। चरे कै-चोरिकै (नवल०)।
 उररि-उररि (बाल०)। वै जियतु हैं-ति जियत है (बाल०)। ही के-
 चाक (बाल०)।

[१७] उलटी तुमहीं बस-उलटी बस (नवल०)। वे कहूँ कीने-हैं कहिये कह कीने
 (नवल०)। पावति-देखति (रस०)। झीने-हीने (रस०, नवल०)।

[१८] खोट-खाट (बाल०)। लाज-लाल (नवल०)। समाजन-सभाजन (बाल०)।

भूलि परे मौंहनि ही बाँधिहौ कितेक दिन,
 बाँधौ बलि जाउँ बनमाली बनमाल सों ।
 मुहुँ मोरें मारें न मरति रिस 'केसोदास'
 मारहु धौं मेरे कहें कमल सनाल सों ।
 नैननि ही बिहसि बिहसि कौ लौं बोलिहौ जू,
 कबहूँ तौ बोलियै बिहसि मुख लाल सों ॥१६॥

चुरिहेरिन को वचन कृष्ण सों, यथा—(सर्वैया)
 आपुन हूजै दुखी दुख जाके सु ताहि कहा कबहूँ दुख दीजै ।
 जा बिन और सुहाइ न 'केसव' ताहि सुहाइ सु तौ सब कीजै ।
 भाग बड़े जु रची तुम सों वह तौ बिश्काइ कहौ कह लीजै ।
 जौ रिस जाइ तौ जैयै मनावन, तातो है दूध सिराइ तौ पीजै ॥२०॥

सुनारिन को वचन राधिका सों, यथा—(सर्वैया)
 लोल अमोल कटाछ कलोल अलोलिक सों पट ओलि कै फेरे ।
 पानिप सों अति पाने रसाल बिसाल बने मनभावते मेरे ।
 'केसव' चीकने चौगुने चोखे चितै कै भए हरि न्यायनि चरे ।
 सोच सकोचन श्रीरति-रोचन धीरज-मोचन लोचन तेरे ॥२१॥

सुनारिन को वचन कृष्ण सों, यथा—(कबित)
 हाँसी में हँसे तें हरि हरे कै शुकति मन—
 हारि कै हँसति, हेरि हियें अनुरागी है ।
 प्रेम की पहेली गूढ़ जानत जनावतहीं
 आजु अधरातक लौं मेरे संग जागी है ।
 अब लौं ज्याँ धरी धीर तैसेँ दिन द्रैक और
 धरौ, गिरिधर तुम तें को बड़भागी है ।
 भावती तिहारी वह काल्हि ही तें 'केसोराइ'
 काम की कथानि कछु कान देन लागी है ॥२२॥

रामजनी को वचन राधिका सों, यथा—(कबित)
 कोमल कमल वे तौ अमल ये तिक्ष चल,
 मलिन नलिन नवनील के से पात हैं ।
 सूधे साधु सुद्ध वे तौ कुटिल प्रसिद्ध ये तौ,
 'केसव' मरम चोर परम किरात हैं ।

[१६] मन-नाम (नवल०) । केसोदास-प्यारे लाल (बाल०) ।

[२०] बिश्काइ-बिरचाइ (बाल०, रस०) ।

[२२] हँसे तें-भक्तों तें (रस०) । हरे कै-हरि कै (रस०, नवल०) । हारि कै-हरि

कै (रस०) ।

पाइहैं पकरि तब पाइहै न कैसें हू तू
 थोरो इठलाति ये तौ अति इठलात हैं ।
 बरजति क्यों न तो सों कब की कहति मेरे
 मोहन के मन तेरे नैन छवै छवै जात हैं ॥२३॥

रामजनी को वचन कृष्ण सों, यथा—(सबैया)
 कौनहूँ तोष कहा भयो 'केसव' कामिनि कोटिक सों हित ठाँटें ।
 रंच न साथ सधै सुख की बिनु राधिकै आधिक लोचन डाँटें ।
 क्यों खरी सीतल बास करै मुख जौ भखियै घनसार के साँटें ।
 लालच हाथ रहै, ब्रजनाथ पै प्यास बुझाइ न ओस के चाँटें ॥२४॥

संन्यासिनी को वचन राधिका सों, यथा—(कवित्त)
 छूटै न छुटाएँ जब करिहौ धौं कैसी बात,
 'केसोदास' अनयास प्यास भूख भागिहै ।
 खेलु भूलि जाइगो, जुड़ाइगो न चित्तु चेति,
 कछू ना सुहाइगो री रैन दिन जागिहै ।
 ताते तें तपति दूनी सीरे तें सहसगुनी,
 उपजि परैगी उर ऐसी और आगि है ।
 एंड सो एँडाइ जिनि अंचलु उड़ात, ओली,
 ओड़ति हौं, काहू की जु डीठि उड़ि लागिहै ॥२५॥

संन्यासिनी को वचन कृष्ण सों, यथा—(कवित्त)
 सीतल हू हीतल तिहारें न बसति वह,
 तुम न तजत तिल ताको उर ताप-गेहु ।
 आपनो ज्यौ हीरा सो पराएँ हाथ ब्रजनाथ,
 दै कै तौ अकाथ हाथ मैं ऐसो मन लेहु ।
 एते पर 'केसोदास' तुम्हें न प्रवाह वाहि,
 वहै जक लागी, भागी भूख सुख भूल्यौ देहु ।
 माड़ो मुख, छाड़ै छिनु छल न छबीले लाल,
 ऐसी तौ गँवारिनि सों तुमहीं निबाही नेहु ॥२६॥

[२३] कमल-अमल (बाल०, रस०, नवल०) । प्रसिद्ध-करम (बाल०, रस०, नवल०) । चोर परम-चोर मरम (बाल०, रस०) । तो सों-तू हो (रस०) । मोहन के नैन-मोहन के मन (बाल०, रस०, नवल०) ।

[२४] जौ भखियै-जोर भखी (बाल०, रस०) ।

[२५] बात-तब (नवल०) । भागिहै-लागिहै (बाल०) । जुड़ाइगो न-जुड़ाइगो री (बाल०) ।

[२६] अकाथ हाथ-साथ (बाल०, रस०) । मैं ऐसो-माखन सो (बाल०) । माड़ो-माँजो (नवल०) ।

पटइनि को वचन राधिका सों, यथा—(सबैया)

याही कों मेरी गुसाईनि मैं मिलई पहिलें बतियाँ छलि छैलो ।
बातें मिलै आँखियाँ मिलई सखियानि के आँखिनि पारि कै ऐलो ।
आँखि मिले मुहुँ लागि रहै मनु लेहु मिलै सब गहैं हम गैलो ।
मिलें मन माई कहा करिहौ मुँह ही के मिलें तौ कियो मन मैलो ॥२७॥

पुनः—(सबैया)

गेह की नेह की देह की दीबे की भूषन की जिन भूख भगाई ।
मोहि हँसी दुख दोऊ दई तिनहीं सो जनावति है चतुराई ।
'केसवदास' बढ़ाई दई तौ कहा भयो जाति सुभाव न जाई ।
सोने सिंगारहु सोधे चढ़ावहु पीतर की पितराई न जाई ॥२८॥

पटइनि को वचन कृष्ण सों, यथा—(सबैया)

वा मृगनैनी ज्यों औरन हीं जु लगावत हौ मुहुँ ऐसे न हूजै ।
सोनेई सी सुनपीतर होइ तौ 'केसव' कैसहुँ हाथ न छूजै ।
आप गिरा गुन जौ सिखवै तऊ काक न कोकिल ज्यों कल कूजै ।
सुंदर स्याम बिराम करौ कछु आम की साध न आमिलो पूजै ॥२९॥

(दोहा)

बैन ऐन-मुख मैं करि कहे सखिनि के धर्म ।
'केसव' कहौ कछुक अ ब, तिनके कोविद कर्म ॥३०॥

इति श्रीमन्महाराजकुमारइंद्रजीतविरचितायां रसिकप्रियायां
सखीजनवर्णनं नाम द्वादशः प्रभावः ॥ १२ ॥

१३

अथ सखीजन-कर्म-वर्णन—(दोहा)

सिक्षा, बिनय मनाइबो, मिलिबो करि सिंगार ।
झुकि अरु देई उराहनो यह तिनके ब्योहार ॥१॥

- [२७] मुहुँ-मनु (रस०) । लागि रहै-सों मिलिहैं (बाल०) ।
[२८] भगाई-भराई (नवल०) । चढ़ावहु-बिनायन (बाल०) ।
[३०] धर्म-नर्म (बाल०); कर्म (रस०) ।

राधिका सों शिक्षा—(सबैया)

नाह लगेँ सुख सौति दहें दुख 'नाहि' लगेँ दुख देह दहैगो ।
 'नाहीं' अबै सुख देति है 'केसव' नाह सदा सुख देत रहैगो ।
 'नाहीं' तें नाहीं री नाहीं भलाई भली सब नाह ही तें पै कहैगो ।
 नाह सों नेह निबाहि बलाइ ल्यों 'नाहीं' सों नेह कहाँ निबहैगो ॥२॥

कृष्ण की शिक्षा—(कवित्त)

कुंकम उबटि कुमकुमा के न्हाइ जल
 सोंधो सिर लाइ याहि लाए कहा रास मैं ।
 चंदन चढ़ाइ फूल-माल पहिराइ भूलि
 बे ही काज आँजि माँजि कीनी है प्रकाश मैं ।
 'केसव' कपूर पूरि काहे कौं खवावौ पान
 जौ पे मन मगन है ऐसे ही बिलास मैं ।
 वाही न मनावौ हरि हाहा करि पाइ परि
 सबही सुवास बसै जाके मुखबास मैं ॥३॥

राधा की विनय—(सबैया)

ऐसें ही क्यों चुप ह्वै रहिहौं सखि हौं सहिहौं सतराहट सौ लों ।
 क्यों सरिहै मिलिबे बिन तोहि तऊ मिलियै मिलियै दिन जौ लों ।
 'केसव' कोरि करौ उपचार मिले को कहा मिलिहै सुख तौ लों ।
 देखि धौं अंगनि आरसी लै मिलिहै पिय सों मनहीं मन कौ लों ॥४॥

कृष्ण सों विनय—(कवित्त)

कँज के से फूल नैन दारघौं से दसन ऐन
 बिब से अधर हास सुधा सो सुधारघो है ।
 बेंनी पिकबेंनी की त्रिबेंनी सी बनाइ गुही
 बार कै सेवार करिहाँ कों करि हारघो है ।
 कीने कुच अमल कलपतरु के से फल
 'केसोदास' यातें बिधि मुग्ध बिचारघो है ।
 देखौ न गुपाल सखी मेरी को सरीर सब
 सोने सों सँवारि सब सोंधे सों सँवारघौ है ॥५॥

[२] बलाइ ल्यों—री बावरी (बाल०) ।

[५] कंज-सुख (रस०) । बिब-लाल (बाल०, रस०) । गुही-वीर (बाल०) । बार
 कै सेवार-धार से बारीक (बाल०); बारिक वारि सों (रस०) । सब सोंधे-
 मानो मैन (बाल०); मन मैन (रस०) । सँवारघो-सुधारघो (बाल०) ।

राधा को मनाइबो—(सवैया)

‘नाहीं’ सिखावति नाहीं भली सखि पावक सों तिनको मुँह डाढ़ौ ।
भौहनि के भुलवौ भट्ट भावनि नैननि के मत सों हित बाढ़ौ ।
कालि तें कालि कै होन दर्ई हँसी, पाइँ परौ न परौ मुँहु काढ़ौ ।
राजु करौ यह राजु सदा रहै ‘केसव’ चित्र ज्यों आगे ही ठाढ़ौ ॥६॥

पुनः—(सवैया)

रीझि रिझाइ झरोखनि झाँकि रही मुख देखि दिखाइ सुभाहीं ।
बोलन आएँ अबोली भई अब ‘केसव’ ऐसी हमें न सुहाहीं ।
मैं बहुतै बहराई हैं तो सी रो तू बहरावति मोहि बृथाहीं ।
एहीं सयान सदा चलिहौ हरि सों हँसि ‘हाँ’ करै मोही सों नाहीं ॥७॥

कृष्ण को मनाइबो—(सवैया)

भूषन-भेद बनाइ कै ‘केसव’ फूल बनाइ बनाइ कै बागे ।
भाग बढ़ाइ सुहाग बढ़ाइ कै राग बढ़ाइ हियें अनुरागे ॥
पाइनि लागत, सोंधो चढ़ावत पान खवावतहीं निसि जागे ।
कान्ह चलौ उठि बैठे कहा ? मन मूसि परायोऽब रुसन लागे ॥८॥

राधा को मिलेबो—(सवैया)

दुर्लभ देवनि हूँ कों सु तौ हरि को मन हाँसिन ही हरि लीनो ।
टारहु जैं हिय तें कबहूँ अब ज्यों गुरु को दियो मंत्र प्रबीनो ।
लेति लियो तौ न देत दियो अब मानहु ता दिन दुखव नवीनो ।
माँगन आवै तौ दीजै भट्ट अपनो मन, जौ वह जाइ न दीनो ॥९॥

पुनः यथा

आजु देवारि की राति जौ कीजै तौ आजु के घोस लौं हवैहै सभागी ।
बात सुनी जननी पै जबै तब ही मति मान की नींद तें जागी ।
अंग सिगारि निहारि निसा तिन चित्त बिहारनि सों अनुरागी ।
दीप दै देवनि जाइ जुवा मिलि ‘केसवराइ’ सों खेलन लागी ॥१०॥

राधिका को मिलेबो—(कबित्त)

जो हौं गनों औगुननि तौ तू गनै गुन गन
जो हौं गनों गुन तौ तू औगुन के गन में ।

[६] पावक-जावक (बाल०) । न परौ-तन प्यौ (नवल०) । यह छंद रस० में नहीं है ।

[८] चढ़ावत-लगावत (बाल०, नवल०) ।

[९] मन-पुन (बाल०) । हरि-हठि (नवल०) । मानहु-मानिहो (बाल०) । यह छंद रस० में नहीं है ।

[१०] यह छंद रस० में नहीं है ।

‘केसोदास’ ऐसों प्रीति छिपावति छलनि में
 जैसे छनछबि छूटै छिपै जाइ घन में ।
 भारी है निठुर निसि भादों की भयावनी में
 सु क्यों बसै घर जाको पीउ बसै बन में ।
 बैठे तें उठावै, उठि चले तें मचलि रहै,
 सोई मेरी क्यों न कहै जोई तेरे मन में ॥११॥

कृष्ण को मिलैबो—(कवित्त)

सिखै हारी सखी डरपाइ हारी कादंबिनी
 दामिनी दिखाइ हारी दिसि अधरात की ।
 झुकि झुकि हारी रति मारि मारि हारघो मार
 हारी झकझोरत त्रिविध गति बात की ।
 दई निरदई दई याहि काहे ऐसी मति
 जारति जु रैन दिन दाह ऐसे गात की ।
 कैसें हूँ न मानै हौं मनाइ हारी ‘केसोराइ’
 बोलि हारी कोकिला बुलाइ हारौ चातकी ॥१२॥

राधिका को शृंगार—(सबैया)

दीनो मैं पाइ झँबाइ महावर आँज्यों मैं आँजन आँखि सुहाई ।
 भूषन भूषित कीने मैं ‘केसव’ माल मनोहर मैं पहिराई ।
 दर्पन लै अब दीपति देखि सखी, सब अंग सिंगारि सिधाई ।
 बंक बिलोकनि अंक लै पान खवावै को कान्ह-कुमार की नाई ॥१३॥

कृष्ण को शृंगार—(सबैया)

पाग बनी अरु बागो बन्यो पटुवा पटुका कटि राजत नीको ।
 सोंधो बन्यो अति चारु, मनोहर हार बन्यो उर भावतो जी को ।
 बीरा बन्यो मुख खात मनोहर मोहि सिंगार लग्यो सब फीको ।
 भाल भली बिधि जो लौं गुपाल कियो उहि बाल बनाइ न टीको ॥१४॥

राधा को झुकिबो—(कवित्त)

फिरि फिरि फेरि फेरि फेरघो मैं हरी को मन,
 मन फेरें फिरी पुन भाग की भली घरी ।
 पल पल पाइनि परति हुती जिनकें सु
 परघो पीय तेरें पाइ पी के पाइ हौं परी ।

[११] औगुन के गन-अगुनै गुनन (नवल०) । जैसे-जैसे छन छूटि छबि छूटि छपै छन में (बाल०) ।

[१२] दिसि-निसि (रस०) । याहि-वाहि (बा०, नवल०) । दिन-ऐन (बाल०, रस०, नवल०) ।

[१३] मैं-हू (नवल०) । अब-कर (बाल०) ।

[१४] कटि राजत-कहरा कटि (बाल०, रस०) । घरी-घरी (नवल०) ।

बड़िनि की बेटिनि की बड़ीयै बड़ाई मेटि,
 'केसोदास' बड़िनि में जाँ तू हौं बड़ी करी ।
 हौं तौ जानी मनाएँ तें मेरो गुन मानिहै मैं
 ताहि क्यों मनाई तैं जु मो हो सों मनी धरी ॥१५॥

पुनः—(सवैया)

'केसवराई' बुलावत हैं चित चारु बिलोचन नीचे करौ जू ।
 कालि करै वर एक बिसौ परौ बीस बीस व्रत तें न टरौ जू ।
 आगि लगै तेरे कालि के सीस, परौ पर जाइ बजागि परौ जू ।
 आजु मिलौ तौ मिलौ ब्रजराजहि नाहि तौ नीके है राज करौ जू ॥१६॥

कृष्ण को झुकिबो —(सवैया)

तासों बसाइ कहा कहि 'केसव' कामलता तरु तेंदु रई ।
 विधि की लिपि लोपी न जाइ अमोलिक लै मनि सीस भुजंग दई ।
 अपनो मुख देखहु आरसी लै पुनि बात कहौ परमान लई ।
 बृषभान-मुता पर और सुहागिल बाउ कहाँ लगि जोभ गई ॥१७॥

राधिका सों उराहनो—(कवित्त)

'केसोदास' कौन बड़ी रूप कुनकानि पै
 अनोखो एक तेरे हौं अनूप उर ओलियै ।
 आपनैं सयान काहू मानसै न मानै तू
 गुमान के बिमान बैठि व्योम व्योम डोलियै ।
 ऐंड सों ऐंडाई अति अंचल उड़ाइ ऐसी
 छाड़ि ऐंड बैंड चितवनि निरमोलियै ।
 दीनो मन हाथ जिनि हीरा सो हरषि कै ता
 हरि सों हरिननैनी हरें हूँ तौ बोलियै ॥१८॥

कृष्ण को उराहनो—(कवित्त)

सौंहनि की सोच न सकोच काहू बीच की को
 पोंछौ प्यारे पीक-लीक लोचन किनारे की ।
 माखन की चोरी की है थोरी थोरी मोहू सुधि
 जानति बिसेष वहै जोरी है जु बारे की ।

[१५] बड़िनि की० --बड़ी बड़ी बहुन की (बाल०, रस०) । जानी-जान्यो मन में
 तू (नवल०) । मनी धरी-भली करी (नवल०) ।

[१६] नीचे करौ-चित चेतहु (बाल०) । करै वर-कलेवर (बाल०) । एक-बीस
 (नवल०) । है-हूँ (नवल०) । यह छंद रस० में नहीं है ।

[१७] लिपि-गति (नवल०) । बाउ-वारो (बाल०, नवल०) । कहाँ-जहाँ (नवल०) ।

[१८] अनप-अनल (बाल०, नवल०) । बाउ-वारो (बाल०, नवल०) ।

मेरियै कुमति और कहा कहौ 'केसोदास'
 लागति है लाल लाज इहाँ पाई धारे की ।
 एती है झुठाई, वह अबहीं रुठाई यह
 छारहू तौ छूटी नाहि पाइनि के पारे की ॥१६॥

राधा वचन सखी सों अपरं च—(सबैया)

आँधी सी धाड़ है दाई दवारि सी दासिनि के दुख देह दही है ।
 ताप के तुल तबोलिनि मालिनि-नाइनि नाह के नेह नही है ।
 तेरी सौं तेरी सौं मेरी सखी सुनि तेरी अकेली की आस रही है ।
 कान्हू मिलाउ कि मोहि न पाइहै आपने जी की मैं तोसों कही है ॥२०॥

(दोहा)

इति बिधि स्याम-सिगार-रस बहु बिधि बरनो लोइ ।
 चारि बरन चहुँ आश्रमनि कहत सुनत सुख होइ ॥२१॥
 राध राधा-रमन के करघो सिगार सुबेष ।
 रस आदिक आगे कहौ और रसनि को भेष ॥२२॥

इति श्रीमन्महाराजकुमारइंद्रजीतसिंहविरचितायां रसिकप्रियायां
 सखीजन-कर्मवर्णनं नाम त्रयोदशः प्रभावः ॥१३॥

१४

अथ हास्यरस-लक्षण—(दोहा)

नयन बयन कछु करत जब मन को मोद उदोत ।
 चतुर चित्त पहिचानियै, तहाँ हास्य रस होत ॥१॥

हास के भेद—(दोहा)

मंदहास कलहास पुनि, कहि 'केसव' अतिहास ।
 कोविद कवि बरनत सब अरु चौथो परिहास ॥२॥

मंदहास-लक्षण—(दोहा)

बिगसहि नयन, कपोल कछु दसन, दसन के बास ।
 मंदहास तासों कहत कोविद 'केसवदास', ॥३॥

[१६] बिसेष वहै-वहै किसोरी (बाल०) । रुठाई-रुढ़ाई (रस०) ।

[२१] रस-सब (रस०) । लोइ-सोइ (रस०) ।

[३] दसन के-बसन के (रस०) ।

बरनत बाढ़ै ग्रंथ बहु, कहे न 'केसवदास' ।
औरौ रस यों जानियौ सबै प्रछन्न प्रकास ॥४॥

राधिका को मंद हास, यथा—(सवैया)

भेद की बात सुने तैं कछू वह मासक तैं मुसुक्यान लगी है ।
बैठति है तिनमें हठि कै जिनकी तुमसों मति प्रेम पगी है ।
जानति हौं नलराज दमैती की दूतकथा रस-रंग रंगी है ।
पूजैगी साध सबै सुख की बड़भाग की 'केसव' ज्योति जगी है ॥५॥

अपरं च—(सवैया)

जानै को पान खवावत क्यों हूँ गई गड़ि अंगुरी ओठ नवीने ।
तैं चितयो तबहों तिहि रीति री लाल के लोचन लीलि से लीने ।
बात कही हरए हँसि 'केसव' मैं समुझी वे महारस भीने ।
जानति हौं पिय के जिय के अभिलाष सबै परिपूरन कीने ॥६॥

श्रीकृष्ण को मंद हास, यथा—(कवित)

दसन-बसन माँझ दमकै दसन-दुति
बरषि मदन सर करत अचेत हौ ।
झाई झलकत लोल लोचन कपोलनि में
मोल लेत मन क्रम बचन समेत हौ ।
भौहें कहें देत भाउ सुनौ मेरी भावती के
भावते छबीले लाल मौन कौन हेत हौ ।
'केसव' प्रकास हास हँसि कहा लेहुगे जू
ऐसी ही हँसे तैं तौ हिये को हरे लेत हौ ॥७॥

कल हास-लक्षण—(दोहा)

जहँ सुनियै कल ध्वनि कछू कोमल बिमल बिलास ।
'केसव' तन मन मोहियै, बरनहु कबि कल हास ॥८॥

राधिका को कल हास, यथा—(सवैया)

काछें सितासित काछनी 'केसव' पातुर ज्यों पुतरीनि बिचारौ ।
कोटि कटाच्छ नचै गति भेद नचावत नायकु नेह निनारौ ।

[४] बहु-जिहि (रस०) ।

[५] यह छंद रस० में नहीं है ।

[६] रीति-भाँति (रस०, नवल०) । केसव-कै सुनि (रस०, नवल०) ।

[७] दमकै-दरसै (बाल०, नवल०, रस०) । सर-दुति (रस०) । देत-भेद (बाल०) । सुनौ-कहौ (रस०, नवल०) । हँसे तैं-तौ हँसनि ही तैं हियो हरि (रस०) ।

बाजत है मृदुहास मृदंग सु दीपति दीपनि को उजियारौ ।
देखत हौ हरि देखि तुम्हें यह होतु है आँखिन ही में अखारौ ॥६॥

अपरं च, यथा—(सर्वैया)

प्रेम घने रसबन सने गति नैननि की सर-मैन भई ही ।
बाल-बहिक्रम-दीपति देह त्रिबिक्रम की गति लील लई ही ।
भौहैं चढ़ाइ सखीनि दुराइ इतै मुसुकाइ उतै चितई ही ।
'केसव' पाइहौ आजु भलें चित चोरि लै कालि गुवाल गई ही ॥१०॥

श्रीकृष्ण को कल हास, यथा—(सर्वैया)

आजु सखी हरि तोसों कछू बड़ी बार लौं बात कही रस भीनी ।
मोलि गरैं पटुका पुनि 'केसव' हारि हियें मनुहारि सी कीनी ।
मोहि अचंभो महा सु हहा कहि बाँह कहा बड़ा बार लौं लीनी ।
तैं सिर हाथ दियो उनिकें उनि गाँठि कहा हँसि आँचरु दीनी ॥११॥

अतिहास-लक्षण—(दोहा)

जहाँ हँसहि निरसंक हवै प्रकटहि सुख मुख-वास ।
आधे आधे बरन पद, उपजि परत अतिहास ॥१२॥

राधिका को अतिहास, यथा—(कबित्त)

तैसीयें जगत ज्योति सीस सीसफूलनि की,
चिलकत तरुनि तिलक तेरे भाल को ।
तैसीयें दसन-द्रुति दमकति 'केसोदास'
तैसोई लसतु लाल लाल कंठमाल को ।
तैसीयें चमक चारु चिबुक कपोलनि की,
चमकत तैसो नकमोती चल चाल को ।
हरें हरें हँसि नेक चतुर चपलनैन
चित्त चकचौध मेरे मदन गुपाल को ॥१३॥

श्रीकृष्ण को अतिहास, यथा—(कबित्त)

गिरि गिरि उठि उठि रीझि रीझि लागैं कंठ
बीच बीच न्यारे होत छबि न्यारी न्यारी सों ।

[६] निनारौ-निन्यारौ (रस०); निहारौ (बाल०, नवल०) । ही में-बीच (नवल०) ।

[१०] सर-मैन-रस मैन (नवल०) । यह छंद रस० में नहीं है ।

[११] बाँह-चाह (नवल०) । बड़ी-बहु (बाल०, नवल०) ।

[१३] चिलकत-भिलकत (बाल०, नवल०) । तरुनि-तिलनि (बाल०) ।

चमकत-भलकत (बाल०, रस०) ।

आपुस में अकुलाइ आधे आधे आखरनि
 आछी आछी बात कहँ आछी एक यारी सों ।
 सुनत सुहाइ सब समुझि परै न कछू
 'केसोदास' की सौँ दुरि देखे मैं दुस्यारी सों ।
 तरनि-तनूजा-तीर तरवर-तर ठाढ़े
 तारीं दै दै हँसत कुँवर कान्ह प्यारी सों ॥१४॥

अथ परिहास-लक्षण—(दोहा)

जहँ परिजन सब हँसि उठें तजि दंपति की कानि ।
 'केसव' कौनहु बुद्धिबल सो परिहास बखानि ॥१५॥

राधा को परिहास, यथा—(सबैया)

आई है एक महाबन तें तिय गावति मानो गिरा पगु धारी ।
 सुंदरता जनु काम की कामिनि, बोलि कह्यो वृषभानु-दुलारी ।
 गोपिकै ल्याइ गुपालहि वै अकुलाइ मिली उठि आदर भारी ।
 'केसव' भेटत ही भरि अंक हँसों सब कीक दै गोपकुमारी ॥१६॥

श्रीकृष्ण को परिहास, यथा—(सबैया)

सखि बात सुनौ इक मोहन की निकसी मटुकी सिर री हलकै ।
 पुनि बाँधि लई सुनिये नतनार कहँ कहँ बूंद करी छलकै ।
 निकसीं उहि गैल हुते जहँ मोहन लीनी उतारि जबै चल कैं ।
 पतुकी धरी स्याम खिसाइ रहे उत ग्वारि हँसी आँचल कैं ॥१७॥

अथ करुण रस-लक्षण—(दोहा)

प्रिय के बिप्रिय करन तें आनि करुण रस होत ।
 ऐसो बरन बखानियें जैसो तरुन कपोत ॥१८॥

[१४] कछू-अब (बाल०, रस०) ।

[१६] मानो-गीत (बाल०) । उठि-करि (रस०) । आदर-सदर (नवल०) ।
 कीक-कूक (रस०) । कीक दै-की कहै (बाल०) ।

[१७] सखि-जुवती सुनि औगुन मोहन के (रस०) । री हलकै-रीतियें लें
 (रस०) । सुनिए-सु नए (रस०) । नतनार-नतनामु (रस०) । पतुकी-
 पितुखी (रस०) । यह छंद बाल० में नहीं है । यह दोहा रस० में
 अधिक है—

कह्यो हास रस बरनि यों अरु रस सुगम कबित्त ।
 करुनादिक सिगारमय बरने समझहु चित्त ॥

राधिकाजू को करुण रस, यथा—(कवित्त)

तेज सूर से अपार, चंद्रमा से सुकुमार,
 संभु से उदार उर उर धरियतु है ।
 इंद्रजू से प्रभु पूरे, रामजू से रन सूरे,
 कामजू से रूप रूरे हिय हरियतु है ।
 सागर से धीर गनपति से चतुर अति,
 ऐसे अबिबेक कैसे दिन भरियतु है ।
 नंद मति मंद महा यमुदा से कहाँ कहा,
 ऐसे पूत पाइ पसुपाल करियतु है ॥१६॥

श्रीकृष्ण को करुण रस, यथा—(कवित्त)

चंपे की सी कली भली 'केसव' सुबास भरी,
 रूप की सी मंजरी मधुप मन भाइयै ।
 बेद की सी बानी अति बानी तैं सयानी देव
 राइ की सी रानी जानी जग सुखदाइयै ।
 काम की कला सी, चपला सी, काम अबला सी
 कमला सी देह धरें पूरे पुन्य पाइयै ।
 कौनों कीनी निपट कुचालि जाति ग्वारि ऐसी
 राधिका कूँवरि पर गोरस बिचाइयै ॥२०॥

अथ रौद्र रस-लक्षण—(दोहा)

होहि रौद्र रस क्रोधमय बिग्रह उग्र सरीर ।
 अरुन बरन बरनत सबै कहि 'केसव' मति धीर ॥२१॥

राधिकाजू को रौद्र रस, यथा—(कवित्त)

केहरी कपोत करि केर मृग मीन फनि
 सुक पिक कंज खंजरीट बन लीनो है ।
 मृदुल मृनाल बिब चंपक मराल बेलि
 कुंकुम दाड़िम कहँ दूनो दुख दीनो है ।

[१६] उदार उर-उदार अति (नवल०) । अति-चर (बाल०) । यह छंद रस० में नहीं है ।

[२०] भली-अली (नवल०) । भरी-भली (नवल०) । बेद की-देव की (रस०) । कुचालि-कुजाति (बाल०, नवल०) । पर-पहँ (रस०) ।

[२२] केहरी कपोत करि केर-केहरी कुबास करि केरि (बाल०); केहरी की हरी कटि करी (नवल); केहरी कपोत कुकुरी कोक (रस०) ।

जारत कनक तन तनक तनक ससि,
 बढ़त घटत बंधुजीव गंधहीनो है ।
 'केसोदास' दास भए कोबिद कुँवर कान्ह
 राधिका कुँवरि कोप कौन पर कीनो है ॥२२॥

श्रीकृष्ण को रौद्र रस, यथा—(कवित्त)

मीडि मारचो कलह वियोग मारचो बोरि कै
 मरोरि मारचो अभिमान भारयो भय भान्यो है ।
 सबको सुहाग अनुराग लूटि लीनो दीनो
 राधिका कुँवरि कहँ सब सुख सान्यो है ।
 कपट कपटि डार्यौ निपट कै औरनि सों
 मेटी पहिचानि मन में हूँ पहिचान्यो है ।
 जीत्यो रति रन मथ्यो मनमथ हूँ को मन
 'केसोदास' कौन कहँ रोष उर आन्यो है ॥२३॥

अथ वीर रस-लक्षण—(दोहा)

होहि वीर उत्साहमय गौर बरन दुति अंग ।
 अति उदार गंभीर कहि 'केसव' पाइ प्रसंग ॥२४॥

राधिकाजू को वीर रस, यथा—(कवित्त)

गति गजराज साजि देह की दिपति बाजि,
 हाव रथ भाव पतिराजि चली चाल सों ।
 'केसोदास' मंदहास असि कुच भट भिरे
 भेंट भए प्रतिभट भाले नखजाल सों ।
 लाज साजि कुलकानि-सोच पोच भय भानि,
 भौहैं धनु तानि बान लोचन बिसाल सों ।
 प्रेम को कवच कसि साहस सहायक लै
 जीत्यो रति-रन आजु मदन गुपाल सों ॥२५॥

श्रीकृष्ण को वीर रस, यथा—(कवित्त)

अघ ज्यों उदारिहौ कि बक ज्यों बिदारिहौ कि
 केस गहि 'केसोदास' केसी ज्यों पछारिहौ ।
 हरिहौ कि प्राननाथ पूतना के प्राननि ज्यों
 बन तैं कि बनमाली काली ज्यों निकारिहौ ।

[२३] कहँ-कर (रस०) ।

[२५] हाव रथ-हास रथ (रस०) । चाल-बाल (बाल०) । जाल-जान (बाल०) ।
 कसि-साजि (बाल०) । रति-राग (बाल०) । जीत्यो-जीति (बाल०, नवल०) ।

करिहौ बिमद घनबाहन ज्यों घनस्याम
 काहू सों न हारे हरि याही सों क्यों हारिहौ ।
 वे ही काम काम बर ब्रज की कुमारिकानि
 मारतु है नंद के कुमार कब मारिहौ ॥२६॥

अथ भयानक रस-लक्षण—(दोहा)

होइ भयानक रस सदा 'केसव' स्याम सरोर ।
 जाको देखत सुनतहीं, उपजि परति भय-भीर ॥२७॥

राधिकाजू को भयानक रस, यथा—(सबैया)

भुवमंडल मंडित कै घनघोर उठे दिविमंडल मंडि गटी ।
 घहराति घटा घन बात के संघट घोष घटै न घटी हूँ घटी ।
 दस हूँ दिसि 'केसव' दामिनि देखि लगी प्रिय कामिनि-कंठ-तटी ।
 जनु पंथहि पाइ पुरंदर के बन पावक की लपटें क्षपटी ॥२८॥

श्रीकृष्ण को भयानक रस, यथा—(कबित)

रोष में रस के बोल विष तें सरस होत
 जानै सो प्रबल पित्त दाखें जिन चाखी हैं ।
 'केसोदास' दुख दीबे लायक भयेऽब तुम
 आज लगि जाकी जी में आँखें अभिलाषी हैं ।
 सूधे हवै सुधारिबे कौं आए सिखवन मोहि
 सूधे हूँ में सूधी बातें मो सों उन भाखी हैं ।
 ऐसे में हौं कैसें जाउँ दुरि हूँ धौं देखौ जाइ
 काम की कमान सी चढ़ाइ भौंह राखी हैं ॥२९॥

अथ बीभत्स रस-लक्षण—(दोहा)

निंदा भय बीभत्स रस, नील बरन बपु तास ।
 'केसव' देखत सुनत ही तन मन होइ उदास ॥३०॥

राधिकाजू को बीभत्स रस, यथा—(कबित)

माता ही को मास तोहि लागतु है मीठे मुख
 पियत पिता को लोहू नेक ना घिनाति है ।
 भैयनि के कंठनि को काटत न कसकति
 तेरो हियो कैसो है जु कहति सिहाति है ।

[२६] केस गहि-कंस ज्यों कि (बाल०, रस०) । करिहौ-हरिहौ (रस०) ।

[२८] गटी-घटी (नवल०) । घन-घट (बाल०, रस०) । पंथहि-पारथ (नवल०) ।

जब जब होत भेंट तब तब मेरी भट्ट
 ऐसी सौहैं दिन उठि खाति न अघाति है ।
 प्रेतिनी पिसाचिनी निसाचरी की जाई है तू
 'केसोदास' की सौं कहि तेरी कौन जाति है ॥३१॥

श्रीकृष्ण को बीभत्स रस, यथा—(कवित्त)

टूटे ठाट धुन धुने धूम धूरि सों जु सने
 झींगुर छगोड़ी साँप बीछिन की घात जू ।
 कंटक-कलित त्रिन-बलित बिगंध जल
 तिनके तलप-तल ताकों ललचात जू
 कुलटा कुचील गात अंध तम अधरात
 कहि न सकत बात अति अकुलात जू
 छेंड़ी में घुसौ कि घर इंधन के घनस्याम
 पर-घरनीनि पहुँ जात न घिनात जू ॥३२॥

अथ अद्भुत रस-लक्षण—(दोहा)

होइ अचंभो देखि सुनि सो अद्भुत रस जानि ।
 'केसोदास' बिलास-निधि, पीत बरन बपु भानि ॥३३॥

राधिकाजू को अद्भुत रस, यथा—(कवित्त)

'केसोदास' बाल बैस दीपति तरुनि तेरी
 बानी लघु बरनत बुधि परमान की ।
 कोमल अमल उर उरज कठोर जाति
 अबला पै बलबीर-बंधान-विधान की ।
 चंचल चितौनि चित्त अचल सुभाव साधु
 सकल असाधु भाव काम की कथन की ।
 बेचति फिरति दधि, लेत तिन्हें मोल लेत
 अद्भुत रसभरी बेटी बृषभान की ॥३४॥

अन्यच्च, यथा—(कवित्त)

ब्रज की कुमारिका वे लीनें सुक-सारिका
 पढ़ावैं कोक कारिकानि 'केसव' सबै निबाहि ।
 गोरी गोरी भोरी भोरी थोरी थोरी बैस फिरैं
 देवता-सी दौरी दौरी आई चोराचोरी चाहि ।

[३१] नेक-क्योंहू (रस०) । घिनाति-अघाति (रस०; नवल०) ।

[३२] धुने-धने (रस०, नवल०) । धूरि सों जु-धूम सनि (रस०); धूरि सनि (बाल०) । अधरात-अधिराति (रस०) ।

[३४] बरनत-बरनन (बाल०, रस०) ।

बिन गुन तेरी आनि भृकुटी कमान तानि
कुटिल-कटाछ-जान यहै अचरज आहि ।
एते मान ढीठ ईठ तेरो को अदीठ मन
पीठ दै दै मारती पै झूकती न कोऊ ताहि ॥३५॥

श्रीकृष्ण को अद्भुत रस, यथा—(कवित्त)

माखन के चोर मधु-चोर दधि-दूध-चोर
देखै नाहि देखत हो चित चोरि लेत हैं ।
पुरुष पुरान अरु पूरन पुरान इन्हें
पुरुष पुरान सु कहत किहि हेत हैं ।
'केसोदास' देखि देखि सुरनि की सुंदरी वे
करति बिचार सब सुमति-समेत हैं ।
देखि गति गोपिका की भूलि जात निज गति
अगतिन कैसें धौं परम गति देत हैं ॥३६॥

अथ सम रस-लक्षण—(दोहा)

सब तें होय उदास मन, बसै एक हीं ठौर ।
ताही सों समरस कहत 'केसव' कवि-सिरमौर ॥३७॥

राधिकाजू को सम रस, यथा—(सबैया)

देखै नहीं अरबिंदनि त्यों चित चंद की आनंद-कंद निकाई ।
कामिनि काम-कथा करै कान न ताकै त्रिधाम की सुंदरताई ।
देखि गई जब तें तुमकों तब तें कछु वाहि न देख्यो सुहाई ।
छाड़ैगी देह जु देखें बिना अहो देहु न कान्ह कहैं ह्वै दिखाई ॥३८॥

[३५] कुटिल-नयन (बाल०) । मान-गर (रस०) ।

[३६] चोरि लेत-हरि लेत (रस०, नवल०) । पुरुष-पूरन (बाल०, रस०) । पूरन-
पुरुष (बाल०, रस०) । सब-सच (बाल०) । सुमति-सुरनि (रस०) ।
अगतिन-अगतनि (रस०) ।

नवल० में नीचे के सर्वे की टीका इसलिए नहीं की गई है कि 'या कवित्त बहुत प्राचीन पुस्तक में नहीं मिलत'—

बन मोहि मिले हूते केसवराइ कहा बरनों गुन गूढ़ उधारे ।
जसुदा पै गई तब रोहनी पै चुटिआहि गुहावत जाइ निहारे ।
घर जाउँ तु सोवत हैं फिर जाउँ तो नंद पै खात बरा दधिबारे ।
सपनो यह सत्त किधौं सजनी हरि बाहिर होत खड़े घरबारे ॥३७॥

[३८] देह-प्राण (बाल०) ।

श्रीकृष्ण को समरस, यथा—(सवैया)

खारिक खात न दारघौं दाख न माखन हूँ सहूँ मेटो इठाई ।
 'केसव' ऊख महूखहु दूखत आई हौं तो पह छाड़ि जिठाई ।
 तो रदनच्छद को रस रंचक चाखि गए करि केहूँ ढिठाई ।
 ता दिन तें उनि राखी उठाय समेत-सुधा बसुधा की मिठाई ॥३६॥

अपरंच—(कवित्त)

दनुज मनुज जीव जल थल जननि को,
 परघोई रहत जहाँ काल सो समर है ।
 अजर अनंत अज अमरौ मरत परि,
 'केसव' निकसि जानै सोई तौ अमर है ।
 बाजत सवन सुनि समुझि सबद करि,
 वेदनि को बाद नाहि सिव को डमर है ।
 भागहु रे भागौ भैया भागनि ज्यों भाग्यो परं,
 भव के भवन माँझ भय को भमर है ॥४०॥

(दोहा)

इहि बिधि बरन्यो बरन बहु, नवरस रसिक बिचारि ।
 बाँधौ वृत्ति कवित्त की कहि 'केसव' बिधि चारि ॥४१॥

इति श्रीमन्महाराजकुमारइंद्रजीतविरचितायां रसिकप्रियायां
 नवरसवर्णनं नाम चतुर्दशः प्रभावः ॥१४॥

१५

अथ वृत्ति वर्णन—(दोहा)

प्रथम कैसिकी भारती आरभती भनि भाँति ।
 कहि 'केसव' सुभ सात्वती चतुर चतुर बिधि जाति ॥१॥

अथ कैशिकी-लक्षण—(दोहा)

कहिये 'केसवदास' जहँ कहन हास सिंगार ।
 सरल बरन सुभ भाव जहँ सो कैसिकी बिचार ॥२॥

[३६] महूखहु-पिखूखहि (रस०); मयूखहि (बाल०, नवल०) ।

[४०] जल०-जलज थलजनि (रस०) ।

यथा—(कवित्त)

मिलिबे कौं एक मिली मिली फिरें दूतिकानि
मिलि मन ही मन बिलास बिलसति हैं ।
बोलिबे कौं एक बाल बोल सुनिबे कौं एक
बोलि बोलि तीरथनि व्रतनि बसति हैं ।
देखिबे कौं फिरे एक देवता सी दौरि दौरि,
देवता मनाइ दिन दान मनसति हैं ।
कोजं कहा करम कौं इहि रूप मेरी माई
ये तौ मेरे काम्हजू के नामहि हँसति हैं ॥३॥

अथ भारती-लक्षण—(दोहा)

बरनिय जामें बीररस रसमय अद्भुत हास ।
कहि 'केसव' सुभ अर्थ जहं सो भारती प्रकास ॥४॥

यथा—(कवित्त)

काननि कनक-पत्र चक्र चमकत चारु,
धुजा झुलमुली झलकति अति सुखदाइ ।
'केसव' छबीलो छत्र सीसफूल सारथी सो,
केसरि की आड़ि अधिरथिक रची बनाइ ।
नीकोई नकीब सम नीको नकमोती नाक
एक ही बिलोकनि गोपाल तौ गए बिकाइ ।
लोचन बिसाल भाल जरित जराऊ टीको
मानों चढ़यो मीनन के रथ मनमथ राइ ॥५॥

अथ आरभटी-लक्षण—(दोहा)

'केसव' जामें रौद्ररस, भय बीभत्सहि जान ।
आरभटी आरंभ यह, पद पद जमक बखान ॥६॥

यथा—(सवैया)

घेरि घने घन घोरत सज्जल उज्जल कज्जल की रुचि राँचैं ।
फूले फिरें इभ से नभ पाइक सावन की पहली तिथि पाँचैं ।

[३] मिलि०-मिलि मिली मही बिलास (रस०) । मनसति-मै नसति (बाल०, नवल०) ।

[५] अधिरथिक-अधिराधिक (नवल०, रस०) । नीकोई नकीब सम०-नीकें हीं नकीब सम नीकी मोती नीकी नाक (रस०); नीके हीं नीकी नाक नीकी मोती उरजात (बाल०) । टीको-लाल (रस०, नवल०) । चढ़यो-बेगें (बाल०) ।

चौहूँ कुधा तड़िता तड़पै डरपै बनिता कहि 'केसव' साँचैं ।
जानि मनो ब्रजराज बिना ब्रज ऊपर काल-कुटुंबिनि नाचैं ॥७॥

अथ सात्त्वती-लक्षण—(दोहा)

अद्भुत बीर सिंगार रस समरस बरनि समान ।
सुनतहि समुझत भाव जिहि सो सात्त्वकी सुजान ॥८॥

यथा—(कवित्त)

'केसोदास' लाख लाख भाँतिनि के अभिलाष
बारि दै री बावरी न बारि हियो होरी सी ।
राधा हरि केरी प्रीति सबतें अधिक जानि
रति रतिनाथ हूँ में देखौं रति थोरी सी ।
तिन महि भेद न भवानि हूँ पै पार्यो जाइ
मानत में भारती की भारती है भोर सी ।
एकै गति एकै मति एकै प्रान एकै मन
देखिबे कौं देह द्वं हैं नैननि की जोरी सी ॥९॥

(दोहा)

इहि बिधि केसवदास कवि, नवरस बरनि कवित्त ।
पाँच भाँति अनरस सुनौ, ताहि न दीजै चित्त ॥१०॥

इति श्रीमन्महाराजकुमारहंद्रजीतविरचितायां रसिकप्रियायां
चतुर्विधकविववृत्तिवर्णनं नाम पंचदशः प्रभावः ॥१५॥

१६

अथ अनरस-वर्णन—(दोहा)

प्रत्यनीक नीरस बिरस 'केसव' दुःसंधान ।
पात्रादुष्ट कवित्त बहु, करहि न सुकवि बखान ॥१॥

[७] कुधा-कुदा (बाल०, रस०) ।

[८] बीर सिंगार-रुद्र र बीर (बाल०, रस०) ।

[९] देखौं-जानौ (बाल०) । महि-हूँ में (रस०) । मानत-मारत (रस०) ।

अथ प्रत्यनीक-लक्षण—(दोहा)

जहाँ सिंगार बीभत्स भय, बीरहि बरनै कोइ ।
रौद्र सु करना मिलत ही प्रत्यनीक रस होइ ॥२॥

उदाहरण—(सवैया)

हँसि बोलत ही सु हँसै सब 'केसव' लाज भगावत लोक भगै ।
कछु बात चलावत घेरु चलै मन आनतहीं मनमत्थ जगै ।
सखि तू जु कही सु हुती मन मेरेहु जानि यहै न हियो उमगै ।
हरि त्यों टुक दीठि पसारत ही अँगुरीन पसारन लोग लगै ॥३॥

अथ नीरस-लक्षण—(दोहा)

जहाँ दंपती मुँह मिलै सदा रहै यह रीति ।
कपट करै लपटाय तन नीरस रस की प्रीति ॥४॥

उदाहरण—(सवैया)

गाहत सिंधु सयाननि के जिनकी मति की अति देह दहेली ।
मोहि हँसी दुख दोऊ दई तिनहूँ सो जनावति प्रेम-पहेली ।
आजु लौं कानन हूँ न सुनी सु तो देखि चली हम सौति-सहेली ।
जानी है जानी मिली मुँह ही हिय नाहिये भावति गबं गहेली ॥५॥

अथ विरस-लक्षण—(दोहा)

जहीं सोक महि भोग को बरनतु है कवि कोइ ।
'केसवदास' हुलास सों, तहीं विरस रसु होइ ॥६॥

उदाहरण—(कवित्त)

'केसोदास' न्हान दान खान पान भूल्यो ध्यान
गयो ज्ञान भयो प्रान पीठि की सी पीठि है ।
छाँड़हु रसिक लाल यह जक वह बाल
देखत ही सब सुख तुमहीं उबीठिहै ।
ऐसी सों बसीठी, सीठी चौठी अति दीठी सुन
मीठी मीठी बातनि, जु नीके हूँ में नीठि है ।
ईठनि सों टूटी ईठी ताके सोक की अँगोठी
उठी जाके उर में सु कैसे हँसि डीठिहै ॥७॥

अथ दुःसाधन-लक्षण—(दोहा)

एक होइ अनुकूल जहाँ, दूजो है प्रतिकूल ।
'केसव' दुःसाधन रस, सोभित तहाँ समूल ॥८॥

उदाहरण—(सबैया)

‘दै दधि’ ‘दीनो उधार हो केसव !’ ‘दान कहा जब मोल लै खैं’ ।
 ‘दीने बिना तौ गई जु गई !’ ‘न गई न गई घर ही फिरि जैं’ ।
 ‘गो हितु बैर कियो’ ‘कब हो हितु बैर किये बह नीकी हवै रैं’ ।
 ‘बैर कै गोरस बेचहुगी’ ‘अहो बेच्यो न बेच्यो तौ ढारि न दैं’ ॥६॥

अथ पात्रादुष्ट रस-लक्षण—(दोहा)

जैसो जहाँ न बुझियँ, तैसी करियँ पुष्ट ।
 बिनु बिचार जो बरनियँ, सो रस पात्रादुष्ट ॥१०॥

उदाहरण—(कवित्त)

कपट कृपानी मानी प्रेम-रस लटपटानी
 प्राननि को गंगाजू के पानी सम जानियँ ।
 स्वारथ-निधानी परमारथ की राजधानी
 काम की कहानी ‘केसोदास’ जग मानियँ ।
 सुबरन अरुझानी, सुधा सों सुधारि आनी
 सकल-सयान-सानी ज्ञानी सुखदानियँ ।
 गौरा औ गिरा लजानी मोहे मुनि मूढ़ प्रानी
 ऐसी बानी मेरी रानी विषु कै बखानियँ ॥११॥

(दोहा)

‘केसव’ करना हास्य कहूँ अरु बीभत्स सिंगार ।
 बरनत बीर भयानकहि संतत बैर बिचार ॥१२॥
 भय उपजै बीभत्स तें अरु सिंगार तें हासु ।
 ‘केसव’ अदभुत बीर तें, करना कोप प्रकासु ॥१३॥
 इहि विधि ‘केसवदास’ रस, अनरस कहे विचारि ।
 बरनत भूल परी जहाँ कबिकुल लेहु सुधारि ॥१४॥
 जैसे रसिकप्रिया बिना देखिय दिन दिन दीन ।
 त्यों ही भाषा-कवि सबै, रसिकप्रिया बिन हीन ॥१५॥
 बाढ़ै रति मति अति परे जाने सब रस-रीति ।
 स्वारथ परमारथ लहै, रसिकप्रिया की प्रीति ॥१६॥
 इति श्रीमन्महाराजकुमारइंद्रजीतविरचितायां रसिकप्रियायां
 रस-अनरसवर्णनं नाम षोडशः प्रभावः ॥१६॥

[१०] पात्रादुष्ट-पातरदुष्ट (नवल०) ।

[११] मानी-जानी (बाल०) । विषु कै-मुख तैं (बाल०) ।

कविप्रिया

१

(दोहा)

गजमुख सनमुख होत ही बिघन बिमुख हवै जात ।
ज्यों पग परत पयाग-मग पाप-पहार बिलात ॥१॥
बानीजू के बरन जुग सुबरनकन-परिमान ।
सुकवि सुमुख कुरुखेत परि होत सुमेर सामान ॥२॥

(दंडक)

सत्व सत्व गुन को कि सत्य ही की सत्या सुभ,
सिद्धि की प्रसिद्धि की सुबुद्धि-वृद्धि मानियै ।
ज्ञान ही की गरिमा कि महिमा बिबेक की कि
दरसन ही को दरसन उर आनियै ।
पुन्य को प्रकाश बेद विद्या को बिलास किधौं,
जस को निवास 'केसोदास' जग जानियै ।
मदन-कदन-सुत-बदन-रदन किधौं
बिघन-बिनासन को बिधि पहिचानियै ॥३॥

(दोहा)

प्रगट पंचमी को भयो कविप्रिया-अवतार ।
सोरह सै अट्ठावना फागुन सुदि बुधवार ॥४॥
नृपकुल बरनौ प्रथम ही अरु कवि 'केसव'-बस ।
प्रगट करी जिन कविप्रिया कावता के अवतस ॥५॥

अथ नृपवंश-वर्णन—(दोहा)

ब्रह्मादिक की बिनय तैं हरन सकल भुवभार ।
सूरज-वंस करघो प्रगट रामचन्द्र अवतार ॥६॥
तिनकें कुल कलिकालरिपु कहि 'केसव' रनघोर ।
गहरवार इहि ख्याति जुत प्रगट भयो नृप बीर ॥७॥
करन नृपति तिनकें भए धरनी-धर्म-प्रकास ।
जीति सबै जगती करघो वाराणसी निवास ॥८॥

[३] सत्या-सत्ता (सरदार०, हरि०) ।

[५] यह छंद सरदार० में नहीं है ।

[७] इहि-बिख्यात जग (सरदार०, हरि०) ।

[८] करघो-कियो (याज्ञिक०, याज्ञिक० अ०) ।

प्रगढ करन तीरथ भयो जग में जिनके नाम ।
 तिनके अर्जुनपाल नृप भए महोनी ग्राम ॥६॥
 गढकुंडार तिनके भए राजा साहन पाल ।
 सहजइंद्र तिनके भए, कहि 'केसव' रिपुकाल ॥१०॥
 राजा नौनगद्यौ भए तिनके पूरनसाज ।
 नौनगद्यौ के सुत भए, पृथु ज्यों पृथिवीराज ॥११॥
 रामसिंघ राजा भए तिनके सूर समान ।
 रामचन्द्र तिनके भए राजा चन्द्र प्रमान ॥१२॥
 राजा मेदिनिमल भए, तिनके 'केसवदास' ।
 अरि-मद-मर्दन मेदिनी कीनो धर्म-प्रकास ॥१३॥
 राजा अर्जुनद्यौ भए तिनके अर्जुन रूप ।
 श्रीनारायन को सखा कहै सकल भुवभूप ॥१४॥
 महादान षोडस दए जीती जग-दिसि चारि ।
 चारौ बेद अठारहौ सुने पुरान बिचारि ॥१५॥
 रिपुखंडन तिनके भए राजा श्रीमलखान ।
 जुद्ध जुरे न मुरघो कहूँ जानत सकल जहान ॥१६॥
 नृप प्रतापरुद्र सु भए तिनके जनु रनरुद्र ।
 दयादान को कल्पतरु गुननिधि सीलसमुद्र ॥१७॥
 नगर ओरछो जिन रच्यो, जग में जागति कृत्ति ।
 कृस्तदत्त मिश्रहि दई जिन पुरान की वृत्ति ॥१८॥
 भरथखंड मंडन भए तिनके भारतिचंद ।
 देस रसातल जात जिहि फेरयो ज्यों हरिचंद ॥१९॥
 सेरसाह असलेम के उर साली समसेर ।
 एक चतुर्भुज हो नयो ताको सिर तिहि बेर ॥२०॥
 उपजि न पायो पुत्र तिहि गयो सु प्रभु सुरलोक ।
 सोदर मधुकर साहि तब भूप भए भुवलोक ॥२१॥
 जिनके राज रसा बसै 'केसव' कुसल किसान ।
 सिंधु दिसा नहि बार ही पार बजाय निशान ॥२२॥

- [६] जिनके-जाको (याज्ञिक अ०) ।
 [१०] सहजइंद्र-सहजकरन (याज्ञिक अ०) ।
 [११] नौनगद्यौ-नौनिकदे (सरदार, हरि०, लाला०) । पृथु-पृथ्वी (बाल०) ।
 [१२] प्रमान-बखान (याज्ञिक अ०) । [१३] मद-मर्दन-मर्दन करि (बाल०); मर्दन तिन (याज्ञिक०) ।
 [१४] तिनके-राजा (याज्ञिक०) । भुव-भव (बाल०) ।
 [१९] मंडन-भूषण (बाल०) । जिहि-निज (बाल०, लाला०) ।
 [२०] ताको-जाको (याज्ञिक०) । तिहि-इहि (याज्ञिक०) ।
 [२१] तिहि-नहि (बाल०) ।

तिन पर चढ़ि आए जु रिपु 'केसव' गए ते हारि ।
 जिन पर चढ़ि आपुन गए आए तिन्हें सँघारि ॥२३॥
 सबरसाहि अकबर अवनि जीति लई दिसि चारि ।
 मधुकरसाह नरेश गढ़ तिनके लीन्हें मारि ॥२४॥
 खान गनै सुलतान को राजा रावत बादि ।
 हार्यो मधुकरसाहि सों आपुन साहि मुराद ॥२५॥
 साध्यो स्वारथ साथ ही परमारथ सों नेह ।
 गयो सु प्रभु बैकुंठ-मम ब्रह्मरंध्र तजि देह ॥२६॥
 तिनकें दूलहराम सुत लहुरे होरिलराउ ।
 रिपुखंडन कुलमंडनौ पूरन पुहुमि प्रभाउ ॥२७॥
 रनरूरो रनसिंघ पुनि, रतनसेन सुनि ईस ।
 बाँध्यो आपु जलालदीं बानो जाके सीस ॥२८॥
 इंद्रजीत रनजीत अह सत्रुजीत बलबीर ।
 बिरसिंघ देव प्रसिद्ध पुनि, हरसिंघ द्यौ रनधीर ॥२९॥
 मधुकरसाह नरेश के इतने भए कुमार ।
 रामसाह राजा भए, तिनकें बुद्धि अपार ॥३०॥
 घर बाहिर जहँहीं तहीं, 'केसव' देस बिदेस ।
 सब कोऊ यहइ कहै, जीत्यो राम नरेश ॥३१॥
 रामसाह सों सूरता, धर्म न पूजै आन ।
 जाहि सराहत सबंदा, अकबर सो सुलतान ॥३२॥
 कर जोरें ठाढ़े जहाँ, आठौ दिसि के ईस ।
 ताहि तहाँ बैठक दई, अकबर से अवनीस ॥३३॥
 जाके दरसन कों गए, उघरे देव किवार ।
 उपजी दीपति देह कीं, 'केसव' एकहि बार ॥३४॥

[२३] रिपु-अरि (बाल०) । जिन पर चढ़ि-चढ़ि जापर (बाल०) ।

सँघारि-सँहारि (लाला०, हरि०, सरदार०) ।

[२४] सबर-सबल (लाला०, हरि०, सरदार०) । जीति-जीतो जग दिसि चारि (बाल०) ।

[२५] रनसिंघ-दलसिंघ (लाला०, सरदार०); रनसिंधु (हरि०) । सुनि-सुत (लाला०, सरदार०) ।

[२६] देव प्रसिद्ध-द्यौ सिंघ (याज्ञिक अ०) द्यौ भो (लाला०, हरि०, सरदार०) ।

[३०] अपार-उदार (लाला०, हरि०, सरदार०) ।

[३४] देह-दीप (याज्ञिक अ०, लाला०, हरि०, सरदार०) । केसव-देखत (लाला०, याज्ञिक०, हरि०) ।

ता राजा को राज अब, राजत जगती माहँ ।
 राजा राना राउ सब, सोंवत जाकी छाहँ ॥३५॥
 तिनके सुत ग्यारह भए, जेठे साह सँग्राम ।
 दच्छिन दच्छिनराज सों जिन जीत्यो संग्राम ॥३६॥
 भरथखंडभूषन भए, तिनके भारथिसाहि ।
 भरथ भगीरथ पारथहि उनमानत सब ताहि ॥३७॥
 सुत सोदर नृप राम के जदपि बहुत परिवार ।
 तदपि सबे इंद्रजीत-सिर राज लाज को भार ॥३८॥
 कल्पवृच्छ सो दानि दिन सागर सो गंभीर ।
 'केसव' सूरु सूर सो अर्जुन सो रनधीर ॥३९॥
 ताहि कछोवा कमल सो गढ़ दीनो नृप राम ।
 बिधि ज्यों साजत बैठि तहँ 'केसव' बाम अबाम ॥४०॥
 करघो अखारो राज के सासन सब संगीत ।
 ताको देखत इंद्र ज्यों इंद्रजीत रनजीत ॥४१॥
 बालबहिक्रम बाल सब, रूप सील गुन वृद्ध ।
 जदपि भरघो अवरोध षट पातुर परम प्रसिद्ध ॥४२॥
 रायप्रबीन प्रबीन अति, नवरँगराय सुबेस ।
 अति बिचित्रनयना निपुन, लोचन ललित सुदेस ॥४३॥
 सोहति सागर राग की, तानतरंग तरंग ।
 रंगराय रंगवलित गति रंगमूरति अंग अंग ॥४४॥
 तंत्री तुंबुरु सारिका सुद्ध सुरन सों लीन ।
 देवसभा सी सोभिजै रायप्रबीन प्रबीन ॥४५॥
 सत्या रायप्रबीन जुत, सुरत'रु सुरतरु गेह ।
 इंद्रजीत तासों बँधे, 'केसवदास' हि देह ॥४६॥
 नरी किनरी आसुरी, सुरी रहति सिर नाइ ।
 नवरस नवधा भगति स्यों जोजति नवरँगराइ ॥४७॥

[३८] लाज-काज (बाला०) ।

[४०] बिधि ज्यों-ता महि (बाल०) । केसव-भूपति (बाल०) ।

[४२] बहिक्रम-वयक्रम (सरदार०, हरि०, दीन०) ।

[४४] तानतरंग-ताने तान (याज्ञिक अ०); नागर तान (याज्ञिक०) । रंग-
 बलित-करवलित (बाल०) ।

[४५] सोभिजै-देखिये (याज्ञिक अ०, हरि०, सरदार०, दीन०) ; सोहिये
 (याज्ञिक०) ।

[४६] हि-देह-सनेह (याज्ञिक० अ०, सरदार०) ।

[४७] जोजति-राजति (हरि०, दीन०); जोजित (सरदार०) ।

हाव भाव संभावना, दोला सम सुखदाय ।
 पियमन देति झुलाय गति, नव नव नवरँगराय ॥४८॥
 भैरो-जुत गौरी-सँजुत, सुरतरंगिनी लेखि ।
 चंद्रकला सी सोभिये, नयनत्रिचित्रा देखि ॥४९॥
 नयन बयन रतिसयन सम, नयनबिचित्रा नाम ।
 जयनसील पति मयन मन, सदा करति बिस्राम ॥५०॥
 नागरि सागर राग की, सागर तानतरंग ।
 पति पूरन ससि दरस दिन, बाढ़त तान तरंग ॥५१॥
 तानै तानतरंग की, तनु तनु बेधति प्रान ।
 कला कुसुमसर-सरनि की अति अयान तनत्रान ॥५२॥
 रंगराय कर अंगुली सकल गुननि की मूरि ।
 लागत मूढ़ मृदंग मुख, सबद रहत भरपूरि ॥५३॥
 रंगराय कर, मुरजमुख, रँगमूरति पद चार ।
 मनो पढ़यो है साथ ही, सब संगीत बिचार ॥५४॥
 अंग जिते संगीत के गावत गुनी अनंत ।
 रँगमूरति अँग अंग प्रति, राजत मूरतिवत ॥५५॥
 नाचति गावति पढ़ति सब, सबै बजावति बीन ।
 तिनमें करति कवित्त इक, रायप्रबीन प्रबीन ॥५६॥
 रायप्रबीन प्रबीन सों, परबीनन मन सुख ।
 अपरबीन 'केसव' कहा, पर-बीननि मन दुख ॥५७॥
 रतनाकर लालित सदा, परमानंदहि लीन ।
 अमल कमल कमनीय कर, रमा कि रायप्रबीन ॥५८॥
 रायप्रबीन कि सारदा, सुचि रुचि रंजित अंग ।
 बीना-पुस्तक-धारिनी, राजहंस-सुत संग ॥५९॥
 बृषभबाहिनी अंग उर, बासुकि लसत प्रबीन ।
 सिव-सँग-सोहे सर्वदा, सिवा कि रायप्रबीन ॥६०॥

[४८] नवनव-नवरंग (हरि०, सरदार०, दीन०) ।

[४९] संजुत-सहित (बाल०); गौरीसयुत (सरदार०) ।

[५०] सम-रति (बाल०) ।

[५१] सागर-तान०-सोहत तान० (दीन०) ।

[५२] तनु तनु-तनु मनु (बाल०) । अयान-आघात (बाब०) ।

[५३] मूढ़-मूक (दीन०) । मुख-सुख (दीन०) ।

[५४] पढ़यो है-सीख्यो (याज्ञिक अ०) ।

सबिता जू कबिता दई, ताकहँ परम प्रकास ।
ताके काज कविप्रिया, किन्हीं केसवदास ॥६१॥

इति श्रीमत्त्रिविधभूषणभूषितायां कविप्रियायां राजवंश-
वर्णनं नाम प्रथमः प्रभावः ॥६॥

२

अथ कविवंश-वर्णन—(दोहा)

ब्रह्माजू के बिनय तें प्रगट भए सनकादि ।
उपजे तिनके चित्त तें सकल सनावढ़ आदि ॥१॥
परसुराम भृगुनंद तब तिनके पायँ पखारि ।
दए बहत्तर ग्राम तिन उत्तम बिप्र बिचारि ॥२॥
जगपावन बैकुंठपति रामचंद्र इहि नाम ।
मथुरा-मंडल में दए तिन्हें सात सैं ग्राम ॥३॥
सोमवंस जदुकुलकलस त्रिभुवनपाल नरेस ।
फेरि दए कलिकाल पुर तेई तिनहि सुदेस ॥४॥
कुंभवार उद्देसकुल प्रगटे तिनकें बंस ।
तिनकें देवानंद सुत उपजे कुल-अवतंस ॥५॥
तिनकें सुत जयदेव जग थापे पृथ्वीराज ।
तिनकें दिनकर सुकुलसुत प्रगटे पंडितराज ॥६॥
दिल्लीपति अल्लावदी कीनी कृपा अपार ।
तीरथ गया समेत जिन अकर करे बहु बार ॥७॥
गया गजाधर सुत भए तिनकें आनंदकंद ।
जयानंद तिनकें भए बिद्याजुत जगबंद ॥८॥

[६१] ताकहँ-ताको (बाल०) ।

[१] बिनय-चिह्न (हरि०, सरदार०, दीन०) । सकल-सब सनौढ़िया (हरि०,
सरदार०, दीन०) ।

[३] इहि-जिहि (याज्ञिक०) ।

[७] बहु बार-कैं बार (सरदार०) ।

[८] गया-गयो (बाल०) गजाधर-गदाधर (हरि०, सरदार०, दीन०) ।

भए त्रिविक्रम मिश्र तब तिनके पंडितराय ।
 गोपाचलगढ़ दुर्गपति तिनके पूजे पाय ॥६॥
 भाव सम तिनके भए तिनके बुद्धि अपार ।
 भए सुरोत्तम मिश्र तब षट-दरसन-अवतार ॥१०॥
 मानसिंघ सों रोष करि जिन जीती दिसि चार ।
 ग्राम बीस तिनको दए राना पाय पखारि ॥११॥
 तिनके पुत्र प्रसिद्ध जग कीने हरि हरिनाथ ।
 तोंवरपति तजि और सों भूलि न ओढ़्यो हाथ ॥१२॥
 पुत्र भए हरिनाथ के कृस्नदत्त सुभ वेष ।
 सभा साहि संग्राम की जीते गढ़ा असेष ॥१३॥
 तिनको बृत्ति पुरान को दीनी राजा रुद्र ।
 तिनके कासीनाथ सुत सोभे बुद्धिसमुद्र ॥१४॥
 जिनको मधुकरसाह नृप बहुत करयो सनमान ।
 जिनके सुत बलभद्र सुभ प्रगटे बुद्धिनिधान ॥१५॥
 बालक ते मधुसाहि नृप जिनपे सुन्यो पुरान ।
 तिनके सोदर द्वय भए 'केसवदास' कल्याण ॥१६॥
 भाषा बोलि न जानई जिनके कुल को दास ।
 भाषा-कवि भी मंदमति तिहि कुल 'केसवदास' ॥१७॥
 इंद्रजीत तासों कह्यो माँगन माँझ प्रयाग ।
 माँग्यो सब दिन एकरस कीजै कृपा सभाग ॥१८॥
 यों हो कह्यो जु बीरबर माँगि जु मन में होई ।
 माँग्यो तब दरबार में मोहि न रोके कोइ ॥१९॥
 गुरु करि माँग्यो इंद्रजित तन मन कृपा बिचारि ।
 ग्राम दए इकबीस तब ताके पाय पखारि ॥२०॥

[६] तिनके-जिनके (बाल०) ।

[१०] तिनके-जिनके (दीन०); जिनमें (याज्ञिक०) । सुरोत्तम-सिरोमणि (याज्ञिक अ०, हरि०, सरदार, दीन०) ।

[११] बीस-बीस (बाल०) ।

[१२] ओढ़्यो-वोरयो (बाल०) ।

[१५] बलभद्र सुभ-पूरन सुमति (याज्ञिक०); बलिभद्र बुध (याज्ञिक० अ०) ।

[१६] बालक ते-बालहि ते (हरि०, दीन०) । सुन्यो-सुनै (हरि०, दीन०) ।

[१८] तासों-जासों (बाल०) । माँझ-मध्य (याज्ञिक०, हरि०, सरदार०, दीन०); मद्धि (याज्ञिक अ०) । कीजै-कृपा करो बड़भाग (बाल०) ।

[१९] जु-सु (बाल०) ।

इंद्रजीत के हेत तब राजा राम सुजान ।
मान्यो मंत्री मित्र के 'केसवदास' प्रमान ॥२१॥

इति श्रीमत्तुलसीदासभूषणभूषितायां कविप्रियायां कविद्वय-
वर्णनं नाम द्वितीयः प्रभावः ॥२॥

३

(दोहा)

समझें बाला बालकनि बरनन पंथ अगाध ।
कविप्रिया 'केसव' करी, छमिजो बुध अपराध ॥१॥
अलंकार कवितानि को सुनि सुनि विविध बिचार ।
कविप्रिया 'केसव' करी कविता को सिंगार ॥२॥
सगुन पदारथ अर्थजुत, सुबरनमय सुभ साज ।
कंठमाल ज्यों कविप्रिया, कंठ करहु कबिराज ॥३॥
राजत रंच न दोषजुत कविता बनिता मित्र ।
बुंदक हाला होत ज्यों गंगाघट अपवित्र ॥४॥
बिप्र न नेगी कीजिये मूढ़ न कीजै मित ।
प्रभु न कृतघ्नी सेइये दूषनसहित कवित ॥५॥

अथ सबोध कवित्त—(दोहा)

अंध बधिर अरु पंगु तजि नग्न मृतक मतिमुद्ध ।
अंध बिरोधी पंथ को, बधिर ति सबदबिरुद्ध ॥६॥
छंदबिरोधी पंगु गनि, नग्न जु भूषनहीन ।
मृतक कहावै अर्थ बिनु, 'केसव' सुनहु प्रवीन ॥७॥

- [२०] इकबीस-इकईस (बाल०), इकतीस (याज्ञिक०) ।
[२१] तब-फुनि (याज्ञिक०); पुनि (हरि०, दीन०) ।
[१] छमिजो-छमियो कवि (याज्ञिक अ०, हरि०, सरदार०, दीन०); छमियो सब (याज्ञिक०) ।
[२] कवितानि-करतानि (बाल०) ।
[३] इसके बाद हरि० और दीन० में यह दोहा अधिक है—
धरन धरत चिता करत, मोद न भावत सोर ।
सुबरन को सोधत फिरत, कवि व्यभिचारी चोर ॥
[४] होत-परत (हरि०, दीन०) ।
[५] कीजिये-कीजई (बाल०) । [७] कहावै-कहावत (बाल०) ।

अथ पंथविरोधो अंध-वर्णन—(सबैया)

कोमल कंज से फूल रहे कुच देखतहीं पति चंद बिमोहै ।
बानर से चल चार बिलोचन कोए रचे रुचि रोचन को है ।
माखन सो मधुरो अधरामृत 'केसव' को उपमा कह टोहै ।
ठाढ़ी यों कामिनि दामिनि सी मृगभामिनि सी गजगामिनि सोहै ॥५॥

अथ शब्दविरोधो-छंदविरोधो वधिर-पंगु-वर्णन—(सबैया)

सिद्ध सिरोमनि संकर सृष्टि सँघारत साधु समूह भरी है ।
सुंदर मूरति आतमभूत की जारि धरीक में छार करी है ।
सुध्र बिल्प त्रिसोचन सों मति 'केसवदास' की ध्यान अरी है ।
बंदत देव अदेव सबै मुनि गोत्रमुता अरधंग धरी है ॥६॥

(दोहा)

तोलत तुल्य रहै न ज्यों कनक तुलित तिल आधु ।
त्यौ ही छंदोभंग कों सहि न सकत सुति साधु ॥१०॥

अथ अलंकारहीन नग्न-वर्णन—(सबैया)

धीरज मोचन लोचन लोल बिलोकि कै लोक की लीकति छूटी ।
फूटि गए सुति ज्ञान के 'केसव' आँखि अनेक बिबेक की फूटी ।
छोड़ि दई सरता सब काम मनोरथ के रथ की गति खूटी ।
त्यो न करै करतारउ बारक ज्यों चित्तयो इहि बारबनूटी ॥११॥

अथ रसहीन नग्न वर्णन—(सबैया)

तोरि तनी टकटोरि कपोलनि जोरि रहे कर त्यों न रहौंगी ।
पान खबाय सुधाधर पान कै पायँ गहे तैंसैं हौं न गहौंगी !
'केसव' चूक सबै सहिहौं मुख चूमि चले यह पे न सहौंगी ।
कै फिर चूमन दै मुख मोहि कि आपनि घाइ सों जाइ कहौंगी ॥१२॥

अथ अर्थहीन मृतक-वर्णन—(सबैया)

कील कमाल कलाल करालनि साल बिसालनि चाल चली है ।
हाल बिहालनि ताल तमाल प्रबाल कबाल कलाल लली है ।

[८] ठाढ़ी यों-ठाढ़ी है (बाल०) ।

[९] सुन्दर-उत्तम (बाल०) । गोत्र-गोत (बाल०) ।

[१०] तुलित-तुला (याज्ञिक०, हरि०, सरदार०, दीन०) ।

सहि-मुनि (हरि०, दीन०) ।

[११] फूटि-भूलि (बाल०) । छोड़ि दई-दूरि करी (बाल०) ।

[१२] सबै सहिहौं-सहौं बहूतैं (बाल०); सहो सबही (याज्ञिक अ०) ।

लोल बिलोल कलोल अलोल कबोल कमोल कलोल कली है ।
बोलन बाल कपोलनि टोलनि गोलकि गोल निगोल गली है ॥१३॥

अथ दूषण-वर्णन—(दोहा)

अगन न कीजै हीनरस, अरु 'केसव' जतिभंग ।
व्यर्थ अपारथ हीनक्रम, कबिकुल तजहु प्रसंग ॥१४॥
वर्नप्रयोग न कर्नकटु सुनहु सकल कबिराज ।
सबै अर्थ पुनरुक्ति के छाड़हु सिंगरे साज ॥१५॥
देसबिरोध न बरनियै, कालबिरोध निहारि ।
लोक न्याय आगमन के, तजो बिरोध बिचारि ॥१६॥

अथ गणागण-वर्णन—(दोहा)

'केसव' गन सुभ सबदा, अगन असुभ उर आनि ।
चारि चारि बिधि चारु मति, गन अरु अगन बखानि ॥१७॥
मगन नगन भनि भगन अरु यगन सदा सुभ जानि ।
जगन रगन अरु सगन पुनि तगनहि असुभ बखानि ॥१८॥
मगन त्रिगुरुजुत त्रिलघुमय 'केसव' नगन प्रमान ।
भगन आदिगुरु आदिलघु यगनहि भनत सुजान ॥१९॥
जगन मध्यगुरु जानियै, रगन मध्यलघु होइ ।
सगन अंतगुरु, अंतलघु तगन कहै सब कोइ ॥२०॥
आठौ गन की देवता, अरु गुन-दोष-विचार ।
छंदोग्रंथनि में कह्यो, तिनको बहु बिस्तार ॥२१॥

अथ गणागणदेवता-वर्णन—(दोहा)

मही देवता मगन की, नाग नगन को देखि ।
जल जिय जानहु यगन को, चंद भगन को लेखि ॥२२॥
सूरज जानहु जगन को, रगन सिखीमय मानु ।
काल समुझियै सगन को, तगन अकास बखानु ॥२३॥

अथ गणागणजाति-वर्णन—(दोहा)

मगन नगन को मित्र गन, भगन यगन भनि दास ।
उदासीन ज त जानियै, र स रिपु 'केसवदास' ॥२४॥

[१५] सबै-जिते (बाल०) ।

[१६] भनत-बखान (याज्ञिक०, याज्ञिक अ०, हरि०, सरदार०, दोन०) ।

[२१] यह दोहा बाल० में नहीं है ।

[२३] काल-वायु (हरि०, दोन०) ।

अथ गणागण-फलाफल—(छप्पे)

भूमि भूरि सुख देइ, नीर नित आनंदकारी ।
 आगि अंग दिन दहै, सूर सुख सोखे भारी ।
 'केसव' अफल अकास, काल किल देस उदासै ।
 मंगल चंद अनेक, नाग बहु बुद्धि प्रकासै ।
 इहि बिधि कबित सब जानियै, करता अरु जाकौं करै ।
 तजि कै प्रबंध अरु देव, गन सदा सुभासुभ फल करै ॥२५॥

अथ द्विगण-विचार — (दोहा)

जौ कहैं आदि कबित की, अगन होइ बड़भाग ।
 तातैं द्विगुन-विचार चित्त कीनो बासुकि नाग ॥२६॥

(कबित)

मित्र तें जु होइ मित्र बाढ़े बहु बुद्धि रिद्धि,
 मित्र तें जु दास त्रास जुद्ध तें न जानियै ।
 मित्र तें उदास गन होत गोत दोष उदौ,
 मित्र तें जु सत्र होइ मित्रबंधु हानियै ।
 दास तें जु मित्रगन काजसिद्धि 'केसोदास',
 दास तें जु दास सब जीव बस मानियै ।
 दास तें उदास होत धननास आसपास,
 दास तें जु सत्रु मित्र दास सो बखानियै ॥२७॥
 जानियै उदास तें जु मित्रगन तुच्छ फल,
 प्रगट उदास ते जु दास प्रभुताइयै ।
 होइ जौ उदास तें उदास तौ न फलाफल,
 जौ उदास ही तें सत्रु तौ न सुख पाइयै ।
 सत्रु तें जु मित्रगन ताहि तौ अफल गन,
 सत्रु तें जु दास आसु बनिता नसाइयै ।
 सत्रु तें उदास कुलनास होत 'केसोदास',
 सत्रु तें जु सत्रु नास नायक को गाइयै ॥२८॥

अथ गणागण को उदाहरण—(दोहा)

राधा राधारमन कैं, मन पठयो हे साथ ।
 उद्धव तुम ह्यां कीन सों, कही जोगी की गाय ॥२९॥

[२५] काल-वायु (हरि०, दीन०) । जाकौं-जा हित (दीन०) । देव-दोष (दीन०) ।

[२७] बुद्धि रिद्धि-रिद्धि सिद्धि (दीन०) । दोष उदौ-दुःख देत (दीन०) ।
 बस मानियै-सनमानियै (बाल०) । दास सो-सत्रु सो (दीन०) ।

कहौ कहाँ तुम पाहुने, प्रातनाथ के मित ।
फिरि पीछे पछिताहुगे, ऊधो समुझौ चित्त ॥३०॥
दोहा दुहैं उदाहरन, आठौ आठघौ पाइ ।
'केसव' गन अरु अगन के, समुझौ बुद्धि सुभाइ ॥३१॥

अथ गुरुलघु-भेद-वर्णन—(दोहा)

संजोगी की आदि जुतबिंदु जु दीरघ होइ ।
सोई गुरु, लघु और सब कहत सयाने लोइ ॥३२॥
दीरघ हैं लघु करि पढ़ैं, सुख ही मुख जिहि ठौर ।
सोई लघु करि लेखियै, कहत रसिक-सिरमौर ॥३३॥

(सबैया)

पहिलैं सुख दै सब ही को सखी उत ही हठि कै जु हरी मति मीठी ।
दूजे लै जीवनभूरि अकूर गयो अंग अंग लगाइ अंगीठी ।
अब धौं किहि कारन 'केसव' ये उठि धाए हैं ऊधव झूठी बसीठी ।
माथुर लोगनि के संग की वह बैठक तोहि अजौं न उबीठी ॥३४॥

(दोहा)

संजोगी की आदि को कबहुँक बरन बिचार ।
'केसवदास' प्रकास-बस, लघु करि ताहि निहार ॥३५॥
अमल जुन्हाई चंदमुखि ठाढ़ी भई अन्हाइ ।
सौनित के मुख-कमल ज्यों देखि गए कुम्लाइ ॥३६॥

अथ हीनरस-वर्णन—(दोहा)

बरनत 'केसवदास' रस, जहाँ बिरस ह्वै जाइ ।
ता कवित्त सों हीनरस; कहत सकत कबिराइ ॥३७॥

(सबैया)

दै दधि, दीनो उधार हो 'केसव', दान कहा अरु मोल लै खैं हैं ।
दीने बिना तो गई जु गई, हौं गई न गई घर ही फिर जैं हैं ।

[३१] बुद्धि-सुभाइ-सब कबिराइ (बाल०) ।

[३३] कहत-केसव कवि (याज्ञिक०, सरदार०, दीन०) ।

[३४] हठि कै-हितु कै (याज्ञिक०, याज्ञिक अ०, हरि०, सरदार०, दीन०) ।

दूजे लै-दूसरी (बाल०) । अकूर-लै कूर (बाल०) ।

[३५] कबहुँक-गुरवरन बिषे ही जान । और रीति गणना बिषे (याज्ञिक०) ।

कुबरन-कुवस्तु (बाल०) । निहार-बखान (याज्ञिक०) ।

[३६] कुम्लाइ-मुरझाइ (याज्ञिक अ०, दीन०) ।

[३७] बरनत-उपजत (बाल०) ।

गो हितु बैर कियो, कब हो हित बैर किये बर नीके हूँ वै रहैं ।
बैर कै गोरस बैचहुगी, अहो बेच्यो न बेच्यो तो ढारि न दैं ॥१८॥

अथ यतिभंग-वर्णन—(दोहा)

और चरन के बरन जहँ, ओर चरन सों लीन ।
सो यतिभंग कबित कहि 'केसव' कहत प्रबीन ॥१९॥
हरि हरि 'केसव' मदन मोहन घनस्याम सुजान ।
यों ब्रजबासी द्वारिकानाथ रटत दिन मान ॥२०॥

अथ विरोध-वर्णन—(दोहा)

एक कबित प्रबंध में, अर्थविरोध जु होइ ।
पूरब पर अनमिल सदा, व्यर्थ कहैं सब कोइ ॥२१॥
(मरहटा)

सब सत्रु सँघारहु जी जिनि मारहु सजि जोधा उमराउ ।
बहु बसुमति लीजै, मोमत कीजै, दोजै आपन दाउ ।
कोउ न रिपु तेरो सब जग हेरो तुम कहियत अतिसाधु ।
कछु देहु मँगावहु भूख भगावहु हौं पुनि धनी अगाधु ॥२२॥

अथ अपार्थ-लक्षण—(दोहा)

अर्थ न जाको समुझियै, ताहि अपार्थि जानि ।
मतवारे उनमत ज्यों सिसु के बचन बखानि ॥२३॥
पिये लेत नरसिंधु को हो अति सज्बर देह ।
ऐरावत हरि भाउतो, देखौ गरजत मेह ॥२४॥

अथ क्रमहीन-लक्षण—(दोहा)

क्रम ही गुननि बखानि कै गुनी गनै क्रमहीन ।
सो कहिजै क्रमहीन कवि, 'केसवदाम' प्रबीन ॥२५॥
(तोटक)

जग की रचना कहि कौन करी ।
किहि पारन कौं जिय पैज धरी ।
अति कोपि कै कौन सँघार करे ।
हरि जू हर जू बिधि बुद्धि ररै ॥२६॥

[४१] कहै०-कहावै सोइ (याज्ञिक०) । कहै सयाने लोइ (बाल०) ।

[४२] जिनि मारहु-जीवन मारहु (हरि०, दीन०) । दोजै-लीजै (सरदार०, दीन०) । पुनि-तुम (दीन०) । धनी-धर्म (सरदार०) ।

[४५] कवि-जग (याज्ञिक०, हरि०, सरदार०, दीन०) ।

[४६] पारन कौं-राखन की (याज्ञिक०, याज्ञिक अ०, हरि०, सरदार०, दीन०) ।

अथ कर्णकटु-लक्षण—(दोहा)

कहत न नीको लागाई, सो कहिजे कटुकर्नु ।
‘केसवदास’ कबित में, भूलि न ताको बर्नु ॥४७॥
बारनु बन्यो बनाउ तन, सुबरन बली बिसालु ।
चढ़िजे राज मँगाई के, मानो राजत कालु ॥४८॥

अथ पुनरुक्त-लक्षण—(दोहा)

एक बार कहिजो कछु, बहुरि जु कहिजतु सोइ ।
अर्थ होइ के सबद पुनि, सुनि पुनरुक्त सु होइ ॥४९॥

(सोरठा)

मधवा धन आरुढ़, इंद्र आजु अति सोभिजै ।
ब्रज पर कोप्यो मूढ़, मेघ दसौ दिसि देखिये ॥५०॥

(दोहा)

दोष नहीं पुनरुक्ति को, एक कहैं कबिराज ।
छाँड़ि अर्थ पुनरुक्ति को, सब्द कहौ इहि साज ॥५१॥
लोचन पैने सरनि तें, है कछु तो कहैं सुद्धि ।
तन बेधयो, मनु बेधियो, बेधी मन को बुद्धि ॥५२॥

अथ देशविरोध-वर्णन—(दोहा)

मलयानिल मन हरत हठि, सुखद नर्मदाकूल ।
सुबन सधन धनसारमय, तरवर तरल सफूल ॥५३॥
मरुत देस मोहन महा, देखहु सकल सभाग ।
अमल कमल-कुल-कलित जहँ, पुरन सलिल तड़ाग ॥५४॥

अथ कालविरोध-वर्णन—(दोहा)

प्रफुलित नव नीरज रजनि, बासर कुमुद बिसाल ।
कोकिल सरद, मयूर मधु, बरष मुदित मराल ॥५५॥

अथ निगमविरोध-वर्णन—(दोहा)

स्थाई बीर सिंगार के, करुना धृता प्रमान ।
तारा अरु मंदोदरी, कहत सतीनि समान ॥५६॥

[५२] सुद्धि-लाज (बाल०) । बुद्धि-काज (बाल०) ।

[५४] मरुत देस-मरु सुदेस (हरि०, सरदार०, दोन०) ।

[५५] बिसाल-बिलास (बाल०) ।

अथ न्याय-आगम-बिरोध-वर्णन—(दोहा)

पूजिय तीन्यौ बरन जहँ करि बिप्रनि सों भेद ।
 पुनि लीबो उपबीत हम, सुनि लीजें सब बेदु ॥१७॥
 इहि बिधि औरहु जानिजहु, कबिकुल सकल बिरोध ।
 'केसव' जे हे कछुक ह्याँ, मूढ़नि के अबिरोध ॥१८॥
 'केसव' नीरस बिरस अरु, दुस्संधान बिधानु ।
 पात्र जु दुष्टादिकन को, रसिकप्रिया तें जानु ॥१९॥

इति श्रीमद्विविधभूषणभूषितायां कविप्रियायां
 कवित्वदुषणवर्णनं नाम तृतीयः प्रभावः ॥३॥

४

अथ कविभेद-वर्णन—(दोहा)

'केसव' तीनहु लोक में, त्रिविध कबिनि के तात ।
 मति पुनि तीन प्रकार की बरनत मति-अवदात ॥१॥
 उत्तम मध्यम अधम कबि, उत्तम हरि-रस-लीम ।
 मध्यम मानत मानसनि, दोषनि अधम प्रबीन ॥२॥

(सवैया)

हैं अति उत्तम ते पुरुषारथ जे परमारथ के पथ सोहैं ।
 'केसवदास' अनुत्तम ते नर संतत स्वारथ-संजुत जो हैं ।
 स्वारथ हू परमारथ भोगनि माध्यम लोगनि के मन मोहैं ।
 भारथ पारथमीत कह्यो परमारथ-स्वारथ-हीन ते को हैं ॥३॥

अथ कविरोत-वर्णन—(दोहा)

साँची बात न बरनहीं, झूठी बरनन बानि ।
 एकनि बरनत नियम करि, कवि-मत बिबिध बखानि ॥४॥

- [१७] जहँ-जग (दीन०); वर (सरदार०) । सुनि-पढ़ि (वही) ।
 [१८] जे हे०-कहे कछुक अब (हरि०, दीन०) । अबिरोध-अनुरोध (हरि०) ।
 [१९] दुष्टादिकन-दुष्टाकबिनि (बाल०) ।
 [१] तात-राय (याज्ञिक०, हरि०, सरदार०, दीन०) । मति-अवदात-सब सुखदाय (वही) ।
 [२] मानसनि-मानुषनि (हरि०, सरदार०, दीन०) ।
 [४] बिबिध-त्रिविध (हरि०, सरदार०, दीन०) ।

अथ सत्य बात को वर्णन—(दोहा)

‘केसवदास’ प्रकास सह चंदन के फल फूल ।
कृस्त पक्ष की जोन्ह ज्यों, सुक्ल पक्ष तम तुव ॥१॥

अथ मिथ्या बात को वर्णन—(दोहा)

जहँ जहँ बरनत सिंधु को, तहँ तहँ रतननि लेखि ।
सूखम सरबर हू कहत ‘केसव’ हंस बिसेषि ॥६॥
लेन कहैं भरि मूठि तम, सृजिनि सियनि बनाइ ।
अंजलि भरि पीवन कहैं चंद्र-चंद्रिका पाइ ॥७॥
सब के कहत उदाहरन बाढ़े ग्रंथ अपार ।
कहैं कहैं ताते कह्यो, कबिकुल चतुर विचार ॥८॥

अथ तम को उदाहरण—(कवित्त)

कटक न अटकतु फाटें न चरन चैंपि,
बात तें न जाति उड़ि आंगु न उधारियै ।
नेक ही न भीजत मुसलाधार बरसत,
कीच न रुचत रंच वित्त में बिचारियै ।
‘केसवदास’ सावकास परम प्रकास सों,
उसारियै पसारियै न पिय पै बिसारियै ।
चलिये जू ओढ़ि पट तम ही को गाढ़ो तम,
पातरो पिछोरा सेत पाट को उतारियै ॥९॥

अथ चंद्रिका को उदाहरण—(कवित्त)

भूषन सकल घनसार ही के घनस्याम,
कुसुम-कलित केस रही छबि छाई सी ।

-
- [५] सब-बहु (हरि०, सरदार०, दीन०) ।
[६] कों-सब (याज्ञिक०, हरि०, सरदार०, दीन०) । कहत-कहै (याज्ञिक०, हरि०, सरदार०, दीन०) ।
[७] सृजिनि०-सुजनी सियत (याज्ञिक०) ।
[८] सब के-केसव (बाब०) । चतुर-लेहू (याज्ञिक०) ।
[९] अटकतु-अटकै न (याज्ञिक०, हरि०, सरदार, दीन०) आंगु-अंग (हरि०, सरदार, दीन०) । रुचत-रुचत (याज्ञिक०, हरि०, सरदार०, दीन०) । प्रकास सों-प्रकासन (याज्ञिक०, हरि०, सरदार०, दीन०) । गाढ़ो तम-गाढ़ो तन (याज्ञिक०, हरि०, सरदार०, दीन०) ।

मोतिनि की सरि सरि कंठ कंठमाल हार,
 और रूप जानि जात हेरत हिराई सी ।
 चंदन चढ़ाई चारु सुंदर सरीर सब,
 राखी सुभ्र सोभा सुनि बसन बसाई सी ।
 सारदा सी देखियत देखी जाइ 'केसोराइ',
 ठाढ़ी वह कुँवरि जुन्हाई में अन्हाई सी ॥१०॥

अथ कविनियम-वर्णन- (दोहा)

बरनत चंदन मलय ही, हिमगिरि ही भुजपात ।
 बरनत देविनि चरन तें, सरि तें मानुष-गात ॥११॥
 अति लज्जाजुत कुलबधू, गनिका गनि निर्लज्ज ।
 कुलटनि सों कोबिद कहत, अंग सलज्ज अलज्ज ॥१२॥
 बरनत नारिनि नरनि तें, लाज चौगुनी चित्त ।
 भूख द्विगुन साहस छगुन, काम अठगुनै मित्त ॥१३॥
 कोकिल को कल बोलिबो, बरनत हैं मधुमास ।
 बरषा ही हरषित कहैं, केकी 'केसवदास' ॥१४॥
 दनुजन सों दितिसुतन सों, असुरै कहत बखानि ।
 ईस-सीस ससि वृद्ध की, बरनत बालक-बानि ॥१५॥
 सहज सिंगारत सुंदरी, जदपि सिंगार अपार ।
 तदपि बखानत सकल कवि, सोरहई सिंगार ॥१६॥

(कवित्त)

प्रथम सकल सुचि, मज्जन, अमल बास,
 जावक, सुदेस केसपास को सुधारिबो ।
 अंगराग, भूषन विविध, मुखबास राग,
 कज्जल-कलित लोल लोचन निहारिबो ।
 बोलनि हँसनि मृदु चातुरी चलनि चारु,
 पल पल प्रति पतिव्रत प्रतिपारिबो ।
 'केसोदास' सबिलास करहु कुँवरि राधे,
 यहि विधि सोरह सिंगारनि सिंगारिबो ॥१७॥

[१०] और-बाकी (दीन०) । सुनि-स५ (याज्ञिक०, हरि०, सरदार०, दीन०) ।

[१४] बोलिबो-कुजिबो (याज्ञिक०) । कहैं-सही (बाल०) ।

[१५] वृद्ध-वृद्धि (हरि०, दीन०) ।

[१७] मृदु-चित्त (याज्ञिक०, हरि०, दीन०) । प्रति पतिव्रत-पतिव्रत प्रीति (सरदार०) ।

(दोहा)

कुलटा को पति प्रेमबस बारबधुनि कें जानु ।
जाहि दई पितु मातु सो कुलजा को पति मानु ॥१८॥
महापुरुष को प्रगट ही, बरनत वृषभ समान ।
दीप, थंभ, गिरि, गज, कलस, सागर, सिंघ प्रमान ॥१९॥

(कवित्त)

गुनमनि बैरागर, धीरज को सागर,
उजागर धवल धरि धर्मधुर धाए जू ।
खलतर तोरिबे कौ राजै गजराज सम,
अरि गजराजनि को सिंह सम गाए जू ।
बामनि कौ बामदेउ, कामिनि कौ बामदेउ,
रत-जयथंभु रामदेउ मन भाए जू ।
कासीस-कुल-कलस, जंबूदीप-दीप 'केसो-
दास' को कलपतर इंद्रजीत आर जू ॥२०॥

(दोहा)

वृषभ कंध सुर मेघ सम भुज धुज अहि परिमान ।
उर सम सिला कपाट अंग, और त्रियानि समान ॥२१॥

(कवित्त)

मेघ ज्यों गंभीर बानी सुनत सखा सिखीनि,
सुख अरि उर क जवासे ज्यों जरत हैं ।
जाके भुजदंड भुवलोक में अभय धुज,
देखि देखि दुज्जन भुजंग ज्यों डरत हैं ।
तोरिबे कौ गढ़तर होत हैं सिला सुरूप,
राखिये कौ द्वारनि किवार ज्यों अरत हैं ।
भूतल कौ इंद्र इंद्रजीत राजै जुग जुग
'केसवदास' जाकें राज राज सो करत हैं ॥२२॥
इति श्रीमत्तुलसीदासभूषणभूषितायां कविप्रियायां कविव्यवस्था
वर्णनं नाम चतुर्थः प्रभावः ॥४॥

[१८] बारबधुनि कें-बारबधुन (सरदार०) । जानु-दान (हरि०) । यह दोहा
याज्ञिक और दीन० में नहीं है ।

[१९] प्रमान-सुजान (बाल०) । सिंघ-सील (याज्ञिक०) ।

[२१] समान-प्रमान (बाल०) ।

५

अथ कविता-अलंकार-वर्णन—(दोहा)

जदपि सुजाति सुलच्छनी, सुबरन सरस सुवृत्त ।
भूषन बिनु न बिराजहीं, कविता बनिता मित्त ॥१॥
कबिनि कहे कबितानि के, अलंकार द्वै रूप ।
एक कहैं साधारनै, एक बिसिष्ठ सरूप ॥२॥

अथ सामान्यालंकार—(दोहा)

सामान्यालङ्कार को चारि प्रकार प्रकास ।
बर्न बर्न्य भू-राज-श्री, भूषन 'केसवदास' ॥३॥

अथ वर्णालंकार—(दोहा)

स्वेत पीत कारे अरुन धूमर नीले बर्न ।
मिश्रित 'केसवदास' कहि, सात भाँति सुभकर्न ॥४॥

अथ श्वेतवर्णन—(दोहा)

कीरति, हरिहय, सरद घन, जोन्ह, जरा मंदार ।
हरि, हरि, हरगिरि, सूर, ससि, सुधा, सौध, घनसार ॥५॥
बल, बक, हीरा, केवरो, कौड़ी, करका, कास ।
कुंद, काँचरी, कमल, हिम सिसता, भस्म, कपास ॥६॥
खांडि, हाडि, निशंर, चँवर, चंदन, हंस, मुरार ।
छत्र, सत्यजुग, दूध, दधि, सँख, सिंघ, उडुमार ॥७॥
सेष, सुकृति, सुचि, सत्वगुन, संतनि के मन, हास ।
सीपि, चून, भोड़र, फटिक, खटिका, फेन, प्रकास ॥८॥
सुक्र, सुदर्शन, सुरसरित, वारन बाजि समेत ।
नारद, पारद, अमल जल सारदादि सब सेत ॥९॥

(कवित्त)

कीने छत्र छित्तिपति, 'केसोदास' गनपति,
दसन, बसन बसुमति कर्यो चारु है ।
बिधि कियो आसन सरासन असमसर,
आसन कौ कीनो पाकसासन तुषारु हैं ।

[१] सरस-बरन (बाल०) ।

[७] दधि-बुधु (बाल०) ।

हरि करी सेज हरिप्रिया कर्यो नाकमोती,
 हर कर्यो तिलक हरा हूँ कर्यो हार है ।
 राजा दसरथसुत सुनौ राजा रामचंद्र,
 रावरो सुजसु सब जग को सिंगार है ॥१०॥
 देहदुति हलघर कीने निसिकर कर,
 जगकर बानी बर, बिमल बिचार है ।
 मुनिगन मन मानि, दुजनि जनेऊ जानि,
 संख संखपानि-पानि सुखद अपार है ।
 'केसोदास' सबिलास बिलसै बिलासिनीन,
 सुख मुख मृदु हास, उदय उदार है ।
 राजा दसरथसुत सुनौ राजा रामचंद्र,
 रावरो सुजसु सब जग को सिंगार है ॥११॥
 नारायन कीनी मनि उर अवदात गुनि,
 कमला को बीना भनि सोभा सुभ सार है ॥
 'केसव' सुरभि केस, सारदा सुदेस बेस,
 नारद को उपदेस, बिमल बिचार है ।
 सौनक ऋषी बिसेषि सीरष सिखानि लेखि,
 गंगा की तरंग देखि, बिमल बिहार है ।
 राजा दसरथसुत सुनौ राजा रामचंद्र,
 रावरो सुजसु सब जग को सिंगार है ॥१२॥

(सवैया)

बिलोकि सिरोरुह सेत समेत, तनूरुह 'केसव' यों गुन गायो ।
 उठे किधौ आयु की औधि के अंकुर, सूल की सुखल समूल नसायो ।
 लिख्यो किधौ रूपे के पानी पराजय रूप को भूप कुरूप लिखायो ।
 जरा सरपंजर जीउ जर्यो कि जरा जर-कंबर सो पहिरायो ॥१३॥
 अभिराम सचिक्कन स्याम सुगंध के धामहु तें जे सुभाइक के ।
 प्रतिकूल भए दृगसूल सबे किधौ साल सिमार के धाइक के ।
 निज दूत अभूत जरा के किधौ अबिताली जरा जन जाइक के ।
 सित केस हियै इहि बेस लसे जनु साइक अंतक नाइक के ॥१४॥

[११] सबिलास-सो बिलसि (दीन०) । राजा रामचन्द्र-राजिवनयन राम (बाल०) ।

[१२] बीना-बाणी (दीन०) । बिमल बिचार-बिसद बिचार (दीन०) ।
 सिखानि-सिखीनि (बाल०) । बिमल बिहार-बिसद बिहार (बाल०) ।

[१३] केसव-कोविद (बाल०) । रूपे-रूप (हरि, दीन०) ।
 लिखायो-भजायो (याज्ञिक०) । जरा जरकंबर-जुरा जरकंबर (दीन०) ।

[१४] अबिताली-अफताली (हरि, दीन०) । जाइक-जाइक (वही) ।

लसैं सित लोम सरीर सबै कि जरा जस रूपे के पानी लिखायो ।
 सुरूप के देस उदास की कीलनि कीलित कै कि कुरूप नसायो ।
 जरैं किधौं 'केसव' व्याघिन की किधौं औघि के अंकुर अंत न पायो ।
 जरा सरपंजर जीव जर्यो कि जरा जरकंबर सो पहिरायो ॥१५॥

अथ पीत-वर्णन — (दोहा)

हरिबाहन, बिधि, हरजटा, हरी, हरद, हरतालु ।
 चंपक, दीपक, बीररस, सुरगुरु, मधु, सुरपालु ॥१६॥
 सुरगिरि, भू, गोरोचना, गंधक, गोधनमूत ।
 चक्रवाक, मनसिल, सदा द्वापर, बानरिपूत ॥१७॥
 कमलकोस, केसवबसन, केसर, कनक सभाग ।
 सारोमुख, चपलादि सब, पीतरि पीत पराग ॥१८॥

(सवैया)

मंगल ही जु करो रजनी बिधि, याही तैं मंगली नाउ धर्यो है ।
 दूसरें दामिनि देह सँवारि, उड़ाइ दर्ई धनु जाइ बर्यो है ।
 रोचन कौं रचि केतकि चंपक फूलनि में अँगवास भर्यो है ।
 गौरि-करि गुराई को मेल मिले हाटक कै करहाट कर्यो है ॥१९॥

अथ कृष्ण-वर्णन—(दोहा)

बिंध्य वृक्ष, आकास, असि, अजुंन, खंजन, साँप ।
 नीलकंठ को कंठु, सनि, व्यास, बिसासी, पाप ॥२०॥
 राकस, अगरु, लँगूरमुखु राहु, छाँह, मद, रोर ।
 रामचंद्र, घन, द्रोपदी, सिंधु, असुर, तम, चोर ॥२१॥
 जामू, जमुना जानियै, तिल, खल, मनसिज, चीर ।
 भील, करी, बन, नरक, मसि, मृगमद, कज्जलनीर ॥२२॥
 मधुप, निसा, सिगाररस, काली, कृत्या, कोल ।
 अपजसु रीछ, कलंक, कलि, लोचन-तारे लोल ॥२३॥

[१५] रूपे-रूप (बाल०) । कीरति (अन्यत्र) ।

कहीं-कहीं यह छंद और है—

चंद्रमनि चंद्रचूड़ चारुता बिचारि चित्त चामर चांदनी चंद्र वारि वारि धार्यो है ।
 'केसव' कुमुद कुंद कंबुकंठ कंठरव कामिनी कटाक्ष कमनीयता पसार्यो है ।
 पारद नारद मुनि सारद सरदधन घन घनसार जीति मलें मन मार्यो है ।
 ऐसी जस उज्जल जगत इंद्रजीतजु को बिसद प्रभाव बर जासों हैंस हार्यो है ।

[१८] दि सब-दिवस (हरि०, दीन०) ।

[१९] दूसरें-दीपति (दीन०) । मेल मिले करि-मेलहि लै करि (दीन०) । कै-कैं (बाल०); तैं (दीन०) ।

मारग अग्नि, किसान नर, लोभ, छोभ, दुख, मोह ।
बिरह, जसोदा, गोपिका, कोकिल, महिषी लोह ॥२४॥
काँच, कीच, कच, काम, मल केकी, काक, कुरूप ।
कलह, क्षुद्र, छल आदि दै कारे कृष्ण सरूप ॥२५॥

(कवित्त)

बैरिनि कें बहु भाँति देखतहीं लागि जाति,
कालिमा कमलमुख सब जग जानी है ।
जतन अनेक करि जदपि जनम भरि,
घोवत हूँ छूटति न 'केसव' बखानी है ।
निज दल जागँ जोति, परदल दूनी होति,
अचला चलति यह अकह कहानी है ।
पूरन प्रताप-दीप-अंजन की राजि राजे,
राजति श्रीरामचंद्र-पानि न कृपानी है ॥२६॥

अथ श्वेत-कृष्ण-मिश्रित-वर्णन--(कवित्त)

हंसनि के अवतंस रचे रंच कीच करि,
सुधा सों सुधारे मठ काँच के कलस सों ।
गंगाजू के अंग-संग जमुना-तरंग बल-
देव को बदन रस्यो बाखनी के रस सों ।
'केसव' कपाली-कंठ-कूल कालकूट जैसें,
अमल कमल अलि सोहै ससि सस सों ।
राजा रामचंद्रजू के त्रास बस भारे भूप,
भूमि छाड़ें भागे फिरें ऐसे अपजस सों ॥२७॥

अथ आरक्त-वर्णन—(दोहा)

इंद्रगोप, खद्योत, कुज, केसरि, कुसुम बिसेषि ।
'केसव' गजमुख, बिबरबि, ताँबो, तक्षक लेखि ॥२८॥
रसना, अधर, द्रिगंत, पल, कुक्कुटसिखा समान ।
मानिक सारससीस सुक, बानर-बदन प्रमान ॥२९॥

[२६] राजि राजे-राजे रज (याज्ञिक०); राजे रेख (हरि०, सरदार, दीन०) ।

[२७] रस्यो-रच्यो (सरदार, दीन०) ।

[२८] केसव-मदिश (हरि०, सरदार०, दीन०) । बिब-बिबि (याज्ञिक०);

कोकिल, चास, चकोर, पिक, पारावत नख ने ।
 चिंचु चरन कलहंस के, पकी कँदूरी ऐन ॥३०॥
 जपाकुसुम, दाढ़िमकुसुम, किसुक, कंज, असोक ।
 पावक, पल्लव, बीटिका, रंग रुचिर सब लोक ॥३१॥
 रातो चंदन, रुद्ररस, क्षत्रिय-धर्म मँजीठ ।
 अरुन महावर, रुधिर, नख, गेरू, संध्या ईठ ॥३२॥

(सवैया)

फूले पलास बिलासथली वहि 'केसवदास' हुलास न थोरे ।
 सेष असेष मुखानल की अनु, ज्वाल बिलास चली दिवि वोरे ।
 किसुकश्री सुकतुंडनि की रुचि राचै रसातल में चित्त चोरे ।
 चिंचुनि चापि चहूँ दिसि डोलत चारु चकोर अंगारनि भोरे ॥३३॥

अथ धूम्र-वर्णन—(दोहा)

काककंठ, खर, मूषिका, ग्राह, गोघ, भनि भूरि ।
 करभ, कपोतनि आदि दै धूम, धूमिली धूरि ॥३४॥
 राघव की चतुरंग चमू बहु धूरि उठी जल हू थल छाई ।
 मानौ प्रताप-हुतासन-धूम सु 'केसवदास' अकास न माई ।
 भेटि कै पंच प्रभूति किधौ विधि रेनुमई नव रीति चलाई ।
 दुखल-निवेदन कौ भव-भार को भूमि मनौ सुरलोक सिधवाई ॥३५॥

अथ नील-वर्णन—(दोहा)

दूध, बंस, कुवलय, नलिन, अनिल, ब्योम तृन बाल ।
 मरकत मनि, हय सूर के, नीलबन सैवाल ॥३६॥

(सवैया)

कंठ दुकूल सु ओर दुहुँ दिसि यों उरमै बल कें बलदाई ।
 'केसव' सूरज-अंसुनि मंडि मनो जमुना जलधार धसाई ।
 संकरसैल-सिलातलमध्य किधौ सुक की अवली फिरि आई ।
 नारद-बुद्धिबिसारद-होंय किधौ तुलसीदल-माल सुहाई ॥३७॥

[३०] चास-चाख (दीन०); चारु (अन्यत्र) । कँदूरी-कुंदुरू (दीन०); किंदूरी (अन्यत्र) ।

[३१] कहि-बहु (याज्ञिक अ०, हरि०, सरदार०, दीन०) । वोरे-खोरे (बाल०) ।

[३४] भूरि-धूरि (बाल०) । ग्राह-गृहगोधा (याज्ञिक०, हरि०, दीन०) । धूमिली-धूमरी (वहो) ।

[३५] बहु-बस (याज्ञिक अ०, सरदार०, हरि०); चपि (दीन०) ।

[३७] दिसि-उर (याज्ञिक अ०, हरि०, दीन०) ।

अथ श्वेत-कृष्ण-मिश्रित-वर्णन—(दोहा)

सिंध कृस्न हरि सब्द गनि, चंद बिस्नु बिधु देखु ।
 अम्रक धातु अकास पुनि कृस्न स्याम सिति लेखु ॥३८॥
 घन कपूर घन मेघ अरु, नागराज गज सेषु ।
 पयोरासि कहु सिंधु सों, अरु छिति छोरहि लेखु ॥३९॥
 राहु सिंधु सिंधीजु भनि, हरि बलभद्र अनंतु ।
 अर्जुन कहिजौ सेत सों, अरु पारथ बलवंतु ॥४०॥
 हरिगज सुरगज समुझिये, हरिगज हरिगज जानि ।
 कोकिल सों कलकंठ कहि, अरु कलहंस बखानि ॥४१॥
 कृस्ननदीबर सब्द सों, गंगा सिंधु बखानि ।
 नीरद निकसे दाँत सों, अरु जु नीर को दानि ॥४२॥

अथ श्वेत-पीत-वर्णन—(दोहा)

सिव बिरंचि सों संभु भनि, रजत रजत अरु हेमु ।
 स्वर्न सरभ सों कहत हैं, अष्टापद करि नेम ॥४३॥
 सोम स्वर्न कहि चंद, कलघौत रजत अरु हेमु ।
 तारकूट रूपो रुचिर, पीतरि कहि करि प्रेमु ॥४४॥

अथ श्वेत-आरक्त-वर्णन—(दोहा)

स्वेत वस्तु सुचि, अग्नि सुचि, सूर सोम हरि होइ ।
 पुष्कर तीरथ सों कहै, पंकज सों सब लोइ ॥४५॥
 हंस हंस रवि बरनिये, अर्क फटिक रवि मानु ।
 अब्ज संख सरसिज दुऔ, कमल कमल जल जानु ॥४६॥

इति श्रीमत्त्रिविधभूषणभूषितायां कविप्रियायां

सामान्यालंकारवर्णने श्वेतादिवर्णवर्णनं

नाम पंचमः प्रभावः ॥५॥

[३८] कृस्न-पाख (दीन०) ।

[४०] कहिजौ-कहिये (याज्ञिक०, हरि०, सरदार, दीन०) सेत-चेत (बाल०) ।

[४१] हरिगज०-हरि हरिगज गज (याज्ञिक०, याज्ञिक अ०, हरि०, सरदार०);

फिर हरिगज गज (दीन०) ।

[४४] स्वर्न-स्वर्ग (बाल०) । कहि-अरु (दीन०) ।

६

अथ वर्णालंकार—(दोहा)

संपूरन आवर्त, कहि कुटिल, त्रिकोन सुवृत्त ।
 तीक्ष्ण, गुह, कोमल, कठिन, निस्चल, चंचल चित्त ॥१॥
 सुखद, दुखद, अह मंदगति, सीतल, तप्त, सुरूप ।
 क्रूरस्वर, सुस्वर मधुर, अबल, बलिष्ठ अनूप ॥२॥
 सत्य, झूठ, मंडल बरनि, अगति, सदागति, दानि ।
 अष्टाबिस बिधि मैं कहे, बर्न्य अनेक बखानि ॥३॥

अथ संपूर्ण-वर्णन —(दोहा)

इतने संपूरन सदा बरने 'केसवदास' ।
 अंबुज, आनन, आरसी, संतत प्रेम प्रकास ॥४॥
 (कवित्त)

हरि-कर-मंडन, सकल-दुख-खंडन,
 मुकुर महिमंडल के कहत अखंडमति ।
 परम सुबास पुनि पीयूष-निवास, परि
 पूरन प्रकास 'केसोदास' भू-आकास-गति ।
 बदन मदन कैसो श्रोजू के सदन जाहि,
 सोदर सुभोदर दिनेसजू के मित्र अति ।
 सीताजू के मुख सुख सुखमा की उपमा कौं,
 कोमल न कमल, न अमल रयनिपति ॥५॥

अथ आवर्त-वर्णन—(दोहा)

ये आवर्त बखानिजै, 'केसवदास' सुजान ।
 चकरी, चक्र, अलात अह आतपत्र, खरसान ॥६॥
 (कवित्त)

दुहूँ रख मुख मानो पलट न जानी जात,
 देखि कै अलातजात जोति होति मंद लाजि ।
 'केसोदास' कुसल कुलाल-चक्र चक्रमन,
 चातुरी चितै कै चाह आतुरी चलत भाजि ।
 चंदजू के चौहूँ कोद बेष परिवेष कैसो,
 देखत ही रहियै न कहियै बचनु साजि ।
 घाप छाँड़ि आपनिधि जानि दिसि दिसि रघु-
 नाथजू के छत्र तर भ्रमत भ्रमीनि बाजि ॥७॥

[५] गति-रति (बाल०) ... । जाहि-जेहि (हरि०, दीन०) । मुख सुख सुखमा
 कौं...मुख सुखमा...कौं सखि (सरदार०; हरि०, दीन०) ।

अथ कुटिल-वर्णन—(दोहा)

अलक, अलिक, भ्रू, कुंचिका, किंसुक, सुकमुख लेखि ।
अहि, कटाक्ष, धनु, बीजुरी, कंकनभग्न बिसेखि ॥८॥
बालचंद्रिका, बालससि, हरि नख, सूकरदंत ।
कुहालादिक बरनियै कपटी कुटिल अनंत ॥९॥

(सवैया)

भोर जगी वृषभानुसुता अलसी बिलसी निसि कुंजबिहारी ।
'केसव' पोंछति अंचल-छोरनि पीक सु लोक गई मिटि कारी ।
बंक लगे कुच बीच नखच्छत देखि भई दृग दूनी लजारी ।
मानो बियोग-बराह हन्यो जुग सैल की संधिनि इंगवै डारी ॥१०॥

अथ त्रिकोण-वर्णन—(दोहा)

सकट, सिंधारो, बज्र, हल, हर के नैन निहारि ।
'केसवदास' त्रिकोन महि, पावककुंड बिचारि ॥११॥

(कवित्त)

लोचन त्रिलोचन को 'केसव' बिलोक बिधि,
पावक के कुंड सी त्रिकोन कोन्हों धरनी ।
सोधी है सुधारि पृथु परम पुनीत नृप,
करि करि पूरन दसहुँ दिस करनी ।
ज्वालु सो जगतु जगु सुभग सुमेरु तामें,
जाकी जोति होति लोक लोक मन हरनी ।
थिर चर जीव हव्य होमिजत जुग जुग,
होता होत काल न जुगति जात बरनी ॥१२॥

अथ सुवृत्त-वर्णन—(दोहा)

वृत्त बेल भनि गुच्छ अरु, ककुद, साधु के अंग ।
कुम्भिकंभ, कुच, अंड मनि, कंदुक, कलस सुरंग ॥१३॥

(कवित्त)

परम प्रवीन अति कोमल कृपालु तेरे,
उर तें उदित नित चित हितकारी है ।
'केसोराइ' की सौं अति सुंदर उदार सुभ,
सलज सुसील बिधि सूरति सुधारी है ।
काहू सौं न जानैं हंसि बोलि न बिलोकि जानैं,
कंचुकी सहित साधु सूधी बैसवारी है ।
ऐसे हौं कुचनि सकुचति न सकति बुझि,
हरि-हिय-हरनि प्रकृति कौनै पारी है ॥१४॥

अथ तोक्ष्ण-गुरु-वर्णन—(दोहा)

नख, कटाक्ष, सर, दुर्बचन, सेलादिक खर जानि ।
कच, नितंब, गुन, लाज, मति, रति, अति गुरु करि मानि ॥१५॥

(कवित्त)

संहंथी हृथ्यार अँन अन्यारे, अनेक काम-
सर हू तें खरे खल-बचन बिसेषि ।
चोट न बचति ओट कीने हूँ कपाट कोट,
भौन भौहरे हू भारे भय अवरेखिये ।
'केसोदास' मंत्र, गद, जंत्रऊ न प्रतिपक्ष,
रक्षै लक्ष लक्ष बज्र रक्षक न लेखिये ।
भेदियत मर्म, बर्म ऊपर कसेई रहैं,
पीर घनी घाइलनि घाइ पै न देखिये ॥१६॥

(सबैया)

पहिले तजि आरस आरसी देखि घरीक घसे घनसारहि लै ।
पुनि पौछि गुलाब तिलौछि फुलेल अँगोछे मैं आछे अँगोछनि कै ।
कहि 'केसव' मेद जुबादि सों माँजि इते पर अँजे मैं अँजन दै ।
बहुरघौ दुरि देखौं तो देखि सखी मेरे लाज तो लोचन लागिय है ॥१७॥

अथ कोमल-वर्णन—(दोहा)

पल्लव, कुसुम, दयालुमन, माखन, मृदुल मुरारि ।
पाट पामरी, जीभ पद, प्रेम, सुपुन्य बिचारि ॥१८॥

(कवित्त)

मैन ऐसो मन मृदु, मृदुल मृनालिका के,
सूत कैसे सुर घुनि मननि हरति है ।
दारयो कैसे बीज दंत, पात से अरुन ओठ,
'केसोदास' देखि दृग आनंद भरति है ।
एरी मेरी तेरी मोहि भावांत भलाई तातें,
बूझति हौं तोहि और बूझति डरति है ।
माखन सी जीभ, मुख कंज सो कोंवरो, कहि,
काठ सी कठेठी बात कैसें निकरति है ॥१९॥

[१६] अँन-हू ते अति (दीन०) । अन्यारे अनेक-अनियारे (दीन०) । भेदियत-भेदत हैं (दीन०) ।

[१७] 'कहि' बाल० और याज्ञिक अ० में नहीं है । देखि सखी मेरे-देखौं कहा सखि (दीन०, हरि०, सरदार०) ।

[१८] मृदुल-मैन (दीन०) ।

[१९] कैसे-ऐसी (दीन०) । मेरी-बीर (दीन०) । कहि-तासों (दीन०) ।

अथ कठोर-वर्णन—(दोहा)

कुच कठोर भुजमूल मनि बरनि बज्र कहि मित ।
धातु, हाड़, हीरा, हिये बिरही-जन के चित्त ॥२०॥
सूरनि के तन, सूम-मन, काठ, कमठ की पीठि ।
'केसव' सुखो चर्म अरु, हठ, सठ, दुर्जन-डोठि ॥२१॥

(कबित)

'केसोदास' दीरघ उसासनि को सदागति,
आयु को अकास है, प्रकास पाप भोगी को ।
देह जात जात रूप हाड़नि को रूपो रूप,
रूप को रूपक बिधु बासर-संयोगी को ।
बुद्धिनि की बीजुरी है, नैननि को धाराधर,
छाती को घरघार, घन घाइन प्रयोगी को ।
उदर को वाड़वा अगिनि-गेह मानत हौं,
जानत हौं हीरा हीरा काहू पुत्रसोगी को ॥२२॥

अथ निश्चल-वर्णन—(दोहा)

सती, समर-भट, संत-मन, धर्म-अधर्म-निमित्त ।
जहाँ जहाँ ये बरनियै, 'केसव' निश्चल चित्त ॥२३॥

(सबैया)

काय मनो बच काम न लोभ न मोह न मोहैं महाभय-जेता ।
'केसव' बाल वहिकम, बृद्ध, विपत्तिनि हूँ अति धीरज-चेता ।
हैं कलि में कहनाबरनालय कौन गनै कृत द्वापर त्रेता ।
एई हैं सूरज-मंडल भेदत सूर सती अरु ऊरघरेता ॥२४॥

अथ चंचल-वर्णन—(दोहा)

तरल तुरंग कुरंग-गान, बानर, चलदल-पान ।
लोभिन के मन, स्यारजन, बालक, काल-बिधान ॥२५॥
कुलटा, कुटिल कटाक्ष, मन, सपनो, जोबन, मोन ।
खंजन, अलि, गजश्रवन, श्री, दामिनि, पवन प्रबोन ॥२६॥

[२२] रूपो-पूरो (दीन०) । घन-तन (हरि०, सरदार०, दीन०) । हीरा-हियो (वही) ।

[२४] मोह न मोहैं-छोभ न मोहैं (दीन०) ।

[२५] घन-वन (हरि०, दीन०) ।

(कवित्त)

भौर ज्यों भँवत लोल ललना लतानि प्रति,
 खंजन से थल, मीन मानौ जहाँ जल है ।
 सपनेऊ होत, कहूँ आपनो न अपनाए,
 भूलिये न बैन ऐन आक को सो फल है ।
 गहिये धौं कौन गुन, देखत ही रहिये री,
 कहिये कछू न, रूप मोह को महल है ।
 चपला सी चमकनि सोहै चारु चहूँ दिसि,
 कान्ह को सनेह चलदल को सो दल है ॥२॥

अथ सुखद-वर्णन—(दोहा)

पंडित पुत्र, पतिव्रता, बिद्या, बपु नारोग ।
 सुख ही फल अभिलाष के, संपति, मित्रसँजोग ॥२॥
 दान, मान, धनजोग, जय, राग, बाग, गृह, रूप ।
 मुक्ति, सोम, सर्वज्ञता, ये सुखदानि अनूप ॥२॥

(मालती छंद)

पंडित पूत सपूत सुधी पतिनी पतिप्रेम-परायण भारी ।
 जानै सबै गुन, मानै सबै जन, दानबिधान दया उर धारी ।
 'केसव' रोगनि ही सों वियोग, संजोग गु भोगनि सों सुखकारी ।
 साँच कहैं जग माहि लहै जस, मुक्ति यहै चहूँ वेद बिचारी ॥३॥

अथ दुखद-वर्णन—(दोहा)

पाप, पराजय, झूठ, हठ, सठता, मूरख मित्र ।
 बाँभन नेगी, रूप बिन, असहनसील चरित्र ॥३॥
 आधि ब्याधि, अपमान, रिन, परघर भोजन बास ।
 कन्या संतति, वृद्धता, वरषाकाल प्रवास ॥३॥
 कुजन कुस्वामी, कुगति हय, कुपुरनिवास, कुनारि ।
 परबस, दारिद आदि दै, अरि दुखदानि बिचारि ॥३॥

(कवित्त)

बाहन कुचालि, चोर चाकर, चपल चित्त,
 मित्त मतिहीन, सूम स्वामी उर आनिग्रै ।

[२७] सपनेऊ-सपनेऊ अपने न होत कहूँ आपन ए (याज्ञिक अ०); सपनो सो होत, कहूँ आपनो न अपनाये (दीन०) ।

[२८] सुख ही-सुखदा (दीन०) ।

[२९] जय-जप (सरदार०, दीन०) ।

परधर भोजन निवास, बास कुपुरनि,
 'केसोदास' बरषा प्रवास दुख-दानियै ।
 पापिन को अंगसंग, अंगना अनंगबस,
 अपजसजुत सुत, चित हित-हानियै ।
 मूढ़ता बुढ़ाई व्याधि दारिद झुठाई आधि,
 यहई नरक नरलोकनि बखानियै ॥३४॥

अथ मंदगति-वर्णन—(दोहा)

कुलतिय हास बिलास, बुध काम क्रोध मद मानि ।
 सनि, गुरु, सारस, हंस, गज, तियगति मंद बखानि ॥३५॥

(कवित्त)

कोमल बिमल मन, बिमला सी सखी साथ,
 कमला ज्यों लीन्हें हाथ कमल सनाल के ।
 नूपुर की धुनि सुनि, भोरें कलहंसनि के,
 चौंकि चौंकि परें चारु चेदुवा मराल के ।
 कचनि कें भार, कुच-भारनि, सकुच-भार,
 लचकि लचकि जात कटितट बाल के ।
 हरें हरें बोलति बिलोकति हँसति हरें,
 हरें हरें चलति हरति मन लाल के ॥३६॥

अथ शीतल-वर्णन—(दोहा)

मलयज, दाख, कलिंद, सुख, ओरो, मिश्री, मीत ।
 प्रियसंगम-घनसार, ससि, जल, जलरुह, हिम सीत ॥३७॥

(कवित्त)

शीतल समीर टारि, चंद्रचंद्रिका निवारि,
 'केसोदास' ऐसे ही तौ हरषु हिरातु है ।
 फूलनि फैलाइ डारि, झारि डारि घनसार,
 चंदन को टारि चित्त चौगुनो पिरातु है ।
 नीरहीन मीन मुरझाइ जीवै नीर ही पै,
 छीर के छिरीकें कहा धीरज धिरातु है ।
 पाई है तैं पीर किधौं यों हीं उपचार करै,
 आग को तौं दाघ्यो अंग आगि ही सिरातु है ॥३८॥

अथ तप्त-वर्णन—(दोहा)

रिपु प्रताप दुर्बचन तप, तप्त बिरह संताप ।
 सुरज आगि बजागि दुख, त्रिस्ना पापबिलाप ॥३९॥

(कवित्त)

‘केसोदास’ नींद, भूख, प्यास, उपहास-त्रास,
 दुख को निवास बिष मुख हीं गह्यो परै ।
 बाइ को बहन, दिन दाव को दहन, बड़ी
 बाड़वा-अनल-जाल-ज्वाल में रह्यो परै ।
 जोरन जनम जात जोर जुर घोर, परि-
 पूरन प्रगट परिताप क्यों कह्यो परै ।
 सहिहीं तपन-ताप, पर को प्रताप, रघु-
 बीर को बिरह बीर मोपै न सह्यो परै ॥४०॥

अथ सुरूप-वर्णन—(दोहा)

नल, नलकूबर, सुरभिषज, हरिसुत, मदन निहारि ।
 दमयंती सीतादि त्रिय सुंदर रूप बिचारि ॥४१॥

(कवित्त)

को है दमयंती इंदुमती रति राति दिन,
 होहि न छबीली छनछबि जी सिगारियै ।
 ‘केसव’ लजात जलजात, जातबेद ओप,
 जातरूप बापुरो बिरूप सो निहारियै ।
 मदन निरूप निरूपम तौ निरूप भयो,
 चंद बहुरूप अनुरूपकै बिचारियै ।
 सीतजी के रूप पर देवता कुरूप को हैं,
 रूप ही के रूपक तौ वारि वारि डारियै ॥४२॥

अथ क्रूरस्वर-वर्णन(दोहा)

झींगुर, साँप, उलूक, अज, महिषी, काल बखानि ।
 काल, काक, वृक, करभ, खर, स्वान क्रूरस्वर जानि ॥४३॥

(कवित्त)

झिल्ली तें रसीली जीली रंटे हू की रट लीली,
 स्याऊँ तें सवाई भूतभावती तें आगरी ।
 ‘केसोदास’ भैंसनि की भामिनी तें भासै भास,
 खरी तें खरी सी धुनि ऊँट तें उजागरी ।

[४०] दिन दाव-बनदाव (याज्ञिक अ०, हरि०, सरदार०, दीन०) । ताप-पाप (बाल०) ।

[४३] काल-भेंड़ि (दीन०) ।

भेड़िन की मोड़ी मैड, एंड न्यौरा-नारिन की,
 बोकि हू तें बाँकी बानी, कागिन की कागरी ।
 सूकरी सकुचि, संकि कूकरियौ मूक भई,
 घूघू की घरनि को है मोहै नाग-नागरी ॥४४॥

अथ सुस्वर-वर्णन—(दोहा)

कलरव, केकी, कोकिला, सुक, सारो, कलहंस ।
 तंत्री, कंठनि आदि दै सुभसुर दुंदुभि, बंस ॥४५॥

(कबित्त)

केकिन की केका सुनि काके न मथत मन,
 मनमथ-मनोरथ रथपथ सोहिये ।
 कोकिला की काकलीनि कलित ललित बाग,
 देखत ही अनुराग उर अवरोहिये ।
 कोकनि की कारिका कहत सुक-सारिकानि,
 'केसोदास' नारिका कुमारिकाऊ मोहिये ।
 हंसमाल बोलत ही मान की माला उतारि,
 बोलै नंदलाल सों न ऐसी बाला को हिये ॥४६॥

अथ मधुर-वर्णन—(दोहा)

मधुर प्रियाधर, सोमकर, माखन, दाख समान ।
 बालक बातें तोतरी, कबिकुल-उक्ति प्रमान ॥४७॥
 महुवा, मिश्री, दूध, घृत अति सिंगार रस मिष्ट ।
 ऊख, महुख, पियूष गनि 'केसव' साँचो इष्ट ॥४८॥

(सबैया)

खारिक खात न दारचयौई दाखन माखन हूँ सह मेटी इठाई ।
 'केसव' ऊख महुखहु दूषत आई हौं तो पहिँ छोड़ि जिठाई ।
 तो रदनच्छद को रस रंचक चाखि गए करि केहूँ ढिठाई ।
 ता दिन तें उन राखी उठाइ समेत-सुधा बसुधा की मिठाई ॥४९॥

[४४] रसीली-लजीली (बाल०) । स्याऊँ-स्यारि (हरि०, सरदार०, दीन०) ।
 भावती-भामिनी (हरि०, सरदार०, दीन०) । भास-बेस (दीन०) । ऊँट-
 ऊँटि (याज्ञिक०, हरि०, दीन०) ।

[४५] तंत्री कंठनि-तोतक तंत्री (दीन०) ।

[४६] मेटी-छोड़ी (बाल०) । दिन-छिन (बाल०) ।

अथ अबल-वर्णन—(दोहा)

पंगु, गुंग, रोगी, बनिक, मीत भूखजुत जानि ।
अंध, अनाथ, अजादि सिसु, अबला अबल बखानि ॥५०॥

(कवित्त)

खात न अघात सब जगत खवावत है,
द्रौपदी के साकपात खातहीं अघाने हौ ।
'केसोदास' नृपतिमुता के सतिभाइ भए,
चोर तें चतुरभुज चहुँ चक्क जाने हौ ।
माँगनेऊ, द्वारपाल, दास, दूत, सुत, सूनौ,
काठमध्य कौन पाठ बेदनि बखाने हौ ।
और है अनाथनि को नाथ कोऊ, रघुनाथ,
तुम तौ अनाथनि के हाथी ही बिकाने हौ ॥५१॥

अथ बलिष्ठ-वर्णन—(दोहा)

पवन, पवन को पूत, अरु परमेशुर, सुरपाल ।
काम, भीम, बाली, हली, बलि राजा, पृथु, काल ॥५२॥
सिध, बराह, गयंद, गुर, सेष, सती सब नारि ।
गहर, बैद, माता, पिता, बली अदिष्ट बिचारि ॥५३॥

(सबैया)

बालि बिध्यो, बलिराउ बैध्यो कर सूली के सुल कपालथली है ।
काम जरघो जग, काल परघो बैदि, सेष धरै बिष हालाहली है ।
सिधु मथ्यो, किल काली नथ्यो, कहि 'केसव' इंद्र कुचालि चली है ।
राम हू की हरी रावन बाम, चहुँ जुग एक अदिष्ट बली है ॥५४॥

अथ साँच-झूठ-वर्णन—(दोहा)

'केसव' चारि हू बेद को मन क्रम बचन बिचारि ।
साँचो एक अदिष्ट हरि, झूठे सब संसार ॥५५॥

(सबैया)

हाथी न साथी न घोरे न चेरे न गाँउ न ठाँउ को नाँउ बिलैहै ।
तात न मात न पुत्र न मित्र न वित्त न अंगऊ संग न रैहै ।
'केसव' काम कौ राम बिसारत और निकाम न कामहि ऐहै ।
चेत रे चेत अजौ चित-अंतर अंतक-लोक अकेलो ही जैहै ॥५६॥

(कवित्त)

अनही ठीक को ठग, जानै न कुठौर ठौर,
ताही पै ठगावै ठेलि जाही कों ठगतु है ।

जाके तौ डर निडरे डग न डगत डरि,
 डर के डरनि डगि डोंगी ज्यों डगतु है ।
 ऐसे बसवास तें उदास होहि 'केसोदास',
 काहे सो न भजै कहि काहे कौं खगतु है ।
 झूठो है रे झूठो जग राम की दोहाई काहू,
 साँचे को बनायो तातें साँचो सो लगतु है ॥५७॥

अथ मंडल-वर्णन—(दोहा)

'केसव' कुंडल, मुद्रिका, बलया, बनय, बखानि ।
 आलबाल, परिवेष, रविमंडल मंडल जानि ॥५८॥

(कवित्त)

मनिमय आलबाल थलज जलज रवि-
 मंडल में जैसे मति मोहै कबितानि की ।
 जैसे सबिसेष परिवेष रेख, में असेष,
 सोभित सुबेष सोम सीमा सुखदानि की ।
 जैसे बंकलोचनि कलित कर कंकननि,
 बलित ललित दुति प्रगट प्रभानि की ।
 'केसोदास' तैसे राजै रास में रसिक लाल,
 आसपास मंडली बिराजै गोपिकानि की ॥५९॥

अथ अगति-सदागति-वर्णन—(दोहा)

अगति सिंधु, गिरि, ताल, तरु, बापी, कूप बखानि ।
 महानदी, नद, पंथ, जग, पवन सदागति जानि ॥६०॥

(कवित्त)

पंथ न थकत पल मनोरथ-रथनि के,
 'केसोदास' जग-मग जैसे गाए गीत मैं ।
 पवन बिचारि चक्र चक्र मन चित्त चढ़ि,
 भूतल अकास भ्रमैं घाम जल सीत मैं !
 कौ लौं राखौं थिर बपु बापी कूप सर सम,
 हरि बिन कीने बहु बासर बितीत मैं ।
 ज्ञान-गिरि फोरि, तोरि लाज-तरु जाइ मिलौं,
 आपु ही तें आपगा ज्यों आपनिधि प्रीतमैं ॥६१॥

[५७] काहे सो न भजै-कैसे न भगत (याज्ञिक०, हरि०, सरदार०, दीन०) ।

बनायो-कियो है (दीन०) ।

[५९] बलित-कलित (बाल०) । तैसे-ऐसे (दीन०) ।

[६१] पल-मन (सरदार०, दीन०) ।

अथ दान-वर्णन—(दोहा)

गौरि, गिरीस, गनेस, बिधि, गिरा, ग्रहनि को ईस ।
 चितामनि, सुरवृक्ष, गो, जगमाता, जगदीस ॥६२॥
 रामचंद, हरिचंद, नल, परसुराम दुखहर्न ।
 'केसवदास' दधीचि, पृथु, बलि, सिबि, भीषम, कर्न ॥६३॥
 भोज, बिक्रमाजीत नृप, जगद्देव रनधीर ।
 दानिन हूँ के दानि दिन, इंद्रजीत, बलबीर ॥६४॥

गौरीजू को दान—(दोहा)

पावक, फनि, बिष, भस्म, मुख हर पबर्गमय मानि ।
 देत जु हैं अपबर्ग कहँ, पारबती-पति जानि ॥६५॥

गणेशजू को दान—(कवित्त)

बालक मृनालनि ज्यों तोरि डारै सब काल,
 कठिन कराल वै अकाल दीह दुख को ।
 बिपति हरत हठि पंकज के पात सम,
 पंक ज्यों पताल पेलि पठवै कलुष को ।
 दूरि कै कलंक-अंक भव-सीस-सरि सम,
 राखत है 'केसोदास' दास के बपुष को ।
 साँकरे की साँकरनि सनमुख होत तोरै,
 दसमुख मुख जोवै गत्रमुख-मुख को ॥६६॥

महादेवजू को दान—(कवित्त)

काँपि उठ्यो आपपति तपनहि ताप चढ़ी,
 सीरी यों सरीर-गति भई रजनीस को ।
 अजहूँ न ऊँचो चाहै अनल मलिन-मुख,
 लागि रही लाज मन मानौ मन बीस की ।
 छबि सों छबीली लक्षि छाती में छपाई हरि,
 छूटि गई दान-गति कोर हूँ तैंतीस की ।
 'केसोदास' तेही काल कारोई हवै आयो काल,
 सुनत श्रवन बकसीस एक ईस की ॥६७॥

[६६] दसमुख-मुख-दसमुख नग (बाल०, याज्ञिक अ०) ।

[६७] आपपति-आपनिधि (हरि०, दीन) । मलिन-अनिल (बाल०) ।

लाज मन-लाज मुख (दीन०); लोकलाज (याज्ञिक०); लाज मनमानी
 दसबीस की (सरदार०) ।

ब्रह्माजू को दान—(कवित्त)

आसीबिष, राकसनि, दैयतनि दै पताल,
 सुरनि, नरनि दियो दिव्य, भू निकेतु है ।
 धिर चर जीवनि कौं दीनी वृत्ति 'केसोराइ'
 दीवे कहँ और कोऊ कहूँ कहा हेतु है ।
 सीत, बात, तेज, तोय आवत समय पाइ,
 काहू पै न नाकी जाति ऐसी सक्सेतु है ।
 अब तब जब कब, जहाँ तहाँ देखिजत,
 बिधि ही को दयो सब सब ही कौं देतु है ॥६८॥

गिराजू को दान—(कवित्त)

बानी जगरानी की उदारता बखानी जाति,
 ऐसी मति 'केसव' उदार कौन की भई ।
 देवता प्रसिद्ध सिद्ध रिषिराज तपबृद्ध,
 कहि कहि हारे सब कहि न काहू लई ।
 भावी, भूत, वर्तमान जगत बखानत है,
 'केसोदास' क्यों हू न बखानी काहू पै गई ।
 बनें पति चारिमुख पूत बनें पाँचमुख,
 नाती बनें षट्मुख तदपि नई नई ॥६९॥

सूर्यजू को दान—(कवित्त)

वाधक बिबिध व्याधि त्रिविध अधिक आधि,
 वेद उपवेद बध बंधन बिधानु हैं ।
 जग पारावार पार करत अपार नर,
 पूजक परम पद पावत प्रमानु हैं ।
 पुरुष पुरान कहैं पुरुष पुरानै सब,
 पूरन पुरान सुनि निगम निदानु हैं ।

[६८] दिव्य-दिवि (याज्ञिक अ०, हरि०, सरदार०, दीन०) । जाति-जाइ (याज्ञिक अ०, याज्ञिक०, हरि०, सरदार०, दीन०) । सक-सर (याज्ञिक०); बाँधो (हरि०, सरदार०, दीन०) । दयो-दियो (याज्ञिक०); दीनो (याज्ञिक० अ०, हरि०, सरदार०); दीन्हो (दीन०) ।

[६९] जाति-जाइ (याज्ञिक अ०, याज्ञिक०, हरि०, सरदार०, दीन०) । केसव-कैसे क (याज्ञिक अ०); उदित (दीन०); उद्यत (सरदार०) ।

भोगवान भागवान, भगतन भगवान,
करिबे कौं 'केसोदास' भानु भगवानु हैं ॥७०॥

परशुरामजू को दान—(सबैया)

जो घरनी हिरनाछ हरी बर जज्ञबराह छिनाइ लई जू ।
मानव दानव देवन के जु तपोबल केहुँ न हाथ भई जू ।
जा लागि 'केसव' भारथ भो भव पारथ जीवन ही जु बई जू ।
सातौ समुद्रन मुद्रित राम सु विप्रन बार अनेक दई जू ॥७१॥

रामजू को दान—(कवित्त)

पूरन पुरान अह पुरुष पुराने परि-
पूरन बतावैं न बतावैं और उक्ति कों ।
दरसन देत जिनि दरसन समझैं न,
नेति नेति कहैं बेद छाँडि और जुक्ति कों ।
जानि यह 'केसोदास' अनुदिन राम राम,
ररत रहत न डरत पुनरुक्ति कों ।
रूप देइ अनिमाहि, गुन देइ गरिमाहि,
महिमाहि देह भक्ति नाम देइ मुक्ति कों ॥७२॥

(सबैया)

जो सतजज्ञ करें करी इंद्र कों सो प्रियता कपिपूँज सों कीनी ।
ईस दई जु दए दससीस सु लंक विभीषन ऐसहि दीनी ।
दानकथा रघुनाथ की 'केसव' को बरनै रस अद्भुत भीनी ।
जो गति ऊरधरेतन की सु तौ औध के सूकर कूकर लीनी ॥७३॥
कैटभ सो, नरकासुर सो, पल में मधु सो, मुर सो जिनि मारघो ।
लोक चतुर्दस रक्षक 'केसव' पूरन बेद पुरान विचारघो ।
श्रीकमला-कुच-कुंकुम-मंडन-पंडित, देव अदेव निहारघो ।
सो कर माँगन कौं बलि पै करतारहु के करतार पसारघो ॥७४॥

[७०] पूजक-पूजन (बाल०) ।

[७१] केहुँ न-कैस हू (बाल०) । ही जु-बीज (हरि०, दीन०) । यह छंद सरदार० में नहीं है ।

[७२] और-भेद (याज्ञिक०, हरि०, सरदार०, दीन०) । ररत-कहत (याज्ञिक अ०, याज्ञिक०) ।

[७४] कहीं कहीं इसके अनंतर (अर्थात् केसव के नाम से)

इंद्रजीतजू को दान—(कवित्त)

कारे कारे तम कैसे प्रीतम सुधारे बिधि,
 वारि वारि डारे गिरि 'केसोदास' भाखे हैं ।
 थोरे थोरे मदनि कपोल फूले थूले थूले,
 डोलैं जल थल बल थानुसुत नाखे हैं ।
 घंटा टननात घननात घने धूंधुरानि,
 भौर भननात भुवपति अभिलाषे हैं ।
 दुज्जन-दलिद्र-दल-दलन बिदारिबे कौं,
 इंद्रजीत हाथियै हथ्यार करि राखे हैं ॥७५॥

वीरबलजू को दान—(सबैया)

पाप के पुंज पखावज 'केसव' सोक के संख सुने सुषमा मैं ।
 झूठ कै झाँझि बड़े डर कै डफ, आवझ जूथन जानी जमा मैं ।
 भेद की भेरी, अलोक कै झालरि, कौतुक भी कलि के कुरमा मैं ।
 जूझत ही बलबीर बजे बहु दारिद के दरबार दमामैं ॥७६॥

इति श्रीमत्त्रिविधभूषणभूषितायां कविप्रियायां
 सामान्यालंकारवर्णनं नाम षष्ठः प्रभावः ॥६॥

७

अथ भूमि-भूषण-वर्णन—(दोहा)

देस, नगर, बन, बाग, गिरि, आश्रम, सरिता, ताल ।
 रवि, ससि, सागर, भूमि के भूषण, रितु सब काल ॥१॥

- [७५] टननात-घननात (याज्ञिक अ०, याज्ञिक०, हरि०, सरदार०, दीन०) ।
 दुज्जन-दुवन (दीन०) । दल-दीह (बाल०) । बिदारिबे कौं-अमरसिध
 (याज्ञिक अ०, याज्ञिक०, हरि०, दीन०) । इंद्रजीत-केसोदास (याज्ञिक०,
 याज्ञिक अ०, हरि०); ऐसे ऐसे (दीन०) । करि-कै कै (याज्ञिक०) ।
 [७६] झूठ कै-झूठ के झालरि झाँझि अलोक के (याज्ञिक०, याज्ञिक अ०, हरि०,
 सरदार०, दीन०) । अलोक कै झालरि-बड़े डर के डफ (याज्ञिक अ०,
 याज्ञिक०, हरि०, सरदार०, दीन०) ।

अथ देश-वर्णन—(दोहा)

रतनखानि, पसु, पक्षि, बसु, बसन सुगंध सुब्रेस ।
नदी, नगर, गढ़ बरनियै भाषा-भूषित देस ॥२॥

(कवित्त)

आछे आछे असन, बसन, बसु, बासु, पसु,
दान, सनमान, जान, बाहन बखानियै ।
लोग, भोग जोग, भाग, बाग, राग, रूपजुत,
भूषननि भूषित, सुभाषा मुख जानियै ।
सातौ परीं तीरथ, सरित, सब गंगादिक,
'केसोदास' पुरन पुरान, गुन गानियै ।
गोपाचल ऐसे गढ़, राजा रामसिधजू से,
देसनि की मनि महि मध्यदेस मानियै ॥३॥

अथ नगर-वर्णन—(दोहा)

खाई, कोट, अटा, धुजा, बापी, कूप तड़ाग ।
बारनारि, असती, सती, बरनहु नगर सभाग ॥४॥

(कवित्त)

चहूँ भाग बाग बन मानहु सघन घन,
सोभा की सी साला, हंसमाला सी सरितबर ।
ऊँचे ऊँचे अटनि पताका अति ऊँची जनु,
कौसिक की कीनी गंगा खेलत तरल तर ।
आपने सुखनि आगे निदत्त नरिद और,
घर घर देखिजत देवता से नारि-नर ।
'केसोदास' त्रास जहाँ केवल अदिष्ट ही को,
वारियै नगर और ओड़छे नगर पर ॥५॥

अथ वन-वर्णन—(दोहा)

सुरभी, इभ, वन-जीव बहु भूत प्रेत भय-भीर ।
भिल्ल भवन, बल्ली, बिटप, दव वन बरनहु धीर ॥६॥

(कवित्त)

'केसोदास' ओड़छे कें आसपास तीस कोस,
तुंगारन्य नाम वन बैरी कौं अजीत है ।

[२] भूषित-भूषन (सरदार०, दीन०) ।

[३] रामसिध-मानसिध (बाल०) ।

विधि कैसो बंधु बर बारन-बलित, बाघ,
 बानर, बराह, बहु भिल्ल कौ अभीत है ।
 जम की जमाति सी कि जामबंत को सो दल,
 महिष सुखद स्वच्छ रिच्छन को मीत है ।
 अचल अनलवंत, सिंधु सो सरितजुत,
 संभु कैसो जटाजूट परम पुनीत है ॥७॥

अथ गिरि-वर्णन—(दोहा)

शृंग तुंग, दीरघ दरी, सिद्ध सुंदरी, धातु ।
 सुर-नर-जुत गिरि बरनियै, औषध, निर्झरपातु ॥८॥

(कवित्त)

रामचंद्र कीने तेरे अरिकुल अकुलाइ,
 मेरु के समान आन अचल घरीनि में ।
 सारो सुक हंस पिक कोकिला कपोत मृग,
 'केसोदास' कहूँ हय करभ करीनि में ।
 डारे कहूँ हार टूटे राते पीरे पट छूटे,
 फूटे हैं सुगंध घट श्रवत तरीनि में ।
 देखिजत सिखर सिखर प्रति देवता से,
 सुंदर कुंवर अरु सुंदरी दरीनि में ॥९॥

अथ आश्रम-वर्णन—(दोहा)

होम-धूम-जुत बरनियै, ब्रह्मघोष मुनिबास ।
 सिधादिक मृग मोर अहि, इभ सुभ बैर-बिनास ॥१०॥

(कवित्त)

'केसोदास' मृगज बछेरु चोखें बाघिनीनि,
 चाटति सुरभि बाघ-बालक-बदन है ।
 सिघनि की सटा एँचै कलभ करनि करि,
 सिघनि को आसन गयंद को रदन है ।
 फनी के फननि पर नाचत मुदित मोर,
 क्रोध न विरोध जहाँ मद न मदन है ।
 बानर फिरत डोरे डोरे अंध तापसनि,
 रिषि को निवास किधौं सिव को सदन है ॥११॥

[७] विधि-बिंध्य (हरि०, दीन०) ।

[९] कोकिला कपोत-पारावत-केकी (बाल०) ।

[११] सिघनि की सटा-सिघिनी की सटा (याज्ञिक अ०) ।

अथ सरिता-वर्णन—(दोहा)

जलचर ह्य गय जलज तट जजकुंड मुनिवास ।
स्नान दान पावन नदी बरनौ 'केसवदास' ॥१२॥

(सर्वथा)

ओड़छे तीर-तरंगिनि बेतवै ताहि तरै रिपु 'केसव' को है ।
अर्जुन-बाहु-प्रबाह-प्रबोधित रेवा ज्यों राजन की रज मोहै ।
जोति लगे जमुना सी लगे जगलोचन-लालित पाप त्रिपोहै ।
सूरमुता सुभ संगम तुंग तरंगित गंग सी सोहै ॥१३॥

अथ बाग-वर्णन—(दोहा)

ललित लता, तरुवर, कुसुम, कोकिल कलरव, मोर ।
बरनि बाग अनुराग स्यों, भँवर भँवत चहुँ ओर ॥१४॥

(कवित्त)

सहित सुदरसन करुनाकलित कम-
लासन बिलास मधुवन मीत मानियै ।
सोहिये अपनी रूपमंजरी पै नीलकंठ,
'केसोदास' प्रगट असोक उर आनियै ।
रंभा स्यों सदांभ बोलै मंजुघोषा उरबसी,
हंस फूले सुमनसु सब सुखदानियै ।
देव को दिवान सो प्रवीनरायजू को बाग,
इंद्र के समान तहाँ इंद्रजीत जानियै ॥१५॥

अथ ताल-वर्णन—(दोहा)

ललित लहर, खग, पुष्प, पसु, सुरभि समीर, तमाल ।
करत केलि पंथी प्रगट, जलचर बरनहु ताल ॥१६॥

(सर्वथा)

आपु धरें मल औरनि 'केसव' निर्मल काय करें चहुँ ओरें ।
पथिन के परिताप हरें हठि जे तरु तुल-तनूरुह तोरें ।
देखहु एक सुभाउ बड़ी बड़भाग तड़ागनि के बित थोरें ।
ज्यावत जीवनहारिनि कों निज बंधन कै जगबंधन छोरें ॥१७॥

[१३] रिपु-सिबु (बाल०) । रज मोहै-मन-मोहै-(याज्ञिक अ०) ।

[१५] पै-और (सरदार०, दीन०) । तहाँ-जहाँ (याज्ञिक अ०, याज्ञिक०) ।

[१६] करत-करभ (हरि०, सरदार०, दीन०) ।

[१७] निज बंधन-निज बंधक (बाल०) ।

अथ समुद्र-वर्णन—(दोहा)

तुंग तरंग गभीरता रतन जलज बहु जंतु ।
गंगा-संगम देवत्रिय, ज्ञान बिमान अनंतु ॥१८॥
गिरि बड़वानल वृद्धि तहु चंद्रोदय तें जानि ।
पन्नग देव अदेव गृह ऐसो सिंधु बखानि ॥१९॥
(सर्वथा)

सेष धरै धरनी, धरनी धरै 'केसव' जीव रचे बिधि जेते ।
चौदह लोक समेत तिन्हें हरि के प्रति रोमनि में चित चेतै ।
सोवत तेऊ सुने इनही में अनादि अनंत अगाध हैं एते ।
अद्भुत सागर की गति देखहु सागर ही महँ सागर केते ॥२०॥
भूति विभूति पियूषहु को विष ईस सरीर कि पाप बिपोहै ।
है किधौ 'केसव' कस्यप को घर देव अदेवि के मन मोहै ।
संत हियो कि बसैं हरि संतत सोभ अनंत कहै कबि को है ।
चंदन-नीर-तरंग-तरंगित नागर कोऊ कि सागर सोहै ॥२१॥

अथ सूर्योदय-वर्णन—(दोहा)

सूर-उदय तें अरुनता पय-पावनता होइ ।
संख-वेद-धुनि मुनि करैं पंथ लगै सब कोइ ॥२२॥
कोक, कोकनद सोकहत, दुख कुबलय, कुलटानि ।
तारा ओषधि दीप ससि धूक चोर तम हानि ॥२३॥
(कबित्त)

कोकनद-मोदकर मदन-बदन किधौ,
दसमुख-मुख कबलय-दुखदाई है ।
रोधक असाधु-जन, सोधक तमोगुन को,
उदित प्रबोध बुधि 'कसोदास' पाई है ।
पावन-करन पय हरिपद-पंकज कै,
जगमगै मनु जगमग दरसाई है ।
तारापति तेजहर, तारका को तारक कै,
प्रगट प्रभातकर ही की प्रभुताई है ॥२४॥

अथ चंद्रोदय-वर्णन—(दोहा)

कोक कोकनद बिरहि तम मानिनि कुलटनि दुख ।
चंद्रोदय तें कुबलयनि जलधि चकोरनि सुख ॥२५॥

(कवित्त)

‘केसोदास’ है उदास कमलाकर सों कर,
 शोषक प्रदोष ताप तमोगुन तारियै ।
 अमृत असेष के बिसेष भाव बरषत,
 कोकनद मोद चंड खंडन बिचारियै ।
 परम पुरुष पद बिमुख पुरुष रुख,
 संमुख सुखद बिदुषनि उर धारियै ।
 हरि हैं री हिये में न हरिन हरिननैनी,
 चंद्रमा न चंद्रमुखी नारद निहारियै ॥२६॥

अथ वसंत-वर्णन—(दोहा)

बरनि वसंत सपुष्प-अलि, बिरहि-बिदारन बीर ।
 कोकिल-कलरव-कलित बन, कोमल सुरभि-समीर ॥२७॥

(कवित्त)

सीतल समीर सुभ गंग के तरंगजुत,
 अंबर-बिहीन बपु बासुकि लसंत है ।
 सेवत मधुपगन गजमुख परभूत,
 बोल सुनि होत सुखी संत औ लसंत है ।
 अदल अमल रूपमंजरी-मुपद-रज-
 रंजित असोक दुख देखत नसंत है ।
 जाके राज दिसि दिसि फूले हैं सुमन सब,
 सिव को समाज किधौ ‘केसव’ बसंत है ॥२८॥

अथ ग्रीष्म-ऋतु-वर्णन—(दोहा)

ताते तरल समीर सुख सूखे सरिता ताल ।
 जीव अबल जल थल बिकल ग्रीष्म सफल रसाल ॥२९॥

(कवित्त)

चंडकर-कलित बलित बर सदागति,
 कंदमूल फल फूल दलनि को नासु है ।
 कीच-बीच बचै मीन, ब्याल बिल, कोलकुल,
 दुरद दरीनि दिनकृत को बिलासु है ।
 थिर चर जीवन-हरन बन बन प्रति,
 ‘केसोदास’ मृगसिर स्रवन निवासु है ।

[२६] चंड-चंद-(याज्ञिक०, याज्ञिक अ०) ।

[२८] सुपद०-में नीलकंठ (अन्यत्र) ।

[२९] ...

धावन बली धनुष सोभत निपानि सर,
सबर समूह किधौं ग्रीषम प्रकासु है ॥३०॥

अथ वर्षा-ऋतु-वर्णन—(दोहा)

बरषा हंस पयान, बक, दादुर, चातक, मोर ।
केतकि पुंज, कदंब, जल, सौदामिनि घन घोर ॥३१॥

(कवित्त)

भौहैं सुरचाप चारु प्रमुदित पयोधर,
भूषण जराइ जोति तड़ित रलाई है ।
दूरि करी मुख सुख सुखमा ससी की नैन
अमल कमल-दल दलित निकाई है ।
'केसोदास' प्रबल करेनुका गमन हर,
मुकुत सुहंसक-सबद सुखदाई है ।
अंबर - बलित मति मोहै नीलकंठजू की
कालिका कि बरषा हरषि हिय आई है ॥३२॥

अथ शरद-ऋतु-वर्णन—(दोहा)

अमल अकास प्रकाश ससि मुदित कमल-कुल कास ।
पंथी पितर पयान नृप सरद सु 'केसोदास' ॥३३॥

(कवित्त)

सोभा को सदन ससि बदन मदन कर,
बंदै नर देव कुबलय बलदाई है ।
पावन पद उदार लसति हंसक मार,
दीपति जलजहार दिसि दिसि धाई है ।
तिलक चिलक चारु लोचन कमल रुचि,
चतुर चतुरमुख जग जिय भाई है ।
अमल अंबर नील लीन पीन पयोधर
'केसोदास' सारदा कि सरद सुहाई है ॥३४॥

[३०] मृगसिर-मृगसुत (बाल०) । भवन-भवत (बाल०) । धावन-धावत (याज्ञिक अ०, हरि०, दीन०) । सबर-समर (याज्ञिक अ०, याज्ञिक०) ।

[३१] बरषा०-वरषा बरनहु हंस बक (याज्ञिक अ०, हरि०) । पुंज-कुंद (याज्ञिक०); पुष्प (दीन०) ।

[३४] बलदाई-सुखदाई (याज्ञिक अ०) ।

अथ हेमन्त-ऋतु-वर्णन—(दोहा)

तेल, तूल, तामोर, त्रिय, ताप, तपन रतिवन्त ।
दीह रयनि, लघु द्योस सुनि सीत-सहित हेमन्त ॥३५॥

(कवित्त)

अमल कमल-दल लोचन, ललित गति,
जारत समीर सीत, भीत दीह दुख की ।
चंद्रक न खायो जाइ चंदन न लायो जाइ,
चंद न निहारयो जाइ प्रकृति बपुष की ।
घट की घटति जात घटना घटी हू घटी,
छिन छिन छोन छबि रबिमुख सुख की ।
सीकर तुषार स्वेद सोहत हेमन्त रितु,
किधौ 'केसोदास' त्रिय प्रीतम बिमुख की ॥३६॥

अथ शिशिर-ऋतु-वर्णन—(दोहा)

सिसिर सरस मन बरनियै, 'केसव' राजा रंक ।
नाचत गावत रैनि दिन, खेलत हँसत निसंक ॥३७॥

(कवित्त)

सरस असमसर सरसिज-लोचनि, बि-
लोक लोकि लीक लाज लोपिब्रे कौ आगरी ।
ललित लता सुबाहु जानि जून ज्वान बाल,
बिटप उरनि लागे उमँगि उजागरी ।
पल्लव अधर मधु मधुपन पीवतहीं,
रचित रुचिर पिक-रुत सुख-सागरी ।
इति विधि सदागति बास बिगलित गात,
सिसिर की सोभा किधौ बारनारि नागरी ॥३८॥

इति श्रीमद्विषभूषणभूषितायां कविप्रियायां

सामान्यार्लंकारवर्णने श्वेतादिवर्णनं

नाम सप्तमः प्रभावः ॥७॥

[३६] निहारयो-चितयो (याज्ञिक अ०, हरि०, दीन०), लखायो (याज्ञिक०) ।

त्रिय-प्रिया (सरदार०, दीन) ।

[३८] पल्लव-कोमल (याज्ञिक० अ०) ।

८

अथ राज्यश्री-भूषण-वर्णन—(दोहा)

राजा, रानी, राजसुत, प्रोहित, दलपति, दूत ।
मन्त्री, मंत्र, पयान, गय, हय, संग्राम अभूत ॥१॥
आखेटक, जलकेलि पुनि, बिरह स्वयंवर जानि ।
भूषित सुरतादिकनि करि, राज्यश्रीहि बखानि ॥२॥

अथ राजा-वर्णन—(दोहा)

प्रजा, प्रतिजा, पुन्यपन, परम प्रताप, प्रसिद्धि ।
सासन, नासन सत्रु के, बल बिबेक की वृद्धि ॥३॥
दंड, अनुग्रह, धीरता, सत्य, सूरता, दान ।
कोष, देसजुत बरनियै, उद्दिम छमा-निधान ॥४॥

(कवित्त)

नगर नगर पर घनई तौ गाजैं घेरि,
ईति की न भीति, भीति अधन अधीर की ।
अरि-नगरीन प्रति होत हैं अगम्या-गौन,
भावै बिभिचारी, जहाँ चोरी पर-पीर की ।
सासन को नासन करत एक गंधासन,
'केसोदास' दुर्गनहीं दुर्गति सरीर की ।
दिसि दिसि जीति पै अजीति दुज दीननि सों,
ऐसी रीति राजनीति राजै रघुबीर की ॥५॥

अथ रानी-वर्णन—(दोहा)

सुंदरि, सुखद, पतिव्रता, सुचि रुचि, सील समान ।
यहि बिधि रानी बरनियै सलज सुबुद्धि-निधान ॥६॥

(कवित्त)

माता जिमि पोषति, पिता ज्यों प्रतिपाल करै,
प्रभु जिमि सासन करति, हेरि हिय सों ।
भैया ज्यों सहाउ करै, देति है सखा ज्यों सुख,
गुरु ज्यों सिखावै सीख हेत जोरि जिय सों ।

दासी ज्यों टहल करै, देवी ज्यों प्रसन्न हवै,
 सुधारै परलोक नातो नाहि काहू बिय सों ।
 छाके हैं अयान मद छिति के छनक छुद्र,
 और सों सनेह करै छाँड़ि ऐसी तिय सों ॥७॥
 काम के हैं आपने ही कामरति, काम साथ,
 रति न रतीकौ जरी, कैसे उर आनियै ।
 अधिक असाधु इंद्र, इद्रानी अनेक इंद्र,
 भोगवति, 'केसोदास' बेद न बखानियै ।
 बिधि हूँ अबिधि कीनी, साबित्री हूँ साप दीनी,
 ऐसे सब पुरुष जुवति उनमानियै ।
 राजा रामचंद्रजू से राजत न अनुकूल,
 सीता सी न पतिव्रता नारी जग जानियै ॥८॥

अथ राजकुमार-वर्णन—(दोहा)

बिद्या बिबिध बिनोद जुत, सील-सहित आचार ।
 सुंदर, सूर, उदार, बिभु, बरनिय राजकुमार ॥९॥

(कवित्त)

दाननि के सील, परदान के प्रहारी दिन,
 दानवारि ज्यों निदान देखियै सुभाइ के ।
 दीपदीप हूँ के अवनीपनि के अवनीप,
 पृथु सम 'केसोदास' दास दुज गाइ के ।
 आनंद के कंद सुरपालक से बालक ये,
 परदार-प्रिय, साधु मन बच काइ के ।
 देह-धर्मधारी पै विदेहराजजू से राज,
 राजत कुमार ऐसे दसरथ राइ के ॥१०॥

अथ पुरोहित-वर्णन—(दोहा)

प्रोहित नृपहित, बेदवित, सत्यसील, सुचि अंग ।
 उपकारी, ब्रह्मन्य, रिजु, जीत्यो अनंग ॥११॥

[७] और सों-औरनि सों नेह करै छोड़ि (दीन०) ।

[८] उर आनियै-ताहि मानियै (दीन०) । अबिधि-अवधि (याज्ञिक अ०) ।
 कीनी-करि (बाल०) । दीनी-भरि (बाल०) । जग जानियै-उर आनियै
 (बाल०, हरि०, सरदार०, दीन०) ।

[१०] दाननि-दाननि (याज्ञिक अ०, हरि०, सरदार०, दीन०), सुरपालक-
 सुरपालक के बालक से (याज्ञिक अ०, याज्ञिक०, हरि०, सरदार०) ।

(कवित्त)

कीनो पुरहूत मीत, लोक लोक गाए गीत,
पाए जु अभूत पूत, अरि उर त्रास है ।
जीते जु अजीत भूप, देस देस बहुरूप,
और को न 'केसोदास' बल को बिलास है ।
तोर्घो हर को धनुष, नृपकुल गौ-बिमुख,
देख्यो जु बधू को मुख सुखमा को बास है ।
हवै गए प्रसन्न राम, बाढ़ो धन धर्म धाम,
केवल बसिष्ठ के प्रसाद को प्रकास है ॥१२॥

अथ सेनापति-वर्णन—(दोहा)

स्वामिभक्त, श्रमजित, सुधी, सेनापति अभीत ।
अनआलस, जनप्रिय, जसी सुख संग्राम अजीत ॥१३॥

(सबैया)

छाँडि दियो अति आरस पारस 'केसव' स्वारथ साथ समूरो ।
साहस सिद्ध प्रसिद्ध सदा जल हूथल हू बल-विक्रम पूरो ।
सोहिय एक अनेकन माहि, अनेक न एक बिना रन रूरो ।
राजत है तेहि राज को राज सु जाकी चमू में चमूपति सूरु ॥१४॥

अथ दूत-वर्णन—(दोहा)

तेज बढ़ै निज राज को अरि उर उपजै छोभ ।
इंगित जानै, समय गुन बरनहु दूत अलोभ ॥१५॥

(कवित्त)

स्वारथ-रहित, हित-सहित बिहित-मति,
काम क्रोध लोभ, मोह छोभ मद हीने हैं ।
मीत हू अभीत पहिचानिबे कों, देस काल,
बुद्धि, बल जानिबे कों परम प्रबीने हैं ।
आपनी उक्ति अति ऊपरी दै औरनि की,
दूर दूर दुरी मति लै लै बस कीने हैं ।
'केसोदास' रामदेव देस देस अरिदल,
राजनि के देखिबे कों दूतै द्रिग दीने हैं ॥१६॥

[१२] नृपकुल-नृपगन (याज्ञिक अ०, हरि०, दीन०); नृपमन भो (सरदार०) ।

[१३] सेनापति०—सेनापति सु (दीन०), सेनापति अनमीत (अन्यत्र) ।

[१४] सिद्ध—सिधु (हरि०, सरदार०, दीन०) । सदा—महा (बाल०) ।

[१६] लोभ मोह-लोभ (दीन०) । मद-दमादिक (बाल०) ।

अथ मंत्री-वर्णन—(दोहा)

राजनीतिरत, राजरत, सुचि, सबंज, कुलीन ।
क्षमी, सूर, जस-सीलजुत मंत्री मंत्र-प्रवीन ॥१७॥

(सवैया)

‘केसव’ कैसेहुँ बारिधि बाँधि कहा भयो रीछनि ज्यों छिति छाई ।
सूरज को सुत बालि को बालक, को नल नील, कही हम ठाई ।
को हनुमंत कितेक बली, जम हूँ पहुँ जोर लई नहि जाई ।
भूषन भूषन, दूषन दूषन, लंक बिभीषन के मत पाई ॥१८॥
जुद्ध जुरे जुरजोधन सों कहि को न करी जमलोक बसीत्यो ।
कर्न, कृपा, द्विज द्रोण सों बैर कै काल बचै बल कीजै प्रतीत्यो ।
भीम कहा बपुरो अरु अर्जुन नारि नग्यावत ही बल रीत्यो ।
‘केसव’ केवल केसव के मत भारथ पारथ भारथ जीत्यो ॥१९॥

अथ मंत्री मति-वर्णन—(दोहा)

पंच अंग गुन संग षट, बिद्याजुत दसचारि ।
आगम संगम निगम मति, ऐसे मंत्र बिचारि ॥२०॥

(सवैया)

‘केसव’ मादक क्रोध बिरोध तजी सब स्वारथ सिद्धि अनैसी ।
भेद, अभेद, अनुग्रह, बिग्रह, निग्रह संधि कही बिधि जैसी ।
बैरिन कौं बिपदा प्रभु कौं प्रभुता करै मंत्रिन की मति ऐसी ।
राखत राजन, देवन ज्यों दिन दिव्य बिचार बिमानन बैसी ॥२१॥

अथ प्रयाण-वर्णन—(दोहा)

चँवर, पताका, छत्र छवि, दुंदुभि, घुनि बहु जान ।
जल-थलमय भुवकंप रज-रंजित बरनि पयान ॥२२॥

(सवैया)

राघव की चतुरंग चमू चय को गनै ‘केसव’ राज-समाजनि ।
सूर तुरंगन के उरझें पग तुंग पताकनि के पट साजनि ।
टूटि परें तिनतें मुकता धरनी उपमा बरनी कबिराजनि ।
बिंदु मनौ मुख-फेनन के किधौं राजसिरी स्रवै मंगल-लाजनि ॥२३॥

[१८] हम—यह (याज्ञिक अ०, याज्ञिक०) । नहि—जु न (अन्यत्र) ।

[१९] बचै-डरै मन (बाल०) । भारथ०-भूतल भारत पारथ (हरि०, सरदार०, दीन०); भूलत० (याज्ञिक०); भारत पारथ ऐसे ही (याज्ञिक०) ।

[२१] सिद्धि—बुद्धि (याज्ञिक अ०, हरि०, सरदार०) ।

(कवित्त)

नाद पूरि, धूरि पूरि तूरि बन, चूरि गिरि,
 सोखि सोखि जल भूरि भूरि थल गाय की ।
 'केसोदास' आसपास ठौर ठौर राखि जन,
 तिनकी संपति सब आपने ही साथ की ।
 उन्नत नवाए, नत उन्नत बनाए भूप,
 सत्रुन की जीविका सुमित्रन के हाथ की ।
 मुद्रित समुद्र सात, मुद्रा निज मुद्रित कै,
 आई दस दिसि जीति सेना रघुनाथ की ॥२४॥

अथ हय-वर्णन—(दोहा)

तरल, तताई, तेजगति, मुखमुख, लघुदिन देखि ।
 देस, सुबेस, सुलक्षनै, बरनहु बाजि बिसेषि ॥२५॥

(कवित्त)

बामनहि दुपद जु नाख्यो नभ ताहि कहा,
 नाखें पद चारि थिर होत इहि हेत हैं ।
 छेकी छिति छीरनिधि छाँडि घाप छत्र तर,
 कुंडली करत लाल चित्त मोल लेत हैं ।
 मन कैसे मीत, बीर बाहन समीर कैसे,
 नैनन ज्यों नौनी, नौनि नेह के निकेत हैं ।
 गुनगन बलित, ललित गति 'केसोदास',
 ऐसे बाजि रामचंद्र दीनन कौ देत हैं ॥२६॥

अथ गज-वर्णन—(दोहा)

मत्त, महाउत हाथ में, मंद चलनि, चलकर्न ।
 मुक्तामय, इभ कुंभ सुभ, सुंदर, सूर सुवर्न ॥२७॥

(कवित्त)।

जल कै पगार, निज दल कै सिंगार, पर
 दल को बिगार करि, पर-पुर पारै रौरि ।
 ढाहैं गढ़ जैसे घन, भट ज्यों भिरत रन,
 देति देखि आसिषा गनेसजू के भोरे गौरि ।

[२४] जीविका सुमित्रन-जीति कांति मित्रनि (याज्ञिक०) । हाथ-साथ (याज्ञिक०) ।

[२६] चित्त-चाकै (दीन०) ।

बिध के से बांधव, कलिदनंद से अमंद,
 बंदन कै भूढ़ भरे, चंदन की चार खौरि ।
 सूर के उदोत उदैगिरि से उदित अति,
 ऐसे गजराज राजे राजा रामचंद्र पौरि ॥२८॥

अथ संग्राम-वर्णन—(दोहा)

सेना, स्वन, संनाह, रज, साहस, सस्त्र-प्रहार ।
 अंग-भंग, संघट्ट भट, अंध, कबंध अपार ॥२९॥
 'केसव' बरनहु जुद्ध महुँ, जोगिनि-गन-जुत रुद्र ।
 भूमि भयानक रुधिरमय, सरबर, सरित समुद्र ॥३०॥

(कवित्त)

सोनित सलिल नर बानर सलिलचर,
 गिरि हनुमंत, बिष बिभीषन डार्यो है ।
 कँवर पताका बड़ी बाढ़वा अनल सम,
 रोगरिपु जामवंत 'केसव' बिचार्यो है ।
 बाजि सुरबाजि, सुरगज से अनेक गज,
 भरत सबंधु इंदु अमृत निहार्यो है ।
 सोहत सहित शेष रामचंद्र, कुस लव,
 जीति कै समर-सिंधु साँच ही सुधार्यो है ॥३१॥

अथ आखेट-वर्णन (दोहा)

जुररा, बहरी, बाज बहु, चीते, स्वान, सचान ।
 सहर, बहलिया, भिल्लजुत, नील निलोच-बिधान ॥३२॥
 बानर, बाघ, वराह, मृग, मीनादिक बहु जंत ।
 बध, बंधन, बेधन बरनि मृगया खेद अनंत ॥३३॥

(कवित्त)

तीतर, कपोत, पिक, केकौ, कोक, पारावत,
 कुरर, कुलंग, कलहंस गहि लाए हैं ।
 'केसव' सरभ सीह साहगोस रोष हति,
 कूकरन पास सक सूकर गहाए हैं ।

[२८] भूढ़ भरे-भूरि भरे (बाल०); सूँढ़ भरे (दीन०) ।

[२९] स्वन-स्वर (बाल०) । स्वसन (सरदार०) । सस्त्र-सन्नु (याज्ञिक अ०) ।

[३१] सबंधु-से बंधु (याज्ञिक अ०) ।

[३२] बिधान-पिधान (याज्ञिक अ०, याज्ञिक०) ।

[३३] बहु-बन (हरि०, सरदार०, दीन०) । मृगया खेद-खग आखेट (सरदार०), खेल (दीन०) ।

मकर निकर बेधि, बाँधि गजराज मृग,
सुंदरी दरीनि भील भामिनीन भाए हैं ।
रीझि रीझि गुंजन के हार पहिराए देखो,
काम ऐसे राम के कुमार दोऊ आए हैं ॥३४॥

खलनि के खैलभैल, मनमथ-मन ऐल,
सैलजा के सैल गैल गैल प्रति रोक है ।
सेनानी के सटपट, चंद्र-चित चटपट
अति अति अटपट अंतक के ओक है ।
इंद्रजू के अकबक, धाताजू के धकपक,
सभुजू के सकपक 'केसोदास' को कहै ।
जब जब मृगया को राम के कुमार चढ़ै,
तब तब कोलाहल होत लोक लोक है ॥३५॥

अथ जलकेलि-वर्णन—(दोहा)

सर, सरोज, सुभ, सोभ भनि, हिय सो प्रिय मन झेलि ।
गहिबो गत भूषनन को, जलचर ज्यों जलकेलि ॥३६॥

(कवित्त)

एक दमयंती ऐसी हरैं हँसि हंस-बंस,
एक हंसिनी सी बिसहार हिये रोहियै ।
भूषन गिरत एक लेति बूड़ि बीचि-बीच,
मीन-गति-लीन, हीन उपमा न टोहियै ।
एक हरि-कंठ लागि लागि बूड़ि बूड़ि जाति,
जलदेवता सी द्विग देवता बिमोहियै ।
'केसोदास' आसपास भँवर भँवत जल-
केलि में जलजमुखी जलज सी सोहियै ॥३७॥

[३४] सरभ-करभ (बाल०) । सीह साह-सीह स्याह (याज्ञिक०, सरदार०); साह सीह (हरि०, दीन०) । हति-हित (याज्ञिक०); गति (हरि०, दीन०); गत (सरदार०) । सक-सिमु (याज्ञिक०); सस (हरि०, सरदार०, दीन०) । निकर-समूह (दीन०) । ऐसे-जैसे (दीन०); कैसे (बाल०) ।

[३५] चढ़-चलै (बाल०, याज्ञिक०) ।

[३६] मन-हिय (दीन०) । झेलि-भेलि (याज्ञिक अ०, सरदार०) ।

[३७] एक हरि०-एक मत कै कै (दीन०) ।

अथ विरह-वर्णन—(दोहा)

स्वास निसा, चिंता बड़ें रुदन परेखें बात ।
 कारे, पीरे, होत कृस, ताते सीरे गात ॥३८॥
 भूख, प्यास, सुधि बुधि घटै, सुख, निद्रा, दुति अंग ।
 दुखद होत हैं सुखद सब, 'केसव' बिरह-प्रसंग ॥३९॥

(कवित्त)

बार बार बरजी मैं सारस सरस मुखी,
 आरसी लै देखि मुख, या रस में बोरिहै ।
 सोभा के निहोरे तौ निहारति न नेक हू तू,
 हारी हैं निहोरि सब कहा काहू खोरि है ।
 सुख को निहोरो जो न मान्यो सु भली करो तैं,
 'केसोराइ' की सौं तोहि जौ तू मन मोरिहै ।
 नाह को निहोरो किन मानति निहोरति हौं,
 नेह के निहोरे फिरि मोहीं जु निहोरिहै ॥४०॥
 हरित हरित हार हेरत हिये हरत,
 हारी हौं हरिननैनी हरि न कहूँ लहौं ।
 बनमाली ब्रज पर बरसत बनमाली,
 बनमाली दूर दुख 'केसव' कैसे सहौं ।
 आप घने घनस्याम, घन ही से होत घन,
 सावन के छौस घनस्याम बिनु क्यों रहौ ।
 हृदय-कमल-नैन देखि कै कमलनैन,
 होहुँगी कमलनैनी और हौं कहा कहौं ॥४१॥

(सर्वथा)

भूलि गयो सब सों रस रोष, मिटे भव के भ्रम रैन बिभातौ ।
 को अपनो पर को पहिचानत, जानति नाहिनै सीतल तातौ ।
 नीकेहि में वृषभानुलली की भई सु न जाकी कही परै बातौ ।
 एकहि बेर न जानियै 'केसव' काहे तैं छूटि गए सुख सातौ ॥४२॥
 मेह की हीस कै आँसू, उसासनि साथ निसा सु विसासिनि बाढ़ी ।
 हास गयो उड़ि हसनि ज्यों, चपला सम नींद नई गति काढ़ी ।

[३९] दुखद-सुखद (बाल०) । सुखद-दुखद (बाल०) ।

[४०] तैं-न (हरि०, दीन०); (सरदार०) । मन-मान (हरि०, दीन०) ।

[४१] 'हृदय-कमल-नैन पंक्ति' याज्ञिक अ०, हरि०, सरदार०, दीन० में तीसरी है

चातक ज्यों पिउ पीउ रटै, चढ़ा ताप-तरंगिनि ज्यों तन गाढ़ी ।
'केसव' वाकी दसा सुनि हौं अब, आगि बिना अँग अंगनि डाढ़ी ॥४३॥

अथ स्वयंवर-वर्णन—(दोहा)

सची स्वयंवर रक्षियै, मंडल मंच बनाउ ।
रूप, पराक्रम, बंस, गुन बरनिय राजा राउ ॥४४॥

(सवैया)

मंडली मंचन की, नृपमंडल-मंडित देखियै देवसभा सी ।
दंतनि को द्रुति, देह की दीपति, भूषन-जोति-समेत अभासी ।
फूलनि की छबि, अंबर की छबि, छत्रन की छबि तत्क्षण भासी ।
सोहति है अति सीय-स्वयंवर आनन-चंद-प्रबेष-प्रभा सी ॥४५॥

अथ सुरति-वर्णन—(दोहा)

सुरति सातुकी भाव भनि, मनित रुनित मंजीर ।
हाव, भाव, बहि अंत रति, अलज सलज्ज सरीर ॥४६॥

(कबित्त)

'केसोदास' प्रथम ही उपजत भय-भीर,
रोम-रुचि स्वेद देह कंपनि गहति हैं ।
प्राण प्रिय बाजी कृत बानर पदाति क्रम,
त्रिविध सबद द्विज दानहि लहति हैं ।
कलित कृपान कर सकति सुमान त्रान,
सजि सजि करज प्रहारन सहति हैं ।
भूषन सुदेस हार दूषन सकल होत,
सखि न सुरति-रीति, समर कहति हैं ॥४७॥

इति श्रीमद्विविधभूषण भूषितायां कविप्रियायां
सामान्यालंकारवर्णने राज्यश्रीभूषणवर्णनं
नाम अष्टमः प्रभावः ॥५॥

[४३] हीस कै-हैं सखि (याज्ञिक०, हरि०, सरदार०, दीन०) । नई-गई (हरि०, सरदार०) ।

[४७] रोम-रोष (हरि, दीन०) । गहति-घरति (बाल०) । लहति-लजति (बाल०) ।

८

अथ विशिष्टालंकार-वर्णन --(दोहा)

जाति सुभाव, बिभावना, हेतु, बिरोध, बिसेष
 उत्प्रेक्षा, आक्षेप, क्रम, आसिष प्रिय सुस्लेष ॥१॥
 प्रेमा, स्लेष, सभेद है नियम, बिरोधी मान ।
 सूक्ष्म, लेस, निदर्शना, उर्जस्वी पुनि जान ॥२॥
 रस, अर्थातरन्यास है, भेद सहित व्यतिरेक ।
 फेरि अपह्नुति, उक्ति है, बक्रोकति सबिबेक ॥३॥
 अन्योक्ति, व्यधिकरण है, सुबिसेषोक्ति भाषि ।
 फिरि सहोक्ति को कहत हैं, क्रम ही सों अभिलाषि ॥४॥
 व्याजस्तुति निंदा कहैं, पुनि निंदास्तुतिवंत ।
 अमित सु पर्यायोक्ति पुनि, युक्त गुनौ सब संत ॥५॥
 स समाहित जु सुसिद्धि पुनि औ प्रसिद्ध बिपरीत ।
 रूपक, दीपक भेद पुनि, कहि प्रहेलिका मीत ॥६॥
 अलंकार परबृत कहौ उपमा जमक सुचित्र ।
 भाषा इतने भूषननि भूषित कीजै मित्र ॥७॥

अथ जाति-लक्षण—(दोहा)

जाको जैसो रूप गुन कहिजै तैसे साज ।
 तासों जाति-सुभाव कहि बरनत हैं कबिराज ॥८॥

(कवित्त)

पीरी पीरी पाट की पिछौरी कटि 'कैसोदास'
 पीरी पीरी पागें पग पीरियै पनहियाँ ।
 बड़े बड़े मोतिन की माल बड़े बड़े नैन,
 नान्ही नान्ही भृकुटी कुटिल बघनहियाँ ।
 बोलनि, हँसनि मृदु चलनि, चितौनि चारु,
 देखत ही बनै पै न कहत बनहियाँ ।
 सरजू के तीर तीर खेलैं चारौ रघुबीर,
 हाथ द्वै द्वै तीर राते रातियै धनुहियाँ ॥९॥

[८] तैसे-तेही (बाल०, हरि०, सरदार०, दीन०) । सुभाव०—सुभाव सब कहि बरनत कबिराज (हरि०, सरदार०, दीन०, याज्ञिक०) सुभाव कहि बरनत सब कबिराज (याज्ञिक० अ०) ।

[९] बनहियाँ-बनै निगई (दीन०) ।

अथ स्वभाव-वर्णन—(कवित्त)

गोरे गात, पातरी, न लोचन समात मुख,
 उर उरजातन की बात अवरोहियै ।
 हँसति कहति बात, फूल से झरत जात,
 औठ अवदात राती रेख मन मोहियै ।
 स्यामल कपूरधूर की उढ़ौनी ओढ़े, उड़ि
 धूरि ऐसी लागी 'केसो' उपमा न टोहियै ।
 काम ही की दुलही सी काके कुल उलही सु,
 लहलही ललित लता सी लोल सोहियै ॥१०॥

अथ विभावनालंकार-वर्णन—(दोहा)

कारज को बिनु कारनहि, उदौ होत जिहि ठौर ।
 तासों कहत विभावना, 'केसव' कबि-सिरमौर ॥११॥

(कवित्त)

पूरन कपूर पान खाए कौसो मुखबास,
 अरुन अधर रुचि सुधा सों सुधारे हैं ।
 चित्रित कपोल, लोल लोचन, मुकुर, ऐन,
 अमल झलक, झलकनि मोहि मारे हैं ।
 भृकुटी कुटिल जैसी तैसी न किये ही होहि,
 आँजी ऐसी आँखें 'केसोराइ' हेरि हारे हैं ।
 काहे कों सिंगार कै बिगारति है मेरी आली,
 तेरे अंग सहज सिंगार ही सिंगारे हैं ॥१२॥

अन्य विभावना—(दोहा)

कारन कौनहु आन तें, कारज होइ जु सिद्ध ।
 जानौ यहौ विभावना, कारज छाँड़ि प्रसिद्ध ॥१३॥

(सवैया)

नेक हू काहू नवाई न बानी बनाई बिना इह बक्र भई है ।
 लोचन-श्री बिझुकाए बिना बिझुकी सी, रँगें बिनु रागमई है ।
 'केसव' कौन की दीनी कहौ यह चंदमुखी गति मंद लई है ।
 छोली न, ह्वै ही गई कटि छीन सु जोबन की यह रीति नई है ॥१४॥

[१०] उलही सु-उलही है सु (याज्ञिक०) ।

[१२] सुधा-सधर (याज्ञिक अ०) ।

[१३] कारज छाँड़ि-कारन छाँड़ि (याज्ञिक अ०, दीन०) ।

[१४] बनाई बिना इह-बनाई बिना सु तो (याज्ञिक०); नबाए बिना ही सु (हरि०,
 नरि० सरदार०, दीन०) ।

अथ हेतु-लक्षण—(दोहा)

हेतु होत है भाँति द्वै, बरनत सब कबिराव ।
'केसवदास' प्रकास सब, बरनि सभाव अभाव ॥१५॥

अथ सभाव-हेतु-वर्णन—(सबैया)

'केसव' चंदन-बृंद घने अरविंदन को मकरंद सरीरो ।
मालती, बेल, गुलाब, सु केतिक, केतिक, चंपक को बन पीरो ।
रंभन के परिरंभन संभ्रम गर्ब घनो घनसार को जीरो ।
सीतल मंद सुगंध समीर हर्यो इनसों मिलि धीरज धीरो ॥१६॥

अथ अभाव-हेतु-वर्णन—(सबैया)

जान्यो न मैं मद जोवन को उतर्यो कब, काम को काम गयो ई ।
छाँड्यो न चाहत जीव कलेवर जीव कलेवर छाँडि दयो ई ।
आवति जाति जरा दिन लीलति, रूप जरा सब लीलि लयो ई ।
'केसव' राम ररौ न ररौ अनसाधे ही साधन सिद्ध भयो ई ॥१७॥

अथ सभाव-अभाव-हेतु-वर्णन—(सबैया)

जा दिन तें बृषभानुललीहि अली मिलए गुरलीधर तें ही ।
साधन साधि अगाध सबै बुधि सोधि जो दूत अभूतन में ही ।
ता दिन तें दिनमान दुहून की 'केसव' आवति बात कहैं ही ।
पीछे अकास प्रकासै ससा, बड़ि प्रेमसमुद्र रहै पहिलें ही ॥१८॥

अथ विरोधाभास-लक्षण—(दोहा)

बरनत लगै विरोध सो, अर्थ सबै अविरोध ।
प्रगट विरोधाभास यह, समझत सबै सुबोध ॥१९॥

(कबित)

परम पुरुष कुरुष-सँग सोभिजत,
दिन दानसील पै कुदान ही सों रति है ।
सूर-कुल-कलस पै राहु को रहत सुख,
साधु कहैं साधु, परदार-प्रिय अति है ।

- [१५] सब-अरु (याज्ञिक अ०); करि (याज्ञिक०, हरि०, सरदार०, दीन०) ।
[१६] गुलाब-गुलाल (बाल०) । सु केतिक-सु केसरि (दीन०) । 'सु केतिक' बाल० में नहीं है और 'चंपक' के बाद 'चंदन' पाठ है । गर्ब-संग (बाल०) ।
जीरो-सीरो (याज्ञिक अ०, दीन०) ।
[१७] छाँड्यो न चाहत-छाँड्यो ई चाहत (बाल०) । जीव-जति (बाल०); जोरि (हरि०, सरदार०, दीन०) ।
[२०] रहत-खलल (बाल० याज्ञिक, अ०) ।

अकर कहावत धनुष धरे देखियत,
परम कृपाल पै कृपान कर पति है ।
विद्यमान लोचन द्वै, हीन बाम लोचनि सु,
'केसोदास' राजा राम अद्भुत गति है ॥२०॥

अथ विरोध-लक्षण—(दोहा)

'केसवदास' विरोधमय, रखियत बचन बिचारि ।
तासों कहत विरोध सब कबिकुल सुबुधि सुधारि ॥२१॥

(कवित्त)

सोभत सुबास हास सुधा सों सुधार्यो बिधि,
बिष को निवास जैसो तैसो मोहकारी है ।
'केसोदास' पावन परम हंस गति तेरी,
पर-हीय-हरन प्रकृति कौने पारी है ।
बारक बिलोकि बलबीर से बलीनि कहूँ,
करत बरहि बस, ऐसी बैस बारी है ।
एरी मेरी सखी तेरी कैसे कों प्रतीत कीजै,
कृसनानुरागी द्विग करनानुसारी है ॥२२॥

(सवैया)

आपु सितासित रूप, चितै चित स्याम मरीर रँगें रँग रातैं ।
'केसव' कानन हीन सुनै, सु कहैं रस की रसना बिन बातैं ।
नैन किधौ कोउ अंतरजामी री जानति हौं जिय बूझति तातैं ।
दूर लौं दौरत हैं बिन पाइन दूरि दुरी दरसैं मति जातैं ॥२३॥

अथ विशेष-लक्षण—(दोहा)

साधन कारन बिकल जहूँ, होय साध्य की सिद्धि ।
'केसवदास' बखानियै, सो बिसेष परसिद्धि ॥२४॥

(सवैया)

साँप को कंकन, माल कपाल, जटान को जूट, रही जटि आतैं ।
खाल पुरानी, पुरानोई बैल, सु और की और कहै बिष-मातैं ।
पारबती-पति-संपति देखि, कहै यह 'केसव' संभ्रम तातैं ।
आपुन माँगत भीख भिखारिन देत दई मुंहमांगी कहाँ तैं ॥२५॥

[२१] मय-मों (अन्यत्र) । सुबुधि-सुद्ध (वही) ।

[२२] कृसनानुरागी-कृसनानुसारी (हरि०, सरदार०, दीन०) ।

[२३] हौं जिय-नाहिन (दीन०) ।

[२५] भीख०-भीखयँ औरहि (बाल०) । माँगी-माँग्यौ (बाल०) ।

(कवित्त)

तमोगुन ओप तन ओपित, बिरूप नैन,
 लोकनि बिलोप करै, कोप के निकेत हैं ।
 मुख बिष भरे, बिषधर, धरे, मुंडमाल,
 भूषितबिभूति, भूत प्रेतनि समेत हैं ।
 पातक पिता के जुत, पातकी ही को तिलक,
 भावै गीत काम ही को, कामिनि के हेत हैं ।
 जोगिन की सिधि, सब जग की सकल सुधि,
 'केसोदास' दासनि ज्यों दासनि कों देत हैं ॥२६॥

(सबैया)

बाजि नहीं, गजराज नहीं, रथ पति नहीं, बल गात बिहीनो ।
 'केसवदास' कठोर न तीक्ष्ण भूलि हू हाथ हथ्यार न लीनो ।
 जोग न जानत, मंत्र न जाप, न जंत्र न पाठ पाढघौ न प्रवीनो ।
 रक्षक लोकनि कौ सु गँवारनि एक बिलोकनि ही बस कीनो ॥२७॥

(कवित्त)

ब्रज की कुमारिका वै लीने सुक सारिका,
 पढ़ावै कोक-कारिकान 'केसव' सबै निबाहि ।
 गोरी गोरी, भोरी भोरी, थोरी थोरी बैस फिरै,
 देवता सी दौरि दौरि आई चोरा चोरी चाहि ।
 बिन गुन, तेरी आन, भृकुटी कमान तानि,
 कुटिल कटाक्ष बान, यह अविरज आहि ।
 एते मान ढीठ, ईठ मेरे को अदीठ मनु,
 पीठ दै दै मारतीं पै चूकतीं न कोऊ ताहि ॥२८॥

(दोहा)

बाँचि न आवै, लिखि कहूँ, देखत छाह न घाम ।
 अर्थ, सुनारी, बैदई, करि जानत पतिराम ॥२९॥

अथ उत्प्रेक्षा-लक्षण--(दोहा)

'केसव' औरहि वस्तु में औरै कीजै तर्क ।
 उत्प्रेक्षा तासों कहै जिनके बुद्धि सपर्क ॥३०॥

[२६] बिरूप-बिषम (दीन०) । बिलोप करै-बिलोपकर (याज्ञिक अ०) । सुधि-
 सिद्धि (याज्ञिक०, हरि०, सरदार०, दीन०) ।

[२७] जाप-जंत्र (बाल०, दीन०) । जंत्र-तंत्र (हरि०, सरदार०, दीन०) । न जंत्र-
 न पाठ न मोह पढघौ (बाल०) ।

[२८] कोऊ-कोई (याज्ञिक० अ०); एको (याज्ञिक०) ।

[२९] सुनारी-सूक्त (बाल०); समुझै (याज्ञिक०); जानत (दीन०) ।

(कवित्त)

हर को धनुष तोरि, लंक तोरि रावन को
 बंस तोरि तोरें जैसे बृद्ध बंस बात हैं ।
 सत्रुन के सेल-सूल फूल-तूल सहे राम,
 सुनि 'केसोराई' की सौहिये हहरात हैं ।
 कामसर हू तैं तिक्ष तारे तरुनीन हू के,
 लागि लागि उचटि परत ऐसे गात हैं ।
 मेरे जान जानकी तु जानति है जान कछु,
 देखत ही तेरे नैन मैन से हवै जात हैं ॥३१॥
 अंक न, ससंक न, पयोधि हू को पंक न सु-
 अंजन न रंजित रजनि निज नारी को ।
 नाहिनै झलक झलकति तमपान की, न
 छिति छाँह छाई, छल नाही सुखकारी को ।
 'केसव' कृपानिधान देखियै बिराजमान,
 मानियै प्रमान राम बैन बनचारी को ।
 लागति है जाइ कंठ नाग दिगपालन के,
 मेरे जान सोई कृतु कीरति तिहारी को ॥३२॥
 इति श्रीमद्विषभूषणभूषितायां कविप्रियायां
 विशिष्टालंकारे जात्याद्युत्प्रेक्षालंकार-
 वर्णनं नाम नवमः प्रभावः ॥६॥

१०

अथ आक्षेपालंकार-वर्णन—(दोहा)

कारज के आरंभ ही, जहँ कीजत प्रतिषेध ।
 आक्षेपन तासों कहत, बहु बिधि बरनि सुमेध ॥१॥

[३१] सहे राम-सम सहे (बाल०) । सुनि-सुनि सुनि (बाल०) । की सौहिये-हिये (बाल०) ।

[३२] छल-झिझ (दीन०) । देखियै-सुनियै (बाल०) । बैन-बैठे (दीन०) । मेरे जान-जानतु हौं (बाल०) । कृतु-कृच्छ (दीन०) ।

[१] आक्षेपन-आक्षेपक (याज्ञिक०, हरि०, सरदार०, दीन०) ।

तीनो काल बखानिजै, भयो जु, भावी, होतु ।
 कबिकुल को कौतिक कहत प्रति प्रतिषेध उदोतु ॥२॥
 बरज्यौं हौं हरि, त्रिपुरहर, बारक करि भ्रूभंग ।
 सुनौ मदनमोहनि मदन ह्वै ही गयो अनंग ॥३॥
 तातैं गोरि न कीजई कौन हु बिधि भ्रूभंग ।
 को जानै ह्वै जाइ कह प्राणनाथ के अंग ॥४॥
 कोबिद कपट नकार-सर लगत न तजहि उछाह ।
 प्रतिपल नूतन नेह को पहिरै नाह सनाह ॥५॥
 प्रेम अधीरज, धीरजहि, संसय मरन, प्रकास ।
 आसिष, धरम, उपाय कहि, शिक्षा 'केसवदास' ॥६॥

अथ प्रेमाक्षेप-लक्षण—(दोहा)

प्रेम बखानत ही जहाँ, उपजत कारज बाधु ।
 कहत प्रेम-आक्षेप यह, तासों 'केसव' साधु ॥७॥

(कवित्त)

ज्यों ज्यों बहु बरजे मैं, मेरे प्राण प्राणनाथ
 अंग न लगाइयै जू, आगे दुख पाइबो ।
 त्यों त्यों हँसि हँसि अति सिर पर उर पर,
 कीबो कियो आँखिन के ऊपर खिलाउबो ।
 एको पल इत उत साथ तँ न जान दीने,
 लीने फिरे हाथ ही कहाँ लौं गुन गाइबो ।
 तुम तौ कहत तिन्हें छाँडि कौ चलन अग,
 छाँडत ये कैसें तुम्हें आगे उठि धाइबो ॥८॥

अथ अधैर्याक्षेप-लक्षण—(दोहा)

प्रेम-भंग भय सुनत जहँ उपजत सातुक भाव ।
 कहत अधीरज को सुकवि, यह आक्षेप सुभाव ॥९॥

(सबैया)

'केसव' प्रात बड़े ही, बिदा कहँ आए प्रिया पहाँ नेह नहे री ।
 आऊँ महाबन ह्वै जु कही, हँसि बोल द्वै ऐसे बर्याइ कहे री ॥

[३] हरि-हर (बाल०) । बरज्यौं-बरजौ (बाल०) ।

[४] गोरि-गौरि (याज्ञिक० हरि०, सरदार०, दीन०) कीजई-कीजिए (याज्ञिक०, हरि०, सरदार०, दीन०) । यह दोहा बाल० तथा याज्ञिक० में नहीं है ।

[५] तजहि-करत (बाल०) । पहिरै-परिहरि (बाल०) । यह दोहा याज्ञिक० में नहीं है ।

[८] कियो-कहें (याज्ञिक०) ।

[९] भय-बच (हरि०, दीन०) ।

को प्रतिउत्तर देइ सखी सुनि लोल, विलोचन यों उमहे री ।
सौहैं ककै हरिहारि रहे दिन बीसक लौं अमुवाँ न रहे री ॥१०॥

अथ धैर्याक्षेप-लक्षण—(दोहा)

कारज करि कहियै बचन, काज निवारन-अर्थ ।
धीरज को आक्षेप यह, बरनत बुद्धि-समर्थ ॥११॥
(कबित्त)

चलत चलत दिन बहुत व्यतीत भए,
सकुचत कत चित चलत चलाए हो ।
जात हैं ते कहौ कहा नाहिनै मिलत आनि,
जानि यह छाँडौ मोह बढ़त बढ़ाए हो ।
मेरी सौं तुमहि हरि रहियौ सुखहि सुख,
मोहूँ है तिहारी सौहैं रहौं सुख पाए हो ।
चले ही बनत जौ तौ चलियै चतुर पीय,
सोवत ही जैयौ छाँडि जागौगी हों आए हो ॥१२॥

अथ संशयाक्षेप-लक्षण—(दोहा)

उपजाएँ संदेह कछु, उपजत काज-बिरोध ।
यह संसय-आक्षेप कहि बरनत जिनिहि प्रबोध ॥१३॥
(कबित्त)

गुननि बलित, कल सुरनि कलित गाइ
ललिता ललित गीत श्रवन रवाईहैं ।
चित्रित हौं चित्रन में परम विचित्र तुम,
चित्रिनी ज्यों देखि देखि नैननि नवाईहैं ।
काम के बिरोधी मत सोधि सोधि साधि सिद्धि,
बोधि बोधि अवधि के बासर गँवाईहैं ।
'कसोराइ' की सौं मोहि यह ई कठिन वाकी
रसनै रसिक लाल पान को खवाईहैं ॥१४॥

अथ मरणाक्षेप-लक्षण—(दोहा)

मरन निवारन करत जहँ, काज-निवारन होत ।
जानहु मरनाक्षेप कबि जौ जिय बुद्धि-उदोत ॥१५॥

[१०] बर्याइ-बनाय (हरि०, सरदार०, दीन०) । दिन बीसक-अधरातिक (दीन०) ।

[११] कारज-कारन (दीन०) ।

[१४] रवाईहैं-रचाइहै (हरि०, सरदार०, दीन०); रमाइहै (बाल०) । चित्रित हौं-चित्रित हैं (याज्ञिक अ०) ।

[१५] कबि-यह (याज्ञिक०, दीन०) ।

(कवित्त)

नीके कै किवार देहों द्वार द्वार दर बार,
 'केसोदास' आस पास सूरज न छावैगो ।
 छिन में छावाय लैहों ऊपर अटानि आजु,
 आँगन पटाइ लैहों जैसे मोहि भावैगो ।
 न्यारे न्यारे नारदान मूँदौगी शरोखा-जाल
 पाइहै न पानी, पौन आवन न पावैगो ।
 माधव तिहारे पीछे मोपहँ मरन मूढ़,
 आवन कहत सु धौं कौन पैंडे आवैगो ॥१६॥

अथ आशिषाक्षेप-लक्षण—(दोहा)

आसिष पिय के पंथ को, दीजै दुख्य दुराइ ।
 आसिष को आक्षेप यह, कहत सकल कबिराइ ॥१७॥

(कवित्त)

मंत्री मित्र पुत्र जन 'केसव' कलत्र गन,
 सोदर सजन जन भट सुखसाज सों ।
 एतो सब होतै जात जो पै है कुसल गात,
 अबहीं चलौ कै प्रात रागुन-सगाज सों ।
 कीनो जु पयान-बाध छमिजै सु अपराध,
 रहिजै न पल आध, बैधिजै न लाज सों ।
 हौं न कहौ, कहत निगम सब अब तब
 राजन परम हित आपने ही काज सों ॥१८॥

अथ धर्माक्षेप-लक्षण—(दोहा)

राखत अपने धर्म कों, जहँ कारज रहि जाइ ।
 धर्माक्षेप सदा यहै, बरनत सब कबिराइ ॥१९॥

(कवित्त)

जो हौं कहौ 'रहिजै' तौ प्रभुता प्रगट होति,
 'चलन' कहौ तौ हित-हानि, नाहि सहनै ।
 'भावै सो करहु' तौ उदास भाव प्राननाथ
 'साथ लै चलहु' कैसे लोकलाज बहनै ।

[१६] छावैगो-आवैगो (हरि०, दीन०) । पटाइ लैहों-पटाइ देहों (हरि०, दीन०) ।
 मूँदौगी-मूँदिहों (हरि०, सरदार०, दीन०) । पाइहै-जाइहै (याज्ञिक०,
 दीह०) । पानी-पैंडो (हरि०, सरदार०) ।

‘केसोराइ’ की सौं तुम सुनहु छत्रीले लाल,
चले ही बनत जो पै नाहीं राजि रहनै ।
तैंसियै सिखावौ सीख तुम ही सुजान प्रिय,
तुमहि चलत मोहि कैसो कछु कहनै ॥२०॥

अथ उपायाक्षेप-लक्षण—(दोहा)

कौनहु एक उपाय करि, रोकिय प्रिय-प्रस्थान ।
तासों कहत उपाय कबि, यह आक्षेप सुजान ॥२१॥

(सवैया)

मोकों सबै ब्रज की जुवती हर-गौरि समान सोहागिनि जानै ।
ऐसी को गोपी गोपाल तुम्हैं बिन, गोकुल में बसिबो उर आनै ।
मूरति मेरी सुदीठ कै ईठ चली, कि रहौ जो कछु मन मानै ।
प्रेमनि छेमनि आदि दै ‘केसव’ कोऊ न मोहि कहूँ पहिचानै ॥२२॥

अथ शिक्षाक्षेप—(दोहा)

सुख ही सुख जहँ राखिजै, सिख ही सिख सुखदानि ।
सिक्षाक्षेप कहों बरनि, छप्पद बारह बानि ॥२३॥

अथ चैत्र-वर्णन—(छप्पय)

फूली लतिका ललित तरुनितर, फूले तरुबर ।
फूली सरिता सुभग, सरस फूले सब सरबर ।
फूली कामिनि, कामरूप करि कंतनि पूजहि ।
सुक सारो कुल हँसे, फूलि कोकिल कल कूजहि ।
कहि ‘केसव’ ऐसी फूल महँ सूल न फूलहि लाइयै ।
पिय आपु चलन की का चली चित्त न चैत चलाइयै ॥२४॥

अथ वैशाख-वर्णन—(छप्पय)

‘केसवदास’ अकास अवनि बासित सुबास करि ।
बहति पवन गति मंद गात मकरंद-बिंदु धरि ।
दिसि बिदिसनि छबि लागि, भाग पूजित पराग बरि ।
होत गंध हिय अंध बधिर भौरा बिदेसि नरि ।

[२०] राजि-राजा (दीन०); राज (बाल० याज्ञिक०, हरि०, सरदार०) । कैसो-जैसो (याज्ञिक अ०) ।

[२१] कौनहु०—राखत अपने धर्म करि (बाल०) । यह आक्षेप-केसवदास (दीन०) ।

[२२] मोकों-मोसों (बाल०) । हर-हरि (बाल०, सरदार०) । सुदीठ-सुईठ कै डीठ (याज्ञिक अ०) । प्रेमनि०-प्रेमिनि छेमनि (याज्ञिकअ०, दीन०) ।

[२४] कुल हँसे-कलकेलि (याज्ञिक०) ।

सुनि सुखद, सुखद सिख सीखियत, रति सिखई सुख-साख में ।
बर बिरहिन बधत बिसेष करि काम बिसिष बैसाख में ॥२५॥

अथ ज्येष्ठ-वर्णन — (छप्पय)

एक भूतमय होत भूत, भजि पंचभूत भ्रम ।
अनिल, अंबु, आकास, अवनि हवै जात आगि सम ।
पंथ थकित, मद मुकित सुखित सर सिंधुर जोवत ।
काकोदर कर कोष, उदर-तर केहरि सोवत ।
प्रिय प्रबल जीव इहि बिधि अबल, सकल विकल जल थल रहत ।
तजि 'केसवदास' उदास मति, जेठ मास जेठे कहत ॥२६॥

अथ श्रावण-वर्णन — (छप्पय)

पवन चक्र परचंड चलत चहुँ ओर चपल गति ।
भवन भामिनिहि तजत भ्रमति मानहु तिनकी मति ।
संन्यासी इहि मास होत इक आसनबासी ।
पुरुषन की को कहै भए पंछियौ निबासी ।
इति समय सेज सोवन लियो श्रीहि साथ श्रीनाथ हू ।
कहि 'केसवदास' आषाढ़ चल मैं न सुन्यो श्रुतिगाथ हू ॥२७॥

अथ आषाढ़-वर्णन — (छप्पय)

'केसव' सरिता सकल मिलित सागर मन मोहैं ।
ललित लता लपटात तरुन तन तरबर सोहैं ।
रुचि चपला मिलि मेघ चपल चमकत चहुँ ओरन ।
मनभावन कहैं भेंटि भूमि कूजत मिस मोरन ।
इहि रीति रमन रमनी सकल लागे रमन रमावन ।
प्रिय गमन करन की को कहै गमन सुनिय नहि सावन ॥२८॥

अथ भाद्रपद-वर्णन — (छप्पय)

घोरत घन चहुँ ओर घोष निर्घोषनि मंडहि ।
धाराधर धरि धरनि मुसलधारनि जल छंडहि ।
झिल्लीगन-शंकार पवन झुकि झुकि झकझोरत ।
बाघ सिंघ गुंजरत पुंज-कुंजर तरु तोरत ।
निसिदिन बिसेष निरसेष मिटि जात, सु ओली ओड़ियै ।
निज देस पियूष, बिदेस बिष भादौ भवन न छोड़ियै ॥२९॥

[२५] पुजित-पूरित (याज्ञिक अ०, दीन०, हरि०, सरदार०) । बधिर-बोर (दीन०, सरदार०) ।

[२८] रुचि-चित (बाल०); चिर (अन्यत्र) । इहि०-इहि रमनीय रमन रमनीनि कहैं रमन अरु लगे रमावन (बाल०) । लागे० रमारमन लागे रमन (याज्ञिक०) ।

अथ आश्विन-वर्णन—(छप्पय)

प्रथम पिंड हित प्रगट पितर पावन घर आवहि ।
नव दुर्गा नर पूजि स्वर्ग अपवर्गनि पावहि ।
छत्रनि दै छतपति लेत भुव लै सँग पंडित ।
'केसवदास' अकास अमल, जल जलजनि मंडित ।
रमनीय रमन रजनीस रुचि रमारमन हू रासरति ।
कल केलि कलपतरु ववार महँ कंत न करहु बिदेस-मति ॥३०॥

अथ कार्तिक-वर्णन—(छप्पय)

बन, उपवन, जल, थल, अकास दीसंत दीपन ।
सुख ही सुख सुखराति जुवा खेलत दंपति-जन ।
देव-चरित्र बिचित्र चित्र चित्रित आंगन घर ।
जगति जगत जगदीस-जोति, जगमगत नारि नर ।
दिन दान न्हान गुनगान-हुरि जनम सुफल करि लाजियै ।
कहि 'केसवदास' बिदेस-मति कंत न कातिक कीजियै ॥३१॥

अथ मार्गशीर्ष-वर्णन—(छप्पय)

मासन में हरि-अंस कहत मासों सब कोऊ ।
स्वारथ परमारथनि दैत भारथ महँ दोऊ ।
'केसव' सरिता सरनि फूल फूले सुगंध गुर ।
कूजत कल कलहंस, कलित कलहंसनि के सुर ।
दिन परम नरम सीतल गरम करम करम यह पाइ रितु ।
करि प्राननाथ परदेस कहँ मारगसिर मारग न चितु ॥३२॥

अथ पौष-वर्णन—(छप्पय)

सीतल जल, थल बसन, असन सीतल अनरोचक ।
'केसवदास' अकास अवनि सीतल असु-मोचक ।
तेल, तूल, तामोर, तपन, तापन, नव नारी ।
राज रंक सब छाँड़ि करत इनहीं अधिकारी ।
लघु द्यौस दीहं रजनी रमन होत दुसह दुख रूस में ।
यह मन क्रम बचन बिचारि पिय पंथ न बूझिय रूस में ॥३३॥

अथ माघ-वर्णन—(छप्पय)

बन, उपवन, केकी, कपोत, कोकिल कल बोलत ।
'केसव' भूले भँवर भरे बहु भाइनि डोलत ।

- [३०] रमनीय०-रमनीय रजनि (हरि०, सरदार०, दीन०) ।
[३१] सुखराति-दिनरात (याज्ञिक०, हरि०, सरदार०, दीन०) ।
[३२] सरनि-सकल (बाल०) ।

मृगमद, मलय, कपूरधूर धूसरित दसौ दिसि ।
 ताल, मृदंग, उपंग सुनत संगीत गीत निसि ।
 खेमलत बसंत संतत सुघर संत असंत अनंत गति ।
 घर नाह न छाँडिय माघ में जौ मन माहि सनेह-मति ॥३४॥

अथ फाल्गुन-वर्णन—(छप्पय)

लोकलाज तजि राज रंक निरसंक बिराजत ।
 जोइ आवत सोइ कहत करत पुनि हसत न लाजत ।
 घर घर जुवती जुवनि जोर गहि गाँठिनि जोरहि ।
 बसन छीनि मुख माँडि, आँजि लोचन तिन तोरहि ।
 पटवास सुबास अकास उड़ि भुवमंडल सब मंडियै ।
 कह 'केसवदास' बिलासनिधि फागु न फागुन छँडियै ॥३५॥

इति श्रीमद्विषयभूषणभूषितायां कविप्रियायां
 विशिष्टालंकारवर्णने आक्षेपालंकारवर्णनं
 नाम दशमः प्रभावः ॥१०॥

११

अथ क्रमालंकार-वर्णन—(दोहा)

आदि अंत भरि बरनियै, सो क्रम 'केसवदास' ।
 अनुगनना सो कहत हैं जिनके बुद्धि प्रकास ॥१॥

(छप्पय)

धिक मंगन बिन गुनहि, गुन सु धिक सुनत न रिज्झय ।
 रिज्झकु धिक बिन मौज, मौज धिक देत जु खिज्झय ।
 दीबो धिक बिन साँच, साँच धिक धर्म न भावै ।
 धर्म सु धिक बिनु दया, दया धिक अरि कहँ आवै ।
 अरि धिक चित्त न सालई, चित्त धिक जहँ न उदार मति ।
 मलि धिक 'केसव' ज्ञान बिन, ज्ञान सु धिक बिनु हरि-भगति ॥२॥

(सबैया)

सोभति सो न सभा जहँ बृद्ध न, बृद्ध न ते जु पढ़े कछु नाहीं ।
 ते न पढ़े जिन साधु न साधित दीह दया न दिप जिन माहीं ।

सो न दया जू न धर्म धरै घर, धर्म न सो जहँ दान बृथाहीं ।
दान न सो जहँ साँच न 'केसव', साँच न सो जु बसे छल छाहीं ॥३॥

(छप्पय)

तजहि जगत बिन भवन, भवन तजि तिय बिन कीने ।
तिय तजि जु न सुख देइ सुख तजि संपत्ति-हीने ।
संपत्ति तजि बिन दान, दान तजि जहँ न विप्र मति ।
बिप्र तजहि बिन धर्म धर्म, तजि यहि बिन भूपति ।
तजि भूप भूमि बिन, भूमि तजि दीह दुर्ग बिन जो बसे ।
तजि दुर्ग सु 'केसवदास' कहि जहाँ न जल पूरन लसे ॥४॥

अथ गणना-एक-वर्णन—(दोहा)

एक आत्मा, चक्र रवि, एक सुक्र की दृष्टि ।
एकै दसन गनेस को, जानति सिगरी सृष्टि ॥५॥

द्विवर्णन—(दोहा)

नदी-कूल द्वे, राम-सुत, पक्ष, खड्ग की धार ।
द्वै लोचन, द्विज-जन्म, पद, भुज, अस्विनीकुमार ॥६॥
लेखनि-डंक, भुजंग की रसना, अयननि जानि ।
गजरद, मुख चुकरेंड के, कक्षासिखा बखानि ॥७॥

त्रिवर्णन—(दोहा)

गंगा-मग, गंगेस-दृग, ग्रीव-रेख, गुन लेखि ।
पावक, काल, त्रिसूल, बलि, संध्या तीनि बिसेषि ॥८॥
पुस्कर, बिक्रम, राम, बिधि, त्रिपुर, त्रिवेनी, बेद ।
तीनि पाप, परिताप, पद ज्वर के तीन, सखेद ॥९॥

चतुर्वर्णन—(दोहा)

बेद, बदन-बिधि, बारिनिधि, हरि-वाहन-भुज चारि ।
सेना अंग, उपाय, जुग, आस्रम, बरन विचारि ॥१०॥
सुरनायक-बारन-रदन, 'केसव' दिसा बखानि ।
चतुरब्यूह-रचना चमू, चरन, पदारथ जानि ॥११॥

[३] साधित-साधुन (याज्ञिक अ०) । बिन-जय (दीन०) कीने-हिन्नेउ (सहज०) ।

[४] सुख-सुख जु (दीन०); सुखहि (सहज०) । बिन धर्म जु विषम (बाल०) । तजि यहि-तजि जिहि (दीन०) ।

[६] बेद-देव (अन्यत्र) । पाप-ताप (बाल०, सहज०) । सखेद-समेद (अन्यत्र) ।

पंच-वर्णन—(दोहा)

पंडुपूत, इंद्रिय, कवल, रुद्रबदन, गति बान ।
 लक्षन पंच पुरान के, पंच-अंर अरु प्रान ॥१२॥
 पंचवर्ग, तरुपंच, अरु पंचसब्द परमान ।
 पंचसंधि, पंचाग्नि भनि, कन्या पंच समान ॥१३॥
 पंच भूत, पातक प्रगट पंचजज्ञ, जिय जानि ।
 पंचगव्य, माता, पिता, पंचामृतनि बखानि ॥१४॥

षट्-वर्णन—(दोहा)

कुलिस कोन षट, तर्क षट दर्शन, रस, रितु अंग ।
 चक्रवर्ति, सिवपुत्र-मुख, सुनि षटराग प्रसंग ॥१५॥
 षटमाता षट बदन का, षट गुन बरनहु भित्त ।
 आतताइ नर षट गनहु, षटपद मधुप, कवित्त ॥१६॥

सप्त-वर्णन—(दोहा)

सात रसातल, लोक, मुनि, द्वीप, सूरहय, बार ।
 सागर, सुर, गिरि, ताल, तरु, अन्न, ईति, करतार ॥१७॥
 सात छंद, सातो पुरी, सात तुचा, सुख सात ।
 चिरंजीव मुनि, सात नर, सप्तमतृका तात ॥१८॥

अष्ट-वर्णन—(दोहा)

जोग-अंग, दिगपाल, बमु, सिद्धि, कुलाचल चार ।
 अष्टकुली अहि, व्याकरण, दिग्गज तरुनि बिचार ॥१९॥

नव-वर्णन—(दोहा)

अंगद्वार, भूखंड, रस, बाघिनि-कुच, निधि, जानि ।
 सुधाकुंड, ग्रह, नाडिका, नवधा भक्ति बखानि ॥२०॥

दस-वर्णन—(दोहा)

राबन-सिर, श्रीराम के दस अवतार बखानि ।
 बिस्वदेवा, दोष दस, दिसा, दसा दस जानि ॥२१॥

(कवित्त)

एक थल थित पै बसत प्रीति जन जिय,
 द्विकर पै देस देस कर को घरनु है ।

[१२] कवल-कमल (सहज०) । गति-गनि (बाल०, सहज०) ।

[१८] मुनि-ऋषि (दीन०) । सप्त०-सूर प्रमानिक तात (अन्यत्र) । तात-बात (दीन०) । [२०] नाडिका-नाटिका (दीन०, हरि०) ।

[२१] श्रीराम-बिष्णु के (दीन०) ।

त्रिगुन कलित बहु बलित ललित गुन,
 गुनिन के गुनतरु फलित करनु है।
 चारि ही पदारथ को लोभ चित्त नित नित,
 दीबे कौ पदारथ-समूह को परनु है।
 'केसोदास' इंद्रजीत भूतल अभूत, पंच-
 भूत की प्रभूति भवभूति को सरनु है ॥२२॥
 दरसै न सुर से नरेस सिर नावै नित,
 षठ दरसन ही को सिर नाइयतु है।
 'केसोदास' पुरी, पुरपुंजन को पालक, पै
 सात ही पुरी सों पूरो प्रेम पाइयातु है।
 नायका अनेकन को नायक नगर नव,
 अष्ट नायकनि ही सों मन लाइयतु है।
 नवधाई हरि को भजन इंद्रजीतजू को,
 दस अवतार ही को गुन गाइयतु है ॥२३॥

अथ आशिष-वर्णन—(दोहा)

मातु, पिता, गुरु, देव, मुनि कहत जु कछु सुख पाइ।
 ताहो सों सब कहत हैं आशिष कवि कबिराइ ॥२४॥

(कवित्त)

मलयमिलित बास, कुंकुमकलित, जुत-
 जावक, कुसुम-नख पूजित, ललित कर।
 जटित जराइ को जँजीर बीच नीलमनि,
 लागि रहे लोकन के नैन मानो मनहर।
 चिह चिह सोहो रामचंद्र के चरन जुग,
 'केसोदास' दीबो करें आशिष असेष नर।
 हय पर, गय पर, पालिक सु पीठ पर,
 अरि-उर पर अबनीसन के सीस पर ॥२५॥

(सर्वैया)

होय धौं कोऊ चराचर मध्य में उत्तम जाति अनुत्तम ही को।
 किनर के नर नारि बिचारि कि बास करै थल कै जल ही को।
 अंगी अनंग कि मूढ़ अमूढ़ उदास अमीत कि मीत सही को।
 सो अथवै कबहूँ जनि 'केसव' जाके उदोत उदौ सब ही को ॥२६॥

[२५] चारिही-चारिहूँ (बाल०, सहज) ।

[२२] हया पर०-पन्नग पतंगु अरु किनर असुर मसक गयंद सम चाहत अवरबर

अथ प्रेमालंकार-वर्णन—(दोहा)

कपट निपट मिटि जाइ जहँ उपजै पूरन क्षेम ।
ताही सों सब कहत हैं, 'केसव' उत्तम प्रेम ॥२७॥

(सवैया)

कछु बात सुनै सपने हू बियोग की होन चहै दुइ टूक हियो ।
मिलि खेलिय जा सह बालक तँ, कहि तासों अबोलों क्यों जात कियो ।
कहिजै यह 'केसव' नैननि सों बिन काजहि पावक-पुंज पियो ।
सखि तू वरजै अरु लोग हँसे सब, काहे को प्रेम को नेम लियो ॥२८॥

अथ श्लेषालंकार-वर्णन—(दोहा)

दोइ तीन अरु भाति बहु आनत जामें अर्थ ।
श्लेष नाम तासों कहत, जे हैं बुद्धिसमर्थ ॥२९॥

द्वि-अर्थ—(कवित्त)

घरत घरनि, ईस सीस चरनोदकनि,
गावत चतुरमुख सब सुखदानियै ।
कोमल कमल कर कमलाकर कमल,
कलित बलित गुन क्यों न आनियै ।
हिरनकसिपु दानकारी प्रह्लाद हित,
द्विजपद उरधरि बेदन बखानियै ।
'केसवदास' दारिद दुरद के बिदारिबे कौं,
एकै नरसिंह को अमरसिंह जानियै ॥३०॥

त्रि-अर्थ—(कवित्त)

परम बिरोधी अबिरोधी हूँ रहत सब,
दानिन के दानि, कवि 'केसव' प्रमान है ।
अधिक अनंत आप, सोहत अनंत संग,
असरनसरन, निरक्षक निधान है ।
हुतभुक हित मति, श्रीपति बसत हिय,
भावत है गंगाजल, जग की निदान है ।

[२७] उत्तम-उपमा (बाल०) ।

[२८] सुनै-कहै (बाल०) । सह-संग (दीन०) ।

[२९] जे हैं-जिनकी (याज्ञिक०, हरि०, सरदार०, दीन०) ।

[३०] कमल-अमल (हरि०, सरदार०, दीन०) । कर-पद (याज्ञिक अ०, हरि०, सरदार०, दीन०) कलित-ललित (याज्ञिक अ०, दीन०) ।

‘केसोराइ’ की सौ कहै ‘केसोराइ’ देखि देखि,
रुद्र की समुद्र की अमरसिंह रान है ॥३१॥

चतुर्थ—(कवित्त)

दानवारि सुखद, जनकजातनानुसारि,
करषत धनु गुन सरस सुहाए हैं ।
नरदेव क्षयकर करम हरन, खर
दूषन के दूषन सु ‘केसोदास’ गाए हैं ।
नागधर प्रिय मानि, लोकमाता सुखदानि,
सोदर सहायक नवल गुन भाए हैं ।
ऐसे राजाँ राम, ब्रजराम, कै परसुराम,
कैधौ हैं अमरसिंह मेरे उर भाए हैं ॥३२॥

पंच-अर्थ—(कवित्त)

भावत परम हंस जात गुन सुनि सुख,
पावत संगीत मीत बिबुध बखानियँ ।
सुखद सकति घर समरसनेही बहु,
बदन बिदित लस ‘केसोदास’ गानियँ ।
राजै द्विराज पद भूषन बिमल कम-
लासन प्रकास परदार प्रिय मानियँ ।
ऐसे लोकनाथ की त्रिलोकनाथ नाथनाथ,
कैधौ जगनाथ रामनाथ जग जानियँ ॥३३॥

(दोहा)

तिन में एक अभिन्नपद, और भिन्नपद जानि ।
श्लेष - बुद्धि द्वै वेष की ‘केसोदास’ बखानि ॥३४॥

अभिन्नपद—(कवित्त)

सोहति सुकेसी, मंजुघोषा, रति, उरबसी,
राजा राम मोहिबे को मूरति सोहाई है ।

[३१] रहत-कहत (अन्यत्र) ।

[३२] करषत-बरषत (बाल०) । ब्रजराम-बलराम (दीन०) ।

[३३] मीत-सीत (बाल०) । नाथनाथ०-नाथनाथ भूतल की नाथ किधौ इंद्र-
जीत जानिये (याज्ञिक०); रघुनाथ किधौ नाकनाथ किधौ ब्रह्मनाथ
जानिये (याज्ञिक अ०); रघुनाथ किधौ नाथनाथ राजा रामसिंह जानिये
(हरि०); किधौ रघुनाथ के अमरसिंह जानिये (दीन०); जगरनाथ
अंबरांत किधौ संभू... (बाल०) ।

[३४] बुद्धि-सुद्धि (याज्ञिक०) । वेष-भेद (दीन०) ।

कलरव कलित सुरनि राग रंग जुतु,
 बदन कमल षटपद छबि छाई है ।
 भृकुटी कुटिल धनु, लोचन कटाक्ष सर,
 भेदिजत मंजु मन तन सुखदाई है ।
 प्रमुदित पयोधर सौदामिनि साथ नाथ,
 काम की सी सेना कामसेना बनि आई है ॥३५॥

अथ अभिन्नपद लक्षण—(दोहा)

पद ही में पद काटियै ताहि भिन्नपद जानि ।
 भिन्न भिन्न पुनि पदन के, उपमा स्लेष बखानि ॥३६॥
 वृषभ बाहिनी अंग उर, बासुकि लसत प्रबीन ।
 सिव-संग नोहै सबंदा सिवा कि राइ प्रबीन ॥३७॥

(कवित्त)

राजे रज 'केसोदास' दूटत अरुन लार,
 प्रतिभट अंकन तें अंक पसरतु है ।
 सेना सुंदरीन के बिलोकि मुख भूषननि,
 किलकि किलहि जाहि ताही कों धरतु है ।
 गाढ़े गढ़ खेल ही खिलौननि ज्यों तोरि डारै,
 जग जय जस चारु चंद्र कों अरतु है ।
 चंद्रसेन भुवपाल अंगन विसाल रन,
 तेरो करबाल बाललीला सौ करतु है ॥३८॥

(दोहा)

बहुज्यो एक अभिन्नक्रिय अविरुद्धक्रिय जान ।
 पुनि विरुद्धकर्मा अबर नियम बिरोधी, मान ॥३९॥

[३५] मूरति-सुरति (याज्ञिक०, हरि०, दीन०) । सुरनि-सुरमि (याज्ञिक०, याज्ञिक अ०, हरि०, सरदार०, दीन०) मंजु० मर्मतनु तन (याज्ञिक०); तनु मनु तनु (याज्ञिक अ०); तन मन अति (हरि०, दीन०); मनु तन (सरदार०) । सौदामिनि०-दामिनी सी (याज्ञिक०, याज्ञिक अ०, हरि०, सरदार०, दीन०) ।

[३६] भिन्न-अर्थ (दीन०) ।

[३८] अंक परसतु-अंकमि भरतु (याज्ञिक०) । जय-धर (याज्ञिक अ०) । अंगन-आँगन (सरदार०, दीन०) । चंद्रसेन०-एलिच बहादुर नवाब खानखाना सूय जाकी (याज्ञिक०) ।

अथ अभिस्रक्रिय—(कवित्त)

प्रथम प्रयोगिजतु बाजि द्विजराज प्रति,
 सुबरन सहित न बिहित प्रमान है ।
 सजल सहित अंग बिक्रम प्रसंग रंग,
 कोष तें प्रकासमान धीरज-निधान है ।
 दीन को दयाल प्रतिभटन कों साल करै,
 कीरति को प्रतिपाल जानत जहान है ।
 जात हैं विलीन हवै दुनी के दान देखि राम,
 चंद्रजू को दान कंधौ 'केसव' कृपान है ॥४०॥

अथ अविरुद्धक्रिय—(सवैया)

कछु कान्ह सुनौ कल बोलति कोकिल काम की कीरति गावति सी ।
 पुनि बातें कहैं कल भाषिनि कामिनि केलि कलानि पढ़ावति सी ।
 सुनि बाजति बीन प्रवीन नबीन सराग हिये उपाजावति सी ।
 कहि 'केसवदास' प्रकास बिलास बस बन सोभ बढ़ावति सी ॥४१॥

अथ अविरुद्धकर्मो—(कवित्त)

दोऊ भगवंत तेजवंत बलवंत अति,
 दुहुन की बेदन बखानी बात ऐसी है ।
 दोऊ जानै पुन्य पाप, दुहुन के रिषि बाप,
 दुहुन की देखिजत सूरत सुदेसी है ।
 सुनौ देवदेव बलदेव, कामदेव प्रिय,
 'केसोराइ' की सौं तुम कहौ तैसी जैसी है ।
 बारुनी की राग होत सूरजु करत अस्त,
 उदी द्विजराज की जु होत यह कैसी है ॥४२॥

अथ नियम—(कवित्त)

बेरी गाइ बाँभन को ग्रंथनि में सुनिजत,
 कबिकुल ही के सुबरनहर हर काज है ।
 गुह सेजगामी एक बालकै बिलोकिजत,
 मातंगनि ही को मतवारे को सो साज है ।

[३६] क्रिय-कृष्ट (याज्ञिक अ०) । ओर०-अचिरजु कृतु उर आनु (बाल०);

ओर मिश्रक्रिय (दीन०) ।

[४०] सजल-सकल (बाल०) । साल-ब्याल (बाल०) ।

[४१] बोलति-कूकति (दीन०) । पढ़ावति-बढ़ावति (बाल०) । बढ़ावति-सिखावति (बाल०) ।

अरि नगरीन प्रति होत है अगम्यागोन,
 दुर्गन ही 'केसोदास' दुर्गति सी आज है ।
 दुख ही को खंडन है मंडन सकल जग,
 चिर राम राज करो जाको ऐसी राज है ॥४३॥

अथ विरोधी—(सवैया)

कृष्ण हरै हरये हरें संपत्ति, संभु बिपत्ति यहै अधिकाई ।
 बातक काम अकामन के हितु, घातक काम सकाम सहाई ।
 छाती मँ लच्छि दुरावत वे तो, किरावत ये सबके सँग घाई ।
 जद्यपि 'केसव' एक तऊ हरि तँ हर सेवक कों सति भाई ॥४४॥

अथ सूक्ष्मालंकार—(दोहा)

कौनहु भाव प्रभाव तें जानिय जिय की बात ।
 इंगित तें आकार तें, कहि सूक्ष्म अवदात ॥४५॥

(सवैया)

सखि सोभित गोपसभा मँह गोविंद बैठे हुते दुति कों धरिकै ।
 जनु 'केसव' पूरन चंद लगे चित्त चारु चकोरन को हरिकै ।
 तिनको उलटो करि आनि दियो केहु नीरज नीर नयो भरिकै ।
 केहु काहे तें नेकु निहारि मनोहर फेरि दियो कलिका करिकै ॥४६॥

[४३] ग्रंथनि में०-कीलै सब काल जहाँ (याज्ञिक०, याज्ञिक अ०, हरि०, सरदार०, दीन०) । दुख ही को०-राजा दसरथसुत राजा रामचंद्र तुम (याज्ञिक०, याज्ञिक अ०, हरि०, सरदार०, दीन०) । राम-चिर (याज्ञिक०, याज्ञिक अ०, हरि०, सरदार०, दीन०) ।

[४४] काम०-कायम कामनि (बाल०) । सति-सित (याज्ञिक अ०) । सत (हरि०, सरदार०, दीन०) ।

[४५] जिय-मन (बाल०) । कहि-सुनि (बाल०) ।

[४६] सोभित-मोहन (याज्ञिक अ०); सोहत (दीन०); सोहन (अन्यत्र) । कहीं कहीं यह सवैया है—

बैठी हुती वृषभानुकुमारि सखीन मंडल मध्य प्रबीनी ।
 लै कुम्हिलानो सो कंज परी जू कौऊ इक ग्वालिनि पायँ नबीनी ।
 बंदन सौँ छिरक्यो बस बाकहँ पान दये करुना रस भीनी ।
 चंदन चित्र कपोल बिलेपि कै अंबन आँजि बिदा करि दीनी ॥

अथ लेशालंकार—(दोहा)

चतुराई के लेस तें, चतुर न समझत लेस ।
कहत सु कोबिद कबि सबै तासों उत्तम लेस ॥४७॥

(सबैया)

खेलत हैं हरि बागे बने जहँ बैठी प्रिया रति तें अति लोनी ।
'केसव' कैसेहुँ पीठि में दीठि परी कुच-कुंकुम की रुचि रोनी ।
मातु समीप दुराई भलें तिहि सातुक भावन की गति होनी ।
धूरि कपूर की पूरि बिलोचन सँधि सरोरुह ओढ़ि ओढ़ोनी ॥४८॥

अथ निदर्शनालंकार—(दोहा)

कौनहु एक प्रकार तें, सत अरु असत समान ।
करियै प्रगट निदर्सना, समुझत सकल सुजान ॥४९॥

(कबित)

तेई करै चिर राज, राजन में राजै राज,
तिनहीं को जस लोक लोकनि अटतु है ।
जीवन, जनम तिनहीं के धन्य 'केसोदास'
औरन को पसु सम दिन निघटतु है ।
तेई प्रभु परम प्रसिद्ध पुहुमी के पति,
तिनही की प्रभु प्रभुताई को रटतु है ।
सूरज समान सोम मित्र हूँ अमित्र कहँ,
दुख सुख आपने उदै ही प्रगटतु है ॥५०॥

अथ ऊर्जालंकार—(दोहा)

तजै न निज हंकार कों, जद्यपि घटै सहाइ ।
ऊर्ज नाम तासों कहैं, 'केसव' सब कबिराइ ॥५१॥

(सबैया)

को बपुरा जो मिल्यो है विभीषन है कुलदूषन जीवैगो कौ लौं ।
कुंभकरन्म मर्यौ मघवारिपु तौ रे कहा न डरौं जम सौ लौं ।

[४७] कहत०-बरनत कबि कोबिद सबै सीता को 'केसव' बेस (याज्ञिक०); बरनत कबि 'केसव' सबै वाको कोबिद लेस (याज्ञिक अ०) ।

[४८] गति-मति (बाल०); रति (याज्ञिक०) ।

[५०] आपने०-निज उदै अस्त (दीन०) ।

[५१] बाल० में नहीं है । सरदार० में यह रूप है-

अहंकार को ना तजै सो ऊर्जालंकार । कबि कोबिद सब कहत हैं 'केसवदास' उदार ।

श्रीरघुनाथ के गातन सुंदरि जानहि तूं कुसलात न तो लौं ।
साल सबै दिगपालन कीं कर रावन के करवाल है जौ लौं ॥५२॥

अथ रसवत् अलंकार—(दोहा)

रसमय होइ सु जानियै, रसवत् 'केसवदास' ।
नव रस को संक्षेप ही, समुझौ करत प्रकास ॥५३॥

अथ शृंगार रसवत्—(सबैया)

आन तिहारी, न आन कहौ, तन में कछु, आनन आन ही कैसौ ।
'केसव' स्याम सुजान सुरूप न जाइ कह्यो मन जानत जैसौ ।
लोचन सोभहि पीवत जात, समात, सिहात, अधात न तैसौ ।
ज्यौ न रहात बिहात तुम्हैं बलि जात सु बात कहौ नेक वैसौ ॥५४॥

अथ रौद्र रसवत्—(छप्पय)

जेहि सर मधुमद मदि महा मुर मर्दन किन्नउ ।
मार्यो करकस नरक संख हनि संख जु लिन्नउ ।
निष्कंटक सुर कटक कर्यो कौटभ-ब्रपु खंडचउ ।
खरदूषन त्रिसिरा कबंध तरुखंड विहंडचउ ।
कुंभकरन जेहि मद संहर्यो, पल न प्रतिज्ञा तें टरउँ ।
तेहि बान प्राण दसकंठ के कंठ दसौ खंडित करउँ ॥५५॥

अथ वीर रसवत्—(छप्पय)

करि आदित्य अदृष्ट नष्ट जम करौ अष्ट बसु ।
रुद्रन वोरि समुद्र करौ गंधर्व सब पसु ।
बलित अबेर कुबेर बलिहि गहि देउँ इंद्र अब ।
विद्याधरन अबिद्य करौ बिन सिद्धि सिद्ध सब ।
लै करौ दासि दिति की अदिति अनिल अनल मिटि जाइ जल ।
सुनि सूरज सूरज उवत ही करौ असुर संसार बल ॥५६॥

अथ करुण रसवत्—(सबैया)

दूर तें दुंदुभि दोह सुनी न सुनी जन पुंज की गुंजन गाढ़ी ।
तोरन तार न तूर बजै बरम्हावत भाट न गावत ढाढ़ी ।

[५२] है कुल-ह्वं० (याज्ञिक०, हरि०, दीन०) ।

[५४] नेक-टुक (दीन०) ।

[५५] संहर्यो-मद हर्यो (हरि०, दीन०) ।

[५६] गहि-धरि (बाल०) । लै०-बर होइ (अन्यत्र) । दासि०-अदिति की दासि
दिति (बाल०) । संसार-संहार (अन्यत्र) ।

बिप्र न मंगल मंत्र पढ़ें अरु देखी न बारबधू ढिग ठाढ़ी ।
'केसव' तात के गात, उतारति आरति, आरति मातहि बाढ़ी ॥५७॥

अथ भयानक रसवत्—(सवैया)

राम की वाम जु आनी चुराई सु लंक में मीचु की बेलि बई जू ।
क्यों रन जीतहुगे तिनसों जिनकी धनुरेख न नाखी गई जू ।
बीस बिसे बलवंत हुते, जु हुती दृग 'केसव' रूप रई जू ।
तोरि सरासन संकर को पिय सीय स्ययंबर क्यों न लई जू ॥५८॥
बालि बली न बच्चो पर खोरि सु क्यों बचिहौ तुम कै निज खोरहि ।
'केसव' छीरसमुद्र मथ्यो कहि कैसें न बाँधिहै सागर थोरहि ।
श्रीरघुनाथ गनौ असमर्थ न देखि बिना रथ हाथिन घोरहि ।
तोर्यो सरासन संकर को जिहि सोऽब कहा तुव लंक न तोरहि ॥५९॥

अथ बीभत्स रसवत्—(त्रिभंगी छंद)

सिगरे नरनाइक असुर बिनाइक राकसपति हिय हारि गए ।
काहु न उठायो, थल न छुड़ायो, टर्यो न टार्यो भीत भए ।
इन राजकुमारन अति सुकुमारन लै आए हैं, पैज करै ।
व्रतभंग हमारो भयो तुम्हारो रिषि तप-तेज न जानि परै ॥६०॥

अथ अद्भुत रसवत्—(कवित्त)

आसीबिष, सिंधुबिष, पावक सों नातो कछू,
हुतो प्रह्लाद सों, पिता को प्रेम टूटो है ।
द्रौपदी की देह में खुथी ही कहा दुस्सासन,
खरोई खिसानो खैचि बसन न खूटो है ।
पेट में परीक्षित की पारथ बचाई मीचु,
जब सब ही को बल बिधिबान लूटो है ।
'केसव' अनाथन को नाथ जौ न रघुनाथ,
हाथी कहा हाथ कै हथ्यार करि छूटो है ॥६१॥

-
- [५७] तोरन०-तोरन तुर न ताल (दीन०) । तार न-तीरी न (याज्ञिक०) ।
[५८] आनी-ल्याए (याज्ञिक०, याज्ञिक अ०, हरि०, सरदार०) । नाखी०-गई न तरी जू (बाल०) । जु हुती०-वहई त्रिय (याज्ञिक अ०) ।
[५९] कहि-जिहि (बाल०) ।
[६०] थल०-अरु न चढ़ायो (याज्ञिक०, याज्ञिक अ०, हरि०); गहि० (दीन०) । हैं-हो (दीन०), सँग (अन्यत्र) ।
[६१] है-तो (बाल०) । खैचि-खलु (बाल०) । पारथ-पैठि कै (हरि०, सरदार०, दीन०) ।

‘केसोदास’ बेदविधि साथहीं बनाइ व्याध,
 सबरी कबहिं सुचि संहिता सिखाई ही ।
 बेधधारी हरिवेष देख्यो हो असेष जग
 तारका कों कौने सीख तारक पढ़ाई ही ।
 बारानसी बारन कज्यो हो कब बसबासु,
 गनिका कबहिं मनिकर्निका अन्हाई ही ।
 पतितन पावन करत जौ न नन्दपूत,
 पूतना कबहिं पतिदेवता कहाई ही ॥६२॥

अथ हास्य रसवत्—(सबैया)

बैठति है तिनमें हठिकै जिनकी तुम सों मति प्रेमपगी है ।
 जानति हौं नलराज दमैती की दूतकथा रसरंग-रंगी है ।
 पूजैगी साध सबै सुख की बड़भाग की ‘केसव’ जोति जगी है ।
 भेद की बात सुने तें कछु वह मासक तें मुसकान लगी है ॥६३॥

अथ शांत रसवत्—(सबैया)

देइगो जीवनवृत्ति वहै प्रभु, है सिगरे जग कों जिहि दैयै ।
 आवत ज्यों अनउद्यम तें दुख त्यों सुख पूरब के कृत पैयै ।
 राज औ रंक सुराज करौ सब काहे कों ‘केसव’ काहु डरैयै ।
 मारनहार उबारनहार सु तो सबके सिर ऊपर हैयै ॥६४॥

अथ अर्थान्तरन्यास—(दोहा)

और आनियै अर्थ जहँ औरे बस्तु बखानि ।
 अर्थांतर को न्यास यह चारि प्रकार सु जानि ॥६५॥

(सबैया)

भोरेहुँ भौंह चढ़ाइ चितै डरपाइजै कै मन क्यों हूँ करेरो ।
 ताको तौ ‘केसव’ कोरि हिये दुख होत महा, सु कहा इत हेरो ।
 कैसो है तेरो हियो हरि मेरेहि छोरो नहीं तनु छूटत मेरो ।
 बूंदक दूध को मार्यो है बांधि सु जानति हौं माई जायो न तेरो ॥६६॥

[६२] साथ-व्यर्थ (दीन०) । कबहिं-को कौने (हरि०, सरदार०, दीन०) ।

[६३] सुख-मन (दीन०) । बड़-तन (हरि०, सरदार०, दीन०) ।

[६४] वृत्ति-मूरि (बाल०) । दुख त्यों सुख-सुख ज्यों दुख (याज्ञिक०, हरि०, सरदार, दीन०) । उबारन-जियावनहार (दीन०) ।

[६६] कहा-कहाँ (हरि०, सरदार०, दीन०) ।

अथ भेर—(दोहा)

जुक्त अजुक्त बखानिजै और अजुक्ताजुक्त ।
'केसवदास' बिचारिजै चौथो जुक्त अजुक्त ॥६७॥

अथ युक्त अर्थान्तरन्यास—(दोहा)

जैसो जहाँ जु बूझिजै, तैसो तहाँ सु आनि ।
रूप सील गुन जुक्ति बल, ऐसो जुक्त बखानि ॥६८॥

(कबित्त)

गह्वो गुरु को दोष दूषित कलंक करि,
भूषित निसाचरीनि अंक न भरत हैं ।
चंडकरमंडल तें लै लै बहु चंडकर,
'केसोदास' प्रतिमास मास निसरत हैं ।
बिषधर बंधु हैं, अनाथिनी को प्रतिबंधु,
विष को बिसेष बंधु हिये हहरत हैं ।
कमलनयन को सौँ, कमल-नयन मेरे,
चंद्रमुखी चंद्रमा तें न्याय ही जरत हैं ॥६९॥

अथ अयुक्त अर्थान्तरन्यास—(दोहा)

जैसो जहाँ न बूझिजै तैसो तहाँ जु होइ ।
'केसवदास' अजुक्त कहि बरनत हैं सब कोइ ॥७०॥

(कबित्त)

'केसोदास' होत मारसीरी पै सुमार सी री,
आरसी लै देखि देहि ऐसियै है रावरी ।
अमल बतासे से हैं ललित कपोल तेरे,
अधर तमोल धरे दृग तिलचावरी ।
ये ही छवि छकि जात छन में छबीले छैल,
लोचन गँवार छीनि लैहैं इत आव री ।
बारबार बरजति, बारबार जाति कत,
मैले बार वारों आनिवारी है तू बावरी ॥७१॥

अथ अयुक्त-युक्त अर्थान्तरन्यास—(दोहा)

असुभै सुभ हबै जात जहँ, क्यों हूँ 'केसवदास' ।
इहै अजुक्त जुक्त कवि बरनत बुद्धि-बिलास ॥७२॥

[७१] पै सुमार०-ओ है सारसिरी (बाल०) । मैलै०-मिलैबार बारो आनिवारी है
तू बावरी (याज्ञिक०); मैलैबार बीर की त्यों० (बाल०); 'सौँ' (अन्यत्र)

(सवैया)

पातक-हानि, पितानि सों हारिबो, गर्भ के सूलन तें भरियै जू ।
 तालन को बँधिबो, बध रोर को, नाथ के साथ चिता जरियै जू ।
 पत्र फटै तें कटै रिन 'केसव', कैसेहु तीरथ जौ मरियै जू ।
 नीकी सदा लगै गारि सगैन की, डाँड भलौ जौ गया भरियै जू ॥७३॥
 आगे हवै लीबो यहै, जु चितै इत, चौंकि उतै दृग ऐंचि लई है ।
 कोबिद स्याम वहै प्रतिउत्तर, मानियै बात, जु मौनमई है ।
 रोष की रेख, वहै रस की रख, काहे कों 'केसव' छाँडि दई है ।
 नाहियँ हाँ, तुम नाहीं सुनी, यह नारि नईनि की रीति नई है ॥७४॥

अथ युक्ति-अयुक्त अर्थान्तरन्यास—(दोहा)

इष्टै बात अनिष्ट जहँ कैसे हू हवै जाति ।
 तासों जुक्ताजुक्त कहि बरनत बुद्धि बिभाति ॥७५॥

(सवैया)

सूल से फूल, सुबास कुबास सी, भाकसी से भए भौन सभागे ।
 'केसव' बाग महाबन सो, जुर सी चढ़ी जोन्हि सबै अँग दागे ।
 नेह लग्यो उर नाहर सो, निसि नाह घरीक कहूँ अनुरागे ।
 गारी से गीत, बिरी बिष सी, सिंगरेई सिंगार अँगार से लागे ॥७६॥
 पाप की सिद्धि, सदा रिनवृद्धि, सुकीरति आपनी आप कही की ।
 दुख को दान जु, सूतक न्हान जु दासी की संतति संतत फीकी ।
 बेटी को भोजन, भूषन राँड को, 'केसव' प्रीति सदा पर-ती की ।
 जूझ में लाज, दया अरि कौं, अह बाम्हन जाति सों जीति न नीकी ॥७७॥

अथ व्यतिरेकालंकार (दोहा)

तामहिँ आनिय भेद कछु, होइ जु बस्तु समान ।
 सो व्यतिरेक सुभाति द्वै, जक्ति सहज परमान ॥७८॥

अथ युक्ति व्यतिरेक—(कवित्त)

सुंदर सुखद अति अमल सकल विधि,
 सदल सफल बहु सरस संगीत सों ।
 बिबिध सुबासजुत 'केसोदास' आसपास,
 राजै दुजराज तनु परम पुनीत सों ।

[७३] वध-बंधुं (बाल०) । सगैन-सनेह (दीन०) ।

[७४] कोबिद स्याम०-मानिबे को वहई (याज्ञिक०, हरि०, सरदार०, दीन०) ।
 मौनमई-मानमई (याज्ञिक०) । नाहियँ-नाहीं जू (याज्ञिक०), नाहि यँ
 (हरि०, दीन०) ।

[७५] कहि-मति (बाल०) । बुद्धि-कवि सुख पाइ (याज्ञिक०, हरि०, सरदार०, दीन०) ।

फूले ई रहत दोऊ दीबे ही को प्रतिपल,
 देत कामनानि सब मीत हू अमीत सों ।
 लोचन बचन गति बिन, इतनो ई भेद,
 इंद्रतरुबर अरु इंद्र इंद्रजीत सों ॥७६॥

अथ सहज व्यतिरेक—(सबैया)

गाइ बराबरि धर्म सबै धन जाति बराबर ही चलि आई ।
 'केसव' कंस दिवान पितान बराबर ही पहिरावनि पाई ।
 बैस बराबरि दीपति देह बराबर ही विधि बुद्धि उपाई ।
 ऐ सखि आज ही होहुगी कैसें बड़ी तुम आँखिन ही की बड़ाई ॥८०॥

अथ अपह्नुति अलंकार—(दोहा)

मन की बात दुराई मुख, ओरै कहियै बात ।
 कहत अपह्नुति सकल कबि, यासों बुधि अवदात ॥८१॥

(कवित्त)

सुंदर ललित गति बलित सुवास अति,
 सरस सुवृत्त मति मेरे मन मानी है ।
 अमल अदूषित सुभूषननि भूषित,
 सुबरन, हरनमन, सुर सुखदानी है ।
 अंग अंग गूढ़ भाव के प्रभाव जानै को,
 सुभाव ही को भाव रुचि पचि पहिचानी है ।
 'केसोदास' देवी कोऊ देखी तुम ? नाहीं राज,
 प्रगट प्रवीनराइ जू को यह बानी है ॥८२॥
 कारे सटकारे केस, नौनी कछु होनी बैस,
 सोने तें सलोनी दुति देखियत तन की ।
 आछे आछे लोचननि चलनि चितौनि आछी,
 आछी मुख कबिता विमोहै मति मन की ।
 'केसोदास' केहूँ भाग पाइयै जौ बाग गहि,
 साँसनि उसासैं साध पूजै रति रन की ।

[७६] सकल-कमल (याज्ञिक०) । इंद्र०-इंद्रीजीत जीत सों (बाल०) । लाल... (अन्यत्र) ।

[८०] उपाई-बनाई (याज्ञिक०) । ऐ सखि-ऐ अलि (याज्ञिक०, हरि०, सरदार०, दीन०) ।

[८१] यासों-ताहि (दीन०), जिनकै (याज्ञिक०) ।

[८२] अंग०-अंग ही को भाव गूढ़ अब के प्रभाव जानै को सुभाव रूप रुचि पहिचानी है (दीन०) । रुचि-रूप (सरदार०) । रुचि०-रूप पचि पहिचानी है (हरि०) ।

बेटी काहू गोप की बिलोकी प्यारे नंदलाल ?

नाहीं लोललोचनी ! बड़वा बड़ेपन की ॥८३॥

इति श्रीमद्विषभूषणभूषितायां कविप्रियायां विशिष्टालंकारांतरे

क्रमालंकारादि-अपह्नुतिवर्णनं नाम एकादशः प्रभावः ॥११॥

१२

अथ उक्ति अलंकार-वर्णन—(दोहा)

बुद्धि बिबेक अनेक बल, उपजत तर्क अपार ।

तासों कबिकुल उक्ति कहि, बरनत अमित प्रकार ॥१॥

अथ उक्ति-भेद—(दोहा)

बक्र, अन्य, व्यधिकरण कहि, और विशेष समान ।

सहित सहोक्ति में कही, उक्ति सु पंच प्रमान ॥२॥

अथ वक्रोक्ति-लक्षण—(दोहा)

‘केसव’ सुधी बात में, बरनिय टेढ़ो भाव ।

बक्रउक्ति तासों कहें, जे प्रबीन कबिराव ॥३॥

(सवैया)

ज्यों ज्यों हुलास सों ‘केसवदास’ बिलास-निवास हिये अबरेख्यो ।

त्यों त्यों बढ़्यौ उर कंप कछू भ्रम भीत भयो किधौं सीत बिसेख्यो ।

मुद्रित होत सखी बरहीं मेरे नैन सरोजनि साँच कै लेख्यो ।

तैं जु कह्यो मुख मोहन को अरबिद सो है सो तौ चंद सो देख्यो ॥४॥

अथ अन्योक्ति-लक्षण—(दोहा)

औरहि प्रति जु बखानिजै कछू औरई बात ।

अन्यउक्ति यह जानिजै, बरनत कवि न अघात ॥५॥

[८३] चलिनि-चितीनि औ चलिनि (हरि०, सरदार०, दीन०) । आछे मुख-
सुखमुख (हरि०, सरदार०, दीन०) ।

[३] जे०-केसव कवि (बाल०), सदा सबै (सरदार०); सही सबै (दीन०) ।

[५] यह०-तेहि कहत है (दीन०) ।

(सबैया)

दल देख्यो नहीं जड़ जाड़ो बड़ो अरु घाम घनो जल क्यों हरिहै ।
 कहि 'केसव' बाउ बहै बहु दाउ दहै घर धीरज क्यों धरिहै ।
 फलिहै फल नाहि कि तौ लौ तु ही कहि तो पहुँ भूख सही परिहै ।
 कछु छाँह नहीं सुख सोभ नहीं, कहि कीर करीर कहा करिहै ॥६॥
 अंग अली धरियँ अँगियाऊ न आजु तें नींदौ न आवन दीजै ।
 जानति हौं पिय नाते सखीन के लाजउ तौ अब साथ न लीजै ।
 थोरहि द्यौस तें खेलन तेऊ लगों जिय सों जिनकों जिय जीजै ।
 नाह के नेह के मामिले आपनी छाँह हू की परतीति न कीजै ॥७॥

अथ व्यधिकरणोक्ति-लक्षण—(दोहा)

औरहि में कीजै प्रगट औरहि को गुन-दोष ।

उक्ति यहै व्यधिकरण की सुनत होइ संकोष ॥८॥

(कबित्त)

जानु, कटि, नाभिकूल, कंठ, पीठि, भुजमूल,
 उरज करजरेख रेखी बहु भाँति है ।
 दलित कपोल, रद ललित अधर रुचि,
 रसना रसित रस, रस में रिसाति है ।
 लोटि लोटि लौटि पौटि लपटाति बीच बीच,
 हा हा, हू हू, नेति नेति बानी होति जाति है ।
 आलिंगन अंग अंग पीड़ियत पद्मिनी के,
 सौतिन के अंग अंग पीरनि पिराति है ॥९॥
 राजभार, साजभार, लाजभार, रजभार,
 भूमिभार, भवभार, नीके ही अटत हैं ।
 प्रेमभार पनभार, 'केसव' संपत्तिभार,
 पतिभार जुत अति जुद्धनि जटत है ।
 दानभार, मानभार, सकल-सयानभार,
 भोगभार, भागभार घटना घटत हैं ।
 एते भार फूलनि ज्यों राजें राजा राम सिर,
 तिहि दुख सत्रुन के सिरई फटत हैं ॥१०॥

[६] बहु-दिन (हरि०, सरदार०, दीन०) । फल-फूल (हरि०, सरदार०), फूलिहै (दीन०) । कहि-रहि (सरदार०, दीन०) ।

[७] पिय-जिय (याज्ञिक०, हरि०, सरदार०, दीन०) । तेऊ-ते उलटी (याज्ञिक०) । जिय सों-तिन सों (याज्ञिक०); जिय सों उन सों जिन्हें देखत जीजै (हरि०, सरदार०), ...देखिकै जीजै (दीन०) ।

[९] रसित-रसतु (याज्ञिक०) । रस में-रोस में (दीन०) । पीरनि-पीर अति (अन्यत्र) ।

(सबैया)

पूत भयो दशरथ्य कें 'केसव' देवन कें घर बाजी बधाई ।
 फूलि कै फूलन कों बरषें, तह फूलि फले सब ही सुखदाई ।
 छीर बहीं सरिता सब भूतल, धीर समीर सुगंध सुहाई ।
 सर्वसु लोग लुटावत देखि कै दारिद-देह दरार सी खाई ॥११॥

(दोहा)

होइ हँसी औरनि सुने, यह अवरज की बात ।
 कान्ह चढ़ावत चंदनहि, मेरे अंग सिरात ॥१२॥

(सोरठा)

दये सुनारनि दाम, रावर को सोनो हर्यो ।
 दुख पायो पतिराम, प्रोहित 'केसव' मिश्र सों ॥१३॥

अथ विशेषोक्ति-लक्षण—(दोहा)

बिद्यमान कारन सकल, कारज होहि न सिद्ध ।
 सोइ उक्ति बिषेषमय, 'केसव' परम प्रसिद्ध ॥१४॥

(सबैया)

कर्न से दुष्ट ते रुष्ट हुते भट पाप सपुष्ट न सासना टारे ।
 सारद सैन दुसासन से सब साथ समर्थ भुजा उसकारे ।
 हाथी हजारन को बल 'केसव' ऐंचि थके पट कों डर डारें ।
 द्रौपदी को दुरजोधन पै तिल अंग तरु उघर्यो न उघारे ॥१५॥

(दोहा)

मूल तोल कसि बान बनि काइथ लिखत अपार ।
 राखि मरत पतिराम ये सोनो हरत सुनार ॥१६॥

(कबित्त)

सिखै हारी सखी डरवाइ हारी कादंबिनि,
 दामिनी दिखाइ हारी दिसि अधरात की ।
 झुकि झुकि हारी रति मारि मारि हार्यो मार,
 हारी झकझोरति त्रिविध गति वात की ।
 दई निरदई दई वाहि काहे ऐसा मति,
 जारति जु रैन ऐन दाह ऐसे गात की ।
 कैस हू न मानै हौं मनाइहारी 'केसोराइ'
 बोलि हारी कोकिला बुलाइहारी चातकी ॥१७॥

[१०] साजभार-रजभार (दीन०) । भवभार०-भवभार जयभार (हरि०, सरदार०, दीन०) । [१२] अंग-नैन (याज्ञिक०); हियो (दीन०) ।

[१५] दुष्ट०-दुष्ट ते पुष्ट (हरि०, सरदार०, दीन०) । सपुष्ट न-ओ कष्ट न (दीन०) । दुसासन-कुयोधन (दीन०) । दुरजोधन-दुहसासन (दीन०) ।

[१६] मूल-तुला (दीन०) । मरत-भरत (वही) । ये-पै (वही) । [१७] ऐन-दिन (याज्ञिक०) ।

(सवैया)

कर्न कृपा दुज द्रीन तहाँ जिनको मत काहू पै जात न टार्यो ।
भीम गदाहि धरें धनु अर्जुन, जुद्ध जुरे जिनसों जम हार्यो ।
'केसवदास' पितामह भीषम मीचु करी बस लै दिसि चार्यो ।
देखत ही तिनके दुरजोधन द्रौपदी सामुहें हाथ पसार्यो ॥१८॥
वेई हैं बान बिधान निधान अनेक चमू जिन जोर हई जू ।
वेई हैं बाहु वहै धनु धीरज दाह दिसा जिन जुद्ध जई जू ।
वेई हैं अर्जुन आपु नहीं जग में जस की जिन बेलि बई जू ।
देखत ही तिनके तब कोलनि नेकहि नारि छुड़ाइ लई जू ॥१९॥

अथ सहोक्ति-लक्षण—(दोहा)

हानि वृद्धि सुभ असुभ कछु कहियै गूढ़ प्रकास ।
होइ सहोक्ति स साथ ही बरनत 'केसवदास' ॥२०॥

(कबित्त)

सिसुता समेत भई मंदगति लोचननि,
गुनन सों बलित ललित गति पाई है ।
भौंहनि की होड़ीहोड़ा हवै गई कुटिल अति,
तेरी बानी मेरी रानी सुनत सुहाई है ।
'केसोदास' मुखहास हीसखँ ही कटितट,
छिन छिन सूछम छबीली छवि छाई है ।
बारबुद्धि वारनि के साथ ही बड़ी है बीर,
कुचनि के साथ ही सकुच उर आई है ॥२१॥

अथ व्याजस्तुति-निंदालंकार-लक्षण—(दोहा)

स्तुति निंदा मिस होइ जहँ स्तुति मिस निंदा जान ।
व्याजस्तुति निंदा बहै, 'केसवदास' बखान ॥२२॥

(कबित्त)

सीतल हूँ हीतल तिहारे न बसति वह,
तुम न तजत तिल ताको तनु ताप-गेहु ।
आपनो ज्यौ हीरा सो पराए हाथ ब्रजनाथ,
दै कै तौ अकाथ कथ मैं ऐसो मन लेहु ।
एते पर 'केसोराइ' तुम्हें न प्रवाहि वाहि,
वहै जक लागी भागी भूख सुख भूख्यो गेहु ।

माँडौ मुख छाँडौ छिन छलनि छबीले लाल,
ऐसी तौ गँवारिन सों तुम ही निबाहौ नेहु ॥२३॥

अथ निंदाव्याज स्तुति—(कवित्त)

केसर कपूर कुंज केतकी गुलाब लाल,
सूँघत न चंपक चमेली चारु तोरी हैं ।
जिनकी तू पासवानि बूझियत, आसपास,
ठाढ़ीं 'केसोदास' कीनी भय भ्रम भोरी हैं ।
तेरी कौनो कृति किधौ सहज सुवास ही तें,
बसि गई हरि चित क्यों हैं चोराचोरी हैं ।
सुनहि अचेत आई इहि हेत, नाहींतर,
तो सो ग्वारि गोकुल गुबरिहारी थोरी हैं ॥२४॥
जानिजै न जाकी माया मोहति मिलेहीं माँझ,
एक हाथ पुण्य एक पाप को निवारियै ।
परदारप्रिय मत्त मातँग सुताभिगाभी,
निसिचर को सो मुख देख्यो देह कारियै ।
आजु लौं अजादि राखे बरद बिनोद भावै,
एते पै अनाथ अति 'केसव' निहारियै ।
राजन के राजा छाँड़ि कीजतु तिलक ताहि,
भीषम सों कहा कहीं पुरुष न नारियै ॥२५॥

अथ अमित-लक्षण—(दोहा)

जहाँ साधनै भोगवै, साधक की सुभ सिद्धि ।
अमित नाम तासों कहत, जाकी अमित प्रसिद्धि ॥२६॥

(सबैया)

आनन सीकर सीक कहा हिय तो हित तें अति आतुर आई ।
फीको भयो सुख ही मुखराग क्यों तेरे पिया बहु बार बकाई ।
प्रीतम को पटु क्यों पलट्यो अलि केवल तेरी प्रतीति कौं लाई ।
'केसव' नीकेहि प्रीतम सों रमी, नायिका बातन ही बहराई ॥२७॥
को गनै कर्न जगन्मनि से नृप साथ सबै दल राजन ही को ।
जानै को खान किते सुलतान सु आयो सहाबुदी साह दिली को ।

[२३] तनु-उर (याज्ञिक० हरि०, सरदार, दीन०) । ताको-बाकी (याज्ञिक०) ।

कथ-हाथ (याज्ञिक०); अब (सरदार०); साथ (हरि०, दीन०) । प्रवाहि-
प्रतीत (याज्ञिक०) । गेहु-देहु (याज्ञिक०) । [२४] पासवानि-टहलनो
(याज्ञिक०) [२५] आजादि-आजानि (बाल०) । राखे-रिषि (याज्ञिक०) ।

[२७] सुख-मुख (बाल०) । प्रीतम-नायक (याज्ञिक०, हरि०, सरदार, दीन०) ।

ओरछे आनि जुर्यो कहि 'केसव' साह मधूकर सों सक जी को ।
दौरि कै दूलहराम सु जीति कर्यो अपने सिर कीरति-टीको ॥२८॥

अथ पर्यायोक्ति-लक्षण—(दोहा)

कौनहु एक अदृष्ट तँ, अनही किये जु होइ ।
सिद्धि आपने इष्ट की पर्यायोक्ति सोइ ॥२९॥

(कवित्त)

खेलति ही सतरंज अलीनि सों तहाँ हरि
आए आपु ही तें किधौं काहू के बुलाए री ।
लागे मिलि खेलन मिलै कै मनु हरें हरें
देन लागे दाउ आपु आपु मन भाए री ।
उठि उठि गई ति मिस ही मिस जित तित,
'केसोराइ' की सौं दोऊ रहे छबि छाए री ।
चौकि चौकि चहुँ दिसि तिहि छिन राधाजू के,
जलज से लोचन जलद से हवै आए री ॥३०॥

अथ युक्तालंकार-लक्षण—(दोहा)

जैसो जाको बुद्धि-बल, कहिजै तैसो रूप ।
तासों कबिकुल कहत हैं जुक्त बरनि बहुरूप ॥३१॥

(कवित्त)

मदन बदन लेत लाज को सदन देखि,
जदपि जगत जीव मोहिबे को है छमी ।
कोटि कोटि चंद्रमा संवारि वारि वारि डारौं
जाके काज ब्रजराज आज हू लौ संजमी ।
'केसोदास' सबिलास तेरे मुख की सुबास,
सुनिजत सही सार आरसनि लै रमी ।
मित्रदेव, छिति दुर्ग, दंड दल, कोस, कुल,
बल जाकें ताकें कहौ कौन बात की कमी ॥३२॥

इति श्रीमद्विधिभूषणभूषितायां कविप्रियायां विशिष्टालंकार-

वर्णने उक्तियुक्तालंकारवर्णनं नाम द्वादशः प्रभावः ॥३२॥

[३०] चौकि चौकि-चौकि चित (याज्ञिक०) ।

[३१] तासों कबि०-तासों कबिकुल जुक्ति कहि बरनत अधिक अतृप (याज्ञिक०);
युक्त यह बहुत सरूप (हरि०, सरदार०, दीन०) ।

[३२] सुनिजत०-सुनियत आरस ही सारसनि (हरि०, सरदार०, दीन०) ।

१३

अथ समाहितालंकार-वर्णन—(दोहा)

होइ न क्योंहू, होतु जहँ दैवजोग तें काज ।
ताहि समाहित नाम यह, बरनत कबिसिरताज ॥१॥

(कवित्त)

छवि सों छबीली वृषभानु की कुमारि आजु,
रही हुती रूपमद मानमद छकि कै ।
मार हू तें सुकुमार नंद के कुमार ताहि,
आए री मनावन सयान सब तकि कै ।
हँसि हँसि, सौँहें करि करि पाइ परि परि,
'केसोराइ' की सों जब रहे जिय जकि कै ।
ताही समै उठे घन घोर घोरि, दामिनी सी,
लागी लौटि स्याम घन उर सों लपकि कै ॥२॥

(सर्वया)

सातहु दीपनि के अवनीपति हारि रहे जिय मैं जब जाने ।
बीस बिसे व्रतभंग भयो सु कहौ अब 'केसव' को धनु ताने ।
सोक की आगि लगी परिपूरन आइ गए घनस्याम बिहाने ।
जानकी के जनकादिक के सब फूलि उठे तरु-पुन्य पुराने ॥३॥

अथ सुसिद्धालंकार—(दोहा)

साधि साधि औरै मरें, औरै भोगैं सिद्धि ।
तासों कहत सुसिद्ध सब जिनके बुद्धि-समृद्धि ॥४॥

(सर्वया)

मूलन सों फलफूल सबै दल जैसी कछू रसरति चली जू ।
भाजन भोजन भूषन भामिनि भौन भरो भव भाँति भली जू ।
डासन आसन बास सुबासन बाहन जान बिमान थली जू ।
'केसव' जैसे महाजन लोग मरें सँचि भोगत भोग बली जू ॥५॥

[१] जहँ-अब (बाल०) । यह-कहि (दीन०) ।

[२] तकि-नकि (बाल०) । जब-दाऊ (बाल०) ।

[३] परिपूरन-पुर पूरन (बाल०); पुनि पूरन (याज्ञिक०) ।

[४] भोगैं-भोगवै (बाल०, याज्ञिक०) । जिनके-जाकी अमित प्रसिद्धि (बाल०) ।

[५] जैसे-कै कै (बाल०) । सँचि०-भव भोगवै लै लै (बाल०) ।

(छप्पय)

सरधा संचि संचि मरहि, सहर मधुपान करत मुख ।
 खनि खनि मरत गँवार कूप, जल पियत पथिक मुख ।
 वागवान बहि मरत फूल बाँधत उदार नर ।
 पचि पचि मरत सुबार, भूप भोजननि करत वर ।
 भूषन सुनार गढ़ि गढ़ि मरत भामिनि भूषित करति तन ।
 कहि 'केसव' लेखक लिखि मरहि पंडित पढ़ें पुरानगन ॥६॥

अथ प्रसिद्धालंकार—(दोहा)

साधन साधै एक भव भोगें सिद्धि अनेक ।
 तासो कहत प्रसिद्ध सब 'केसव' सहित बिबेक ॥७॥

(सवैया)

मात के मोह पिता परितोषनि केवल राम भरे रिस भारे ।
 औगुन एक ही अर्जुन को छितिमंडल के सब छत्रिय मारे ।
 देवपुरी कहँ औधपुरी जन 'केसवदास' बड़े अह वारे ।
 सूकर कूकर स्यों हरिचंद के सत्य समेत सदेह सिधारे ॥८॥

अथ विपरीतालंकार—(दोहा)

कारज साधक को जहाँ, साधन बाधक होइ ।
 तासों सब विपरीत कहि, कहत सयाने लोइ ॥९॥

(कवित्त)

नाह तें नाहर, त्रिय जेवरी तें साँप करि,
 घालें घर, बीथिका बसावति बननि की ।
 सिवहि सिवा हू भेद पारति जिनकी माया,
 माया हू न जानै छाया छलित तननि की ।
 राधाजू सों कहा कहीं ऐसिन की सुन सीख,
 साँपनि सहित विषरहित फननि की ।
 क्यों न परै बीच बीच आँगिहू न सहि सकैं,
 बीच परी अंगना अनेक आँगननि की ॥१०॥
 साथ न सयानो कोऊ हाथ न हथ्यार, रघु-
 नाथजू के जज्ञ को तुरंग गहि राख्योई ।
 काछन कछोटी सिर छोटी छोटी काकपक्ष,
 सातहीं बरस किनि जुद्ध अभिलाख्योई ।
 नील नल अंगद सहित जामवत हनु-
 मंत से अनंत जिन नीरनिधि नाख्योई ।

‘केसोदास’ देस-देस कुलनि त्यों रघुकुल,
कुसलव जीति तें बिजय-रस चाख्योई ॥११॥

अथ रूपकालंकार—(दोहा)

उपमा ही के रूप सों, मिल्यो बरनियै रूप ।
ताही सों सब कहत हैं, ‘केसव’ रूपक-रूप ॥१२॥
बदन चंद्र, लोचन कमल, बाहु बीसनी जानि ।
कर पल्लव अरु झूलता, बिबाधरनि बखानि ॥१३॥
ताके भेद अनेक में, तीन्यै कहे सुभाउ ।
अद्भुत एक बिरुद्ध पुनि, रूपक रूपक नाँउ ॥१४॥

अथ अद्भुत रूपक—(दोहा)

सदा एकरस बरनियै, और न जाहि समान ।
अद्भुत रूपक कहत हैं, तासों बुद्धिनिधान ॥१५॥

(कवित्त)

सोभा सरवर माहि फूल्यो ई रहत सखि,
राजें राजहंसिनी समीप सुखदानियै ।
‘केसोदास’ आसपास सौरभ के लोभ धने,
घ्राननि के देव भौर भ्रमत बखानियै ।
होति जोति दिन दूनी निसि में सहसगुनी
सूरज सुहृद चारु चंद्र मन मानियै ।
रति को सदन छूई सके न मदन ऐसो;
कमलबदन जग जानकी को जानियै ॥१६॥

अथ बिरुद्ध रूपक—(दोहा)

जहँ कहियै अनमिल कछु, सुमिल सकल विधि अर्थ ।
सो बिरुद्ध रूपक कहें, ‘वेसव’ बुद्धिसमर्थ ॥१७॥

(सवैया)

सोने की एक लता तुलसी बन क्यों बरनौं सुनि बुद्धि सकै छवै ।
‘केसवदास’ मनोज मनोहर ताहि फले फल श्रीफल से द्वै ।
फूलि सरोज रह्यो तिन ऊपर रूप निरूपत चित्त चलै चवै ।
तापर एक सुवा सुभ तापर खेलत बालक खंजन के स्वै ॥१८॥

[११] पाँच ही-सातही (दीन०) । नीरनिधि-बारिनिधि (बाल०) । दीप०-दीप भूपति (दीन०) ।

[१३] बीसनी-मृणालहि (याज्ञिक०); पास ज्यों (हरि०, सरदार, दीन०) ।

[१८] तै-बै (दीन०) • चवै (हरि०) • चवै (सरदार) • तै-तै (दीन०) •

अथ रूपक रूपक—(दोहा)

रूप भाव जहँ बरनियै कौनिहु बुद्धि बिबेक ।
रूपक रूपक कहत कवि 'केसवदास' अनेक ॥१६॥

(सबैया)

काछि सितासित काछनी 'केसव' पातुरि ज्यों पुतरीनि बिचारो ।
कोटि कटाक्ष चलै गति भेद नचावत नानक नेह निनारो ।
बाजतु है मृदु हास मृदंग, सुदीपति दीपन को उजियारो ।
देखो नहीं हरि देखि तुम्हैं यहि होत है आंखिन ही में अखारो ॥२०॥

अथ दीपकालंकार—(दोहा)

वाच्य क्रिया गुन द्रव्य बहु, बरनहि करि इक ठौर ।
दीपक दीपति कहत हैं, 'केसव' कबिसिरमौर ॥२१॥
दीपक रूप अनेक हैं, मैं बरने द्वे रूप ।
मनि माला तिनसों कहैं 'केसव' कवि कबिभूष ॥२२॥
बरषा, सरद बसंत, ससि, सुभता, सोभ, सुगंधु ।
प्रेम, पवन, भूषन, भवन, दीपक दीपक-बंधु ॥२३॥

अथ मणिदीपक—(दोहा)

इनमें एक जु बरनियै, कौनहु बुद्धिबिलास ।
तासों मनिदीपक सदा, बरनत 'केसवदास' ॥२४॥

(कवित्त)

प्रथम हरिननैनी हेरि हेरि हरि की सौं,
हरषि हरषि तम तेजहि हरतु है ।
'केसोदास' आसपास परम प्रकास सों,
बिलासनि बिलास कछु कहि न परतु है ।
भांति भांति भामिनी भवन कह भूषै भव,
सुभग सुभाइ सुभ सोभ को धरतु है ।
मानिनी समेत मान मानिनीनि बस करि,
मेरो मन तेरो दीप दीपति करतु है ॥२५॥
दक्षिण पवन दक्षि जक्षिनी रमन लगि,
लोलन करत लौंग लवली लता को फर ।
'केसोदास' केसर कुसुम कोस-रसकन,
तनु तनु तिनहू को सहि न सकत भर ।

[१७] सो-तेहि (दीन०) । [१९] केसवदास-जिनकै बुद्धि अनेक । (याज्ञिक०) ।
[२०] देखो नहीं-देखति हो (याज्ञिक०, हरि०, सरदार० (दीन०) । [२१] यह दोहा बाल० में नहीं है । [२४] तासों-सो मन दीपक जानियो नीकै केसवदास (याज्ञिक०) ।

क्यों हैं कहूँ होत हठि साहस बिलास बस,
 चंपक चमेली मिलि मालती सुवास हर ।
 सीतल सुगंध मंद गति नँदनंद की सौं,
 पावत कहाँ तें तेज तोरिवे कौं मानतर ॥२६॥

अथ मालादीपक—(दोहा)

सबै मिलै जहँ बरनियै, देस काल बुधिवंत ।
 मालादीपक कहत हैं, ताके भेद अनंत ॥२७॥

(सबैया)

दीपक-देह दसा सों मिलै सु दसा मिलि तेजहि जोति जगावै ।
 जागि कै जोति सबै समुझै तम सोधि सु तौ सुभता दरसावै ।
 सो सुभता रचै रूप को रूपक रूप सु कामकला उपजावै ।
 काम सु 'केसव' प्रेम बढ़ावत प्रेम लै प्रानप्रियाहि मिलावै ॥२८॥

(कवित्त)

घननि की घोर सुनि, मोरन को सोर सुनि,
 सुनि सुनि 'केसव' अलाप अलीजन को ।
 दामिनी दमक देखि, दीप की दिपति पेखि,
 देखि सुभ सेज, देखि सदन सुमन को ।
 कुंकुम की बास, घनसार की सुवास भए
 फूलनि की बास मन फूलि कै मिलन को ।
 हँसि हँसि मिले दोऊ, अनही मनाएँ, मान
 छूटि गो एक ही बार राधिका रवन को ॥२९॥

अथ प्रहेलिका अलंकार—(दोहा)

बरनिय बस्तु दुराइ जहँ, कौनहुँ एक प्रकार ।
 तासों कहत प्रहेलिका, कबिकुल बुद्धि उदार ॥३०॥
 सोभित सत्ताईस सिर, उनसठि लोचन लेखि ।
 छप्पन पद जानहु तहाँ, बीस बाहु बर देखि ॥३१॥

सूर्यमंडल जानिबो ।

चरन अठारह बाहु दस, लोचन सत्ताईस ।
 मारत हैं प्रतिपाल करि, सोभित ग्यारह तीस ॥३२॥

हरिहरात्मक सरीर जानिबो ।

नौ पसु, नव ही देवता, द्वै पक्षी जिहि गेह ।
 'केसव' सोई राखिहै, इंद्रजीत की देह ॥३३॥

सूर्यमंडल जानिबो ।

देखै सुनै न खाइ कछु, पाइ न, जुवती जाति ।
 'केसव' चलन न हारई' बासर ननै न राति ॥३४॥

‘केसव’ ताके नाम के आखर कहिजै दोइ ।
सुधे भूषन मित्र के उलटे दूषन होइ ॥३५॥
राज जानबी ।

जाति लता दुइ आखरनि, नाउ कहै सब कोइ ।
सूधे सुखमुख बरनियै, उलटे अंबर होइ ॥३६॥
दाख जानबी ।

सब सुख चाहौ भोगवै, जौ पिय एकहि बार ।
चंद गहै जहँ राहु कों, जैयो तिहि दरबार ॥३७॥
बीरबर को दरबार जानबी ।

ऐसी मूरि दिखाउ सखि, जिय जानत सब कोइ ।
पोठि लगावत जासु रस छाती सीरी होइ ॥३८॥
पुत्र जानबी ।

इत्यादिक बहिरांपिका जानबी ।

अथ परिवृत्तालंकार—(दोहा)

और कछु कीजै जहाँ उपजि परै कछु और ।
तासों परिवृत कहत हैं, ‘केसव’ कबिसिरमौर ॥३९॥
(सवैया)

हँसि बोलत ही जु हँसैं सब ‘केसव’ लाज भगावत लोक भगै ।
कछु बात चलावत घैरु चलै, मन आनत ही मनमथ्य जगै ।
सखि तू जु कहै सुहुती मन मेरेही जानि यहै न हियो उमगै ।
हरि त्यों नक डीठि पसारत ही अँगुरीन पसारन लोग लगै ॥४०॥
हाथ गह्यौ ब्रजनाथ सुभाव ही छूटि गई धर धीरजताई ।
पान भखें मुख नैन रची रुचि, आरसी देखि कहौ यह ठाई ।
दै परिरंभन मोहन को मन मोहि लियो सजनी सुखदाई ।
लाल गुपाल कपोल नखक्षत तेरे दिये तें महा छबि पाई ॥४१॥
जीउ दयो निज जन्म दयो जग, जाही की जोति बड़ी जग जानै ।
ताही सों बैर मनो बच काइ करै कृत ‘केसव’ को उर आनै ।
मूषक तें रिषि सिघ कह्यो रिषि ही कह मूरख रोष बितानै ।
ऐसो कछु यह काल है जाको भलो करियै सो बुरो करि मानै ॥४२॥

इति श्रीमद्विषयभूषणभूषितायां कविप्रियायां विविष्टालंकारे

समाहितालंकारवर्णनं नाम त्रयोदशः प्रभावः ॥१३॥

[३६] दुई०-दूषन रहित (याज्ञिक अ०) । बरनियै-भक्षिये (दीन०) । [३८] यह दोहा केवल हरि०, सरदार०, दीन०, में ही है, प्राचीन हस्तलेखों में नहीं । [४०] नक-नैक (बाल०, याज्ञिक); टुक (दीन०); निकु (सरदार०) । [४१] नखक्षत-रदच्छत (दीन०) । पाई-छाई (वही) । [४२] कह-सह (याज्ञिक०) ।

५४

अथ उपमालंकार—(दोहा)

रूप सील गुन होहि सम, जौ क्यों हैं अनुसार ।
 तासों उपमा कहत कबि, 'केसव' बहुत प्रकार ॥१॥
 संसय, हेतु, अभूत अरु, अदभुत, बिक्रिय जानि ।
 दूषन, भूषन, मोह मय, नियम, गुनाधिक आनि ॥२॥
 अतिसय, उत्प्रेक्षित कहौं, स्लेष, धर्म, बिपरीत ।
 निर्नय, लाक्षनिकोपमा, असंभाविता मीत ॥३॥
 बुधि बिरोध, माला कहत, और परस्पर ईस ।
 उपमा भेद अनेक हैं में बरने इकबीस ॥४॥

अथ संशयोपमा—(दोहा)

जहाँ नहीं निरधार कछु सब संदेह सरूप ।
 यह संसय उपमा सदा, बरनत हैं कबिभूप ॥५॥

(सबैया)

खंजन हैं मनरंजन 'केसव' रंजन नैन किधौं, मति जी की ।
 मीठी सुधा कि सुधाधर की दुति दंतन की किधौं दाढ़िम ही की ।
 चंद भलो मुखचंद किधौं सखि सूरति काम कि कान्ह की नीकी ।
 कोमल पंकज कै पदपंकज, प्रानपियारे कि मूरति पी की ॥६॥

अथ हेतुपमा—(दोहा)

होत कौनहू हेत तें, अति उत्तम से हीन ।
 ताही सों हेतोपमा, 'केसव' कहत प्रवीन ॥७॥

(कबित्त)

अमल कमल-कुल कलित ललित गति,
 बेल सों बलित मधु माधवी को पानियै ।
 मृगमद मरदि कपूर धूरि चूरि पग,
 केसरि को 'केसव' बिलास पहिचानियै ।
 झेलि कै चमेली करि चंपक सों केलि, सेइ
 सेवती समेत हेतु केतकी सों जानियै ।
 हिलि मिलि मालती सों आवति समीर जब
 तब तेरे सुखमुख बास सो बखानियै ॥८॥

[२] बिक्रिय-चित्रित (बाल०) । [४] माला०-मालोपमा (हरि०, सरदार०, दीन०) । [५] यह-सो (दीन०) । [६] किधौं सखि०-सखी सुरनि सूति (बाल०) । सूरति-मूरति (याज्ञिक०) । [८] गति-बाग (बाल०) । पानियै-मानियै (बाल०) ।

अभूतोपमा—(दोहा)

उपमा जाइ कही नहीं, जाको रूप निहारि ।
सो अभूत उपमा कही, 'केसवदास' बिचारि ॥६॥

(कवित्त)

दुरिहै क्यों भूषन बलन दुति जोवन की,
देह ही की जोति होति घौस ऐसी राति है ।
नाह की सुवास लागें हबैहै कैसी 'केसव'
सुभाव ही की बास भौर-भीर फारें खाति है ।
देखि तेरी मूरति की सूरति बिसूरति हौं,
लालन कों दृग देखिबे कों ललचाति है ।
चलिहै क्यों चंद्रमुखी कुचनि के भार भएँ,
कचन के भार तें लचकि लंक जाति है ॥१०॥

(सवैया)

भाल गुही गुन लाल लटें लपटीं लर मोतिन की सुखदेनी ।
ताहि बिलोकति आरसी लै कर आरस सों इक सारसननी ।
'केसव' स्याम दुरें दरसी परसी उपमा मति सों अति पैनी ।
सूरजमंडल में ससिमंडल मंडि धरी जनु जाइ त्रिबेनी ॥११॥

अदभुतोपमा—(दोहा)

जैसी भई न होति अब, आगे कहै न कोइ ।
'केसव' ऐसी बरनियै, अदभुत उपमा सोइ ॥१२॥

(सवैया)

प्रीतम को अपमानिन माननि, गान सयानिन रीझि रिझावै ।
बंक बिलोकनि बोल अमोलनि बोलि कै 'केसव' मोद बढ़ावै ।
हाव हू भाव बिभाव प्रभाव सुभाव के भाइनि चित्र चुरावै ।
ऐसे बिलास जु होहि सरोज में तौ उपमा मुख तेरे की पावै ॥१३॥

अथ विक्रियोपमा—(दोहा)

क्योंहूँ क्योंहूँ बरनियै, कौनहुँ एक उपाइ ।
बिक्रिय उपमा होति तहँ, बरनि कहत कबिसाइ ॥१४॥

(कवित्त)

'केसोदास' कुंदन के कोस तैं प्रकासमान,
चिंतामनि ओपनी सों ओपिकै उतारी सी ।

[१०] लंक-कटि (बाल०) । [११] आरस०-आरस में इक (याज्ञिक०) । मंडि०-मध्य घसी (याज्ञिक अ०) । [१२] कहै-लहै (दीन०) । [१३] प्रभाव०-प्रभाव के भाव के भेदनि (याज्ञिक अ०) । [१४] कौनहुँ-कहै न (दीन०) । उपाइ-प्रकार (वही) । बरनि०-'केसव' बुद्धि उदार (वही) ।

इंदु के उदोत तें उकीरी ऐसी काढ़ी, सब
 सारस सरस, सोभासार तें निकारी सी ।
 सोंधे की सी सोंधी, देह सुधा सों सुधारी, पावँ
 धारी देवलोक तें कि सिंधु तें उधारी सी ।
 आजु यासों हँसि खेलि बोलि चालि लेहु लाल,
 काल्हि एक बाल ल्याऊँ काम की कुमारी सी ॥१५॥

अथ दूषणोपमा—(दोहा)

जहँ दूषनगन बरनियै, भूषन-भाव दुराइ ।
 दूषन उपमा होति तहँ, बुधजन कहत बनाइ ॥१६॥

(सबंया)

जौ कहौ 'केसव' सोम सरोज सुधासुर भृंगनि देह दहे हैं ।
 दाढ़िम के फल श्रीफल बिद्रुम हाटक कोटिक कण्ट सहे हैं ।
 कोक, कपोत, करी, अहि, केहरि, कोकिल, कीर कुचील कहे हैं ।
 अंग अनूपम वा प्रिय के उनकी उपमा कहँ वेई रहे हैं ॥१७॥

अथ भूषणोपमा—(दोहा)

दूषन दूर दुराइ जहँ, बरनत भूषन-भाइ ।
 भूषन उपमा होति तहँ, बरनत सब सुख पाइ ॥१८॥

(कवित्त)

सुबरनजुत, सुरबलित बरनि पुनि,
 भैरो सो मिलित गति ललित बितानी है ।
 पावन प्रगट दुति दुजन की देखिजत,
 दीपति दिपति अति श्रुति सुखदानी है ।
 सोभा सुभ सानी परमारथ-निधानी दीह
 कलुष कृपानी मानी सब जग जानी है ।
 पूरब के पूरे पुन्य सुनिजै प्रबीनराइ,
 तेरो बानी मेरी रानी गंगा को सो पानी है ॥१९॥

अथ मोहोपमा—(दोहा)

रूपक के अनुरूप कौं कौनहि बस मन जाइ ।
 ताहीं सों मोहोपमा कहत सकल कबिराइ ॥२०॥

(कवित्त)

खेलत न खेल कछु हाँसी न हँसत हरि,
 सुनत न गान कान तान बान सी बहै ।

[१८] बरतन०-‘केसव’ सुखद सुभाई (याज्ञिक अ०); सब कबिराय (दीन०) ।
 [१९] सुरबलित-सुख सुरनि (याज्ञिक०) । [२०] कौनहि०-जानि कतहँ (दीन०) ।

ओढ़त न अंबरन डोलत दिगंबर सो,
 संबर ज्यों संबरारि दुख देह को दहै ।
 भूलिहू न सँघै फूल, फूलि फल कुंभिलात,
 जात, खात बीरा हू न बात काहू सों कहै ।
 जानि जानि चंद-मुख 'केसव' चकोर सम,
 चंदमुखी चंद ही के बिब ल्यों चितै रहै ॥२१॥

नियमोपमा—(दोहा)

एकै सुभ जहँ बरनियै, मन क्रम बचन बिसेष ।
 'केसवदास' प्रकास बस, नियमोपमा सु लेख ॥२२॥
 (कवित्त)

कलित कलंककेतु केतु अरि सेत गात,
 भोग जोग को अजोग रोग ही को थल सो ।
 पुन्यो ही को पूरन पै प्रतिदिन ऊनो ऊनो
 छिन छिन छीन छबि छीलर के जल सो ।
 चंद सो जु वरनत रामचंद की दुहाई,
 सोई मतिमंद कवि 'केसव' कुसल सो ।
 सुंदर सुवास अरु कोमल अमल अति,
 सीताजू को मुख सखि केवल कमल सो ॥२३॥

अथ गुणाधिकोपमा—(दोहा)

अधिकन हू तैं अधिक गुन, जहाँ बरनियत होइ ।
 तासों गुन अधिकोपमा, कहत सयाने लोइ ॥२४॥
 (कवित्त)

वे तुरंग सेत रंग संत एक ये अनेक,
 हैं सुरंग अंग अंग पै कुरंगम से ।
 ये निसंक अंक जज्ञ वे ससंक 'केसोदास',
 ये कलंक रंक वे कलंक ही कलीत से ।
 वे पियें सुधाहि, ये सुधानिधीस के रसै जु,
 साँचहू सुनीत ये, पुनीत वे पुनीत से ।
 देहि ये दिये बिना, बिना दिये न देहि वे,
 भए न, हैं न, होहि गे न, इंद्र इंद्रजीत से ॥२५॥

[२१] सुनत०-सुनत न कान तान बान गंग सी बहै (बाल०) । जानि०-देखि-देखि (बाल०) । [२२] सुभ-सम (हरि०, सरदार०, दीन०); सों (याज्ञिक अ०) । प्रति-आन (अन्यत्र) । [२३] कुसल-मुसल (दीन०) । [२४] होइ-कोइ (दीन०) । [२५] सनीत०-पनीत ये सनीत (दीन०) ।

अथ अतिशयोपमा—(दोहा)

एक कछू एकहि बिषे, सदा होइ रस एक ।
अतिसय उपमा होति तहँ, बरनत सहित बिबेक ॥२६॥

(कवित्त)

‘केसोदास’ प्रगट प्रकास सों अकास पुनि,
ईस हू के सीस रजनीस अवरेखियै ।
थल थल जल जल अचल अमल अति,
कोमल कमल बहु बरन बिसेखियै ।
मुकुर कठोर बहु नाहिनै अचल जस
बसुधा सुधा हू तिय अधरन लेखियै ।
एकरस एकरूप जाकी गीता सीता सुनि,
तेरो सो बदन तैसो तोही बिष देखियै ॥२७॥

अथ उत्प्रेक्षितोमा—(दोहा)

‘केसव’ दीपति एक ही, होइ अनेकन माह ।
उत्प्रेक्षित उपमा सोई, कहैं कविन के नाह ॥२८॥

(कवित्त)

न्यारो ही गुमान मन मोननि के मानिजत,
जानिजत सब ही सु कैसे न जनाइयै ।
पंचवान बाननि के आन आन भाँति गर्ब,
बाढ़यो परिमान बिनु कैसे वै बताइयै ।
‘केसोदास’ सबिलास गीत रंग रंगनि
कुरंग अंगनानि हूक आँगननि गाइयै ।
सीता जू की नयन-निकाई इन ही पै है सु,
झूठे हैं नलिन खंजरीट हू में पाइयै ॥२९॥

अथ श्लेषोपमा—(दोहा)

जहाँ सरूप प्रयोगिजै सब्द एक ही अर्थ ।
‘केसव’ तासों कहत है, श्लेषोपमा समर्थ ॥३०॥

(कवित्त)

सगुन, सरस, सब अंग राग रजित है,
सुनुहु सुभाग बड़े भाग बाग पाइयै ।

[२६] बरनत०-कहत सुबुद्धि अनेक (दीन०) । [२७] प्रकास०-अकास में प्रकासमान (दीन०) । अचल-अचला (बाल०) । सीता०-सुनियत (दीन०) । तँसो-सीता (बाल०) । [२८] कहैं-बरनि कहत कबिनाह (बाल०) । [२९] जनाइयै-मनाइयै (बाल०) । इन ही पै-हेम ही में (याज्ञिक०) । हम ही में (याज्ञिक अ०, हरि०, सरदार०, दीन०) ।

सुंदर सुवास तन कोमल अमल मन,
 षोडस बरस मय हरष बढ़ाइये ।
 बलित ललित बास 'केसोदास' सबिलास,
 सुंदरी सिंगारि लाई गहर न लाइये ।
 चातुरी की साला माँझ आतुर हवै नंदलाल
 चंपे की सी माला बाला उर उरमाइये ॥३१॥

अथ धर्मोपमा—(दोहा)

एक धर्म को एकु अंगु, जहाँ जानिजतु होइ ।
 ताही सों धर्मोपमा, कहत सयाने लोइ ॥३२॥

(कवित्त)

ऊजरे उदार उर बासुकी बिराजमान,
 हार के समान आन उपमा न टोहियै ।
 सोभिजै जटान बीच गंगाजू के जलबिंदु,
 कुंद-कलिका से 'केसोदास' मन मोहियै ।
 नख कैसी रेखा चंद चंदन सी चारु रज,
 अंजन सिंगार हू गरल रुचि रोहियै ।
 सब सुख सिद्धि सिवा सोहै सिव-बाम-अंक,
 जावक सो पावक लिलार लाग्यो सोहियै ॥३३॥

अथ विपरीतोपमा—(दोहा)

पूरब पूरे गुननि के, तेई कहिजै हीन ।
 तासौं विपरीतोपमा, 'केसव' कहत प्रवीन ॥३४॥

(सवैया)

भूषित देह बिभूति दिगंबर नाहिन अंबर अंग नबीने ।
 दूरि कै सुंदर सुंदरी 'केसव' दौरि दरीनि में मंदिर कीने ।
 देखि बिमंडित दंडन सों भुजदंड दोऊ असिदंड-बिहीने ।
 राजनि श्रीरघुनाथ के राज कुमंडल छाँड़ि कमंडल लीने ॥३५॥

अथ निर्णयोपमा—(दोहा)

उपमा अरु उपमेय को, जहँ गुन-दोष-बिचार ।
 निर्णय उपमा होति तहँ, सब उपमानि को सार ॥३६॥

[३१] बाग-आइ (बाल०); गहि (याज्ञिक०) । सिंगार-सँवारि (दीन०) । माँझ-मानि (वही) । [३३] बाम-अंक-जू के साथ (याज्ञिक अ०, दीन०) । [३४] गुनिन-पुन्य (दीन०) । [३५] मंदिर-आसन (दीन०) । देखि-देखिये (वही) ।

(कवित्त)

एक कहैं अमल कमल मुख सीताजू को,
 एक कहैं चंदमय आनंद को कंद री ।
 होइ जौ कमल तौ वै रैन में न सकुचै री,
 चंद जौ तौ बासर न होइ दुतिमंद री ।
 बासर ही कमल रजनि ही में चंद, मुख
 बासरहू रजनि बिराजै जगबंद री ।
 देखें मुख भावत न देख्योई कमल चंद,
 तातैं मुख मुखैं सखि कमलौ न चंद री ॥३७॥

अथ लाक्षणिकोपमा—(दोहा)

लक्षन लक्षि जु बरनियै, बुधिबल बचन-बिलास ।
 तासों लाक्षणिकोपमा, कहियत 'केसवदास' ॥३८॥

(कवित्त)

वासों मृग-अंक कहैं तोसों मृगनैनी सबै,
 वह सुधाधर तुही सुधाधर मानियै !
 वह दुजराज राजै तेरे दुजराजी वह
 कलानिधि तुही कलाकलित बखानियै ।
 रतनाकर के दोऊ 'केसव' बिलासकर,
 अंबर प्रकास कुबलय-हित गानियै ।
 वाके अति सीतकर तुही सीता सीतकर,
 चंद्रमा सी चंद्रमुखी सब जग जानियै ॥३९॥

अथ असंभावितोपमा—(दोहा)

जैसे भाव न संभवत तैसे करत प्रकास ।
 होत असंभावित तहाँ उपमा 'केसवदास' ॥४०॥

(कवित्त)

जैसे अति सीतल सुबास मलयज माहि,
 अमल अनल बुद्धिबल पहिचानियै ।
 जैसे कौनो कालबस कोमल कमल कोस,
 'केसोदास' केसोराइ कंटक से जानियै ।
 जैसे बिधु सधर मधुर मधुमय सोहै,
 मोहरुख बिष बिषमुखहि बखानियै ।

[३७] मय-सम (दीन०); माई (सरदार०) । [३८] बचन०-केसवदास (बाल०) । तासों०-लाक्षणिकोपमा सु यह बहुधा बचन-बिलास (बाल०) । [३९] बिलास-प्रकास (दीन०); बिसाल (अन्यत्र) । प्रकास-बिलास (दीन०) ।

सुंदरि सुलोचनि सुबचनि सुदंति तैसे,
तेरे मुख आखर परुषरुख मानिये ॥४१॥

अथ विरोधोपमा—(दोहा)

जहँ उपमा उपमेय सों, आपुस माहि बिरोध ।
सो बिरोध उपमा कहत, 'केसव' जिनिहि प्रबोध ॥४२॥
(कबित्त)

कोमल कमल कर कमला के भूषननि,
'केसोदास' दूषन सरद ससि पाई है ।
ससि अति अमल अमृतमय मनिमय,
सीता को बदन देखि ताकों मलिनाई है ।
सीता को बदन सब सुख को सदन जाहि,
मोहत मदन दुख-कदन निकाई है ।
आधो पल माधोजू के देखे बिनु सोई ससि,
सीता के बदन कहँ होत दुखदाई है ॥४३॥
अथ मालोपमा—(दोहा)

जो जो उपमा दीजियै, सो सो पुनि उपमेय ।
सो कहियै मालोपमा 'केसव' कबिकुल-गेय ॥४४॥
(कबित्त)

मदनमोहन कहौ रूप को रूपक कैसो,
मदन-बदन ऐसो जाहि जग मोहियै ।
मदन-बदन कैसो, सोभा को सदन स्याम
जैसौ है कमल रुचि लोचननि पोहियै ।
कैसो है कमल जैसो आनंद को कंद सुभ,
कैसो है सुचंद जैसो उपमान टोहियै ।
कैसो है जु चंद वह 'केसव' कुवैर कान्ह,
सुनौ प्रान प्यारी जैसौ तेरी मुख सोहियै ॥४५॥

अथ परस्परुपमा—(दोहा)

जहाँ अभेद बखानिजै, उपमेयो उपमान ।
तासों परस्परुपमा, 'केसवदास' बखान ॥४६॥

[४१] कोस-महि (याज्ञिक०) । मधु०-मधुमय माहि (दीन०) । [४२] कहत०-सदा बरनत जिन्हें (दीन०) । [४३] पाई-ठायी (दीन०); गाई (सरदार०) । [४४] यह दोहा बाल०, सरदार०, में नहीं है । कहीं-कहीं यह रूप मिलता है - 'केसव' जहाँ न प्रेम है उपजत भाव सरूप । ताही सों मालोपमा कहि बरनत कबिभूष ॥ [४५] पोहियै-जोहियै (दीन०) । [४६] उपमेयो०-उपमा अरु (बाल०); उपमेय रु (दीन०) ।

(कवित्त)

बारे न बड़े न बृद्ध नाहिनै गृहस्थ सिद्ध,
 बावरे न बुद्धिवंत, नारियौ न नर से ।
 अंगी न अनंगी तन ऊजरे न मैले मन,
 स्मार ऊ न सूर रन थावर न चर से ।
 दूबरे न मोटे रंक राज ऊ कहे न जाई,
 मर न अमर अरु आपने न पर से ।
 बेद हू न कछु भेद पाइजतु 'केसोदास'
 हरिजू से हेरे हर हरि हेरे हर से ॥४७॥

(दोहा)

कोकिल से अति कृष्ण घन करिनी सो गिरिराज ।
 मृग सूरौ मृगराज सो, ऐसो बरनत लाज ॥४८॥

अथ संकीर्णोपमा—(दोहा)

बंधु, चोर, बादी, सुहृद, कल्प, वृक्ष, प्रभु जानि ।
 सम, रिपु, सोदर आदिदै, इतने अर्थ बखानि ॥४९॥

(कवित्त)

विधु को सो बंधु किधौ चोर हासरस को कि,
 कुंदन को बादी किधौ मोतिन को मोत है ।
 कल्प कलहंस को कि चोरनिधि छवि वृक्ष,
 हिम-गिरि-प्रभा-प्रभु, प्रगट पुनीत है ।
 अमल अमित अंग गंगा के तरंग सम
 सुधा को सुबुद्धि रिपु रूपक अभीत है ।
 दिस दिस देस देस परम प्रकासमान
 किधौ 'केसोदास' रामचंद्रजू को गीत है ॥५०॥

इति श्रीमद्विषयभूषणभूषितायां कविप्रियायां
 विशिष्टालंकारवर्णने उपमालंकारवर्णनं
 नाम चतुशर्दशः प्रभावः ॥१४॥

[४९] वृक्ष-पृच्छ (दीन०); वृष्टु (बाल०) । [५०] तरंग०-तरंगन को (दीन०) ।
 सुधा०-सोदर सुधा को (दीन०); सुधा को समूह (सरदार०) । रूपक-रूपको (दीन०,
 सरदार०) ।

१५

अथ नखशिख-वर्णन—(दोहा)

सबिता के परताप ज्यों बरन्यो कबिता-अंग ।
 कहीं जथामति बरनि त्यो बनिता के प्रत्यंग ॥१॥
 कही जु पूरब पंडितनि जाकी जितनी जानि ।
 तितनी अब ता अंग की उपमा कहीं बखानि ॥२॥
 नख तें सिख लौं बरनियै देवी दीपति देखि ।
 सिख तें नख लौं मानुषी 'केसवदास' बिसेषि ॥३॥
 जग के देवी देव के श्रीहरिदेव बखानि ।
 तिन हरि कौं श्रीराधिका इष्टदेवता जानि ॥४॥
 भूषित तिनके भूषननि त्रिभुवनपति के अंग ।
 तिनके 'केसवदास' कबि बरनतु है प्रति अंग ॥५॥
 उपमा और समान सब इतनो भेदु बखानि ।
 जावकजुत पद बरनियै महँदीसंजुत पानि ॥६॥

अथ जावक-वर्णन—(दोहा)

राजु रजोगुन को प्रगट प्राची दिसि को भागु ।
 रंगभूमि जावकु बरनि कोपराग अनुराग ॥७॥

अथ जावक-वर्णन—(कवित्त)

कोमल अमलता की किधौं यह रंगभूमि
 सोभिजतु अंगुन कि सोभा के सदन को ।
 अरुन दलनि पर कीनी कि तरनि कोप,
 जीत्यो किधौं रजोगुनु राजिव के गन को ।
 पलु पलु प्रनय करत किधौं 'केसोदास'
 लागि रह्यो पूरबानुरागु रिय-मन को ।
 एरी वृषभानु की कुमारि तेरे पाई सोहै
 जावक को रंगु कै सुहागु सौतिजन को ॥८॥

अथ चरणोपमा—(दोहा)

अति कोमल पद बरनियै पल्लव कमल समान ।
 जलज कमल से चरन कहि कर कहि थलज प्रमान ॥९॥

अथ पदपंकज-वर्णन—(कवित्त)

गंगाजू के जल मध्य कंठ के प्रमान पैठि
 जपि जपि सूर-मंत्र आनंद बढ़ावहीं ।
 'केसोदास' घाम जल सीत सहि एकरस,
 एक पाई ठाढ़े कोटि कलप नसावहीं ।
 कोमल अमल भए सुंदर सुवास भए,
 कमल-निवास मनु जदपि भ्रमावहीं ।
 पायो परब्रह्मपद पदुमनि पदुमनि
 तेरे पद पदवी को पदु पै न पावहीं ॥१०॥

अथ अंगुली-वर्णन—(दोहा)

अंगुलीं चंपक की कलीं जीवनमूरि प्रमान ।
 तारा रबि ससि सुमम मन मनिगन किरनि समान ॥११॥
 बिछिया बाँक अनौट की नाहिन उपमा आन ।
 सोभा प्रभा तरंग गन हंस अंस तन त्रान ॥१२॥

(सवैया)

चंपकली-दल हू तें भली पद-अंगुली बाल की रूप रसे हैं ।
 सुभ्र सुदेस लस देख यों जनु प्रीतम के दृग देखि बसे हैं ।
 बाँक अनौट बने बिछियानि बिभूषित जोति जराइ ग्रसे हैं ।
 'केसव' सोम सरोजनि ऊपर कोपि मनौं तनत्रान कसे हैं ॥१३॥

अथ नूपुर-वर्णन—(दोहा)

नूपुर रक्षाजंत्र मन लोचन गुनगन हार ।
 जाचक जसपाठक मधुप जामिक बंदनमार ॥१४॥

(कवित्त)

गतिनि के हार की बिहार के पहरु-रूप
 किधौं प्रतिहार रतिपति के निलय के ।
 हंस गतिनाइक कि गूढ़ गुनगाइक कि
 भवन-सुहायक कि माइक हैं मय के ।
 'केसव' कमलमूल अलिकुल कुनित कि
 मनु प्रतिधुनित सुमनित निचय के ।
 हाटक घटित मनि स्यामल जटित पग,
 नूपुर जुगल किधौं बाजे हैं बिजय के ॥१५॥

[१०] पर-बह (बाल०) । [११] किरनि-नखन (याज्ञिक०) । [१३] देखि-
 देव (याज्ञिक०) । [१५] प्रतिधुनि०-किंकिनि प्रतिधुनित (बाल०, याज्ञिक०) ।

अथ जेहरी-वर्णन—(दोह)

जेहरि जयकंकन कलित 'केसवदास' सुजान ।
माला साला सुभ सभा सीमा सम सोपान ॥१६॥

(कवित्त)

कोमल कमलमूल नुपुर नवल अलि-
कुलनि की साला किधौ 'केसव' सुभाइ की ।
चरन-सरोवर समीप किधौ बीछिया
कनक कलहंसनि की बैठकें बनाइ की ।
गज हंस सारस की जीती गति मेरी मति
बाँध्यो जयकंकन की सोभा सुखदाइकी ।
अमिल सुमिल सीढ़ी मदन-सदन की कि
जगमगै पग जुग जेहरी जराइ की ॥१७॥

अथ उरु-वर्णन—(दोहा)

उरु करी-कर केरि सम करभ-सोभ सों लीन ।
चक्र पास थल पुलिन सम बरनि नितंबनि पीन ॥१८॥

(कवित्त)

कोमल कमलमुखी तेरे ये जुगल जानु
मेरे बलबीरजू के बलहि हरत हैं ।
सौरभ सुभाय सुभ रंभा कों सदंभ अरु
'केसव' करभ हू की सोभा निदरत हैं ।
कोटि रतिराज ब्रजराज सिरताज की सौं
देखि देखि गजराज लाजनि मरत हैं ।
मोचि मोचि मद रुचि सकुल सकोचि सोचि
सुधि आएँ सुंडनि की कुंडली करत हैं ॥१९॥

अथ नितंब-वर्णन—(कवित्त)

चहूँ वोर चितचोर चाक चक चक्रमन,
सुंदर सुदरसन दरसन हीने हैं ।
दितिसुत-सुखनि घटाइबे कौं सुपरुख,
सुरनि बढ़ाइबे कौं 'केसव' प्रबीने हैं ।
सब ही के मननि मथत हरिहरहू के,
मन मथिबे कौं मनमथ साथ दीने हैं ।

रुचि सुचि सकुच सकेलि कै तरुनि तेरे
काहू नए चतुर नितंब चक्र कीने हैं ॥२०॥

अथ कटि-वर्णन—(दोहा)

कटि अति सूक्ष्म उदर दुति चलदल-दल उनमान ।
रोमलता तम धूम अलि चारु चिटौनि प्रमान ॥२१॥

(कवित्त)

भूत की मिठाई जैसी साँच की झुठाई तैसी,
स्यार की ढिठाई ऐसी छीन छहूँ रितु है ।
धीरा को सो हास, 'केसोदास' दास कैसो
सुख सूर की सी संक अंक रंक को सो बितु है ।
सूम कैसो दानु मतिमूढ़ कैसो जानु,
गोरी गौरा कैसो मानु मेरे जान समुदितु है ।
कौनै है सँवारी वृषभानु की कुमारी यह,
जाकी कटि निपट कपट कैसो हितु है ॥२२॥

अथ रोमराजी-वर्णन—(कवित्त)

किधौँ काम बागवान बई है सिंगार-बेलि
सीचि कै बढाई नाभि कूप मनु मोहियै ।
किधौँ हरिनैन खंजरीटनि के खेलिबे की
भूमि 'केसोदास' नख पंक रेख रोहियै ।
सुंदर उदर सुभ सुंदरी की रोमराजी
किधौँ चित चातुरी की चोटी चारु सोहिये ।
किधौँ चलदल-दल पिय की कपट जुह
टूटिबे कौं मंत्रु लिखि लोचननि पोहियै ॥२३॥

अथ कुच-वर्णन—(दोहा)

चक्रवाक कुच बरनियै 'केसव' कमल प्रमान ।
सिव गिरि घट मठ गुच्छफल सुभ इभ-कुंभ-समान ॥२४॥

(कवित्त)

किधौँ मनोहर मनहार दुति सर खेलै,
जोवन कलभ कुंभ सोभन दरस हैं ।
मोहनी के मठ किधौँ इंदिरा के मंदिर,
कि इंदीबर इंदुमुखी सौरभ सरस हैं ।
आनंद के कंद किधौँ अंग द्वै आनंग ही के,
बाढ़त जु 'केसोदास' बरस बरस हैं ।

एरी वृषभानु की कुमारि तेरे कुच किधौं,
रूप अनुरूप जातरूप के करस हैं ॥२५॥

अथ भुज-वर्णन—(दोहा)

कर कंजनि पल्लवनि भुज बिस बल्लरी सुपास ।
रतन तारका कुसुम सर नखरुचि 'केसवदास' ॥२६॥

(कवित्त)

'केसोदास' गोरे गोरे गोल कामसूल-हर
भामिनी के भुजमूल भाइ से उतारे हैं ।
सोभा सुख बरसत माखन से दरसत
परसत कंचन से कठिन सुधारे हैं ।
बलया बलित बाहु देखि रीझे हरिनाहु
मानौ मन पासिबे के पासियें बिचारे हैं ।
मलिन मृनाल मुख पंक में दुराए दुख
देखौ जाइ छातिनि में छेद कौ कौ डारे हैं ॥२७॥

अथ करभूषण-वर्णन—(कवित्त)

गजरा बिराजें गजमोतिन के अति नीके
जिनकी अजीत जोति 'केसोदास' गाई है ।
बलय बलित कर कंचन कलित मनि
लाल की ललित पौंची पौंचिनि बनाई है ।
सेत पीत हरित झलक झलकति अति
स्यामल सुमिल मेरे स्यामले कौ भाई है ।
मानौ सूर सोम की कला सकेलि आपनीयौ
आपुने सखा कों सुख पाइ पहिराई है ॥२८॥

अथ नखांगुलिमुद्रिका-वर्णन—(कवित्त)

गोरी गोरी अंगुरिनि राते से रुचिर नख
और अति पैने पैने रुचि रुचि कीने हैं ।
रतिजय लेखिबे की लेखनी सुलेख किधौं
मीनरथ सारथी के नोदन नबीने हैं ।
किधौं 'केसोदास' पंचवानजू के पांचौ बान
सकल भुवन जिहि बस करि दीने हैं ।
कंचन कलित मनि मुदरी ललित मानौ
पिय परिजन मन हाथ करि लीने हैं ॥२९॥

[२५] वृषभानु०-मेरे कान्हजू की प्यारी (याज्ञिक०) । [२७] दरसत-परसत (याज्ञिक०) । परसत-दरसत (याज्ञिक०) । पासियें-पासी से (याज्ञिक०) । दुख-मृदु (अन्यत्र) ।

अथ मेहदी-संयुत पाणि-वर्णन—(सवैया)

राधिका रूपनिधान के पानिनि आनि मनौछिति की छबि छाई ।
 दीह अदीहन सूक्ष्म शूल गही दृग गोरी की दौरि गुराई ।
 महुँदीमय बिंदु बने तिनमें मनमोहन के मन मोहनी लाई ।
 इंदुबधू अरबिद के मंदिर इंदिरा कौ मनौ देखन आई ॥३०॥

अथ ग्रीवा-वर्णन—(दोहा)

कंठ सुकंठ कपोत-दुति 'केसवदास' प्रमान ।
 पीठि कनक की पट्टिका बरनत सकल सुजान ॥३१॥

(कवित्त)

सुर नर प्राकृत कवित्त रीति आरभटी
 सातुकी सु भारती की भारतीयौ भोरी की ।
 किधौ 'केसोदास' कलगानता सुजानता
 निसंकता सों बचन-वचित्रता किसोरी की ।
 बीना बेनु पिक सुर सोंभा की त्रिरेख रुचि
 मन-क्रम-बचन कि पिय-चित चोरी की ।
 अंबुसाई की सौं मोहै अंबिकाऊ देखि देखि
 अंबुज नयन कंबु ग्रीवा गोरी गोरी की ॥३२॥

अथ ग्रीवा-भूषण वर्णन—(कवित्त)

लेत मोल लाल को अमोल चितु गोल ग्रीव
 लोल नैन देखि देखि जात गर्ब भागि कै ।
 स्याम सेत पीत लाल कंबु-कंठ कंठमाल
 जाति नाहि नेकहीं रही जु जोति जागि कै ।
 'केसवदास' आसपास बास कै रहे मनौ
 समेत राग रागिनीनि राग रंग रागि कै ।
 सूर के निवास तें प्रकास सोमजू कियौ
 अनेक भाँति की किधौ रही मयूख लागि कै ॥३३॥

अथ पीठि-वर्णन—(कवित्त)

केसव कुँवर देखि राधिका कुँवरि आजु,
 सोवत सुभाइ सेज जननी जनक की ।
 बेनी में बनाइ गुही काहू अली भाँति भली,
 कुंदन की कली तन तनक तनक की ।
 पीठि में तिनकी प्रतिमूरति बिसेखजति,
 पूरति नयन जुग सूरति बनक की ।

हरि-मन मथिबे कौं मानौ मनमथ लिखे,
रूप के रुचिर अंक पट्टिका कनक की ॥३४॥

अथ चिबुक-वर्णन—(दोहा)

कज्जल-मनिरस क्षीर छबि, रदनु राह को आनु ।
फोंक कामसर चिबुक को, स्यामल बिंदु बखानु ॥३५॥

(कवित्त)

सोभन सिंगार रस की सी छींट सोहै, फोंक
कामसर की सी कहौं जुगतिन जोरि जोरि ।
राह कैसो रदनु रह्यो है चुभि चंद माँझ
तमी को सहागु किधौं डारौं तिनु तोरि तोरि ।
चतुर बिहारीजू को चितु सो चिहुँटि रह्यो
'केसोदास' चितएँ तें लेतु चितु चोरि चोरि ।
तनक चिबुक तिल तेरे पर मेरी सखि
डारो वारि तरुनी तिलोतमा सी कोरि कोरि ॥३६॥

अथ अधर-वर्णन—(दोहा)

अधर बिंब पल्लव बरनि प्रगट प्रबाल-प्रमान ।
मुक्ता दाड़िम कुंद मनि हीरा दसन समान ॥३७॥

(कवित्त)

अरुन अधर अति सुबुधि सुधा के धर
कोमल अमल दल दुति छीनि लीनी है ।
'केसव' सुवास मंदहासजुत कौन काम
बिद्रुम कठोर कटु बिंब मति हीनी है ।
सूक्ष्म सुरेखु अति सूधी सूधी सबिसेष
चतुर चतुरमुख रेखा रचि कीनी है ।
मानौ मैं गुह हरिनाह के नयन गनि
गनि गनि लीबे कहूँ बिद्या गनि दीनी है ॥३८॥

अथ दसन-वर्णन—(कवित्त)

सूक्ष्म सुबेष सूधी सुमन बतीसी किधौं
लक्षण बतीस हू की मूरति बिसेखियै ।
राती है रतीक रुचि सेत सब किधौं ससि
मंडल में सुरनि की सभा अवरेखियै ।

[३४] नयन जुग-न क्यौंहू कही (याज्ञिक०) । बिसेखजति-बिलौकियतु (अन्यत्र)

[३५] आनु-जान (सरदार०) । फोंक-कोक (आज्ञिक०) । [३८] छीनि०-छबि
छीनी (याज्ञिक०) । मति-बुधि (याज्ञिक०) । गनि-गन (बाल०) । गनि-गनि-कनि (वही) ।

किधौं पिय-जुगति अखंडता के खंडिबे कौं
 खंडन को 'केसव' तरक-कूल लेखियै ।
 दीनी दूनी कला बिधि तेरे मुखचंद कौं,
 सु न्याइ ही अकासचंदु मंददुति देखियै ॥३६॥

अथ हास-वर्णन—(दोहा)

जोति जुन्हाई दामिनी-दीपति-सुधा-प्रकासु ।
 महिमा मोह मरीचिका रुचि मोहनी सुहासु ॥४०॥

(कवित्त)

किधौं मुखकमल में कमला की जोति, किधौं
 चारु मुखचंद्र चंद्र-चंद्रिका चुराई है ।
 किधौं मृगलोचन मरीचिका-मरीचि किधौं
 रूप की रुचिर रुचि रुचि सों दुराई है ।
 सौरभ की सोभा कि दसन घन-दामिनी कि
 'केसव' चतुर चित ही की चतुराई है ।
 एरी गोरी भोरी तेरी थोरी थोरी हाँसी मेरे
 मोहन की मोहनी कि गिरा की गुराई है ॥४१॥

अथ मुखवास-वर्णन (दोहा)

मदन-जीविका सुख-जननि मनमोहनी-बिलासु ।
 निपट कृपानी कपट की रति-सुषमा मुखबासु ॥४२॥

(कवित्त)

किधौं भयो उदति अनंगजू को अंग उर
 सुरभित अंगरागु दाहै देह दुख को ।
 किधौं चितचातुरी चमेली चारु फूलि रही
 फैल्यो बासु 'केसव' प्रकासकर सुख को ।
 किधौं परिमलु प्रेम पूरनावतंसनि को
 किधौं बरबानी-बनमाल के बपुष को ।
 किधौं पाएँ प्रानपति हृदय-कमलु फूल्यो
 ताको गंधु बंधु कि सुगंधु मुख मुख को ॥४३॥

अथ मुखराग-वर्णन—(दोहा)

अरुनोदय राजीव में अंगराग अनुरागु ।
 रूपभूष रतिराजु सो राजत सुख मुखरागु ॥४४॥

[३६] सुबेष-सुरेख (बाल०, याज्ञिक०) । लक्षण०-लक्ष नव तीस (अन्यत्र) । बिधि-
 बिधु (याज्ञिक०) । [४३] बनमाल-बरमाल (बाल०) । [४४] भूष-रूप (याज्ञिक०) ।

(कवित्त)

केसोदास' राग रागिनीनि को कि अंगराग
 किधौं दुज सेवत हैं संध्या भली भोर की ।
 अरुन रदन बहुरतन की खानि किधौं
 तिनकी झलक झलकति चहूँ ओर की ।
 किधौं भाषा भूषन की मनिनि को चाकचक्य
 चितएँ तें चोरें लेतु तेरे चितचोर की ।
 लागि रह्यो अनुरागु किधौं नाहनैननि को
 किधौं रुचि राची तेरें तरुनि तमोर की ॥४५॥

अथ रसना-वर्णन—(दोहा)

रसना कोमल बरनियै, कोबिद अमल अलोल ।
 'केसव' देवी रसनि की, रसहि खवत मृदु बोल ॥४६॥

(कवित्त)

देखत हीं आधु पलु बाधिजति बाधा सब
 राधाजू की रसना सुरूप की सी रानी है ।
 आछी आछी बातनि की जननी सी जगमगै
 रसनि की देवी किधौं पचि पहिचानी है ।
 'केसोदास' सकल सुबासु कैसी सेज किधौं
 सकल सुजानता की सखी सुखदानी है ।
 किधौं मुखकंज में सकति कौनौ सेवै दुज
 सबिता की छबिता को कबिता निधानी है ॥४७॥

अथ वाणी-वर्णन—(दोहा)

बानी बीना बेनु अलि-सुक-पिक किनर गानु ।
 सोभन सुभ बहु अर्थ मय 'केसवदास' बखानु ॥४८॥

(कवित्त)

काम की दुहाई कि सुहाई सखी माधुरी की ।
 इंदिरा के मंदिर में झाँई उपजति है ।
 सुरनि की सोदरी कि मोद की कृसोदरी कि
 चातुरी की मातु ऐसी बातनि सजति है ।
 राग-रजधानी अनुराग ही की ठकुरानी
 मोहे दधिदानी 'केसो' कोकिला लजति है ।

[४५] अरुन०-अरुन दसन बहु बरन (याज्ञिक०); बदन-हृदन (बाल०) । चितएँ०-चितचालि (सहज०) । [४६] रसहि०-सरस रसिक (अन्यत्र) । [४७] जननी-रानी (याज्ञिक०) । [४८] सुभ बहु-सोभन (याज्ञिक०) ।

एरी मेरी ब्रजरानी तेरी बर बानी किधौं
बानी ही की बीन सुख मुख में बजति है ॥४६॥

अथ कपोल-वर्णन—(दोहा)

मुकुर मधूक कपोल सम 'केसोदास' प्रमान ।
तिल प्रसून तूनीर सम सुक नासिका बखान ॥५०॥

(कवित्त)

किधौ हरि मनोरथ-रथ की सुपथ-भूमि
मीनरथ-मनहू की मति न सकति छबै ।
किधौ रूप-भूपति के आसन रुचिर रुचि
मिली मृगलोचन-मरीचिका-मरीचि हवै ।
किधौ श्रुति-कुंडल-मकर-सर 'केसोदास'
चितएँ तें चित चकचौंधि कै चलतु चवै ।
गोरे गोरे गोल अति अमल अमोल तेरे
ललित कपोल किधौ मैन के मुकुर द्वै ॥५१॥

अथ नासिका-वर्णन—(कवित्त)

'केसव' सुगंध स्वास सिद्धनि की गुहा किधौं
परम प्रसिद्ध सुभ सोभन सुवासिका ।
किधौं मनसिज-मन-मीन की कुबैनी किधौं
कुंदन की सीव लोल लोचन बिलासिका ।
मुकुता लुलित पुरी ललित मुकुंद जू की
किधौं सुर सेइजति कासी की प्रकासिका ।
त्रिभुवन रूप ताकी तुंग तोयनिधि ताके
तोय के तरंग की तरनि तेरी नासिका ॥५२॥

अथ नकमोती-वर्णन—(दोहा)

'केसव' आनँद-कंद-फल सुधाबुंद मकरंदु ।
मन-पतंग कौं दीपु गनि नकमोती जगबंदु ॥५३॥

[४६] उपब्रजति-भलकति (बाल०) । मंदिर में-मंदिर की (याज्ञिक०) । सुरनि०-
सुर की सोदरी कि मोदक की सोदरी (याज्ञिक०); सुरनि की सुरी किधौं मोदक की
सोदरी (हरि०, सरदार०) । राग-राजै (बाल०) । बानी ही की बीन-बीना ही की कनी
(याज्ञिक०) । [५०] मधूक-बंधूक (याज्ञिक०) । बखान-समान (याज्ञिक०) । [५१] मनहू-
रथहू (बाल०) । मति-गति (हरि०, सरदार०) । कै चलतु-ह्वै चलतु (याज्ञिक०) ।
[५२] सुगंध-सुवास (याज्ञिक०) । सुवासिका-सभालिका (बाल०) । बिलासिका-
सुभासिका (अन्यत्र) ।

(कवित्त)

‘केसवदास’ सकल सुवास को निवासु सखि
 किधौ अरबिद-मध्य बिदु मकरंद को ।
 किधौ चंद्रमंडल में सोहत असुरगुरु
 किधौ गोद चंद ही की खेलै सुतु चंद को ।
 बाढ़ै रूप काम गुन दिन दूनो होतु किधौ
 चंद फूल सूँघतु है आनंद के कंद को ।
 नाक-नाइकानि हूँ तें नकमोती नीको नाक
 मानौ मनु उरझि रह्यो है नंदनंद को ॥५४॥

अथ लोचन-वर्णन—(दोहा)

लोचन चारु चकोर सम चातक कुमुद तुरंग ।
 अंजनजुत अलि कामसर खंजन मीन कुरंग ॥५५॥

(कवित्त)

पिय-मन-दूत किधौ प्रेमरथ-सूत किधौ
 भँवर अभूतबपु बासु के सुरंग हैं ।
 चितवत चहूँ ओर चित्तचोर स्याम
 मुखचंद के चकोर किधौ ‘केसव’ कुरंग हैं ।
 बान-मद-भंजन के खेलिबे के खंजन कि
 रंजन कुँवर कामदेव के तुरंग हैं ।
 सोभा-सर-लीन मीन कुवलय-रस-भीन
 नलिन नवीन किधौ नैन बहुरंग हैं ॥५६॥

अथ अंजन-वर्णन—(दोहा)

बिष सिंगाररस-तूल तम पूरे पातक लाज ।
 मनरंजन अंजन सबै बरनत हैं कबिराज ॥५७॥

(कवित्त)

किधौ रसराज-रस-रसित असित किधौ
 ललित बिषिष बिष बलित सभालिके ।
 किधौ जगु जीतबे कौं राजा रतिनाथ-हाथ
 बाहन बनाए ‘केसोदास’ चल चालि के ।
 ब्रतघात पातक कि चित चोरिबे कौं तमु
 देखिबे कौं नंदलालु लालि करै कालि के ।

[५४] सोहित-रजति (याज्ञिक०) । रूप०-रूप गुन काम जिहि दिन दूनो किधौ (याज्ञिक०) । [५५] कामसर-मीनसम (याज्ञिक०) । मीन-कंज (याज्ञिक०) । [५६] बासु के-बासक (याज्ञिक०) । [५७] पूरे०-पूरे पातक लाइ (याज्ञिक०) ।

लागि रही लोकलाज खंजन-नयन किधौं
पिय-मन-रंजन कि अंजन हैं बालि के ॥५८॥

अथ भ्रू-युग-वर्णन—(दोहा)

भुकुटि कुटिल पल्लव धनुष रेखा खड्ग अनूप ।
'केसवदास' सुपास सम बरनि श्रवन करि कूप ॥५९॥

(कवित्त)

किधौं लागी पंकज के अंक पंकलीक किधौं
'केसव' मयंक अंक अंकित सुभाइ को ।
जंत्रु है सुहाग को कि मंत्रु अनुराग को कि
मंत्रनि कौं बीज अध ऊरध अभाइ को ।
आसनु सिंगार को कि काम को सरासनु कि
सासनु लिख्यो है प्रेम पूरन प्रभाइ को
रोष रूष बेष बिष पियूष बिसेष मय,
भामिनी को भौंह किधौं भौनु हाइ भइ को ॥६०॥

अथ कर्ण-वर्णन—(दोहा)

राग-रवन भाजन भवन, सोभत सुखद पवित्र ।
'केसव' लोचन लाज के, मन के मंत्रिय मित्र ॥६१॥

(कवित्त)

रागनि के आकर बिराग के बिभागकर
मंत्र के भँडार गूढ़ रूढ़ के रवन हैं ।
ज्ञान के बिबर किधौं तनक तनक तन
कनक-कचोरा हरि-रसु अँचवन हैं ।
श्रुतिनि के कूप किधौं मन के सुमित्र रूप
किधौं 'केसवदास' रूप-भूप के भवन हैं ।
लाज के नयन किधौं नयन-सचिव किधौं
नयन - कटाक्ष - सर - लक्ष्यक श्रवन हैं ॥६२॥

अथ कर्णफूल-वर्णन—(दोहा)

भनि मनिमय ताटक जुगल, ललित लक्ष्य परिमान ।
तरुन तरिनि चल चक्र से, 'केसव' कुसुम-समान ॥६३॥

(कवित्त)

पहिरें करनफूल देखी है कुँवरि एक
सुनहु कुँवर कान्ह सोभा सुखदानियै ।

[५८] लालि करै-ललचात (याज्ञिक०) । [६०] मंत्रनि-मंत्रिनि (याज्ञिक०) ।
[६१] राग-राधा (बाल०) । [६२] बिराग०-बिरागरि के बिभाकर (याज्ञिक०) । गूढ़ रूढ़-
गूढ़-गूढ़ (याज्ञिक०) । [६३] यह दोहा याज्ञिक० में नहीं है ।

तिनके तन की जोति जीते जोतिवंत अति
 'केसव' अनंत गति कैसें उर आनियै ।
 मानौ बामदेव कामदेवजू के बैर-काम
 साधै सर-साधनानि लक्षि उनमानियै ।
 दुहैं दिसि दूहैं भुज भृकुटी कमान तानि ।
 नयन-कटाक्ष-बान बेधत न जानियै ॥६४॥
 अथ खुटिला-वर्णन—(दोहा)

चलदल-दल सी तीतुरी, जनु पताक मन मीन ।
 सरस करस आकास के दीसत दीप नवीन ॥६५॥
 (कवित्त)

खुटिला खचित-मनि मोहन बनक बने
 कनक-कलस-रुचि रुचिर रवन हैं ।
 तनक तनक तन तीतुरी तरल गति
 मानहुँ पताका पीत पीड़ित-पवन हैं ।
 कार्लिदी के कूल कूल जात जलकेलि कहैं
 कालि ही सराहे मेरे काली के दवन हैं ।
 'केसोदास' सुंदर श्रवन ब्रज सुंदरी के
 मानौ मनभावते के भावते भवन हैं ॥६६॥
 अथ लीलार-वर्णन—(दोहा)

कनक-पट्टिका सम कहौं, 'केसव' ललित लिलार ।
 सोभतु की सभा, अर्ध चंद्रमा चार ॥६७॥
 (कवित्त)

'केसव' असोकु किधौं सुंदर सिंगार-लोकु,
 कनक-केदार किधौं आनंद के कंद को ।
 सोभा को सुभाव किधौं प्रभा को प्रभाव देखि
 मोहै हरिराव सखी नंदनु सु नंद को ।
 चमकत चार रुचि गंगा को पुलिनु किधौं
 चक्रचौधैं चितु मतिमंदह अमंद को ।
 सेज है सुहाग की कि भाग की सभा सुभग
 भामिनी को भालु किधौं भागु चार चंद को ॥६८॥

[६४] देखी है-देखी मैं (याज्ञिक०) । कामदेव०-जू के बैर काम कामदेव (याज्ञिक०) ।
 [६५] चलदल०-चलदल-दल सी चातुरी धुजा किधौं निज मीन (याज्ञिक०) । [६६]
 तीतुरी-तीनु सी (याज्ञिक०) । मनि-मन (अन्यत्र) । कार्लिदी सराहे-अति ही सराहे
 (याज्ञिक०) ।

अथ अलक-वर्णन—(दोहा)

अलक चिलक-सौं बरनियँ स्यामल सुमिल सुपास ।
 अति चंचल अति चारु अति सूक्ष्म 'केसवदास' ॥६६॥
 डारि डोरि डग डीठि गनि तम-त्रिय जमुना जानु ।
 छाया-माया काम की काया कुसल बखानु ॥७०॥

(कवित्त)

'केसव' कसा किधौं अनंग की तुरङ्गमुखी
 लोचन-कुरंगनि की चाल हटकति है ।
 पिय-मन पासिबे कौं पासि सी पसारी किधौं
 उपमा कौं मेरी मति भुव मटकति है ।
 तरनि-तनूजा खेलै तारानाथ-साथ किधौं
 हाथ परी तम की तरुनि मटकति है ।
 सुनि लोललोचनी नवल निधि नेहनि की
 अलका कि अलिक अलक लटकति है ॥७१॥

अथ मुखमंडल वर्णन—(दोहा)

अमल मुकुर सम मानियै, कोमल कमल समान ।
 अकलंकितु मुखु बरनियै, चारु चंद परिमान ॥७२॥

(कवित्त)

ग्रहनि में कीन्यो गेहु सुरनि दै देख्यो देहु
 सिव सौं कियो सनेहु जाग्यो जुग चार्यो है ।
 तपिन में तप्यो तपु जलधि में जप्यो जपु
 'केसोदास' बपु-मास मासप्रति गार्यो है ।
 उडगन-ईसु द्विज-ईसु औषधीसु भयो
 जद्यपि जगत-ईस सुधा सों सुधार्यो है ।
 सुनि नंदनंद-प्यारी तेरे मुखचंद सम
 चंद पै न भयो कोटि छंद करि हार्यो है ॥७३॥

अथ केशपाश-वर्णन—(दोहा)

भौर चौर सैबाल तमु जमुना को जलु मेहु ।
 मोरपक्ष सम बरनियै 'केसव' सहित सनेहु ॥७४॥

[६६] सुमिल०-अमल सुवास (याज्ञिक०) । [७०] गनि०-गन तमरिपु (याज्ञिक०) ।
 [७१] मुखी-लोल (याज्ञिक०); भूमि (रत्ना०) । भुव-भव (रत्ना०) । मटकति-पटकति
 (याज्ञिक०) । निधि नेहनि-नेहनिधि नीकी (याज्ञिक०) । [७२] चारु-चोख (याज्ञिक०) ।
 [७३] सुरनि-देवनि (रत्ना०) । चंद पै-चंदहू (याज्ञिक०) । [७४] सहित-केस (याज्ञिक०) ।

(कवित्त)

कोमल अमल चल चीकने चिलक चार
चितए तँ चितु चक चौधिजत 'केसोदास' ।
सुनहु छबीली राधे छूटँ तँ छुवें छवानि
कारे सटकारे हैं सुभाव ही सदा सुबास ।
सुनि कै प्रकास उपहास निसिबासर कै
कीनो है सुकेसी बसबासु जाइ कै अकास ।
जद्यपि अनेक चंद साथ मोरपक्ष तरु
जीत्यों एक चंदमुख-रुख तेरे केसपास ॥७५॥

अथ शिरशोभा-वर्णन—(कवित्त)

जस-अनुराग-रेख सुंदर सिंगार में कि
सूर सोम करत हैं तेज तम-बल में ।
किधौं गिरा गंगाजू के पूरनि की पूरी जोति
निकसि कै चाहै मिल्यो जमुना के जल में ।
स्यामल सुमिल सुभ पाटिन में चारु माँग
अरुन जलज-सोभ सोभैं पल पल में ।
मनौ 'केसोदास' रूरे रूपे जातरूपहू की
कसी केसोराइ लोक कसौटी अमल में ॥७६॥

अथ बेणी-वर्णन—(दोहा)

ऐसी बेनी बरनियै 'केसोवदास' बनाइ ।
असि निसि जमुनाधार अहि अलि-अवली सुखु पाइ ॥७७॥

(कवित्त)

चंदनु चढ़ाइ चारु कुंकुम लगाइ पीछें
किधौं निसिनाथ निसि नेह सों दुराई है ।
किधौं बंदी बंदन छिरकि क्षीर सापिनि-समीप
सुधानिधि सोधि सुधा-सीध आई है ।
मेलि मालती की माल लाल डोरी गोरी गुही
बेनी पिकबेनी की त्रिबेनी सी बनाई है ।
'केसोदास' हासरस मिलि अनुरागरस
किधौं रसराजरस-धारा धरा धाई है ॥७८॥

अथ बेंदा-वर्णन—(दोहा)

बेंदा बरनत सकल कबि 'केसव' ललित लिलार ।
भाम सुहाग नरेस सम रबि ससि उदित उदार ॥७९॥

[७५] चिकुर-चिलक (याज्ञिक०) । [७७-७८] ये छंद याज्ञिक० में नहीं हैं ।
[७९] बेंदा-बेंदी (याज्ञिक०) । सकल कबि-बुध सबे (याज्ञिक०) ।

मांग-फूल सिर-फूल सुभ बेनी-फूल बनाउ ।
 रूप-भूष जग-जोति जनु पुरन प्रगट प्रभाउ ॥८०॥
 मौतिनि की लरि सीस पर सोभति हैं इहि भाँति ।
 चारु चंद्रिका की चमू घन मराल की पाँति ॥८१॥

अथ शिरोभूषण-वर्णन—(कवित्त)

बेनी पिकबैनी की त्रिबेनी सी बनाइ गुही
 कंचन कुसुम रुचि लोचननि पोहियै ।
 'केसोदास' फौलि रही फूलि सीसफूल-दुति
 फूयो तनु मनु मेरो न्यायै हरि मोहियै ।
 बदा जगमगतु जराय-जन्थो ताकी जोति
 जोत्यो है अजित उपमा न आन टोहियै ।
 मानो इन पाँवडेनि पाइँ धरि आए दोऊ
 सोहत सुहागु सिरभागु भाल सोहियै ॥८२॥

अथ अंगवास-वर्णन—(दोहा)

सहज सुवास सरीर की आकरण-बिधि जानु ।
 अति अदृष्टगति दूतिका इष्टदेवता मानु ॥८३॥

(कवित्त)

कमल बदन कर नयन चरन, कुच
 कपूर कुरंगमद दृगनि बिलासु है ।
 भृकुटी कुटिल कच मेचक सुगंधमय
 कुंद-कलिका से दंत, चंदन सो हासु है ।
 कुंकुम सरीर कुमकुमानि कौं स्वेद-नीर
 अंबर कौं 'केसोदास' अंबर-बिलासु है ।
 मन-करण-बिधि किधौं इष्ट-देवता
 अदृष्टगति दूतिका कि सहज सुवासु है ॥८४॥

अथ वसन-वर्णन—(कवित्त)

किधौं यह 'केसव' सिंगार की है सिद्धि किधौं
 भाग की सहेली कि सुहाग को सहाउ है ।
 जोवन की जाया किधौं माया मनु मोहिबे की
 काया किधौं लाज की कि लाज ही की आउ है ।
 सारी जरकसी जगमगति सरीर किधौं
 भूषण जरावही की जोति को जराउ है ।

[८०] सुख-सम (याज्ञिक०) । पुरन-सूरज (याज्ञिक०) । [८१] यह छंद याज्ञिक में नहीं है । [८२] न्यायै हरि-न्याइ मन (याज्ञिक०) । [८३] इष्टदेवता मानु-इष्टदेवता जानु (बाल०) । [८४] दृगनि-कटाक्ष (अन्यत्र) । चंदन-चंद्रिका (याज्ञिक०) ।

लाख लाख भाँतिनि के प्रीतम के अभिलाष
पहिरे बनाइ किधौँ सोभा को सुभाउ है ॥८५॥

अथ समस्त भूषण-वर्णन--(कवित्त)

बिछिया अनौट बाँकें घूघरी जराइ जरी
जेहरि छबीलौ क्षुद्रघंटिका की जालिका ।
मुंदरी उदार पौँची कंकन बलय नीके चुरी
कंठ कंठमाल हार पहिरे गुपालिका ।
बेनीफूल सीसफूल कर्नफूल माँगफूल
खुटिला तिलक नकमोती बनी बालिका ।
'केसोदास' नीलबास ज्योति जगमगि रही
देहु धरें देखियति मानौ दीपमालिका ॥८६॥

अथ अंगदीप्ति-वर्णन—(दोहा)

कंचन केसर केतकी चपला चंपक चारु ।
कमलकोस गोरोचना त्रिय-तन दुति-अवतार ॥८७॥

(सबैया)

राधा के अंग गुराई-सी और गुराई बिरचि बनावन लीनी ।
कै मनु बुद्धि बिबेक सों एक अनेक बिचारनि मैं दृग दीनी ।
बानिक तो सी बनी न बनाउत 'केसब' कैसे हूँ हवै गई हीनी ।
लै तब केसर केतकी चंपक कुंदन के तन दामिनी कीनी ॥८८॥

अथ गति-वर्णन—(दोहा)

राजहंस कलहंस सम अति गति मंदबिलास ।
महामत्त गजराज सी वरनत 'केसोदास' ॥८९॥

(कवित्त)

किधौँ गजराजनि को राजति है अंकुस सी
चरन-बिलासनि कों आरस सजति है ।
किधौँ राजहंसनि की संकासक 'केसोदास'
किधौँ कलहंसनि की लाज सी लगति है ।
ललित अनंग-तरु-बलित सिंगार-बेलि
फूल फूल हाव-भाव-फलनि फलति है ।
किधौँ नंदलाल लोल लोचन की शृङ्खला कि
तेरी लोललोचनी अलोल अति गति है ॥९०॥

[८५] भाग-संग (रत्ना०) । सहाउ-सुहाउ (वही) । प्रीतम-पिय हिय (याज्ञिक०) ।

[८६] बलय-नवैया (अन्यत्र) । [८७] केसर-केतक (बाल०); कुंदन (अन्यत्र) ।

[८८] गुराई-गुराई देखि (याज्ञिक०) । केसर-केतक (बाल०) । [९०] अंकुस सी-अंकुस सिर (याज्ञिक०) । चरन-बिलासनि कों-किधौँ पद सारस को (याज्ञिक०) ।

अथ संपूर्ण-मूर्ति-वर्णन—(दोहा)

चंद्रकला उडु दामिनी कनक-सलाका देखि ।
दीपसिखा ओषधिलता माला बाला लेखि ॥६१॥

(सबैया)

तारा सी कान्ह तराइन-संग अचंद्रकला निसि चंद्रकला सी ।
दामिनी सी घनस्याम-समीप लसै उर-स्याम तमाल लता सी ।
आधि की ओषधि काहे कौ 'केसव' काम के धाम में दीपसिखा सी ।
सोने की सींक सी दूरि भएँ तँ मिलें उर में उरहार-प्रभा सी ॥६२॥

(छप्पय)

महि मोहन-मोहिनी-रूप महिमा रुचि रूरी ।
मदन-मंत्र की सिद्धि प्रेम की पद्धति पूरी ।
जीवन-मूरि बिचित्र किधौं जग जीव मित्र की ।
किधौं चित्त की बृत्ति मृत्ति अभिलाष-चित्र की ।
कहि 'केसव' परमानंद की आनंद-सक्ति किधौं बरनि ।
आधार-रूप भव धरन कौं राधा ब्रजबाधा हरनि ॥६३॥

(दोहा)

इहि बिधि बरनहु सकल कवि अबिरल छवि अँग अंग ।
कही जथामति जीव जड़ 'केसव' पाइ प्रसंग ॥६४॥
इति नखशिख

अथ यमकालंकार—(दोहा)

अव्ययेत सव्ययेत पुनि, यमक बरनि दुहुँ देत ।
अव्ययेत बिनु अंतरहि, अंतर सो सव्ययेत ॥६५॥

अव्ययेत आबिपत की यमक—(दोहा)

सजनी सज नीरद निरखि हरिख नचत इत मोर ।
पीउ पीउ चातक रटत चितवैं हरि की ओर ॥६६॥

[६२] अचंद्रकला०-यो चंद्रकलानि सी (याज्ञिक०) । उर में०-उतै हार बिहार (याज्ञिक०) । उर स्याम-तन स्याम (याज्ञिक०) । याज्ञिक० में चरणों में १-४-३-२ का क्रम है, अन्यत्र १-२-४-३ भी है ।

[६३] महि०-मोहनि मोहन रूप भूप उपमा रुचि रूरी (याज्ञिक०) । मूरि-मित्र (याज्ञिक०) । इसके अनंतर बाल० में २८ छंदों का 'शिखनख' भी है ।

[६५] बाल० में यह नहीं है । दीन० में ये दो दोहे आदि में और हैं—
पद एकै नाना अरथ जिनमें जेतो बित्तु । तामें ताको काढ़िये यमक माहि दै चित्तु ॥
आदिपदादिक यमक सब लिखे ललित चित लाय । सुनहु सुबुद्धि उदाहरण 'केसव' कहत बनाय ॥
दुहुँ०-दुइ० (दीन०); करि हेत (सहज०) ।

दूसरे चरण की यमक—(दोहा)

मान करत सखि कौन सों, हरि तू हरि तू आहि ।
मान भेद को मूल है, ताहि देखि चित चाहि ॥६७॥

तीसरे चरण की यमक—(दोहा)

सोभति सोभा अंगननि, हींसत ह्य ह्यसार ।
बारन बारन गुंजरत, दीने बिनु संसार ॥६८॥

चौथे चरण की यमक—(दोहा)

राधा 'केसव' कुर्वर की, बाधा हरहु प्रबीन ।
नैक सुनावहु करि कृपा, सोभन बीन प्रबीन ॥६९॥

अथ आदि-अंत यमक—(दोहा)

हरि के हरि के बल मनहि, सुनि वृषभानुकुमार ।
गावहु कोमल गीत दै, सुखकरता करतारि ॥७०॥

अथ त्रिपाद यमक—(दोहा)

सारस सारस नैन सुनि चंद्र चंद्र-मुख देखि ।
सुनि रमनी रमनीय तर तिनत हरिमुख लेखि ॥७१॥

अथ द्विपदादि यमक—(दोहा)

अलिनी अलि नीरज बसैं, प्रति तरुवरनि पतंग ।
त्यौं मनमथ-मन-मथन हरि, बसैं राधिका संग ॥७२॥

अथ पादानुपादादि यमक—(दोहा)

आप मनावत प्रानप्रिय, मानिनि मानि निहार ।
परम सुजान सुजान हरि, अपनैं चित्त बिचार ॥७३॥

द्विपादांत यमक—(दोहा)

जिन हरि सब को मन हर्यो, बाम बाम दृग चाहि ।
मनसा बाचा कर्मना, हरि-बनिता बनि ताहि ॥७४॥

उत्तरार्ध यमक—(दोहा)

आजु छबीली छबि बनी, छोड़ि छलनि के संग ।
मिलौ तरुनि तरु के निकर, 'केसव' के सब अंग ॥७५॥

अथ त्रिपाद यमक—(दोहा)

देखि प्रवाल प्रवाल हरि, मन मनमथ रस भीनी ।
खेलन वह सुंदरि गई, गिरि सुंदरी दरीनि ॥७६॥

[१०२] तरुप्रति-युगल विहंग (दीन०) । [१०४] सब-जग (सरदार०, दीन०) ।

[१०५] मिलौ-तरुनि तरुनि के तर मिलै (वही); मिलौ तरुन तरु करन कर (अन्यत्र) ।

परमानन्द परमानदहि देखत बन-उपकंठ ।
 यह अबला अब लागिहै मन हरि हरि के कंठ ॥१०७॥
 जूझि गयो संग्राम में, सूरज सूरज देखि ।
 दिव रमनी रमनीय तजि, मूरति रति सम लेखि ॥१०८॥

अथ चतुष्पादादि यमक—(दोहा)

नहीं उरबसी उर बसी, मदन मद न बस भक्त ।
 सुर तरवर तरवर तजैं, नंद नंद आसक्त ॥१०९॥

सव्ययेत—(दोहा)

अव्ययेत जमकनि सदा बरनहु इहि बिधि जानि ।
 करौं व्ययेत-बिकल्पना जमकनि की सुखदानि ॥११०॥

अथ द्विपदादि यमक—(दोहा)

माधव तो धव राधिका, पावहु कान्ह कुमार ।
 पूजत माधव नेम सों, गिरिजा को भरतार ॥१११॥

अथ आदि-अंत यमक—(दोहा)

सीय स्वयंबर माँझ जिन जुवतिनि देखे राम ।
 ता दिन तें तिन सब सखिनि, तजे स्वयं बर-धाम ॥११२॥

आद्यंत निरंतर यमक—(दोहा)

पाप नसत यों कहत ही, रामचंद्र अवनीप ।
 नीप प्रफुलित देखि त्यों, बिरही बिरह समीप ॥११३॥

आद्यंत सांतर यमक —(दोहा)

जैसें छुवै न चंद्रमा, कमलाकर सबिलास ।
 तैसें ही सब साधु पर-कमला करनि उदात ॥११४॥
 अंग देस में लक्षियै लक्षी लक्ष सरूप ।
 अंगन में जैसे लसै, अंगनानि के रूप ॥११५॥
 दान देत ज्यों सोभिजै, दानरतन के हाथ ।
 दानसहित ज्यों राजहीं, मत्त गजनि के माथ ॥११६॥
 परम तरुनि यों सोभिजै, परम ईस अरधंग ।
 कल्पलता जैसी लसै, कल्पवृक्ष के संग ॥११७॥

चतुष्पादादि यमक—(दोहा)

नर-लोकहि राखत सदा, नरपति श्री रघुनाथ ।
 नरकनिबारन नाम जग, नर बानर को नाथ ॥११८॥

[१०७] मनु०-मनु मनहरि (याज्ञिक अ०); मनुहरि हरि (दीन०) [१०८] बस-
 हित (बाल०) । [११०] यह दीन० में नहीं है । [११२] जाम-काम (याज्ञिक०) ।
 [११५] लक्षियै-देखिये (टीन०) ।

सुखकर दुखकर भेद द्वै, सुखकर बरने जानि ।
जमक सुनौ कबिराज सब, दुखकर कहौ बखानि ॥११६॥
मान-सरोवर आपने मानस मा नस चाहि ।
मानस-हरि के मीन को मानस बरनहि ताहि ॥१२०॥
बरनी बरनी जाइ क्यों, सुनि घरनी के ईस ।
रामदेव नरदेवमनि, देवदेव जगदीस ॥१२१॥
राजराज जगदीस दुज-राज राज मनमान ।
विष विषधर अरु सुरसहित, विष विषम न उर आन ॥१२२॥
(छंद)

अमान मान नाचहीं । अमाल मान राचहीं ।
समान मान पावहीं । बिमान मान धावहीं ॥१२३॥
(दोहा)
कुमति हारि संहारि हठ, हितहारिनी प्रहारि ।
कहा रिसाति बिहारि बन, हरि मनुहारि निहारि ॥१२४॥

(छंद)
जौ तू सखि न कहूँ कछु चालहि । तौ हौँ कहौँ इक बात रसालहि ।
तो कहूँ देउँ बनी मनिमालहि । मो कहूँ तू मिलवै नँदलालहि ॥१२५॥
जैसेँ रमै जयश्री करवालहि । ज्यों नलिनी जलजात सनालहि ।
ज्यों बरखा हरखै बिनु कालहि । त्यों दृग देख्योई चाहै गुपालहि ॥१२६॥
(सबैया)

स्यंदनु हाँकत होत दुखी दिन दूरि करै सबके दुख-दंदनु ।
छंदनु जानी नहीं जिनकी गति नामु कहावत हैं नँदनंदनु ।
फंदनु पंड के पूतनि कीरति काटि करै महि मोह-निकंदन ।
चंदनु चेरी को अंग चढ़ावत देव अदेव कहें जगबंदनु ॥१२७॥

(चौपही)
सुर तरवर मै रंभा बनी । सुरत रव रमै रंभा बनी ।
सुर-तरंगिनी कर किनरी । सुरत रंगिनीकर किनरी ॥१२८॥

(दोहा)
श्रीकंठ-उर बासुकि लसत, सर्बमंगलामार ।
श्री कंठ उर बासुकि लसत, सर्बमंगला मार ॥१२९॥

(सबैया)
दूषन दूषन के जस भूषन भूषन अंगनि 'केसव' सोहै ।
जान संपूरन पूरन के परिपूरन भावनि पूरन जौहै ।

[११८] बानर-बाहन (अन्यत्र) । नाथ-साथ (दीन०) । [१२१] बरनी-करनी (बाल०) । [१२२] जगदीस-संग ईस (दीन०) । मन०-सनमान (वही) । विषम न-विषधर (बाल०) । [१२३] अमान-प्रमान (दीन०) । [१२६] नलिनी-अलिनी (याज्ञिक०, याज्ञिक अ०) । [१२७] पूतनि-पूरनि (याज्ञिक०) ।

श्री परमानंद की परमा-पर मानंद की परमा कहि को है ।
पातुर सी तुरसी मति को, अवदातुरसी तुरसीपति मोहै ॥१३०॥

(दोहा)

इहि बिधि औरहु जानिजहु, दुखकर जमक अनेक ।
कहिहौं चित्र कबित्त, अब, सुनिजहु सहति बिवेक ॥१३१॥

इति श्रीमद्विधभूषणभूषितायां कविप्रियायां
विशिष्टालंकारवर्णने उपमालंकारवर्णनं
नाम पंचदशः प्रभावः ॥१५॥

१६

अथ चित्र-कबित्त-लक्षण—(दोहा)

‘केसव’ चित्र-समुद्र में बूड़त परम बिचित्र ।
ताके बूंदक के कनै बरनत हौं सुनि मित्र ॥१॥
अध ऊरध बिन बिदजुत, जति रसहीन अपार ।
बधिर अंध गन अगन के गनिजत अगन बिचार ॥२॥
‘केसव’ चित्र-कबित्त में इनके दोष न देखि ।
अक्षर मोटे पातरे ब व, ज य एकै लेखि ॥३॥
अति रति मति गति एक करि बहु बिबेकजुत चित्त ।
ज्यों न होइ क्रमभंग त्यों बरनहु चित्र-कबित्त ॥४॥

अथ निरोष्ठक-लक्षण—(दोहा)

पढ़त न लागैं अधर सों अधर बरन त्यों मंडि ।
बरनहु, एक व बरन जहँ एक प बर्गहि छंडि ॥५॥

(कबित्त)

लोक लीक लीकी, लाज लीलत से नंदलाल,
लोचन ललित लोल लीला के निकेत हैं ।
सौंहनि को सोच न सकोच लोकालोकनि को,
देत सुख सखी, ताकौं दूनो दुख देत हैं ।

[१३०] पातुर०-मातुल सी तुलसीपति कों अवदातुलसी तुलसी० (बाल०) ।

[१] समुद्र-कबित्त (बाल०) । [३] कबित्त-समुद्र (दीन०) । [५] बरनहु०-और
बरण बरणो सबे उ पवर्गहि सब छंडि (दीन०) । व बरन-उ-बरन (अन्यत्र) । जहँ०-और एक
पवर्णहि (याज्ञिक०) ।

‘केसोदास’ कान्हर कनेर ही के कोरक से,
 अंग रंगे राते रंग, अंत अति सेत हैं ।
 देखि देखि हरि की हरनता हरिननैनि,
 देखौ कहा देखत ही हियो हरें लेत हैं ॥६॥

अथ मात्रारहित-लक्षण— (दोहा)

एकै स्वर जहँ बरनियै अदभुत रूप अ बर्न ।
 कहियो मात्रारहित यह मित्र चित्र-आभर्न ॥७॥
 (कवित्त)

जग जगमगत भगत-जन-रस-बस,
 भव-भर-सह कर करत अचल चर ।
 कनक-बसन तन असन अनल-बड़,
 बटदल-बसन सजलथल थल कर ।
 अजर अमर अज बरन चरन थर,
 परम धरम गन बरन सरन-पर ।
 अमल कमल बर बदन सदन जस,
 हरन - मदन - मद मदन-कदन-हर ॥८॥

अथ एकादि शब्द-वर्णन— (दोहा)

एक आदि दै बरन बहु बरनहु सब्द बनाइ ।
 अपने अपने बुद्धिबल समुझि सकल कबिराइ ॥९॥

अथ एकाक्षर शब्द-वर्णन— (दोहा)

गो गो गं गो गी अ आ श्री ध्री ह्री भी भानु ।
 भू बि ख स्व ज्ञा छौ हि नौ ना सं भं मा नु ॥१०॥

अथ द्वि-अक्षर शब्द-वर्णन— (दोहा)

रमा उमा बानी सदा हरि हर बिधि संग बाम ।
 क्षमा दया सीता सती कीनी रामा राम ॥११॥

अथ त्रि-अक्षर शब्द-वर्णन— (दोहा)

श्रीधर भूधर केसिहा, ‘केसव’ जगत प्रमान ।
 माधव राधव कंसहा, पूरन पुरुष पुरान ॥१२॥

अथ चतुरक्षर शब्द-वर्णन— (कवित्त)

सीतानाथ सेतुनाथ सत्यनाथ रघुनाथ,
 जगनाथ ब्रजनाथ दीनानाथ देवगति ।

[६] लोका०-लोकहू को (बाल०); काहू लोकहू को (सहज०) । अंग०-वाह्य
 रंग राते अंग अंतस में (दीन०) । कहा-नहीं (बाल०) । हरें-हरि (दीन०) । [८] भर-
 भय (दीन०), हर (बाल०) । सह-हर (दीन०) । बसन-सनन (बाल०); मयन (अन्यत्र) । बरन-
 चरन (बाल०); रचन (अन्यत्र) । [९] समुझि०-समझैं सब (दीन०) । [१०] ध्री-धी
 (बाल०) । नु-न (दीन०) । बि-मि (अन्यत्र) । स्व-स (बाल०) । [१२] पुरुष-प्रगट (बाल०) ।

देवदेव जक्षदेव बिस्वदेव ब्यासदेव,
 बासुदेव बसुदेव दिव्यदेव दीनरति ।
 रनबीर रघुबीर जदुबीर ब्रजबीर,
 बलबीर बीरबीर रामचंद्र चारुपति ।
 रमापति रामापति रामपति राधापति
 रसपति रसापति रासपति राजपति ॥१३॥
 इत्यादि जानिबो ।

अथ षड्विंशाक्षरादि एकाक्षरांत-वर्णन—(दोहा)
 आखर षंठबिसति सबै भाषा बरनि बनाउ ।
 एक एक घटि एक लागि 'केसवदास' सुनाउ ॥१४॥

अथ षड्विंशाक्षर-वर्णन—(दोहा)
 चोरी माखन दूध घी दूँढत हठि गोपाल ।
 डरौ न जल थल भटकि फिरि झगरत छबि सों लाल ॥१५॥

पंचविंशाक्षर—(दोहा)
 चेटी चंदन हाथ कै रीझि चढ़ायो गात ।
 बिहवल छितिधर डिभ सिमु फूले बपुष न मात ॥१६॥

चतुर्विंशाक्षर—(दोहा)
 अघ बक सकट प्रलंब हति मारयो गज चाणूर ।
 धनुष भंजि दिढ़ दौरि पुनि कंस माथे मदमूर ॥१७॥

त्रयोविंशत्यक्षर—(दोहा)
 सूधी यशुमात नंद फुनि भोरे गोकुलनाथ ।
 माखन-चोरी झूठ हठ पढ़्यौ कवन के साथ ॥१८॥

द्वाविंशत्यक्षर—(दोहा)
 हरि दिढ़बल गोबिंद बिभु मायक सीतानाथ ।
 लोकप बिठ्ठल संखधर गरुडध्वज रघुनाथ ॥१९॥

एकविंशत्यक्षर—(दोहा)
 जैसें तुम सब जग रचे दिये काल के हाथ ।
 तैसें अघ दुख काटि बलि करमफंद डिढ़ नाथ ॥२०॥

विंशत्यक्षर—(दोहा)
 थके जगत समझाइ सब निपट पुरान पुकारि ।
 मेरे चित वे चुभि रहे मधुमद-माखन-हरि ॥२१॥

[१३] जग०-जदुनाथ (बाल०) । जक्ष०-जक्षदेव (दीन०) । राम०-राजपति (दीन०) ।
 राज०-राजपति (वही) । [१५] घी-घ्यौ (बाल०); धिव (अन्यत्र) । डरौ-दुरदु (वही) ।
 [१६] चेटी-चेरी (बाल०) । [१७] मथे-हूते (बाल०) । [२१] मधुमद-मधुमन
 (याज्ञिक अ०), मधुमदमर्दन हारि (याज्ञिक०) ।

एकोनविंशत्यक्षर—(दोहा)

को जानै को कहि गयो राधा सों यह बात ।
करी जु माखन चोरि बलि उठत बड़े परभात ॥२२॥

अष्टादशाक्षर—(दोहा)

जतन जमायो नेह-तरु फूलत नंदकुमार ।
खंडत कसकत जी न अब कपट कठोर कुठार ॥२३॥

सप्तदशाक्षर—(दोहा)

बालापन गोरस हरे बड़े भए जिमि चित्त ।
त्यौं 'केसो' हरि देह हू जौ न मिलौ अब मित्त ॥२४॥

षोडशाक्षर—(दोहा)

तुम घर घर मँडरात अति बलिभुक से नंदलाल ।
जाकी मति तुमहीं लगी कहा करै वह बाल ॥२५॥

पंचदशाक्षर—(दोहा)

जो काहू तें वह सुनै ठूकत डोलत साँझ ।
तौ सिंगरी ब्रज बूढ़िहै बाके आँसुनि माँझ ॥२६॥

चतुर्दशाक्षर—(दोहा)

ढूँका ढाँकी दिन करौ टकाटका अरु रैन ।
यामहि 'केसव' कौन रसु घैरु करै पिकबैन ॥२७॥

त्रयोदशाक्षर—(दोहा)

कह्यो और को मैं सुन्यो मन दीनो हरि हाथ ।
ता दिन तें बन बन फिरै को जानै किहि साथ ॥२८॥

द्वादशाक्षर—(दोहा)

काहू बैरनि कैं कहें जी जुरि गयो सनेहु ।
टोरी तौ टूटै नहीं कहा करौ अब लेहु ॥२९॥

एकादशाक्षर—(दोहा)

वे सब सोहैं काल्हि की बिसरी 'केसव' राज ।
मुख देखौ लै मुकुर कर करी कलेऊ लाज ॥३०॥

[२२] बलि-छल (बाल०) । [२४] अब-तुम (दीन०) [२५] वह-सो (बाल०, दीन०) ।
[२६] तें-पै (बाल०, सरदार०, सहज०) । वह-यह (बाल०) । ठूकत-बूँडत (याज्ञिक०,
दीन०) । सिंगरी-सारो (दीन०) । [२७] रसु-मुख (याज्ञिक०, दीन०, सरदार, सहज०) ।
[२८] और को-परायो (बाल०) । ता-वा (बाल०) । [२९] तौ-हू (दीन०) । [३०]
केसव-गोकुल (बाल, दीन०) ।

दशाक्षर—(दोहा)

ले बाके मन-मानि कहि कत काहु के जात ।
जब कोऊ जिय जानिह सब कहिहै को बात ॥३१॥

नवाक्षर—(दोहा)

चिंचुनि चुनै अँगार-गन जाको करि जिय जोर ।
सोही जो जारै जियैं कैसें जियैं चकोर ॥३२॥

अष्टाक्षर—(दोहा)

नैन न नेहु नेकहु कमलनैन नउ नाथ ।
मन बालनि के मोहि लै बेचे मनमथ-हाथ ॥३३॥

सप्ताक्षर—(दोहा)

राम काम सिव बस करे बिबुध काम सब साधि ।
काम राम बर बस करे 'केसव' सों आराधि ॥३४॥

षडक्षर—(दोहा)

काम नाहिने काम के सब मोहन के काम ।
बस कीनो मन सबनि को का बामा का वाम ॥३५॥

पंचाक्षर—(दोहा)

कमलनैन के नैन से नैन न कौनो काम ।
कौन कौन सों नेम कै मिले न साम सकाम ॥३६॥

चतुरक्षर—(दोहा)

बनमालीं बन में मिलै बनी नलिन-बनमाल ।
नैन मिली मन मन मिली बैननि मिली न बाल ॥३७॥

त्र्यक्षर—(दोहा)

लगालगी लोपौं गली, लगे लागु लै लाल ।
गैल गोप गोपी लगे, पा लागौं गोपाल ॥३८॥

द्व्यक्षर—(दोहा)

हरि हीरा राही हरे हेरि रही ही हारि ।
हर हर हौं हाहा ररौं हरे हरे हरि रारि ॥३९॥

प्रतिपदैकाक्षर—(दोहा)

गो गो गो गो गंग गज जीजै जीजी जोजि ।
रुरे रुरे रेरु ररि हाहा हुहू होहि ॥४०॥

[३३] न०-नवाबहु (दीन०); नि नेबहु (सरदार०) । मोहि-हाथ (याज्ञिक अ०), चोरि (बाल०) । [३४] सों-श्री (बाल०); सी (दीन०) । [३६] मिले-मिलन (बाल०) । साम-कान्ह (बाल०); स्याम (अन्यत्र) । [३९] हर०-रहि-रहि (दीन०) । [४०] गो गो-गो (दीन०) । गंग-गोग (वही) । जीजै-जीहि (वही) ।

अधैकाक्षर—(दोहा)

केकी केका कीक का कोकू काको कोक ।
लोलि लालि लोलै लली लाला लीला लोल ॥४१॥

एकाक्षर—(दोहा)

नोनी नोनी नौनि नै नोने नोने नैन ।
नाना नन नं नाननै नन नूनं नूनै न ॥४२॥

अथ बहिर्लापिका-अंतर्लापिका-वर्णन—(दोहा)

उत्तर बरन न बाहिरै बहिर्लापिका होइ ।
अंतह अंतरलापिका यह जानै सब कोइ ॥४३॥

अथ बहिर्लापिका—(दोहा)

अक्षर कौन बिकल्प को, जुवति बसति किहि अंग ।
बलि राजा कौने छल्यो सुरपति के परसंग ॥४४॥
वामनु जानिबो ।

अथ अंतर्लापिका—(दोहा)

कौन जाति सीता सती, दइ कौन कह तात ।
कौन ग्रंथ बरनी हरी, रामायन अवदात ॥४५॥

अथ गुप्तोत्तर-वर्णन—(दोहा)

उत्तर जाको अति दुख्यो दीजै 'केसवदास' ।
तासों गुप्तोत्तर सब बरनत बुद्धि बिलास ॥४६॥

(सबैया)

नख तें सिख लौं सुख दै कौ सिंगारि सिंगार न 'केसव' एक बच्यो ।
पहिराए मनोहर हार हियें सब गात सुगंध-समूह सच्यो ।
दरसाईं सिरी कर दर्पन लै कपि कुंजर ज्यों बहु नाच नच्यो ।
सखि पान खवावत ही किहि कारन कोप पिया पर नारि रच्यो ॥४७॥
हास-बिलास-निवास सो 'केसव' केलि-बिधान-निधान दुनी मैं ।
देवर जेठ पिता सुत सोदर है सुख ही महि बात सुनी मैं ।
भाजन भोजन भूषन भौन भरे जस पावन देवधुनी मैं ।
क्यों सब जामिनि रोवति कामिनि कंत करै सुभ गान गुनी मैं ॥४८॥
नाह नयो नित नेह नयो पर नारि तो 'केसव' क्यों हूँ न जोवै ।
रूप अनूपम भू पर भूप सु आनंद रूप नहीं गुन गोवै ।
भौन भरी सब संपति दंपति श्रीपति ज्यों सुखसिंधु में सोवै ।
देव सो देवर प्रान सो पूत सु कौन दसा सुदती जेहि रोवै ॥४९॥

[४१] केका-कोका (बाल०) । कोकू-कोकु कीक का (दीन०) । [४२] नूनं-नूनै (दीन०) [४३] बरन न-बरन जु (दीन०) । [४४] बसति-बरति (बाल०) । [४६] गुप्तोत्तर-गुप्तोत्तर (दीन०) । सबै-कहत (दीन०) । [४६] नयो-नवो (बाल०) । तो-त्यों (दीन०) ।

अथ एकानेकोत्तर-वर्णन—(दोहा)

एकहि उत्तर में जहाँ उत्तर गूढ़ अनेक ।
 उत्तर एकानेक यह बरनत सहित बिबेक ॥५०॥
 उत्तर एकु समस्त में व्यस्त अनेकनि मानि ।
 जोरि अंत के बन सों क्रम हीं बरन बखानि ॥५१॥

(छप्पय)

कहा न सज्जन बवत कहा सुनि गोपी मोहित ।
 कहा दास को नाम, कबित में कहियत को हित ।
 को प्यारो जग माँझ, कहा छत लागे वत ।
 को बासर कों करत, कहा संसारहि भावत ।
 कहि कहा देखि कायर कँपत आवि अंत है को सरन ।
 यह उत्तर 'केसवदास' दिय, 'सबै जगत सोभा धरन' ॥५२॥

अथ व्यस्त-समस्तोत्तर-वर्णन (दोहा)

मिलै आदि के बरन सों 'केसव' करि उच्चार ।
 उत्तर व्यस्त समस्त सो साँकर के अनुहार ॥५३॥

(छप्पय)

को सुभ अक्षर, कौन जुवति जोधन बस कीनी ।
 बिजय सिद्धि संग्राम राम कहँ कौनै दीनी ।
 कंसराज जदुबंस बसत कैसे 'केसव' पुर ।
 बट सों कहिजै कहा नाम जानहु अपने उर ।
 कहि कौन जननि सब जगत की कमल नयनि सूछम बरनि ।
 सुनि बेद पुरानन म कही सनकादिक 'संकरतहनि' ॥५४॥

(कबित)

कोल को है धरी धरा धीरज धरम हित,
 मारे किहि सूतु बलदेव जोर जब सों ।
 जाँचै कहा जग जगदीस पर 'केसोदास',
 कौन गायो रामायन गीत सुभ रव सों ।
 जस अंग अवदात जात बन तातनि सों,
 कही कौन कुंती मात बात नेह नव सों ।
 बाम ग्राम दूरि करि देवकाम पूरि करि,
 मोहे राम कौन सों संग्राम 'कुस लव सों' ॥५५॥

[५०] यह-तेहि (दीन०) । [५२] यह-तहँ (सरदार०); यक (दीन०) ।
 [५४] सूछम०-कंचन बरनि (दीन०) ।

अथ व्यस्त गतागत उत्तर-वर्णन —(दोह)

एक एक तजि बरन कों जुग जुग बरन बखानि ।
उत्तर व्यस्त गतागतनि एक समस्तनि आनि ॥५६॥

(कबित्त)

कै हैं रस कैसें लई लंक, काहे पीत पट
होत, 'केसोदास' कौन सोभिजै सभा में जन ।
भोगनि को भोगावत, कौनें गनें भागवत,
जीत्यो को जतीन, कौन हैं प्रनाम के बरन ।
कौन करी सभा, कौन जुवती अजीत जग,
गावैं कहा गुनी, कहा भरे हैं भुजंगन ।
काहे मोहे पसु, कहाँ करें तपी तप, इंद्र-
जीतजू बसत कहाँ, 'नवरंगराय मन' ॥५७॥

(दोहा)

'केसवदास' बिचारि कै भिन्न पदारथ आनि ।
उत्तर व्यस्त समस्त ते दुऔ गतागत जानि ॥५८॥

(सबैया)

दासनि सों, पर सों, परमान की बात सों, बात कहा कहिजै नय ।
भूपनि कौ उपदेस कहा किहि नेम बसै किहि जीति तजै भय ।
आपु बिषैनि सों क्यों कहिजै, बिनु काह भए छितिपालन की छय ।
न्याउ कै बोल्यो कहा जम 'केसव' कै अहिमेघ कर्यो 'जनमेजय' ॥५९॥

(रोला)

कै ग्रह, क्यों मधु हत्यो, प्रेम किहि पलुहत प्रभु-मन ।
कह कमला को गेह, सुनत मोहत कह मृगगन ।
कहाँ बसत मुख-सिद्धि, कबिन कौतुक किहि बरनन ।
केहि सेए पितु मातु, कह्यो कबि 'केसव' 'सरवन' ॥६०॥

(दोहा)

उत्तर व्यस्त समस्त सों दुऔ गतागत आनि ।
एकहि अर्थ समर्थ मति 'केसवदास' बखानि ॥६१॥

(सोरठा)

कंठ बसत को सात, कोक कहा बहु बिधि कहै ।
को कहिजै सुर-तात, को कामी-हित 'सुरतरसु' ॥६२॥

[५६] बखानि-बिचारि (दीन०) । आनि-निहारि (वही) । [५७] अजीत० —
अतीव कौन (बाल०) । पसु-मृग (याज्ञिक०) । तप-तप्त (बाल०) । [५८] समस्त० —
गतागतनि कछु समस्त के (दीन०) । [५९] नेम०-रूप भले (दीन०) । [६०] कह०-कहा
कमल (याज्ञिक०, दीन०) ।

अथ शासनोत्तर—(दोहा)

तीनि तीनि सासननि को इक इक उत्तर जानि ।
सासन-उत्तर कहत सब बुधजन ताहि बखानि ॥६३॥

(छप्पय)

चौक चारु कर, कूप ढारु, घरियार बाँधु घर ।
मुक्त-मोल कर, खग खोलु, सिचहि निचोल बर ।
हय कुदाउ, दै सुरकुदाउ, गुन गाउ रंक को ।
जानु भाउ, सब धाम धाउ धन ल्याउ लंक को ।
यह कहत मधूकर साहि कहँ रह्यो सकल दीवान दबि ।
तब उत्तर 'केसवदास' दिय 'घरी न, पान्यौ, जानु, कबि' ॥६४॥

अथ प्रश्नोत्तर—(दोहा)

जेई आखर प्रस्न के तेई उत्तर जानु ।
इहि बिधि प्रस्नोत्तर सदा कहँ सुबुद्धि-निधानु ॥६५॥

(दोहा)

को दंडग्राही सुभट, को कुमार रतिबंत ।
को कहिये ससि तें दुखी, कोमल मन को संत ॥६६॥

(दोहा)

कालि काहि पूजै अली, को किल कंठहि नीक ।
को कहिये कामी सदा, काली को है लीक ॥६७॥

अथ गतागत-वर्णन—(दोहा)

सूधो उलटो बाँचियै एकहि अर्थ प्रमान ।
कहत गतागत ताहि कबि 'केसवदास' सुजान ॥६८॥

अथ गतागत-वर्णन—(सबैया)

मासम सोह सजै बन बीन नबीन बजै सहसोम समा ।
मानव हीरहि मोरद मोद दमोदर मोहि रही बन मा ।
मारलतानि बनावति सारि रिसाति बनावनि ताल रमा ।
मालबनी बलि 'केसवदास' सदा बस केलि बनी बलमा ॥६९॥

अथ गतागत भिन्नार्थ-वर्णन—(दोहा)

सूधो उलटो बाँचियै औरहि औरहि अर्थ ।
एक सबैया मैं सुकबि प्रणटित होय समर्थ ॥७०॥

अनुलोम—(सबैया)

सैन न माधव, ज्यो सर 'केसव' रेख सुदेस सुबेस सबै ।
नैनव की तचि जी तरुनी रुचि चीर सबै निमि काल फलै ।

[६३] तीनि-दोय (दीन०) । सब-जिह (याज्ञिक०); है (दीन०) । [६४] हय-
यहु (याज्ञिक०) । पान्यौ-जारी (अन्यत्र) ।

तैन सुनी जस भीर भरी, धर धीर ब रीति सु कौन बहै ।
मैन मनी गुरु चाल चलै सुभ, सो बन में सर सीव लसै ॥७१॥
सैल बसी रस में नव सोभ सु लै चल चारु गुनी मन मै ।
है बन कोसु ति री बर धीर धरी भर भी सजनी सुन तै ।
लै फल कामिनि बैस रची चिर नीरुत जी चित्त की बननै ।
बैस सबेसु सदेसु खरे बस कै रस ज्यो बध मान नसै ॥७१॥

अथ चित्र-लक्षण—(दोहा)

इंद्रजीत संगीत लै किये रामरस लीन ।
छुद्रगीत संगीत लै भये कामबस दीन ॥७२॥

अथ गतागत चतुर्पदी

राकाराज जराकारा, मास मास समा समा ।
राधा मीत तमी धारा, साल सीसु सुसील सा ॥७३॥

अथ त्रिपदी—(दोहा)

रामदेव नरदेव गति परसुधरन मद धारि ।
बामदेव गुरदेव गति पर कुधरन हृद धारि ॥७४॥

अथ चरणगुप्त—(दोहा)

राजत अंग रस बिरस अति सरस सरस रस भेव ।
पग पग प्रति दुति बढ़ति अति बय नव मन मति देव ॥७५॥
सुबरन बरन सु सुबरननि रचित रुचिर रुचि लीन ।
तन मन प्रगट प्रबीन मति, नवरंगराय प्रबीन ॥७६॥

अथ सर्वतोभद्र

सीता सीन नसी तासी, तार मार रमा रता ।
सीमा कली लीक मासी, नर लीन नली रन ॥७७॥
कामदेव चित्त दाहि, बाम देव मित्त दाहि ।
रामदेव चित्त चाहि, धाम देव नित्त माहि ॥७८॥

अथ चक्रबंध—(दोहा)

मुरलीधर मुख दरसि मुख संमुख मुख श्रीधाम ।
सुनि सारसनेनी सिखै जी मुख पूजै काम ॥७९॥

अथ कमलबंध—(दोहा)

राम राम रम छेम छम सम दम जम श्रम धाम ।
दाम काम क्रम प्रेम बम जम जम दम भ्रम बाम ॥८०॥

अथ धनुषबंध—(दोहा)

परम धरम हरि हेरहीं 'कैसव' सुनै पुरान ।
मन मन जानै नार द्वै जिय जस सुनत न आन ॥८१॥

[७२] इसके पहले कहीं-कहीं यह दोहा भी है—जैसो सूघो पाठ त्यों मंत्रि अस्वगति भान । तासों कहियतु मंत्रिगति गोमूत्रिका सुजान ॥

अथ पर्वतबंध—(सबैया)

या मय रागे सुतौ हित चोरटी काम मनोहर है अभया ।
मीत अमीतनि कों दुख देत दयाल कहावत हीन दया ।
सत्य कहौ कहा झूठ म पावत देखौ वेई जिन रेखी कया ।
या मय जे तुम मीत सबै स सबै सत भी मत गेय मया ॥८२॥

अथ सर्वतोमुख—(सबैया)

काम अरै तन लाज मरै कब मानि लिये रति गान गहै रुख ।
बाम बरै गन साज करै अब कानि किये पल प्रान दहै दुख ।
धाम धरै धन राज हरै तब बानि बिये मति हानि लहै सुख ।
राम ररै मन काज सरै सब हानि हिये अति आन कहै मुख ॥८३॥

अथ हारबंध --(दोहा)

हरि हरि हरि ररि दौरि दुरि फिरि फिरि करि करि आरि ।
मरि मरि जरि जरि हारि परि परिहरि अरि तरि तारि ॥८४॥

डमरूबंध

नर सरब श्री सदा तन मन सरस सुर बसि करन ।
नर कसि बर सु सकल सुख दुख हीनव जनि मरन ॥
नर मन जीवन हीन रदय सदय मति मत हरन ।
नर हत मनि मय जगत 'केसवदास' श्रीवर सरन ॥८५॥

अथ मंत्रीगतिबंध—(सबैया)

राम कहौ नर जानि हिये मृत लाज सबै धरि मौन जनावत ।
नाम गहौ उर मानि किये कृत काज तबै करि तौन बतावत ।
काम दहौ हर आनि हिये वृत राज जबै भरि भौन अनावत ।
याम बहौ बर पानि पिये घृत आज अबै हरि क्यों न मनावत ॥८६॥

(दोहा)


कामधेनु दै आदि सब कल्पवृक्ष-परजंत ।
बरनत 'केसव' सकल कबि चित्र-कबित्त अनंत ॥८७॥
यहि बिधि 'केसव' जानिये चित्र-कबित्त अपार ।
बरनत पंथ बताय मै दीनो बुद्धि-अनुसार ॥८८॥
सुबरन जटित-पदारथनि भूषन-भूषित मान ।
कविप्रिया है कबि-प्रिया कबि की जीवन-प्रान ॥८९॥
पल पल प्रति अवलौकिबो पढ़िबो गुनिबो चित्त ।
कविप्रिया कों रक्षियो कविप्रिया ज्यों मित्त ॥९०॥
अनल अनिल जल मलिन तें बिकट खलन तें नित्त ।
कविप्रिया को रक्षियो कविप्रिया ज्यों मित्त ॥९१॥
'केसव' सोरह भाव सुभ सुबरन मय सुकुमार ।
कविप्रिया के जानियै ये सोरह सिंगार ॥९२॥

त्रिगतिबंध—

इ	द्र	जी	त	सं	गी	त	लै	कि	ये	रा	म	र	स	ली	न
हु	द्र	गी	त	सं	गी	त	लै	भ	ये	का	म	ब	स	दी	न

[कविप्रिया, २२७-७२]

कषाटबंध—



[कविप्रिया, २२७-७२]

अश्वगतिबंध—

इं ^१	द्र ^२	जी ^३	त ^४	सं ^५	गी ^६	त ^७	लै ^८
कि ^९	ये ^{१०}	रा ^{११}	म ^{१२}	र ^{१३}	स ^{१४}	ली ^{१५}	न ^{१६}
यु ^{१७}	द्र ^{१८}	गी ^{१९}	त ^{२०}	सं ^{२१}	गी ^{२२}	त ^{२३}	लै ^{२४}
भ ^{२५}	ये ^{२६}	का ^{२७}	म ^{२८}	ब ^{२९}	स ^{३०}	दी ^{३१}	न ^{३२}

[कविप्रिया, २२७-७२]

शोभूत्रिकाबंध—

इं	जी	सं	त	कि	रा	र	ली
द्र	त	गी	लै	ये	म	स	न
हु	गी	सं	त	भ	का	ब	दी

[कविप्रिया, २२७-७२]

रा	का	रा	ज
मा	स	मा	स
रा	धा	मी	त
सा	ल	सी	सु

[कविप्रिया, पृष्ठ २२७-छंद ७३]

गतागत चतुष्पदी—२

राका	राज	जरा	कारा
मास	मास	समा	समा
राधा	मीत	तमी	धारा
साल	सीसु	सुसी	लसा

[कविप्रिया, २२७-७३]

त्रिपदी—१

रा	दे	न	वे	ग	प	सु	र	म	धा
म	व	र	व	ति	र	ध	न	द	रि
बा	दे	गु	दे	ग	प	कु	र	ह	धा

[कविप्रिया, २२७-७४]

त्रिपदी—२

राम	वन	देव	तिप	सुध	नम	धा
दे	र	ग	र	र	द	रि
बाम	वगु	देव	तिप	कुध	नह	धा

[कविप्रिया, २२७-७४]

त्रिपदी—३

रा म	न र	गति	सुध	मद
देव	देव	पर	रन	धारि
बाम	गुर	गति	कुध	हद

[कविप्रिया, २२७-७४]

चरणगुप्त—

	५		४		३
	रा →	जतञ्च	ग	रसबि	र
	स र ति	अतिस सभेव दुतिब	र प द	ससर गपग तिअति	स प्र ब
६	य	नवम	न ट	मतिदे	व
	सु ब र	बरन रननि रुचिली	ब र न	रनसु चितरु सनम	सु चि न
७	प्र	गटप्र	बी	नमति	न
			८		

[कविप्रिया, २२७-७५, ७६]

सर्वतोभद्र—१

सी	ता	सी	न	न	सी	ता	सी
ता	र	मा	र	र	मा	र	ता
सी	मा	क	ली	ली	क	मा	सी
न	र	ली	न	न	ली	र	न
न	र	ली	न	न	ली	र	न
सी	मा	क	ली	ली	क	मा	सी
ता	र	मा	र	र	मा	र	ता
सी	ता	सी	न	न	सी	ता	सी


[कविप्रिया, २२७-७७]

सर्वतोभद्र—२


काम	देव	चित्त	दाहि
बाम	देव	मित्त	ताहि
राम	देव	चित्त	चाहि
धाम	देव	नित्त	नाहि

[कविप्रिया, २२७-७८]


सर्वतोमुख—१



[कविप्रिया, २२७-७८]




[कविप्रिया, ३२७-८०]



[कविप्रिया, २२७-८१]



पर्वतबंध—



[कविप्रिया, २२८-८२]

हारबंध—

सर्वतोमुख—



चौकीबंध—

य	ज	ग	त	के	स	व	दा
द							त
स							न
य							म
द							न
र							स
न							र
ही	ख	हु	ख	सु	ल	क	स

[कविप्रिया, २२८-८५]

डमरुबंध—

य	ज	ग	त	के	स	व	दा
द							त
स							न
य							म
द							न
र							स
न							र
ही	ख	हु	ख	सु	ल	क	स

[कविप्रिया, २२८-८५]